

# **Southeast Ambrym Bible**

**Portions of the Holy Bible  
in the Southeast Ambrym  
Language of Vanuatu**

**Certaines parties de la  
Bible dans la langue  
Ambrym Sud de Vanuatu**



## Southeast Ambrym Bible

Portions of the Holy Bible in the Southeast Ambrym Language of Vanuatu

Translation by Wycliffe Bible Translators

© 2011, Wycliffe Bible Translators, Inc.

Print publication, 2011 by Wycliffe Bible Translators, Inc.

Web version

© 2015, Wycliffe Bible Translators, Inc.

<http://www.Wycliffe.org>

[www.ScriptureEarth.org](http://www.ScriptureEarth.org)

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/4.0>

**Your are free to share** — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** — For any reuse or distribution, you must make clear to others the license terms of this work.

# Table of Contents

Rut. . . . .	Rut. . . . .	5
Siona. . . . .	Siona. . . . .	12
Matiu. . . . .	Mat . . . . .	16
Luk. . . . .	Luk. . . . .	100
Polien . . . . .	Pol . . . . .	178
1 Timoti . . . . .	1Ti . . . . .	247
2 Timoti . . . . .	2Ti . . . . .	258
Taetas . . . . .	Taet . . . . .	265
Filimon. . . . .	Fil . . . . .	271



# Rut

---

## Sakpisien Xil xa Nggeih Bemei e Meulien na Ate-Isrel Tei

*Rut 1:1-5*

**1** <sup>1-2</sup>Tetiamu, e melengien xil xa Iahova tesa eilep xil mei latetutou ni mol-Isrel xil e latelepis rin nae xil vengan xa suv toto nae tehe tovuol tamu, mae kekaten tei xa eilep tekapis e tan tahal Isrel. Ma moletin tei tahal Betlehem e tan na mol-Sudah xil, xi tehe kantri tahal Moab, hisen Elimelek. Xi texo vatimol xa mahulong na Efrat. Xi teha tetel atou nan, xa hisen Noume, e tetel horamue lu nalu, xa hisealu Malon e Kilion. Xil ba lateti hura mahis e rute ak. <sup>3</sup>E melele xa lateti rute ak, Elimelek temat, ma Noume teta tasen tang tetel horamue nan xalu. <sup>4</sup>Di, horamue xalu ak luteteli mi atou lu tahal Moab, hisealu Oripa e Rut. Melele xa hura mahis hexalu (10) mei tetavi, <sup>5</sup>Malon xal Kilion mun lutelel. Ma, Noume tetat temak tang, tiramue nan e horamue nan xalu mun latehe tovuol.

### **Noume Xal Havnahin Rut Ludilomun Lube Metimal Tahal Betlehem**

<sup>6</sup>Aveti mahis mei mitavi, e Noume milongeong ni xa Hi di duxol xat moletin nan xil nggo rin xa di misak ni anien sae xil di meul bos rilomun. Misak ni, Noume bue xat xi tangan ihe reling kantri tahal Moab itel havnahin xalu. <sup>7</sup>Xatel vus latobituei latoba tangan latotilomun latohe tan na mol-Sudah xil. E melele xa di latoba, <sup>8</sup>Noume biteni mi xalu bitene, “Multilomun mun tang mulihe visal ninemil xati xalu. Inou nasis tangan Hi ipisen hosien mi xamil ixoni ngan taxa mutepisen ni minou tetel horamue navan xalu xa lulel tuei. <sup>9</sup>Nasisi mun xa Hi ipol ni xamil mikila muliteli rilomun e mulikamet hosien itel tiramue hu tova.”

Di, Noume maheah xat xalu tangan vastovokein xalu e vaha. E xalu di lumuis <sup>10</sup>e lubiteni mini lubitene, “!Misakras li malherelinguk! Xamel malhusiluk, ratiha ratiti vituei itel moletin nam xil.”

<sup>11</sup>E Noume bit rilomun ni mi xalu bitene, “Havuxahin xalu, bos mak mu xa mutitlomun muliha. ?Veneh ma mubit mulhusil nou? ?Munemi mubit inou nikila nipes horamue lu mun tangan muliteli mun itel xalu? <sup>12</sup>!E-e! !Muliha! Inou nabe tovolih pupu tangan nateli rilomun. ?Tave

ti neta xosxa inou nanemi namit nikila niteli mun xosalitang, e nipes horamue lu mun, <sup>13</sup>xamil mulkila multatil xalu ha vuma ... lalomatulalopin ni tetelien? E-e, ngan ak misakras vastal vamak. Havuxahin xalu, xos mulkila mulikamet hosien mu e meulien namil, e inou nasakras. Mulnahusil nou ti! E meulien navan, napus pangasien holu vengana xa he Iahova di nggeih da xat nou.”

<sup>14</sup>Xalu lumuis vatei mun. Di, Oripa maheah xat avu sasa nan, miseplingi, e ba tengana vatilomun vahe visal vatimol nan xil. E Rut, xi miteli en nggeih, en titavei vahe relingi. <sup>15</sup>Ma Noume biteni mini bitene, “?Rut, pus ti? Tumahin di dilomun tengana vahe visal moletin nan xil e hi nan xil. Xouk mun uhusili muliha ha upus vatimol nam xil.

<sup>16</sup>E Rut bit rilomun ni mini bitene, “!Onasil nou ti tengana name relinguk! Umaen ni nou li nihusiluk. !Rute xave xa uha en, inou mun niha en! Rute xave xa uta en, inou mun nita en. Moletin nam xil, lihe moletin navan xil mun. E Hi nam, ihe Hi navan mun. <sup>17</sup>Rute xave xa umat en, inou mun nimat en, e litihin nou e rute ak. Nasakras namaen neta tova vahur rat nou ra xouk ha vuma ... tei ralu imat. !Ngan ak be hitxatien navan e Iahova isa longpangasien te xeih mei iti xat nou xosxa nihur xotehi!”

<sup>18</sup>Melele xa Noume pus kila xa Rut, nenemien nan nggeih tengana ihusili, xi tasak ti mun tengana vasila vahe relingi.

<sup>19</sup>Ma xalu lukakao vuma ... ba luduxoh metimal tahal Betlehem. E melele xa be lustal, moletin xil vus te rute ak latemanin ni xalu. E atou xil lamesep pupu e labitene, “?Noume mak xiak?”

<sup>20</sup>E Noume bit rilomun ni mi xil bitene, “Munakes nou ni ‘Noume’ ti li mun. Mukes nou ni ‘Mara’ vengana xa Iahova pol ni meulien navan polu ni pangasien.” <sup>21</sup>Melele xa natehe reling rute ak, heok xalu tepolu ni hosien, e taxeak, Hi nggur rilomun ni nou namei del heok hon tang. ?Veneh ma mukes nou ni Noume vengana xa Hi te Xeihen di pol ni nggeih pupu minou e misa pangasien minou?”

<sup>22</sup>Nggo sexien ak, Noume nggo kantri tahal Moab e dilomun bemei Isrel del havnahin Rut, xa be ate-Moab. E melele xa mei lustal e metimal tahal Betlehem, bale<sup>b</sup> mun be tematu e naho sa moletin xil.

### Rut Ba Pol e Naho sa Boas

**2** <sup>1</sup>E Betlehem, eilep tei da en xa holesok nan holu, hisen Boas. Xi nggo vatimol xati na Elimelek, tiramue na Noume. <sup>2</sup>Vatei, Rut misis Noume bit, “Umaen nou nihe naho tova tengana nileh viton bale xil

<sup>a</sup> 1:20 ‘Noume’, koute teni be ‘hosien’, e Mara, koute teni be ‘pangasien’ <sup>b</sup> 1:22 Bale be anien tei xa meul nggoni utual, e anien nen be vanute e langga ni nggoni raes.

xa moletin te polien xil laki rasi di nga tangan mei ihe anien aralu. Kos nikila nikamet moletin tova xa imaen nou nipol ni e naho san.”<sup>c</sup>

Ma Noume maen ni bit, “Havuxahin, bos tang, ha upol ni.”

<sup>3</sup>Ma Rut ba be naho tei e di pol dutou ni moletin te polien xil e di mileh viton bale xil xa xil laki rasi di nga. E Rut, xi takil ti xa naho xa di pol en sa Boas xa nggo vatimol xati na Elimelek, tiramue na Noume.

<sup>4</sup>Tavehi, Boas nggo metimal tahal Betlehem e mei mistal mi moletin te polien nan xil e mikei ba ni xil bit, “!Iahova iti mi xamim!”

Ma xil labit rilomun ni mini labit, “!Iahova ituxol xatuk mun!”

<sup>5</sup>Di, Boas misis vat te polien nan bit, “?Atul maxoe xai na visi?”

<sup>6</sup>Ma vat ak bit rilomun ni mini bit, “Atou xai tahal Moab, e be xal Noume iaxa lumei. <sup>7</sup>Xi misis nou tangan nimaen ni ha ti ihusil moletin te polien xil e ti ileh viton bale xil xa laki rasi di nga. Xi temei makoe roroh tamu e di ni polien duxoh taxeak. Xi ba mingel vuteili tang pe horao.”

<sup>8</sup>Di, Boas ba misepin del Rut bit, “Ei, atuli. Uteong ni nou, ieok bei tangan upol e naho savan sangas visal atou te polien xil navan. Onaha ti mun naho na mosav tangan oleh viton bale en. <sup>9</sup>Rute xave xa xil ti lipol en, xouk mun utat visal xil. Nasep xol moletin navan xil tuei tangan linapol ti nasa minuk. E xosxa meruru iatuk, ma uha umu ti oei e valoei xa langgutihi tuei di.”

<sup>10</sup>Melele xa Rut milonge mak, mitingeiril be tan e valnaon duxoh tan. Xi bit rilomun ni mi bit, “?Veneh ma di onem pupu usil nou? ?Veneh ma di osak kuh moletin tei xa nggo kantri sav?”

<sup>11</sup>Boas bit rilomun ni mini bitene, “Inou nalongeong ni sexien hos xil xa otepisen ni mi avu sasa nam melele xa tiramue nam temat. Nakila xa xouk oteheling tamom e ninom e kantri xati nam tangan mei odi mi moletin xil xa otnakil ti xil tetiamu. <sup>12</sup>Nasis mi Iahova tangan isa xoles hosien xa otepisen ni mini. Reitin, Iahova, Hi na mol-Isrel xil, isa sanien tei xa ihos pupu minuk, vengan xa xouk oteiling nenesien nam en tangan ilaxatuk e isikoe xol meulien nam.”

<sup>13</sup>Di, Rut bit rilomun ni mini bitene, “O eilep navan, xouk obos pupu minou. Neta sav xa inou natapin ti tangan name atou te polien tei nam, xouk osepin kuhi minou e odal rat nenemien navan.”

<sup>14</sup>E piniae, melele xa di langganien, Boas biteni mi Rut bitene, “Amei visali xamem, a ti beret e usa ni ihe sup<sup>d</sup> ak.” Ma xi dotan del moletin te polien xil, e Boas misa rut bale xa ladin ni meses mini. Xi ngganien pipin, di miserep kuh anien an xa ngga lingi ba di. <sup>15</sup>Melele xa Rut dilomun ba tangan vapol, Boas misel xat moletin te polien nan xil bitene, “Mumaen ni ileh viton bale e rute xil vus xa ien bei. Tave ti neta xosxa ileh rerati ra

---

<sup>c</sup> 2:2 Dut 24:19 bit bos xos mol-Isrel xil limaen ngan halesav xil itel tunau xil mei lileh viton rut bale mu uit xa laki rasi di nga. <sup>d</sup> 2:14 uaen xa mikon

vanute xil xa mubar vitoni ngamu di, munasep xole ti. <sup>16</sup>E tei mun, bos xa muleh rerat ti bale ra vanute xil e muson ni ihe tan tangan atou ak mei ti ilehi.”

<sup>17</sup>Ma Rut mileh viton bale e naho ak ba duxoh mahis. E melele xa bas rerat utute, mikameti xa utute xil vus xa miso vitoni, kilo nen be lu e le (12 kg). <sup>18</sup>Mileh utut bale xil ak dilomun be tim e ba pisen ni mi avu sasa nan. Di, rut anien xa teserep kuhi, ngan ak mun, Rut misa ni mini.

<sup>19</sup>Melele xa Noume pusi, mitemanin e misisi bitene, “?Xosali, oleh viton utut bale xil ak ingga xave? ?Naho sasi vari iaxa xouk otepol en? Tuxolxatien na Hi iti mi moletin xa pusuk e pol bos minuk mak.”

Ma Rut biteni mi Noume bit, “Natepol e naho sa moletin tei xa hisen Boas.”

<sup>20</sup>Noume mikei nggeih bitene, “!Tuxolxatien na Iahova iti mini! Iahova di pisen hosien nan mi ralu xa rumeul rudi e mi tiramue naralu xalu xa lulel ngamu. Moletin xai nggo vatimol xati na tiramue naralu xalu. E nggusil sexien na mol-Isrel xil, xi iaxa ilaxat kuh rin xil naralu.”

<sup>21</sup>Ma Rut bitene, “E ngan bos mak mu, xi biteni minou bit tit nileh viton bale itel moletin te polien nan xil ha ituxoh melele xa lileh vuol ni bale ra naho san xil.”

<sup>22</sup>Noume biteni mi Rut bitene, “O havuxahin, bos mak mu xa xouk tit upol itel atou xil xa di lapol e naho sa Boas. Vengan xa xosxa upol e naho sa mosav, moletin tova ipol isa minuk.”

<sup>23</sup>Ma Rut pol del xat atou te polien xil na Boas ba vuma ... duxoh melele xa laleh vuol ni bale, e dutou, laleh uit mun ra naho xil vus san. E Rut nggulehi dat visal tova nan.

### Noume Pol ni Suse tangan Rut Vahur Rilomun ni Tiramue Tova

**3** <sup>1</sup>Vatei, Noume biteni mi Rut bitene, “Havuxahin, bos xa nikamet tiramue tova tangan muliteli e ilaxat kuh xouk. <sup>2</sup>?Onem xat Boas, moletin xa di otepol tetel atou te polien nan xil? Xi nggo vatimol na tiramue naralu xalu. Ma uteong kuhi, xosali mahis, xi iha ihas rerat utut bale ra valite. <sup>3</sup>Ma uha uxul, using ihos e uhas ti vokon e xouk. Ti, uhe von polien nan, e onapol ni ti xa xi nakila xa xouk ode rute ak. Utatil melele xa xi ianien e imu ti uaen ivus <sup>4</sup>e upus xat kuh rute xa xi ha ipat en. Melele xa xi ipor vovong, uha ulat kutei man e ha upat uting xat kaelen tangan ipisen ni xa usisi tangan ilaxat kuh rin xil nam. Ti, xi sung ihit naha xa xouk upol ni.”

<sup>5</sup>Rut bit rilomun ni mini bitene, “Inou nipol vuol ni neta xil vus xa obiteni minou tangan nipol ni.”

<sup>6</sup>Ma Rut be von polien na Boas, e pol ni nggoni ngan xa tova nan tehiteni mini. <sup>7</sup>Melele xa Boas ngganien e mu uaen bus, xi milonge bos. Di, be visal seri tetit bale xa mitihu di e ba pat. Melele xa xi por vovong, Rut mika merou ba, milat kutei man e ba pat miting xat kaelen.



<sup>8</sup>E hilaep te vongien, Boas mesep ni neta tei. E melele xa mea biles, pusi xa atou tei di pat e di miting xat kaelen. <sup>9</sup>Ma misisi bit, “?Ei, xouk visi?”

E Rut bit rilomun ni mini bit, “Inou Rut li tang, atou te polien nam. Suv, xouk obe tei e vatimol na tiramue navan xa mat tuei. Misak ni, nggusil sexien namim xil, xouk iaxa ulaxat kuh rin xil navan, e ukila uhur nou mei nihe atou nam.”

<sup>10</sup>E Boas bit rilomun ni mini bit, “Rut, Iahova ituxol xatuk. Di opisen sexien xa bos mi vatimol namem xil xa be eilep mak mu mili naha xa di opisen ni mi tova nam xa be tunau namem. Xouk, vongite xa ova olang ni tiram maxoe sav tova ngamu, ngan xa holesok nan holu mu ngan xa holesok nan tovuol, e xouk otapol ni ti. <sup>11</sup>Ma xouk onanem ti nahe holu usil naha xa istal. Inou nipol vuol ni holesok xil xa otsis nou ven tengan nilaxat rin xil nam vengan xa xouk obe atou tei xa moletin xil vus lapus kil hosien nam. <sup>12</sup>Reitin mak xa inou nabe ngan xa ilaxat kuh rin nam xil vengan xa nabe vatimol xati na tiramue nam xa temat e nakila nihuruk e nilaxatuk. E moletin tei mun de vatimol namem xa xi mak mu be sangas ni tiramue nam, e xi mikila itiamu ni nou tengan ihuruk e ilaxat rin xil nam. E xos ien ti navei, ma inou sung nipol ni. <sup>13</sup>E vongien ak, bos xa uta tak. Ti, sangas ut ilan, ma ralikameti e ralikila xa xi en ihei tengan ilaxatuk mu en ti navei. Xos en ihei, ma bos, e xos en ti navei, ma inou nabiteni reitin pe met Iahova xa inou sung, nihuruk e ti nilaxatuk. E vongien ak, upat uta tak ituxoh makoe.”

<sup>14</sup>Ma Rut pat miting xat kaelen duxoh makoe. E makoe roroh tamu, xi mitamea tengan vaha, vengan xa Boas ien ti tavei moletin xil lakila xa atou tei teme tepat e von polien ak. <sup>15</sup>E diamu xa bit vaha, Boas biteni mini bitene, “Hur rat kot nam e uten ni itak.” Melele xa Rut miteni, Boas mirang utut bale xa kilo nen duxoh hanutap tei e hexalu mun (30 kg) ba en. Di, dutou ni po rati de vatuvun e Rut poe dilomun be tim. E Boas, xi be metimal.

<sup>16</sup>Melele xa Rut duxoh tim, tova nan misisi bit, “?Havuxahin midep?” Ma Rut bit vuol ni holesok xil xa Boas biteni mini. <sup>17</sup>E Rut biteni mun mini bitene, “E xi ien ti tavei xa heok vaka hon melele xa nadilomun namei tim mei napusuk, ma misa utut bale xil ak xa kilo nen be hanutap tei e hexalu mun (30 kg) minou.”

<sup>18</sup>Noume bit rilomun ni mini bitene, “Onanexo ti. Utatili tengan upus ti xa rin ak istal itep, vengan xa Boas misakras vangal ha vuma ... imal ni rin xil vus nam.”

#### Boas Nggur Rut Be Atou Nan

**4** <sup>1</sup>E makoe ak, Boas ba dotan e von totanen xa de sangas visal puiteh te vloh te metimal tahal Betlehem. Di, Boas pus moletin xa

di tesepe usili bit xi be sagas mu ni tiramue na Rut. Melele xa Boas pusi xa di mikakao tangan vali, mikesi bit, “Tua navan, amei mu, totan ti inggaxalei.” Ma moletin ak bemei dotan visali. <sup>2</sup>Di, Boas ba mikamet eilep xil labe hexalu (10) tangan limei liteong ni rin nalu. Melele xa xil vus lamei vituei, <sup>3</sup>Boas biteni mi tua nan ak bit, “Noume xa dilomun nggo kantri tahal Moab bemei, xi ien bei vapos ni tan xil na tiramue nan Elimelek xa tehe vatimol tei naralu. <sup>4</sup>E inou nanemi momal xa nisepe kila minuk. Ma xosxa xouk iem ihei, ma ukila uxale pe met ngan xil xa ladotan ladi xiak. E xosxa iem ti navei, ma uhiteni, vengon xa xouk obe sangas mu mi tiramue na Noume mili nou e ukila uxal rat tan ak itiamu. E xosxa onaxale ti, ma inou sung nixale.”

E moletin ak bit, “E-e, inou nixale.”

<sup>5</sup>Di, Boas biteni mini bit, “Bos pupu. E melengien xa uxal rat tan ak ra Noume, uhur tunau Rut mun xa be ate-Moab. Imak, ma muimol namil ikila ihur tan e holesok sav xil na tiramue na Rut xa mat tuei tangan vatimol nan navop ti.”

<sup>6</sup>Melele xa moletin ak milonge mak, bit rilomun ni mini bitene, “Ve rin ak, inou ninaxal ti tan ak, vengon xa inou nasakras nasa rati mi horamue xati navan xil vahe nae. Itep, ma xouk tang uxale, inou ieok ti tavei mun.”

<sup>7</sup>(E melele nen ak, sexien na moletin xil mak: melele xa labit lapos ni tan tei mu neta sav tova, ma moletin xa tan nan ileh rerat sandel tei nan, e isa ni mi ngan xa ixale. Sexien ak ipisen ni xa lasep maen ni ngamu tangan lival rat tan ak.)

<sup>8</sup>Ma melele xa moletin ak maen tan ak mi Boas tangan vaxale, xi mileh rat sandel nan e misa ni mini. <sup>9</sup>Di, Boas di bithiteni mi eilep xil e ngan teisav xil mun bitene, “Xamim vus mupus rin xa mistal xosali xa inou nanggal rat holesok xil vus ra he Noume xa tehe na Elimelek del horamue nan xalu xa hisealu tehe Kilion e Malon. <sup>10</sup>E rin tei mun, nihur Rut mun, ate-Moab xa teteli tetel Malon tetiamu, mei ihe atou navan. Nggoni sexien nar, muimol namel xa ihe malahos ikila ihur xat holesok xil vus xa vahe na Malon. Ngan ak isak ni vatimol xil na Elimelek navop ti, xil lixulehi liti visal xir e melengien xil xa ti imei. Xamim vus mupus naha xa mistal taxeak.”

<sup>11</sup>Eilep xil e moletin sav xil mun labiteni mini labitene, “Io, xamem mapus holesok xil xa mistal xosali. Xamem musis mi Iahova tangan ipol ni atou ak xa mei iti e tim sam mei ixoni Resel xal Leah, xa lutpes horamue xil holu na Siekob xa mei labe vatimol xil xa eilep tahal Isrel. E musis mun tangan Iahova ipol ni xouk uhe eilep tei xa moletin xil xa langgo vatimol na Efrat limerere ni. Reitin, xi isa his tei minuk xa ihe eilep e metimal nar tahal Betlehem. <sup>12</sup>Horamue xil xa Iahova isa ni minuk ixo ate maxoe ak lipol ni vatimol nam ixoni vatimol na Peres, nat Sudah xa Tamar telingi.”

### Ngan Xil xa Lastal Langgo Vatimol Na Boas

<sup>13</sup>Ma Boas nggur Rut mei be atou nan e Iahova duxol xati. Ma xi di ni tuvava tei, e ngguri be malahos. <sup>14</sup>Atou xil labiteni mi Noume labit, “!Rapet rat his Iahova! Xosali, xi misa havmali tei tangan ti ilaxatuk melele xa mei uhe tovolih. Horamue ak imei ihe eilep tei e Isrel.

<sup>15</sup>Havmahin, eheien nan eilep pupu e xouk. Holesok xil vus xa pol ni minuk bos mak mu mili naha natumali xil lakila lapol ni minuk, neta sav xa xil lave lu e he sav (7). Horamue xa tehuri isak ni meulien nam ihe neta hu rilomun, vengan xa melele xa umei uhe tovolih kuhi, xi ikila ilaxatuk.” <sup>16</sup>Ma Noume po rat tuvava ak, bulu xati e di milaxati.

<sup>17</sup>Atou xil xa ladi sangas mi xil lamei laling his tuvava ak be ‘Ovet’. Labiteni mi moletin xil vus labit, “Tutut horamue tei, lapesi ve Noume.”

Melele xa Ovet ak mei matu, xi mei be tame Tiese, xa mei be tame suv toto Deved.

<sup>18</sup>E ngan ak be vatimol xa testal texo Peres:

Peres tehe tame Hesron.

<sup>19</sup>Hesron tehe tame Ram xa tehe tame Aminatap.

<sup>20</sup>Aminatap tehe tame Nason xa tehe tame Salmon.

<sup>21</sup>Salmon tehe tame Boas xa tehe tame Ovet.

<sup>22</sup>E Ovet tehe tame Tiese xa tehe tame suv toto Deved.

# Siona

---

## Iahova Misil Provet Siona Tengan Vasel Xat Mol-Nineva Xil,<sup>a</sup> e Siona Ien ti Tavei *Siona 1:1-17*

**1** <sup>1</sup>E tan tahal Isrel, provet tei da en, hisen Siona, nat Amitai. Vatei, Iahova misepin mi bit, <sup>2</sup>“Utemanon uhe taon xa mahulong tahal Nineva, e usel xat moletin xil xa ladi en. Uhiteni mi xil xa sexien nae xil pupuru pupu pe metok.”

<sup>3</sup>E Siona, ien ti tavei vahusil suse xa be ist tangan ha vasa sepinien na Iahova mi xil. Mak, ma xi biles be wes e suse sav tangan valesae rani. Ba duxoh pasis te taon tahal Sopa, e rute ak, xi mikamet tuturil tei xa di labue xat xi tangan vahe Spen, kantri tei xa be sotin pilei mak e rin xa wes. Ma xi minggal suse nan, e be tuturil ak del boskru xil nen. Di, tuturil ak miloh tangan vahe Spen del Siona xa di milesae ra Iahova.

<sup>4</sup>Melele xa tuturil ak di miloh ba, Iahova pol ni vatiang mu e tas misa xa misa. Sangas tuturil ak vamahoe lel. <sup>5</sup>Boskru xil ulixil mikan pupu, e xil kekes di ladak kes hi nae xil tangan lasa tutouen mi xil. Di, laleh rat holesok xil xa ladi vangit tuturil e laso ni be tas tangan vapol ni tuturil ak vameit mu.

E Siona, xi ba be vangit tuturil ak, ba pat e por sae. <sup>6</sup>Melele xa vatihos be vangit tuturil ak, mikamet Siona ma biteni mini bit, “!Ei! ?Veneh ma di opat mak? Tamea, e usis mi hi nam ve tutouen. Xos xi iaxa mikila en isae e xir e iteh meulien e xir.”

<sup>7</sup>Di, boskru xil lamei vituei e laling nenemien nae tangan lilihi hise xil tangan lakameti xa visi e xil di milihi an tesa ak ba xat xil. E melele xa lapol ni, lalihi his Siona. <sup>8</sup>Ma ba lasepin mini labit, “?Ei, uhiteni mi xamem, veneh ma an tesa ak di bas xir? ?Polien eah iaxa xouk di opol ni? ?Xouk onngo kantri xave e moletin nam xil labe hisit moletin eah?”

<sup>9</sup>Ma Siona biteni mi xil bitene, “Inou nabe man Isrel tei e di namot mi Iahova, Hi te ut nesao xa tepol ni tan e tas.” <sup>10</sup>Di, Siona bit rat xi mi xil bit xi di milosae rani.

---

<sup>a</sup> **1:1** Nineva be taon tei na mol-Asiria xil xa labe elu ni mol-Isrel xil.

Melele xa boskru xil lalonge mak, ulixil mikan pupu ma lasel mini labit, “?Veneh ma xouk otepol tesa pupu temak?” <sup>11</sup>E melele xa lapusi xa vatiang di bemei nggeih pilei mu, lasis Siona labit, “?Uhiteni mi xamem, mupol ni itep minuk tangan isak ni an tesa ak ihe tan?”

<sup>12</sup>Ma Siona bit rilomun ni mi xil bitene, “Mupo nou e muso nou nihe tas. Melele xa mupol ni imak, ma tas mei ihos rilomun. Nakila xa vatiang ak bas xir mak venou.”

<sup>13</sup>E boskru xil iexil ti tavei tangan laso Siona vahe tas. Misak ni xil lasak tangan lavalis ni tuturil ak vahe ut, e lasakras vengon xa tehe xil mei labe tellep mu e vatiang mei nggeih pilei sung. <sup>14</sup>Ma di, xil ladak kes Iahova labit, “O Iahova, masis minuk li xa onasa longpangasien ti mi xamem ve maten na moletin xai. Reitin, onahas xamem ti li vengon xa xouk, Iahova, otepol ni holesok xil ak testal texo hem e tehusil lingxatien nam kestang.” <sup>15</sup>Di, lapo rat Siona e laso ni be tas. E vatakes, tas mei bos rilomun. <sup>16</sup>Melele xa boskru xil lapusi mak, lamerere ni Iahova himetu. Ma lasa sanien eo tei te memesien mini e xil kekes lapol ni hitxatien nae xil dela.

<sup>17</sup>E e rin na Siona, Iahova misil meseo tei xa mahulong mei miromi. E Siona tamat ti, xi meul tang de vang meseo ak melengien tol.

### E Vang Meseo, Siona Di Misis mi Iahova

#### *Siona 2:1-10*

- 2** <sup>1</sup>Melele xa Siona de vang meseo ak, xi misis mi Iahova, Hi nan, bit,  
<sup>2</sup> “O Iahova, natelong pangas nou pupu ma natekei tehat minuk li,  
 e xouk oteteong ni nou e otetutou ni nou.  
 Melele xa natenemi natehit di nabe von maten, natetak kesuk,  
 e xouk oteteong ni nou li.
- <sup>3</sup>Xouk oteso nou natehe mesavuol  
 e natemarir natehe huinep te tas.  
 E inggak, tas teta xol nou  
 e tehe xil mun latekilkiles ni nou.
- <sup>4</sup>Natenemi natehit otesil rat nou natehe relinguk.  
 E ieok tehei tangan nipus ti mun Nim Eo nam.
- <sup>5</sup>Tas texa xol nou,  
 natemarir natehe tan  
 e lulum te tas tevar xat vatuk.
- <sup>6</sup>Natehe tan teha vuma ... natetuxoh vatit hu xil xa ladi pe tas.  
 Natelonge lehit ngan xa latevar xat nou e von maten e nateta tuok.  
 E xouk Iahova, Hi navan, otemei sung  
 otehur rat nou rilomun ra pe tas ak tangan nameul.
- <sup>7</sup>O Iahova, melele xa natelonge sangas xa meulien navan ha vavus,

natenem rilomun ni xouk.

Natesis tehat minuk,

e otelong nou e Nim Eo nam.

<sup>8</sup> Ngan xil xa di lamot mi nanao votei xil,

xil di lastokovein xouk xa obe vatit hosien nae.

<sup>9</sup> E inou, ti nikikei minuk itel memesien,

e nisa sanien eo tei ihat minuk.

Naha xa natehit xati minuk tangan nipol ni, nipol sen ni.

O Iahova, xouk kestang di oteh meulien e moletin.”

<sup>10</sup> Di, e melele xa Siona misis bus, Iahova misemae ni meseo ak, ma ba, miluh rat Siona ba be suvien.

### Siona Milong Xat Iahova e Ba Be Nineva

#### *Siona 3:1-10*

**3** <sup>1</sup> Iahova misepin vatei mun mi Siona bit, <sup>2</sup> “Uhe taon xa muhulong tahal Nineva, e uhit mesen sepinien xa nisa ni minuk mi xil.”

<sup>3</sup> Ma Siona milong xat Iahova e ba be Nineva. Taon tahal Nineva be mahulong pupu. Xosxa moletin de rin tei e minemi bit vahe rin sav, xi ikakao melengien ihe tol vari. <sup>4</sup> Ma Siona ba be taon ak e mikakao en melengien tei. Di, melele xa de hilaep xati te taon ak, xi miki ba ni moletin xil bitene, “Melengien be hanutap lu (40) sutang di tangan Hi ihu len vari ni taon ak tahal Nineva.”

<sup>5</sup> Melele xa moletin xil tahal Nineva lalonge mak, laneket e sepinien na Iahova. Ma labithiteni tangan moletin xil vus, ngan xil xa latellep ha ituxoh ngan xil xa latereli, lihal ni anien e lising ni talmusu xil tangan lipisen ni xa lalonge misa ve tesaen xil nae.

<sup>6</sup> Melele xa suv toto tahal Nineva milongeong ni usil naha xa Siona di tehithiteni, milonge misa pupu. Ma mitamea ra hor nan e mileh rat eising hos xil nan. Di, mising ni talmusu xil tang e ba midotan de husupang xil.

<sup>7</sup> Di, misemae ni tangan latis mesen rae nan ak iha mi mol-Nineva xil vus tangan ti lihusili xa bit:

Ngan ak be rae na suv toto del eilep nan xil. Moletin xil vus itel vongoro sae xil mun linakar pis ti anien e linamu ti oei. <sup>8</sup> Moletin xil vus itel vongoro sae xil mun lising ni talmusu xil e ti litak kes Hi ve esaen nan. Xil lihiles ra tutuen nae xil e sexien tesa nae xil mun.

<sup>9</sup> Melele xa ripol ni imak, ma xos Hi nasa ti mun pangasien namei xat xir. Xos xi ikila ihiles nenemien nan e nahu vin xir ti natel ekaten nan xa nggeih pupu.”

<sup>10</sup> Melele xa Hi miketeh pus naha xa latepol ni, e pusi xa latehiles ra sexien tesa xil nae, xi biles nenemien nan e tasa pangasien ti mun mi xil vaxoni ngan xa tehiteni.

**Siona Ien Mikat Iahova Vengan xa Xi Pisen Esaecen mi Elu Nan Xil**  
*Siona 4:1-11*

**4** <sup>1</sup>Melele xa Siona pusi xa Iahova en misae e mol-Nineva xil, xi milonge misa e ien mikat pupu. <sup>2</sup>Ma xi misis mi Iahova bit, “O Iahova, melele xa nada tamu e tim savan, nakila ngamu xa xouk upol ni imak. Mak vari iaxa natelesae natehe Spen. Natekila xa xouk obe hisit Hi tei xa di opisen eheien e esaecen mi moletin xil. Xouk di onggur xat ekaten nam e di opisen hosien nam mi moletin xil. Vehakut di obiles nenemien nam tangan onasa pangasien ti mi moletin xil. <sup>3</sup>!O Iahova, taxeak, uhur rat meulien navan! !Vahit namat vahos mak mu vali ngan nameul nada xiak!”

<sup>4</sup>E Iahova bit rilomun ni mini bit, “?Onemi obit momal tang tangan ti iem vakat vamak?” E Siona tavit rilomun ni ti sepinien mini.

<sup>5</sup>Di, Siona be reling taon ak e ba dotan e rute tei xa be ist xa mikila vapus taon tahal Nineva. E inggak, xi pet horao tei e dotan de paen vengon xa bit vapus ti mu naha vaxul mi taon ak.

<sup>6</sup>Di, Iahova misak ni uval tei meul katen usil horao xa Siona tepeti tangan vahe memal man e vapol ni xi nalonge ti mun nasa. Ma melele xa Siona pusi, xi besi xi ven. <sup>7</sup>E visuvong nen, melele xa ut milan, Hi misa vueang tei mei mingas uval ak, ma uval ak mat. <sup>8</sup>E melele xa eai bemei nesao, Hi misa vatiang tei nggo ist xa mitin. Eai minggasil e vat Siona ma ven memel. Ma xi ien bei maten e biteni bit, “!Vahit namat vahos mak mu vali ngan nameul nada xiak!”

<sup>9</sup>E Hi biteni mini bit, “?Onemi obit momal tang tangan ti iem vakat vamak ve uval ak?”

E Siona bit, “!Io! Momal tang tangan nalonge vamak. !Ieok mikat pupu ve rin ak! !E vahit namat, vahos mak mu!”

<sup>10</sup>Ma Iahova biteni mini bit, “Uval ak meul bemei nesao e vongien tei tang, e mat e vongien sav. Xouk otapol ni ti neta ven, e tave xouk ti iaxa opol ni vameul. Tave ti neta xa mak, e xouk iem misae pupu ve maten nan. <sup>11</sup>?Ma midep? ??Tamal ti tangan inou nipisen esaecen navan mi moletin xil tahal Nineva?? !Ngan xil xa di lameul e taon ak lali taosen be handred tei e hanutap tei mun (120,000) e latakil ti vari neta xa bos e neta xa misa!<sup>b</sup> E vongoro xil mun xa ladi en labe holu pupu. Siona, momal tevi tangan ieok vasae e meulien na moletin xil ak.”

---

<sup>b</sup> 4:11 Latakil ti xa ngan ak be moletin xil vus tahal Nineva mu tuten nae xil tang.

# Matiu

## *Sepinien xa Diamu te Matiu*

### **Visi iaxa tetis sepinien ak?**

Melele xa Iesu tepol kokot ni pispisien nan xil e di tetal rerat meseien ra moletin xil hao, moletin xil holu di latehusili. E melele nen ak, Iesu di tekakao e taon tahal Kapaniam, e tepus Siu tei xa di teleh takis ra Siu sav xil tangan vasa ni vahe kavmen tahal Rom, hisen Matiu Livae (Mat 9:9). Tumulen xa xi tetisi di biteni xa melele xa Iesu tepusi e tekesi, vatei takes, xi testokovein polien nan e tehusil xati. Di, e melele xa Iesu tehe ut nesao, Ninin Eo mei tepolu e Matiu e eloheoh sav xil mun. Ma lateha latehithiten longeongen hos usil Iesu Kristo mi moletin xil (Polien 2:4,43). Matiu tetis vanuvei ak usil meulien na Iesu e huram 63 AD (huram 63 xa dutou ni poten na Iesu).

### **Visi iaxa tevuli sepinien ak tetiamu?**

Matiu tetis vanuvei ak teha mi mol-Isrel xil vengang holu e xil latake reitin ti xa Iesu iaxa be xi xa Hi tehiti xati tetiamu tangan isa ni imei. Misak ni, Matiu en tehei tangan vapisen ni xa holesok xil xa provet xil te oltestamen latehit usili e rin te meien, meulien, e mea rilomunen na Iesu mei tehe reitin.

### **Matiu tetis sepinien xil ak veneh?**

**Matiu en tehei vapisen ni xa meien na Iesu tehusil xat naha xa Hi tehiti xati usil meien na suv toto xa isa ni imei tangan vatutou ni mol-Isrel xil - Matiu tetis kuh holesok xil xa testal e meulien na Iesu e tepisen ni xa di nggusil naha xa provet xil tetiamu latehit usili e oltestamen:**

Iesu texo vatimol na Ebrahim (Mat 1:1) e tehusil hitxatien xa Hi tepol ni tetela (Sen 22:18) tangan ‘vatimol nan xil lihe suse te tuxolxatien na Hi iha mi vanut moletin xil vus te ut etan.’

Iesu texo vatimol na suv toto Deved (Mat 1:1) xa tehusil hitxatien xa Hi tepol ni tetel Deved (2 Sam 7:13) tangan ‘laxatien na ngan xil xa listal e vatimol nan iloh sal ha vuma ... hoxalite teni ihe tovuol.’

Iesu, ninen tehe atul maxoe tei xa takil ti mu tiramue (Mat 1:18) texoni ngan taxa Hi tehiti xati texo provet Aesea (Aes 7:14).

Iesu, latpesi e metimal tahal Betlehem (Mat 2:1) texoni ngan taxa Hi tehiti xati texo provet Maeka (Maek 5:2).



Eilep tatei xil xa latehur kilakilen texo suse na hitu xil latexo ist e latemei e Isrel tangan langang ves ‘tuvava xa latpesi be suv toto na Siu xil’ (Mat 2:2) vengang xa xil latepus hitu nan mei testal texoni ngan taxa Hi tehiti xati texo provet Balam (Nam 24:17).

Tuvava Iesu teha tete kantri tahal Isip vuteili (Mat 2:14-15) texoni ngan taxa Hi tehiti xati texo provet Hosea (Hos 11:1).

Sion Baptaes mei misak mesen suse na Iesu (Mat 3:1-3) texoni ngan taxa Hi tehiti xati texo provet Aesea (Aes 40:3).

Iesu tepisen ni xa xi pipin tangan vahur polien na Hi texo sexien xa temaen Sion vabaptaes ni (Mat 3:16-17). Hi tepisen ni xa temaal pupu ven, e tetutou ni ngan ak, Iesu teha tepol kokot ni polien nan xil.

Melele xa Iesu tehur saksipisien xil texo he Temat (Mat 4:1-11), tepisen ni xa Iesu tenamot ti e tesaen, e tesoh kil tetel sepinien na Hi.

**Matiu en tehei vapisen ni xa Iesu bemei tangan vapispisi mi moletin xil usil naha istal e meulien nae melele xa Hi mei ihe Suv Toto nae - Matiu teling pispisien xil na Iesu lateti e vanut pispisien lim (5):**

E hu tei, Iesu tepispisi mi moletin xil usil sexien xil xa momal tangan moletin xil lihuri melele xa Hi mei ihe Suv Toto e meulien nae (Mat 5:1-7:29).

esu tepispisi ni xa saksipisien xil e melengien xil te xeih ti imei e meulien na ngan xil xa Hi mei be Suv Toto nae (Mat 10:1-42).

Iesu tepispisi ni mi moletin xil usil sexien xa Hi mei ihe Suv Toto na moletin xil (Mat 13:1-52).

Iesu tepispisi usil visi iaxa be eilep mak mu e ngan xil xa Hi be Suv Toto nae (Mat 18:1-35).

Iesu tepispisi usil saksipisien e melengien xil te xeih xa ti imei mi ngan xil xa Hi be Suv Toto nae (Mat 24:1-25:46).

**Matiu en tehei vapisen ni xa Iesu tehur xeihen texo Hi xa mili xeihen savsav xil e ut etan - Matiu tetisi xa Iesu ‘tetel rerat meseien xil vus ra moletin xil’ (Mat 4:23). Xi tetisi mun xa Iesu tepol ni temak tangan vasak ni naha xa Hi tehiteni texo provet Aesea mei vahe reitin (Mat 8:17).**

Iesu tehur xeihen teli meseien leporsi (Mat 8:3); meseien xa ri moletin mat (Mat 8:13; 9:6); meseien xa moletin ven mitin (Mat 8:15); e teli meseien savsav xil mun (Mat 8:16; 9:22,35; 12:13,15; 14:36; 16:30).

Iesu tehur xeihen tangan vahol rerat ninin tesa xil vahe reling moletin xil (Mat 8:16,33; 9:33; 12:22; 15:28; 17:18).

Iesu tehur xeihen tangan vasak ni votiang e oei lalilong xat raen (Mat 8:27).

Iesu tehur xeihen tangan vasak ni ngan xil xa lamat, mei lameul rilomun (Mat 9:25).

Iesu tehur xeihen tangan vasak ni ngan xil xa vurange bon, mei lalongeong rilomun, e ngan xil xa labe vut, mei lasepin (Mat 9:29,33; 12:22).

Iesu tehur xeihen tangan vasak ni ngan xil xa metexil bar mei laketeh rilomun (Mat 21:34).

Iesu tehur xeihen tangan vahangan moletin xil holu vatel anien xa hokorong tang (Mat 14:25; 15:36).

Iesu tehur xeihen tangan vasa halesil vaha ni neta ngan (Mat 21:19).

**Matiu en tehei vapisen ni xa vat xil na mol-Isrel xil latesin pispisien xil na Iesu e iexil ti tenavei laling neketen nae en e lavusil xati** - Melele xa Iesu tepol kokot ni polien nan xil, mol-Isrel xil lamaal ven. E melele xa di tepol teha vuma, vat xil na mol-Isrel xil latesin ni e latepol ni texeih mini.

Vat xil na mol-Isrel xil latehit tamal ti melele xa Iesu tesepin e rin na Hi tehiti Hi naketeh ti mun nasa mi moletin xil ve tesaen nae xil (Mat 9:3).

Vat xil na mol-Isrel xil latehit tamal ti xa Iesu di teanien tetel moletin tesa xil (Mat 9:11).

Vat xil na mol-Isrel xil latehit tamal ti xa moletin xil holu latemaal pupu ve holesok xil xa Iesu di tepol ni (Mat 9:34).

Vat xil na mol-Isrel xil latehit tamal ti xa Iesu tenahusil xat sexien matu nae xil ti (Mat 9:14; 12:2,14; 15:2).

Vat xil na mol-Isrel xil latehit xeihen na Iesu texo Temat (Mat 12:24; 16:1).

Vat xil na mol-Isrel xil latehit tamal ti xa Iesu di tesel xat xil ve sexien nae xil (Mat 19:3; 21:23,46; 22:15,23,35; 23:1-39).

**Matiu en tehei tangan vapisen ni xa sakpisien xil e maten na Iesu tehusil xat naha xa Hi tehiti xati tehiti istal** - Matiu tetis kuh holesok xil xa testal e sakpisien e maten xa Iesu tehuri. Xi tepisen ni xa holesok xil ak tehusil xat naha xa Hi tehiti usili texo provet xil tetiamu e oltestamen.

Hi tehiti xati (Sam 118:22-23) xa vat xil na mol-Isrel xil lisen Iesu (Mat 21:42).

Hi tehiti xati (Aes 6:9-10; Sam 78:2) xa moletin xil linalong kil ti pispisien nan xil (Mat 13:13,34).

Hi tehiti xati (Sak 9:9; Sam 118:26) xa Iesu iloh ixo dongki tei ixoni suv toto tei melele xa mei istal e taon tahal Serusalem (Mat 21:4-11).

Hi tehiti xati (Sam 41:9) xa timue hos tei na Iesu xa di lateanien vituei, xi vari isa rati ihe he elu nan xil (Mat 26:23-24).

Hi tehiti xati (Sak 11:12-13; Ser 19:1-13; 32:6-9) xa lival rat meulien na Iesu ni silva mani ihe hanutap tei e he xalu mun (30) (Mat 26:15; 27:3).

Hi tehiti xati (Sak 13:7) xa moletin xil na Iesu lilesae relingi (Mat 26:31).

Hi tehit xati (Aes 53:8) xa melele xa lilepis Iesu e kot, linapol ni ti namal mini e litela tangan ha imat (Mat 27:1-2).

Hi tehit xati (Aes 53:7) xa Iesu itat votei melele xa liso sepinien eah iha xati (Mat 27:12).

Hi tehit xati (Aes 50:6) xa moletin xil liti e likus valnaon (Mat 26:67; 27:30).

Hi tehit xati (Sam 22:14-18) xa liti xat Iesu ite eivave e liso daes tangan liseti eising nan xil (Mat 27:35).

Hi tehit xati (Sam 69:21) xa melele xa maruru iat Iesu, xil lisa uae na xa mikon mini (Mat 27:34).

Hi tehit xati (Sam 22:7-8) xa moletin xil lingue xat Iesu e lisisi tangan itutou ni xi tasen (Mat 27:40).

Hi tehit xati (Aes 53:12) xa Iesu ihur longpangasien itel moletin tesa xil e isis ve ngan xil xa di lapurun ni (Mat 27:38).

Hi tehit xati (Sam 22:11) xa istokovein Iesu melele xa xi ti ilong pangas xi (Mat 27:46).

Hi tehit xati (Aes 53:9) xa liling tiei na Iesu ite rute xa di ladihin ngan xil xa holesok nae holu en (Mat 27:60).

Hi tehit xati (Sam 16:10) xa namaen ni ti Iesu nate von maten, e tiei nan navolel ti e vul (Mat 28:6).

### **Vatit nenemien tei te vanuvei ak de Matiu 5:17**

*Iesu pispisi mi moletin xil bit, "Munanemi ti munahit inou namei tangan naso rerat Rae xil na Mosis e pispisien xil na provet xil vaha. !E-e, tamak ti! Natamei ti tangan naso rerat xil. E namei tangan nisak ni naha xa rae xil ak di lasep usili mei ihe reitin."*

### **Naha iaxa de sepinien ak?**

1. Meien na Iesu nggusil xat naha xa Hi tehit xati (Mat 1:1 - 4:11)

#### *E provins tahal Kaleli*

2. Iesu pol kokot ni polien nan e bit usil sexien xa Hi mei ihe Suv Toto na moletin xil (Mat 4:12 - 7:29)
3. Iesu pisen xeihen na Hi xa mei ihe Suv Toto na moletin xil (Mat 8:1 - 11:1)
4. Moletin xil lasin ni tangan Hi mei vahe Suv Toto nae (Mat 11:2 - 16:12)

#### *E suse vahe Serusalem*

5. Iesu bue xat moletin nan xil ve sapisien xil xa ti imei e xil (Mat 16:13 - 20:34)

#### *E Serusalem*

6. Moletin xil lasin Iesu e iexil ti tavei tangan lavusili (Mat 21:1 - 23:39)
7. Iesu pispisi mi moletin nan xil usil mea rilomunen nan e sapisien xil xa ti imei e xil (Mat 24:1 - 25:46)

8. Vat na mol-Isrel xil lapol ni suse tangan Iesu vamat vaxo en (Mat 26:1-75)  
 9. Maten na Iesu (Mat 27:1-66)  
 10. Iesu mea rilomun ra maten e be ut nesao (Mat 28:1-20)

### Vatimol na Iesu Kristo<sup>a</sup>

**1** <sup>1</sup>Ngan ak be vatimol xil na Iesu Kristo, xa tehe tei e vatimol na suv toto Deved tetiamu, xa tehe tei e vatimol na Ebrahim tetiamu.

- <sup>2</sup> Ebrahim, xi tehe tame Aesak,  
 xa tehe tame Siekob,  
 xa tehe tame Sudah tetel tuneli xil.  
<sup>3</sup> Sudah, xi tehe tame Peres xal Siera, xa ninexalu Tamar,  
 E Peres, xi tehe tame Hesron,  
 xa tehe tame Ram.  
<sup>4</sup> Ram, xi tehe tame Aminatap,  
 xa tehe tame Nashon,  
 xa tehe tame Salmon.  
<sup>5</sup> Salmon, xi tehe tame Boas, e ninen Rehab,  
 E Boas tehe tame Obed, e ninen Rut.  
 E Obed tehe tame Tiese,  
<sup>6</sup> xa tehe tame suv toto Deved.

Suv toto Deved, xi tehe tame Solomon, e ninen tehe tunau na Uraea.

- <sup>7</sup> Solomon, xi tehe tame Rehoboam,  
 xa tehe tame Abitsa,  
 xa tehe tame Asa.  
<sup>8</sup> Asa, xi tehe tame Sehosevat,  
 xa tehe tame Sehoram,  
 xa tehe tame Usaea.  
<sup>9</sup> Usaea, xi tehe tame Siotam,  
 xa tehe tame Ehas,  
 xa tehe tame Hesekaea.  
<sup>10</sup> Hesekaea, xi tehe tame Manase,  
 xa tehe tame Amon  
 xa tehe tame Sosaea.  
<sup>11</sup> E Sosaea, xi tehe tame Sekonaea e tuneli xil.  
 E melele nen ak, mol-Babilon xil mei latehas tan ni mol-Isrel xil e lateleh rerat xil latehe Babilon.

<sup>a</sup> 1:0 Tumulen ak de Luk 3:23-38 mun

- 12 Ngan xil sung ak, xil labe avu xil xa latetutou ni melele xa mol-Isrel xil latehe Babilon:  
 Sekonaea, xi tehe tame Sertil,  
 xa tehe tame Serubabel.
- 13 Serubabel, xi tehe tame Apiut,  
 xa tehe tame Eliakim,  
 xa tehe tame Asor.
- 14 Asor, xi tehe tame Sadok,  
 xa tehe tame Akim,  
 xa tehe tame Eliud.
- 15 Eliud, xi tehe tame Eliesar,  
 xa tehe tame Matan,  
 xa tehe tame Siekop.
- 16 Siekop, xi tehe tame Siosep,  
 xa tehe tiramue na Meri,  
 xa tehe nine Iesu,  
 xa latekesi ni Kristo xa Hi tehit xati tehit isa ni imei.

17 Mak ma, melele xa labuli vatit avu xil ladi vatimol na Iesu, Ebrahim tetuxoh suv toto Deved, lakameti xa latehe hat e le tei (14). E lakameti xa Deved tetuxoh melele xa mol-Isrel xil latehe Babilon, vatit avu xil ak latehe hat e le tei (14). E melele xa mol-Isrel latehe Babilon tetuxoh melele xa Kristo tepot e ut etan, vatit avu xil ak mun latehe hat e le tei (14).

### Iesu Kristo Tepot e Ut Etan<sup>b</sup>

18 Ngan ak be tumulen usil naha xa testal tetiamu ni melele xa Iesu Kristo latepesi. Meri, nine Iesu, xi latesikoe xole ngamu tangan mei ihe atou na Siosep. E melele xa lutnati vituei ti mu, latekameti xa Meri teti tuei ni tuvava texo xeihen na Ninin Eo. 19 Vengan xa Siosep, tiramue na Meri, sexien nan xil momal pe met Hi, xi tenemi tehit isil rati. E xi en titavei vapol ni Meri vahe unoun pe met moletin xil. Ma xi bit xalu lalitalisil e suse xa moletin xil linakil ti.

20 E melele xa Siosep di tamu minem usil rin ak, masxaxa tei na Hi Suv mei mistal mini e metuveen tei e biteni mini bit, “Siosep, tei e vatimol na suv toto Deved tetiamu, ulum nakan ti tangan ovur Meri vahe atou nam, vengan xa tuvava xa di ni nggo xeihen na Ninin Eo. 21 Meri iling horamue ak, e xoux uling hisen ihe ‘Iesu’ xa koute teni be ‘Tahova di miteh meulien’, vengan xa xi iteh meulien e moletin nan xil ra tesaen nae.”

22 Holesok xil ak mei mistal tangan vapol ni sepinien xa Hi Suv tehiteni texo provet nan mei vahe reitin xa bit,

<sup>b</sup> 1:17 Tumulen ak de Luk 2:1-7 mun

23 *“!Muteong kuhi! Ate-maxoe tei xa takil ti mu tiramue,  
xi iti ni tuvava tei.  
Ti, ilingi ihe malohos e liling hisen ihe ‘Immanuel’,  
xa koute teni be ‘Hi di mi xir’.” (Aes 7:14)*

24 Melele xa Siosep milale, xi pol nggusil naha xa masxaxa na Hi Suv tesemae ni mini. Xi nggur Meri be atou nan e ludi vituei. 25 E xi tapat ti vatela ba duxoh melele xa Meri miling horamue nan. E melele xa miling horamue ak, Siosep miling hisen be Iesu.

**Eilep Xil Lamei Tengan Lamerere ni Iesu  
Kristo Ngoni Suv Toto na Siu Xil**

**2** 1 Iesu, latepesi e metimal tahal Betlehem xa de provins tahal Sudea, e melele xa Herod xa Mahulong tehe suv toto te provins ak. E dutou ni melele xa latepes Iesu en, rut eilep xil langgo ist e lamei e taon tahal Serusalem. Eilep xil ak langgur kilakilen tengan lipus kil naha xa istal e ut etan nggo suse na hitu xil. 2 E melele xa lastal e hal Serusalem, lasis moletin xil labit, “?Tuvava xa latpesi be suv toto na Siu xil da xave? Vengan xa melele mateti tamu e ut samem e ist, matepus kila xa hitu nan testal rohon. Ve rin ak, mamei taxeak tengan masa merereen mini.”

3 Melele xa suv toto Herod xa Mahulong milonggeong ni, xi minexo pupu del moletin xil vus tahal Serusalem.<sup>c</sup> 4 Ma Herod mikes viton vat xil na pris xil del tisa xil te Rae xil na Mosis e misis xil bit, “?Kristo xa Hi tehit xati mi Siu xil, lipesi e ut xave?”

5 Xil labit rilomun ni mini labitene, “Lipesi e metimal tahal Betlehem e provins tahal Sudea, vengan xa Hi tesepepin texo tisen na provet tei nan bit,

6 *“Tave ti neta xa metimal tahal Betlehem be hokorong mak mu e metimal  
savsav xil vus na mol-Sudah xil,  
e ixo metimal ak, nisak ni suv toto tei mei istal ixo en.*

*Xi ilaxat kuh mol-Isrel xil vus*

*ixoni moletin tei xa di milaxat kuh sipsip san xil.’” (Maeka 5:2)*

7 Melele xa milongge mak, suv toto Herod xa Muholong mikes xuxus ni eilep xil ak tengan lamei visali. Di, misis pilei xil tengan lihiteni mini melengien xati vari xa xil latepus hitu ak testal rohon en. 8 Di, Herod misil xil labe Betlehem e biteni mi xil bitene, “Muha mulang kuhi ni horamue ak. E melele xa mukameti, mutilomun mei muhiteni minou tengan xa inou mun niha nimot mini.”

---

<sup>c</sup> 2:3 Herod xa mahulong minexo vengan ien ti tavei tengan moletin ti namei naxolesi, e di mu vin ngan xil xa di lanem usili. Xosxa Herod minemi xa mol-Isrel xil labit lixolesi e liling suv toto tova nae, ma xi mikila ihu lelen mol-Isrel xil vus.

9-10 Melele xa eilep xil ak lalong sepinien na suv toto, laba tangan lakamet horamue ak. E melele xa di langgusil suse nae laba, hitu xa latpusi tetiamu melele xa lateti tamu e ist mistal rilomun. E melele xa lapus hitu ak, labesi xil pupu. Hitu ak diamu ni xil ba da kat e rute vari xa horamue da en. 11 Ma melele xa labe nim, lapus horamue del ninen Meri. E melele xa lapusi, latingeiril e lasa merereen mini. Di, laleh rat sanien hos nae xil e lasa ni mini. Xil lasa gol, forangkansen, e mir.<sup>d</sup> 12 E vongien, Hi misep xol xil nggo metuveen tei xa linatilomun ti mun linave visal Herod. Ma xil langgusil suse sav ladilomun labe tim sae.

### **Hi Pol ni Suse tangan Iesu Ilesae Ihe Isip tangan Ngan Xil xa Labit Lavasi Linatal Xati Ti**

13 Melele xa eilep xil ak ladilomun laba, masxaxa tei na Hi Suv mei mistal mi Siosep nggo metuveen tei e biteni mini bitene, “!Tamea! !Temanon, hur horamue xal ninen, e mutlesae muthe Isip! Mutiti rute ak ituxol melele xa inou nihit mutilomun en. Upol ni imak venggan xa, navehi ti, Herod ilang ves horamue ak tangan vahas vini.”

14 Misak ni, e vongien nen tak, Siosep mea po horamue, e del ninen, latlesae latbe kantri tahal Isip. 15 Latodi rute ak ba duxoh melele xa suv toto Herod xa Mahulong mat. Ngan ak mistal tangan vapol ni sepinien na Hi Suv xa tehiteni texo provet Hosea mei mistal be reitin xa bitene, “*Nakes natuxoli imea ra hal Isip.*” (Hos 11:1)

16 Melele xa Herod minem kila xa eilep xil tahal ist lateluvosi, ien mikat pupu. Ma, misemae ni moletin xil te vaeen nan tangan lihe metimal tahal Betlehem e ut xil mun xa di sangas tangan ha lihas malohos xil ngasen xa huram nae lu e be tan. Herod pol ni mak nggusil melele xati xa eilep xil tahal ist latehiteni mini xa hitu ak testal kokot en. 17 Ngan ak mistal tangan vapol ni sepinien xa Hi Suv tehiteni texo provet Seremiah mei mistal be reitin xa bitene,

18 “*Moletin xil tahal Rama<sup>e</sup> lalong neta tei,  
lalong isien tei xa nggeih di mistal.*

*Resel di midang pupu  
ve horamue nan xil xa amat.*

*Ien ti tave tangan moletin ti napet rat nenemien nan,  
venggan xa horamue nan xil latovuol mun.”* (Ser 31:15)

### **Hi Pol ni Suse tangan Iesu Itilomun ra Hal Isip**

19 Melele xa xatel latdi tamu e kantri tahal Isip, Herod xa Mahulong mat. Ma masxaxa tei mei mistal mi Siosep nggo metuveen tei 20 e biteni

---

<sup>d</sup> 2:11 Gol be hat tei xa minehin pupu xa, tetiamu, latepol ni mei tehe mane. Forangkansen e mir lube tut vatie ni lapol ni vokon ni. Mani te xatel vus be nesao e latehe sanien xa momal tangan lasa ni mi suv toto tei. <sup>e</sup> 2:18 Rama be rute tei xa be sangas ni metimal tahal Betlehem, e lanemi labit latetihin Resel, atou na Siekob, en.

mini bitene, “!Tamea! !Utel horamue xal ninen mutdilomun mutihe tan na mol-Isrel xil, vengon xa ngan xil xa latehit lihas vin horamue ak, lalel tuei.” <sup>21</sup>Ma, Siosep mitamea, del horamue xal ninen latdilomun latbe Isrel.

<sup>22</sup>E melele xa Siosep milongeon ni xa Arkelaos nggur vonine tamen, Herod xa Mahulong, mei be suv toto te provins tahal Sudea, xi ulin mikan tengon lathe rute ak. E Hi mun misel xati nggo metuveen tei tengon latnava ti Sudea. Ma latbe provins tahal Kaleli <sup>23</sup>e latdi rute ak e taon tahal Nasaret. Ngan ak misak ni naha xa Hi Suv tehiteni texo provet xil mei mistal be reitin xa bitene, “*Likesi ni ngan Nasaret tei.*”<sup>f</sup>

### Sion Baptaes Misak Mesen Suse na Iesu<sup>g</sup>

**3** <sup>1</sup>Huram holu mei mitavi, e moletin tei ba di uruvuol e provins tahal Sudea, hisen Sion. Xi di baptaes ni moletin xil e di bithiteni bit, <sup>2</sup>“!Muhiles ra tesaen namim xil, vengon xa Hi Suv dat sangas vis xamim e bit mei vahe Suv Toto e meulien namim! <sup>3</sup>Xi vari be ngan xa Hi tesep usili texo provet Aesea melele xa bit,

*“Lalong rae tei mistal e uruvuol xa bit,*

*!Musak mesen suse na Suv!*

*!Mupol ni suse nan imal!”* (Aes 40:3)

<sup>4</sup>Sion, eising nan lapol ni ni hil kamel e mituatu ni mavulut hilbe buluk. Anien an be kelmenamen e hani.<sup>h</sup> <sup>5</sup>Moletin xil hao di lateha tengon lateong ni. Rute langgo taon tahal Serusalem e rute sav xil mun langgo ut sav xil e provins tahal Sudea. E ngan teisav xil mun, langgo rute xil sangas ni Oeisal Sodan. <sup>6</sup>E melele xa lapusi, labit rat tesaen nae mini, e Sion baptaes ni xil e Oeisal Sodan.

<sup>7</sup>Farasi e Sadusi xil holu mun lamei visal Sion tengon vabaptaes ni xil. E melele xa Sion pus xil, misepin nggeih mi xil bitene, “!Xamim munggoni vanut tetal sasa xil xa di langas vin moletin xil ni vulonge! ?Visi misel xat xamim tengon mulesae ra longpangasien xa Hi isa ni mi moletin xil te ut etan? <sup>8</sup>Bos mak mu xa itiamu, mupol ni sexien xil xa ipisen ni xa mubiles ra tesaen namim xil ngamu. <sup>9</sup>E munanenemi ti munahit mutit ihos vengon xa Ebrahim be vatit avu namim. !E-e! Nabiteni reitin mi xamim, Hi ikila isak ni hat xil ak mei lihe moletin xil xa labe vatimol na avu Ebrahim. <sup>10</sup>Taxeak, akis mese tuai e vatit vatiee xil vus. E ngan xil xa latahur huit hosien ti, lite rat xil e liso ni ihe upang.

<sup>11</sup>“Inou nabaptaes ni xamim ni oei tang tengon vapisen ni xa mubiles ra tesaen namim, e ngan xa itutou ni nou, xi ibaptaes ni xamim itel xat

<sup>f</sup> 2:23 Latakil ti xa sepinien ak texo provet xave.    <sup>g</sup> 3:0 Tumulen ak de Mak 1:1-8; Luk 3:1-18; e Sion 1:19-28 mun    <sup>h</sup> 3:4 Kelmenamen be hisit grashopa tei xa eilep xa lakila lava ni, e hani be oei tei xa mikas xa sukabug xil di lapol ni.



Ninin Eo e upang. Xeihen nan mili navan, e natapin ti tangan name slev nan e naleh sandal nan. <sup>12</sup>Xi bue xat xi ngamu tangan vaseti moletin xil vus. Xi ipol ni ixoni moletin tei xa po savel nan e di miso rerat utut uit ra valite. Utut uit xil xa labos, ileh viton ni ha ilingi e nim nen, e valite xa misa, itin ni ni upang tei xa mahulong xa misakras vamat.”

### Sion Baptaes ni Iesu

<sup>13</sup>E melele nen ak, Iesu nggo provins tahal Kaleli e xi mun bemei e Oeisal Sodan tangan Sion vabaptaes ni. <sup>14</sup>E melele xa Sion pusi, misak pisi tangan vahiles nenemien na Iesu bit, “!E-e! ?Xouk di omei visal nou veneh? Momal tangan xouk ubaptaes ni nou vengan xouk obe eilep mili nou.”

<sup>15</sup>E Iesu bit rilomun ni mini bit, “Bos xa ubaptaes ni nou taxeak. Vengan xa, imak, ti ralipol ni holesok xil vus xa imal pe met Hi.” Misak ni, Sion maen ni, e baptaes ni Iesu.

<sup>16</sup>E melele xa Sion baptaes ni Iesu bus, Iesu mea ra oei. Vatei takes, tilang hat misaha, e xi pus Ninin na Hi minggu merau nggoni mae e mei dotan en. <sup>17</sup>E rae tei mistal nggo ut nesao bit, “Ngan ak be Natuxoli reitin xa eheien navan di en. Inou nabesi nou pupu ven.”

### Temat Misak Pis Iesu

**4** <sup>1</sup>Melele xa Iesu baptaes bus, Ninin Eo dela be uruvuol tangan vahur sakpisien vaxo he Temat. <sup>2</sup>Di e uruvuol e di bal ni anien. Melengien hanutap lu (40) mei mitavi, e mae nggati tova tang. <sup>3</sup>Di, Temat xa di misak pis moletin xil bemei visali. Xi biteni mi Iesu bit, “Xosxa reitin xa obe Nat Hi, ma usemae ni hat xil ak tangan lihiles mei lihe beret am.”

<sup>4</sup>E Iesu bit rilomun ni mini bitene, “!E-e! Ninapol ni ti, vengan xa Vanuvei Eo biteni bit,

*‘Moletin misakras vameul e anien kestang.*

*Xi di meul e sepinien xil vus xa mistal nggo vulonge Hi.’ ” (Dut 8:3)*

<sup>5</sup>Di, Temat nggur Iesu lube Serusalem, taon eo na Hi. Xi miling Iesu misoh e ut tei xa be nesao pupu e taep te Nim Eo. <sup>6</sup>E melele xa ludi nesao, Temat biteni mini bit, “Xosxa reitin xa obe nat Hi, hut ihe tan. Vengan xa Vanuvei Eo na Hi biteni bit,

*‘Iahova misemae ni masxaxa nan xil  
tangan lilaxat kuh xouk.*

*Xil lipo xatuk ni hexil,*

*tangan xouk unatun lem ti e hat.’ ” (Sam 91:11-12)*

<sup>7</sup>E Iesu bit rilomun ni mini bitene, “!E-e, ninapol ni ti! Vengan xa Vanuvei Eo biteni mun bitene,

---

<sup>i</sup> 3:13 Tumulen ak de Mak 1:9-11; e Luk 3:21-22 mun <sup>j</sup> 4:1 Tumulen ak de Mak 1:12-13; e Luk 4:1-13 mun

*‘Munasak pis Iahova ti xa be Hi namim  
tengan mukameti xa xi di mi xamim.’ ” (Dut 6:16)*

<sup>8</sup>Di, Temat nggur Iesu lube vathu tei xa be nesao xa be nesao. E rute ak, pisen kantri xil vus te ut etan mini e neta xil xa bos di en. <sup>9</sup>Xi biteni mini bit, “Holesok xil vus ak, nisa ni minuk xosxa utingeiril tang e umot minou.”

<sup>10</sup>E Iesu bit rilomun ni mini bitene, “!Setan, he reling nou! Ninapol ni ti vengan xa Vanuvei Eo biteni bit,

*‘!Umot mi Iahova xa be Hi nam  
e uteong xat xi kestang!’ ” (Dut 6:13)*

<sup>11</sup>Di, Temat be relingi, e masxaxa xil mei ladutou ni.

### **Iesu Pol Kokot ni Polien Nan e Provins tahal Kaleli**

<sup>12</sup><sup>k</sup>Melele xa Iesu di tamu e uruvuol, milongeong ni xa Herod Antipas, xa be suv toto te provins tahal Kaleli, xi tetal xat Sion Baptaes e teso ni tehe nim te xeih. Ma, Iesu dilomun be provins tahal Kaleli. <sup>13</sup>E xi tave ti mun metimal tahal Nasaret, xi ba sung di taon tahal Kapaniam xa be sangas ni Oei Kaleli. Taon ak de tan na vatimol na Sebulon xal Navtali tetiamu. <sup>14</sup>Ngan ak mistal tengang vapol ni naha xa Hi tesepepin ni texo provet Aesea mei mistal be reitin xa bit,

<sup>15</sup>*“Nanggur longeongen tei ba mi moletin xil  
xa ladi e tan na vatimol xil na Sebulon e tan na vatimol xil na  
Navtali.*

*Longeongen ak iha mi ngan xil xa ladi sangas ni Oei Kaleli xa de ist ni  
Oeisal Sodan.*

*Reitin, iha mi moletin xil tahal Kaleli, e rute xa ngan xil xa latave  
Siu ti lapolu en.*

<sup>16</sup>*Ngan xil xa ladi e maluxoluken te tesaen,  
xil lipus miehen na Hi xa mahulong.*

*Reitin, moletin xil xa lalonge, tetiamu lateti pe mamal te maten,  
e taxeak, xil lipusi xa ut milan sung xiak.” (Aes 9:1-2)*

<sup>17</sup>E melele nen ak ba, Iesu ba di bithiteni mi moletin xil bit, “!Muhiles ra tesaen namim xil, vengan xa Hi Suv dat sangas vis xamim e bit mei vahe Suv Toto e meulien namim!”

### **Iesu Mikes Moletin Hat te Sar Meseoen tengang Lathusili**

<sup>18</sup><sup>l</sup>Vatei, Iesu mikakao nggusil seri Oei Kaleli. E melele xa mikakao ba, pus timue lu xa di luso net nalu be oei. Hisealu Saemon (xa laling hisen tei mun be Pita) e Andriu (xa be tunali), e lube moletin tesar meseo en.

---

<sup>k</sup> 4:12 Tumulen ak de Mak 1:14-15; e Luk 4:14-15 mun    <sup>l</sup> 4:18 Tumulen ak de Mak 1:16-20; e Luk 5:1-11 mun

<sup>19</sup>E Iesu biteni mi xalu bit, “Lumei luhusil nou. Xosali di mulihi meseo xil tang, e inou nisak ni xamil mulihi moletin xil.” <sup>20</sup>Vatei takes, lustokovein net xil nalu e lunggusili.

<sup>21</sup>E melele xa latkakao latoba, Iesu pus timue lu mun, hisealu Tiemes xal Sion, xa lube nat Sepeti. Ludi bot del tamealu e di latdil pilei ni net natel xil. E melele xa Iesu mikes xalu, <sup>22</sup>vatei takes, lube reling bot e tamealu, e lunggusil Iesu.

### Iesu Pol ni Polien na Hi e Provins tahal Kaleli

<sup>23</sup><sup>m</sup>Melele xa Iesu mikes moletin hat ak bus, latnggusili e labe rute xil holu e Kaleli. E rute xil vus xa laba en, Iesu pispisi ni moletin xil e nim te pispisien na Siu xil. Xi di bithiten longeongen hos xa Hi di bemei tangan vahe suv toto na moletin nan xil, e di dal rerat meseien xil vus ra moletin xil. <sup>24</sup>E longeongen usili mikapis e provins tahal Siria mun. Misak ni, moletin xil te rute ak laleh ngenexil xa lamesei ni meseien savsav xil: ngan xil xa tenbexil pangas, ngan xil xa ninin tesa xil ladi e xil, ngan xil xa lamermesil, e ngan xil mun xa rut tenbexil mat. Laleh xil lamei visal Iesu e xi midal rat xil vus ra meseien nae. <sup>25</sup>E melele xa Iesu mikakao, vanut moletin xil holu langgusili. Xil langgo provins tahal Kaleli e provins tahal Sudea. Langgo taon tahal Serusalem, e provins tahal Dekapolis. E langgo ut xil mun xa lade ist te Oeisal Sodan.

### E Hu Tei, Iesu Pispisi usil Sexien Xil xa Momal Pe Met Hi

**5** <sup>1-2</sup>Melele xa Iesu pus tatit moletin xil xa eilep xiak, xi be nesao e hu tei del moletin nan xil e dotan tangan vapispisi mi xil.

#### *Pispisien usil Hisit Moletin Eah iaxa Hi Ituxol Xati*

- <sup>3</sup>Iesu biteni mi xil bit,  
 “Tuxolxatien iti mi ngan xil xa lamei vis Hi del he hon tang,  
 vengon xosxa imak, ma xi mei ihe suv toto nae e ilaxat kuh xil.  
<sup>4</sup>Tuxolxatien iti mi ngan xil xa di ladang,  
 vengon xa xosxa imak, ma Hi ipet rat nenemien nae.  
<sup>5</sup>Tuxolxatien iti mi ngan xil xa labe hanmerou e nenemien nae be tan,  
 vengon xa xosxa imak, ma Hi isa rute xil vus e ut etan ihe nae.  
<sup>6</sup>Tuxolxatien iti mi ngan xil xa iexil bei pupu ni tangan limal pe met Hi,  
 vengon xa xosxa imak, ma xi ipol ni mei ihe reitin e meulien nae.  
<sup>7</sup>Tuxolxatien iti mi ngan xil xa esaeen nae di e mosav xil,  
 vengon xa xosxa imak, ma Hi ipisen sexien te esaeen mi xil mun.  
<sup>8</sup>Tuxolxatien iti mi ngan xil xa langgusil xat Hi del nenemien xa memese,

<sup>m</sup> 4:23 Tumulen ak de Luk 6:17-19 mun    <sup>n</sup> 5:3 Tumulen ak de Luk 6:20-23 mun

vengan xa xosxa imak, ma xil lipus xat Hi ni mete.

<sup>9</sup> Tuxolxatien iti mi ngan xil xa di laling tomat di mi moletin xil, vengana xa xosxa imak, ma likes xil ni horamue xil na Hi.

<sup>10</sup> Tuxolxatien iti mi ngan xil xa di langgur longpangasien vengana xa di lapol ni naha xa momal pe met Hi, vengana xa xosxa imak, ma Hi mei ihe suv toto nae e ilaxat kuh xil.

<sup>11</sup> “Tuxolxatien iti mi xamim melele xa moletin xil di lasep xar ba ni xamim, di lasa longpangasien mi xamim, e di lasep usil xamim ni luvoson xil hao xa misa pupu vengana xa di munggul xat nou. <sup>12</sup> Reitin, texot sexien nen xil ak, latesa longpangasien teha mi provet xil xa latetiamu ni xamim. E muhesi xamim tang vengana muhur huite teni sung xa ihe eilep e ut nesao.”

*Pispisien Usil Rin xa Moletin Xil na Hi Langgoni Sol e Laet e Ut Etan*

<sup>13</sup> <sup>o</sup> Iesu misepin rilomun bit, “Xamim munggoni sol xa lalingi del xat moletin xil te ut etan. ?E xosxa neta xa misak ni sol ak bos be relingi, ma lipol ni mei ihos rilomun itep?<sup>p</sup> !Lasakras lapol ni vamak! Sol xa tavos ti, lasakras lapol ni ti neta ni. Bos tengan liso ni iha e moletin xil ti lihe tan en.

<sup>14</sup> “Xamim munggoni laet tei xa di mileluv ba mi moletin xil e ut etan. E nggoni ngan taxa taon tei xa de nesao e hu tei misakras vaxus, neketen namim mun, moletin xil lipus kila. <sup>15</sup> Moletin tovuol xa vasahan laet, ti, vaha vaso xati ni pesin tova. !E-e! Xi di misoxolen ni de nesao tengan ti ileluv kuhi e vangit nim ve moletin xil xa ladi en. <sup>16</sup> Nggusul sexien nen tak, laet te neketen namim ileluv kuhi iha mi moletin xil. Imak, ma melele xa moletin xil lapus sexien hos xil namim, xil ti lipet rat his Hi Tamemim xa de ut nesao.”

*Pispisien usil Rae Xil na Hi*

<sup>17</sup> Iesu pispisi mi moletin xil bit, “Munanemi ti munahit inou namei tengan naso rerat Rae xil na Mosis e pispisien xil na provet xil vaha. !E-e, tamak ti! Natamei ti tengan naso rerat xil. E namei tengan nisak ni naha xa rae xil ak di lasep usili mei ihe reitin. <sup>18</sup> Reitin mak nabiteni mi xamim xa holesok xil vus xa di e rae xil na Hi, reitin, mavulut sepinien xil vus xa latetisi misakras vakesae. Vatova, ut nesao e ut etan lalikesae, e sepinien xil na Hi misakras vakesae ituxoh melele vari xa ipol vuol ni polien xil teni. <sup>19</sup> Mak ma, ngan xil xa langgur xoteh rae tei takes na Hi

---

<sup>o</sup> **5:13** Tumulen ak de Mak 9:50; e Luk 14:34-35 mun    **P 5:13** Sol xa tetiamu tenaxoni ngan xil ti te xosali, tenamese ti. Tesak ni melele xa temer vuteili, ma neta xa tesak ni sol ak tehos tehe reling.

xa hokorong tang e lapispisi mi moletin sav xil tangan lipol ihusili, ma, e melele xa Hi te ut nesao mei ihe Suv Toto na moletin xil, xil mei lihe neta sav tang. E ngan xil xa di lalong xat rae xil na Hi e di lapispisi mi moletin sav xil tangan lipol ihusili, xil mei lihe moletin xil xa latellep e melele nen ak. <sup>20</sup>Vengan nabiteni mi xamim, xosxa momalen namim pe met Hi nali ti momalen na tisa xil te Rae xil na Mosis e momalen na Farasi xil mun, ma musakras mupus ti rute xa Hi be Suv Toto en.”

*Pispisien usil Tesaen te Ekaten*

<sup>21</sup>Iesu biteni mun mi xil bit, “Xamim mutelonge xa Mosis tesa rae ak mi avu namim xil tetiamu tehit, *‘Munahas vin ti moletin,’* (Eks 20:13) e moletin xa ipol ni imak ha lilepisi e lisa longpangasien mini. <sup>22</sup>E inou nabiteni mi xamim xa moletin xil vus xa iexil iat tua nae xil, Hi ilepisi xil e isa longpangasien mi xil. Reitin, xosxa moletin tei biteni mi tuneli bit, ‘vatum tovuol’, lihur moletin ak ha lilepisi e koten na Siu xil e lisa longpangasien mini. E xosxa moletin tei biteni mi tuneli bit, ‘otalang’, xi di nggusil suse tangan ha ihe Upang xa misakras vamat.

<sup>23</sup>“Mak, ma xosxa xoux uha tangan osa sanien nam mi Hi e hor te sanien, e e rute ak, onem rilomun ni neta tei xa moletin sav bit otepol ni mini xa tenamal ti, <sup>24</sup>ustokovein sanien nam iti nga rute ak sangas ni hor te sanien. Ti, uha mu userep rin nam itela. E melele xa userep xamil ivus, utilomun uha e usa sanien nam sung mi Hi.

<sup>25</sup>“E xosxa moletin tei bit vahuruk ove kot ve neta ngan xa xi bit otepol ni mini, ma utemanon ha userep rin nam itela melele xa di tamu munggusil suse tangan mulehe von koten. Maxani, xosxa onapol ni ti, melele xa multuxoh kot, xi ilinguk e he moletin te lepisien. Ma moletin ak mikila ilinguk e he polis, e polis mikila ilinguk e nim te xeih. <sup>26</sup>Reitin li nabiteni minuk, xoux utat rute ak e osakras ova ha vem vamase ha vuma ... uxal rat vuol ni faen xa lalingi di xatuk.”

*Pispisien usil Sexien te Kanen ni Atou mu Tiramue na Mosav Xil*

<sup>27</sup>E Iesu pispisi mun mi xil bitene, “Xamim mutelonge xa Mosis tesa rae ak mi avu namim xil tetiamu tehit, *‘Munakan ni atou mu tiramue na mosav ti.’* (Eks 20:14) <sup>28</sup>E inou nabiteni mi xamim xa melele xa moletin tei xa miteli ngamu pus atou tei e ngguri e nenemien nan tang, e pe met Hi, nggoni ngan xa mikan ni ngamu vengan pol misa tuei dela e nenemien nan.

<sup>29</sup>Xosxa metom metu isak ni xoux umot e tesaen, ukis rati e uso ni iha. Ihos mak mu xa rut tenbom tang ikesae, ili ngan xa liso sen tenbom xil vus ha ikesae e Upang xa misakras vamat. <sup>30</sup>E xosxa hem metu isak ni xoux umot e tesaen, uta xotehi e uso ni iha. Ihos mak mu xa rut tenbom tang ikesae, ili ngan xa liso sen tenbom xil vus ha ikesae e Upang xa misakras vamat.”

*Pispisien usil Sexien xa Moletin Miteli, Di, Mistokovein Atou Nan*

<sup>31</sup> Iesu pispisi mun mi moletin xil bitene, “Xamim mutelonge xa Mosis tesa rae tei mi avu nar xil tetiamu tehit, ‘*Moletin xa bit vastokovein atou nan, isa Setifiket te Silaen mini. Ti, mikila istokovein ni sung.*’ (Dut 24:1) <sup>32</sup> E inou nabiteni mi xamim xa melele xa tiramue tei mistokovein atou nan, xa tamaen xi ti mi tiramue sav, tiramue ak di pol ni tesaen pe met Hi. Vengan naha xa tiramue ak di pol ni isak ni atou ak ha ihur moletin sav xa be tesaen pe met Hi. E moletin xa nggur atou ak, pe met Hi nggoni ngan taxa di mikan ni atou na tiramue ak.”

*Pispisien usil Sexien xa Moletin Di Pol ni Hitxatien Tei*

<sup>33</sup> Iesu pispisi mun mi moletin xil bitene, “Xamim mutelonge xa Mosis tesa rae tei mi avu nar xil tetiamu tehit, ‘*Munaluvos ni his Hi ti e sepinien xil namim, e mupol vuol ni naha xa mutehit xati pe met Hi tengen mupol ni.*’ (Nam 30:2) <sup>34</sup> E inou nabiteni mi xamim xa munasuv xat hitxatien namim xil ti natel his ut nesao, vengan xa rute ak be vontoen na Hi.<sup>r</sup> <sup>35</sup> E munasuv xati ti mun natel his ut etan vengan xa be von kaele Hi.<sup>s</sup> E munasuv xati ti mun ni his Serusalem, vengan be taon na Hi xa be Suv Toto.<sup>t</sup> <sup>36</sup> E munasuv xati ti mun ni vatummim vengan musakras muviles hilimim tei takes mei vamieh mu vamaluxoluk. <sup>37</sup> Mak ma melele xa mubit neta tei, muhiteni tang muhit, ‘Io, be reitin,’ mu, ‘E-e, tave reitin ti.’ Vengan xosxa musuv xat sepinien namim ni neta tei, ma sexien ak nggo Temat vari tang.”

*Pispisien usil Sexien xa Moletin Di Misa Rilomun ni*

*Pangasien mi Mosav Tei xa Pol Misa Mini*

<sup>38</sup> Iesu pispisi mun mi moletin xil bitene, “Xamim mutelonge xa Mosis tesa rae tei mi avu nar xil tetiamu tehit, ‘*Xosxa moletin tei purun met moletin sav, ma ngan xil te lepisien lipurun meten. E xosxa moletin tei diroh luh moletin sav, ma xi mun, litiroh luhon.*’ (Eks 21:24) <sup>39</sup> E inou nabiteni mi xamim xa munasa rilomun ni ti sexien tesa mi moletin tei xa pol misa mi xamim. Mak ma, xosxa moletin tei mei mileves vim metu, umaen ni mun ileves vim meil. <sup>40</sup> E xosxa moletin tei mingguruk mube kot ve kaon nam, e nggeih xatuk tangan usa eising nam mini ixo kaon nam, ma umaen ni ihur kot nam te masoh mun. <sup>41</sup> Xosxa moletin tei te vaeen nggeih xatuk tangan upo ateli nan ha ituxoh kilomita tei, xouk upoe sung ha ituxoh kilomita ihe lu. <sup>42</sup> E xosxa moletin tei dak kesuk ve neta ngan, usa ni mini. E melele xa moletin tei ien bei vahur neta tei nam vahe vuteili tang, onakenin ni ti, e umaen ni tang mini.”

<sup>¶</sup> 5:31 Tumulen ak de Mat 19:9; Mak 10:11-12; e Luk 16:18 mun    <sup>†</sup> 5:34 Aes 66:1; Tiem 5:12    <sup>§</sup> 5:35 Aes 66:1    <sup>‡</sup> 5:35 Sam 48:2    <sup>‡</sup> 5:38 Tumulen ak de Luk 6:29-30 mun

*Pispisien usil Sexien te Eheien xa Moletin Ipiſen ni mi Elu Nan Xil*

<sup>43</sup> Iesu pispisi mun mi xil bitene, “Xamim mutelonge xa Mosis tesa rae ak mi avu namim xil tetiamu tehit, *‘Iemim ihei tuemim xil.’* (Lev 19:18) E, *‘Musa ni elu namim xil.’*”<sup>44</sup> E inou nabiteni mi xamim xa iemim ihei elu namim xil e ti musis ve ngan xil di lapurun xamim. <sup>45</sup> Ixo sexien ak, mupisen ni xa mube horamue xil na Tamemim xa de ut nesao. Vengan xa xi iaxa di pol ni eai misinasin xat moletin tesa xil del ngan xil mun xa labos. E misak ni us mus tengan vakas naho sa ngan xil xa lamal pe meten e ngan xil mun xa latamal ti. <sup>46</sup> Xosxa eheien nam di mi ngan xil kestang xa eheien nae di e xouk, onemi obit Hi isa sanien tova minuk ven? !E-e, tamak ti! !Vengan ngan xil mun xa di laleh takis xil di lapisen eheien mi tua nae xil! <sup>47</sup> E xosxa di onggur pilei tumali xil kestang, sexien ak ihos ili sexien na mosav xil itep? Vengan ngan xil mun xa latakil ti Hi di lapol ni sexien ak.

<sup>48</sup> “E xamim, bos xa mumal tevi ixoni ngan taxa Tamemim xa de ut nesao momal tevi.”

*Pispisien usil Sexien xa Lasa Tutouen mi Hooe Xil*

**6** <sup>1</sup> Iesu pispisi mi moletin xil bit, “Melele xa mupol ni sexien xil xa Hi di biteni bit lamal pe meten, mulaxat kuh xamim tengan munapol ni ti pe met moletin xil tengan limerere ni xamim ven. Vengan xa xosxa mupol ni imak, ma Tamemim xa de ut nesao nasa ti huite teni mi xamim.

<sup>2</sup> “Mak ma, melele xa musa neta ngan mi hooe tei, munapol ni ti naxoni ngan xil xa lamese nggo hilibexil tang. Vengan melele xa di lasak mesen xil tengan lasa neta tei, xil labe nim te pispispian mu labe suse xil xa mahulong, e di lapol ni moletin te polien nae labui amaru tengan ikes viton moletin xil limei e mei lipus naha xa xil lipol ni e lisa merereen mi xil. Nabiteni reitin mi xamim, xil di tuei langgur huite ve naha xa lapol ni xiak, e linahur ti mun huite teni e ut nesao. <sup>3</sup> E melele xa mututou ni hooe xil, mupol xuxus ni tang e suse xa tua hos namim xil linakil ti vari. <sup>4</sup> Imak, ma moletin xil linakil ti tutouen xa di musa ni mi mosav xil. E Tamemim xa pus naha xa moletin xil di lapol xuxus ni, xi vari iaxa isa huite teni mi xamim.”

*Pispisien usil Sexien te Sisen*

<sup>5</sup> Iesu pispisi mi moletin xil mun bitene, “Melele xa musis, munapol ni ti naxoni ngan xil xa di lapol ni nggo hilibexil tang. Vengan iexil bei tang

---

† 5:43 Tumulen ak de Luk 6:27-28,32-36 mun † 5:43 Latakil ti xa sepinien xati ak texo xave, e Sam 139:21-22 di biteni bit, *‘Usa ni ngan xil xa labe elu mi Hi.’* † 6:5 Tumulen ak de Luk 11:2-4 mun

tengan lasoh e lasis e nim te pispisien xil mu e seri suse xil xa mahulong tangan moletin xil holu lipus naha xa di lapol ni. Nabiteni reitin mi xamim, xil di tuei langgur huite ve naha xa lapol ni xiak. <sup>6</sup>E melele xa musis mi Hi, ihos mak mu tangan muhe nim, mukoe xol puiteh, e musis mi Hi Tamemim xa moletin xil lasakras lapusi. E Tamemim xa di pus naha xa moletin xil di lapol xuxus ni, xi vari isa huite teni mi xamim.

<sup>7</sup>E melele xa di musis, munasepin ti natel sepinien xil holu xa be neta sav tang naxoni ngan xil xa latakil ti Hi reitin. Vengan ngan xil ak di lanemi labit hi nae xil liteong ni sisen nae xil melele xa limangang ihe eilep ni sepinien holu. <sup>8</sup>Reitin, munapol ni ti naxoni xil, vengan melele xa mutasis ti mu, e Tamemim mikil vuol ni ngamu naha xa mube tamure ni.

<sup>9</sup>“Mak ma, melele xa musis, muhiteni imak,

‘Hi Tamemem xa ode ut nesao,

hisom be eo e momal tangan musa merereen minuk.

<sup>10</sup> Masis tangan mei uhe Suv Toto namem e ulaxat kuh xamem.

E nenemien xil vus nam istal ihe reitin e ut etan ixoni ngan xa testal ngamu e ut nesao.

<sup>11</sup> Usa anien li mi xamem

ipin te melengien xil vus.

<sup>12</sup> Onaketeh ti nasa mun mi xamem ve holesok xil xa mapol ni tamal ti.

Upol ni ixoni ngan xa xamem mun di maketeh bos rilomun ni ngan xil xa di lapol misa mi xamem.

<sup>13</sup> Onamaen sakkpisien xil te xeih ti namei e xamem, e usikoe xol xamem ra he Temat.<sup>y</sup>

<sup>14</sup>“Xosxa mosav tei pol misa mi xamim e muketeh bos rilomun mini, ma Hi Tamemim mun xa de ut nesao iketeh ihos ni xamim ve naha xa mupol ni. <sup>15</sup>E xosxa munaketeh ti navos mi mosav xil, ma Hi Tamemim mun naketeh ti navos mi xamim.”

*Pispisien usil Sexien Halen ra Anien ve Sisen*

<sup>16</sup>Iesu pispisi mi moletin xil mun bitene, “Melele xa mubal ra anien ve sisen, munapol ni ti naxoni ngan xil xa di lapol ni nggo hilibexil tang. Vengan xa melele xa labal ra anien, xil di lapol ni valnaoxil mikenu tangan moletin xil lipus kila xa mae nggat pangas xil. Inou nabiteni reitin mi xamim xa xil langgur huite teni ngamu. <sup>17</sup>E melele xa mubal ra anien

---

<sup>y</sup> 6:13 Tetiamu, melele xa moletin xil latetis rilomun ni vanuvei na Matiu, lateso rin ni sepinien ak xa bit, “Ve lelaxatien, xeihen e miehien de xouk vehakut e misakras vavus. Reitin.”



ve sisen, bos mak mu tangan mukas valnaomim e musak kuh hilemim ixoni ngan taxa di mupol vehakut ni. <sup>18</sup>Imak, ma mosav xil linapus kil ti xa di mubal ra anien. E Hi Tamemim xa moletin xil lasakras lapusi, xi kestang ipus kila. Reitin, Hi Tamemim xa di pus kil naha xa moletin xil di lapol xuxus ni, xi vari iaxa isa huite teni mi xamim.”

*Pispisien usil Nenexoen ve Holesok Xil te Ut Etan*

<sup>19</sup>ⁱJesu pispisi mi moletn xil mun bitene, “Munaserep holesok namim xil ti nahe holu e ut etan. Vengan holesok xil te ut etan ak, pepepi xil e turara likila lipangei, e moletin te kanen mun mikila ihe nim e ha ikan ni. <sup>20</sup>E ihos mak mu tangan muserep holesok namim ihe holu e ut nesao. Vengan e rute ak, pipepi xil e turara lasakras lapangei, e moletin te kanen mun misakras vahe nim e ha vakan ni. <sup>21</sup>Vengan nenemien namim iti e rute xa di muserep holesok namim xil iti en.

<sup>22</sup>“Metemim nggoni laet te tenbemim. Xosxa metemim bos, ma muti e miehen e tenbemim mikila ipol ni sexien xil xa bos. <sup>23</sup>E xosxa metemim isa, ma muti e maluxoluken e ti mupol ni sexien tesa xil. E xosxa miehen xa vate xouk be tovuol, ma maluxoluken xa ite meulien nam ihe eilep pupu.<sup>a</sup>

<sup>24</sup>E Iesu biteni bit, “Moletin tei misakras vapol mi masta vahe lu (2). Maxani, ien iat tei e ien ihei ngan tesav; mu nenemien nan iti tei ixeih, e isin ni ngan tesav. Ve rin ak, musakras muhusil xat Hi vatel holesok xil te ut etan.

<sup>25</sup>“Ma vengari ak be reitin, bos tangan munanexo ti ve naha xa mua ni mu naha xa mumu ni, mu naha xa musing xol tenbemim ni. ?Midep, meulien nar be te anien en tang? ?Mu tenbexir be tangan taxa ti rasing xole? !E-e, tamak ti! Meulien xa di e xamim bos mili anien e naha xa di musing ni. <sup>26</sup>Mupus pis tuman xil xa di langga xolol. Xil latalih ti neta, e lataserep ti anien ae vati e povah mae xil. E tave ti neta xa latapol ni ti, e Tamemim xa de ut nesao iaxa di bangan xil. E pe met Hi, xamim mubos mak mu muli tuman xil ak. Ma mukil kuhi xa xi ilaxat kuh xamim. <sup>27</sup>Nenexoen ve neta ngan misakras vaso rin ni haoa tei mun vate meulien namim.

<sup>28</sup>“?Mak ma, veneh iaxa di munexo e rin te eising? Munem pis hungovae xil xa di lameul. Xil latapol ti e latatih ti eising nae. <sup>29</sup>E nabiteni mi xamim xa suv toto Solomon tetiamu, eising nan xil tehos xa tehos, e hungovae xil ak, lasing xol xil bos mak mu lali. <sup>30</sup>Hi mising xol

---

<sup>z</sup> 6:19 Tumulen ak de Luk 12:33-34; 16:13; e 12:22-31 mun    <sup>a</sup> 6:23 Miehen e maluxoluken lube vole usil sexien nar xil. Melele xa rapol ni sexien xil xa bos, ngan ak di pisen ni xa radi e miehen na Hi. E melele xa rapol ni sexien xil xa misa, ngan ak di pisen ni xa radi e maluxoluken.

hungovae xil ak bos xa bos, tave ti neta xa di lameul usil suse melengien tei takes, di, e melengien sav nen, lameles e lakiri. Di, ladaveas viton ni e laso ni be upang. ?E xosxa Hi di mising xol xil mak, munemi mubit misakras vasing xol xamim vamaq? !Ei, neketen namim hokorong tova tang!

<sup>31</sup>Ma munanexo ti ve naha xa muan ni, ve naha xa mumu ni, mu ve naha xa musing ni. <sup>32</sup>Vengan hisit nenexoen xil xa mak be na ngan xil xa latakil ti Hi reitin. Vengan Hi Tamemim mikil vuol ni holesok xil vus xa mube tamure ni e meulien namim. <sup>33</sup>E ngan xa eilep mak mu iaxa mumaen Hi mei ihe suv toto e meulien namim e mupol ni naha xa momal pe meten. Melele xa mupol ni imak, holesok xil mun te meulien, Hi isa ni mi xamim. <sup>34</sup>Ma munanexo ti mun ve neta xil xa mulehi visuvong, vengan mukila munem usili visuvong sung. Vengan sakkipsien xil xa muhisu mini xosali, pipin te xosali. Munaleh nenexoen xil te visuvong ti namei nahe te xosali.

*Pispisien usil Rin xa Linalepis Mosav Xil Ti*

**7** <sup>1</sup>Iesu pispisi mun mi moletin xil bitene, “Onalepis moletin sav ti tangan opisen tesaen nan xil. Vengan xosxa upol ni imak, ma Hi mun ilepis xouk tangan ipisen tesaen nam xil. <sup>2</sup>Vengan Hi ilepis xouk ixo hisit sexien taxa xouk di opol ni mi moletin sav. E sexien xa di osikel ni mosav xil, Hi isikel ni xouk ixoni.

<sup>3</sup>“?Veneh ma di opus kil saxut liei tei xa hokorong tang xa de met tumeli, e otapus kil ti vari merut liei xa mahulong xa de metom?<sup>c</sup>

<sup>4</sup>?Veneh ma di osis tumali obit, ‘Tua li, maen nou namur rat saxut liei xai ra metom,’ melele xa merut liei tei xa mahulong dat e metom? <sup>5</sup>Xouk di opol ni sexien hos xil nggo hilibom tang. Bos mak mu tangan upo rat merut liei xa da xat metom, ti, uketeh kuhi sung tangan ukila uhur rat saxut liei ra met tumali.

<sup>6</sup>“Holesok eo na Hi, munasa ni ti mi kuli xil, maxani, lihiles e linggas rilomun ni xamim. Reitin, munaso holesok xil ti xa bos mi vueili xil vengani lihe tan tang en.”<sup>d</sup>

*Pispisien usil Sexien xa Rasis Hi ve Neta Ngan*

<sup>7</sup>Iesu pispisi mi moletin xil mun bitene, “Xosxa iem ihei neta ra Hi, usisi, ma isa ni minuk. Reitin, xosxa ulang vesi, ma ukameti. Sisen nam ixoni ngan taxa ti urei puiteh na Hi, ma xi isaha minuk. <sup>8</sup>Vengan moletin

---

<sup>b</sup> 7:1 Tumulen ak de Luk 6:37-42 mun    <sup>c</sup> 7:3 Koute te liei xalu ak be tesaen.    <sup>d</sup> 7:6 Nggo vole ak, Iesu di mipispisi xa melele xa di osa nenemien eo xil na Hi xa bos pupu mi ngan xil xa latamese ti pe met Hi, vengani xa linem male ni tang e lihiles lipurun xamim mun tang.    <sup>e</sup> 7:7 Tumulen ak de Luk 11:9-13 mun

xil vus xa di lasisi ve neta ngan, xil di langguri; ngan xil xa di lalang ves neta ngan, lakameti; e puiteh di misaha mi ngan xil xa di laresi.

<sup>9</sup>“?Visi e xamim tata xil mikila vasa meralihat tei mi horamue nan melele xa misisi ve anien? <sup>10</sup>?Mu misa tetal sasa tei mini melele xa misisi ve meseo? <sup>11</sup>Ma, tave ti neta xa mube moletin tesa xil, e mukil kuh sexien mak xa ti musa sanien xa bos mi horamue namim xil. ?E midep ni sexien na Hi Tamemim xa bos pupu xa de ut nesao? Sexien nan bos mili sexien namim, e isa holesok xil xa bos mi ngan xil xa ti lisisi.”

*Pispisien usil Suse xa Moletin Ihusili tangan Ihe Ut Nesao*

<sup>12</sup><sup>f</sup>E Iesu biteni mun mi moletin xil bit, “E holesok xil vus xa di mupol ni, mupol ni mi moletin sav xil ixoni ngan taxa iemim bei tangan xil lipol rilomun ni mi xamim. Vengan xa nenemien ak be vatite te Rae xil na Mosis e Tisen na provet xil tetiamu.”

<sup>13</sup>Di, Iesu biteni bit, “Xamim, suse tangan muve ut nesao tave temale ti. Bos tangan muxo puiteh te suse ak xa hokorong. Vengan puiteh tei mun xalu xa eilep da, e moletin xil holu iaxa di langgo en e di langgusil suse nen xa be temale tang. E e hoxalit suse ak, xil likamet longpangasien xa mahulong pupu. <sup>14</sup>E puiteh xa be te suse xa nggeih xa hoxalite teni be meulien sal, puiteh ak hokorong tang. Moletin xil di lalang vesi, e vahis tang likameti e lixo en.”

*Pispisien usil Rin xa Itep iaxa Lipus Kil Provet te Luvosen Xil*

<sup>15</sup><sup>g</sup>Iesu misel xat moletin xil bit, “Mulaxat kuh xamim tangan provet xil te luvosen mei linaluvos xamim ti. Vengan xil langgoni sipsip xil xa labos e lamerou nggo hilbexil tang. E e tinexil, xil langgoni kuli reran xil xa lasa xa di langas purun moletin xil. <sup>16</sup>Xamim mupus kil xil ixo huite te meulien nae. Moletin misakras valeh huit tavu ra vatit ai, mu huit mango ra vatit vilu.<sup>h</sup> <sup>17</sup>Usil rin ak, vatiei xil vus xa bos di laso huite xil xa bos, e vatiei xil xa misa di laso huite xil xa misa. <sup>18</sup>Vatiei xil xa bos, lasakras laso huite xil xa misa, e vatiei xa misa lasakras laso huite xil xa bos. <sup>19</sup>E vatiei xil vus xa lataso huite ti vahos, lita rati e ha liso ni ihe upang. <sup>20</sup>Usil sexien ak vari, mupus kil provet te luvosen xil ak ixo huite te meulien nae.

<sup>21</sup>“Moletin xil hao xa, taxeak, di lakes nou ni ‘suv’, xil linava ti rute xa Hi te ut nesao be Suv Toto en. Ngan xil kestang xa di lapol ni naha xa Tata navan e ut nesao ien bei tangan xil ti lipol ni, xil iaxa ha liti visali. <sup>22</sup>E Melengien te Lepsien,<sup>i</sup> moletin xil hao limei visal nou e ti lisepin

<sup>f</sup> 7:12 Tumulen ak de Luk 13:24 mun    <sup>g</sup> 7:15 Tumulen ak de Luk 6:43-44; e 13:25-27 mun

<sup>h</sup> 7:16 Sepinien xati teni bit, “moletin misakras valeh huit grep ra vatiei xa sanute di en, mu huit fik ra vatiei mun xa misa.”    <sup>i</sup> 7:22 Tumulen ak de Rev 20:11-15 mun

e rin nae lihit, ‘!Suv, Suv! ?Midep? E hisom matehit rat sepinien na Hi, matehol rerat ninin tesa xil, e matepol ni merekel xil holu.’ <sup>23</sup>Ti, inou nihiteni mi xil kekes nihit, ‘!Muhe reling nou xamim xa di mupol misa! !Natakil ti vari xamim!’ ”

*Pispisien usil Rin xa Meulien Nar Ihusil Sepinien na Hi Itep*

<sup>24</sup>JDi, Iesu misepin kor mi moletin xil nggo vole tei bit, “Xosxa xamim mulong sepinien navan xil ak e ha mupol ihusili, ma xamim munggoni moletin tei xa be metisou xa mikili ni nim man de tan tei xa nggeih.

<sup>25</sup>Us mus, oei mileh be eilep, e votiang bas nim ak, e tameru ti vengan misoh e tan xa nggeih. <sup>26</sup>E xamim xa di mulong sepinien navan xil ak e mutahusili ti, munggoni unu tei xa mikili ni nim man dat suhon tang.

<sup>27</sup>Us mus, oei mileh be eilep, e votiang bas nim ak. !Ma nim man meru e mikiri lel vari tang!”

<sup>28</sup>Melele xa Iesu pispisi mi tatit moletin xil ak bus, xil lamesep pupu ve pispisien nan xil. <sup>29</sup>Vengan xa xi pispisi mi xil nggoni ngan xa pispisien nan xil nggo vulonge Hi vari tang. Pispisien nan xil taxoni na tisa xil te Rae xil na Mosis ti xa dit labit rilomun ni sepinien na tisa sav xil tang.

**Iesu Dal Rat Moletin Tei ra Meseien Leporsi**

**8** <sup>1</sup><sup>k</sup>Melele xa Iesu mipispisi mi moletin xil bus, xi bemei etan ra hu ak, e tatit moletin xil langgusili. <sup>2</sup>Di, latemanin, moletin tei xa meseien lepori da en bemei e hilaep te xil, mitingeiril pe met Iesu, e biteni mini bitene, “Suv, xosxa iem bei li, xouk ukila upol pilei ni hilbeok mei vamese rilomun.”

<sup>3</sup>Ma, Iesu mite hen duxoli e biteni mini bit, “Bos, ieok bei nipol ni. !Omese rilomun!” Vatei takes, moletin ak, meseien nan be relingi e hilben mei memese rilomun. <sup>4</sup>Di, Iesu biteni mini bitene, “!Uteong ni nou! Onahiteni ti mi moletin tova naha xa mistal ni xouk. Uha upisen xouk mi pris tei e Nim Eo, e usa ni mi Hi sanien xa Mosis tesemaen ni moletin xil tengang lisa ni. <sup>l</sup> Sexien nam xil ak ipisen ni mi xil xa tenbom bos ngamu e omese rilomun.”

**Iesu Nggur Rat Meseien ra Slev Tei na Vat na Moletin Xil te Vaeen tahal Rom**

<sup>5</sup><sup>m</sup>Iesu mikakao be taon tahal Kapaniam. E melele xa mistal en, vat na moletin xil te vaeen tahal Rom bemei visali e misis tutouen mini bit, <sup>6</sup>“Suv li, slev tei navan de tim e di longpangasi xi holu. Rin tei mat e da nga voninen.”

---

J <sup>7:24</sup> Tumulen ak de Luk 6:47-49 mun <sup>k</sup> **8:1** Tumulen ak de Mak 1:40-45; e Luk 5:12-16 mun <sup>l</sup> **8:4** Lev 14:1-32 <sup>m</sup> **8:5** Tumulen xa de Luk 7:1-10 mun

<sup>7</sup>Ma Iesu biteni mini bit, “Niha nihur rat meseien nan ihe relingi.”

<sup>8</sup>E vat ak bit rilomun ni mini bit, “O suv, onanexo pupu ti venou vengan xa natapin ti tangan mei ove tim savan. E nakila xa xosxa usepin tang, ma slev navan ilonge ihos rilomun. <sup>9</sup>Vengan xa eilep navan da, e inou mun nabe vat na moletin xil te vaeen. Misak ni, melele xa nabiteni mi tei e xil nabit, ‘He inggaxor,’ ma xi ba. E melele xa nabit, ‘Amei,’ xi bemei. E melele nabiteni mi slev navan nabit, ‘Upol ni netak,’ ma mipol ni.”

<sup>10</sup>Melele xa Iesu milong sepinien nan, mitemanin ni e biteni mi ngan xil xa di langgusili bit, “Reitin mak, nabiteni mi xamim xa, e rin na mol-Isrel xil, natakameti mu moletin tova xa neketen nan nggeih vaxoni ngan Rom ak. <sup>11</sup>E melele xa Hi mei ihe suv toto, xi ipol ni anien tei xa mahulong itel moletin nan xil. E melele nen ak, moletin xil holu xa latave Siu ti mei lianien vituei itel Ebrahim, Aesak e Siekob, avu nar xatel tetiamu. <sup>12</sup>E holu e mol-Isrel xil xati, Hi iso rerat xil lihe hale e rute tei xa maluxoluk, e xil ti limuis, e ti lingas luhe ve longpangasien nae xil.”

<sup>13</sup>Di, Iesu biles e biteni mi vat ak bit, “Utilomun uhe tim. Holesok xil istal ixoni ngan xa di oneket en.” E melele nen ak vari, slev na vat ak, tenben bemei bos rilomun.

### **Iesu Mileh Rerat Meseien ra Moletin xil Holu**

<sup>14</sup><sup>n</sup>Melele xa Iesu duxoh tim sa Pita, be nim e pusi xa avu kokon nan di pat de voninen, ven mitin. <sup>15</sup>Melele xa pusi mak, Iesu mite hen duxoh he tovoli ak. E melele xa duxoli, meseien nan be relingi e mitamea. Di, tovoli ak nggur rut anien tei e misa ni mi Iesu.

<sup>16</sup>Melele xa meteneai be tan, moletin xil laleh ngan xil xa ninin tesa di e xil, e Iesu nggol rerat ninin tesa xil ak labe reling xil nggo sepinien nan kestang. E ngan xil xa lamesei, xi dal rat xil vus ra meseien nae. <sup>17</sup>Iesu pol ni mak tangan vasak ni naha xa Hi tehiteni texo provet Aesea mei ihe reitin xa biteni,

*“Xi mileh rerat meseien nar xil  
e po rat pangasien nar xil mun.” (Aes 53:4)*

### **Iesu Misel Xat Ngan Xil xa Labit Lavusil Xati tangan Linem Kuhi Mu**

<sup>18</sup><sup>o</sup>E melele xa Iesu pusi xa tatit moletin xa mahulong ladi xorelisi, xi misemae ni moletin nan xil tangan livue xat bot tei tangan lihe ri Oei Kaleli. <sup>19</sup>E melele xa Iesu e moletin nan xil di laba, tisa tei te Rae xil na Mosis bemei visali e bitene, “Tisa, ut xave xa uha en, inou nihusiluk.”

---

<sup>n</sup> 8:14 Tumulen ak de Mak 1:29-34; e Luk 4:38-41 mun    <sup>o</sup> 8:18 Tumulen ak de Luk 9:57-62 mun

<sup>20</sup>E Iesu bit rilomun ni mini bit, “Asu xil,<sup>p</sup> valexil mae di, e tuman xil mun, nu mae di. E Nat Moletin, tim san xati te pat en tovuol.”

<sup>21</sup>E moletin tei mun xa di nggusil Iesu biteni mini bit, “Suv, ieok bei tangan namusiluk. E itiamu, umaen nou nitilomun nihe tim savan e nilaxat tata navan ituxoh melele xa imat e nitihin ni.”

<sup>22</sup>E Iesu biteni mini bit, “Xouk uhusil xat nou xosali, e uling ngan xil xa lamat tangan ti lithin ngenexil xa lamat.”

### Iesu Misemae ni Votiang e Oei, e Lulong Xat Raen

<sup>23</sup>Melele xa Iesu misepin bus, xi be bot e moletin nan xil langgusil xati tangan lave ri Oei Kaleli. <sup>24</sup>E melele xa di lalis laba, Iesu porsae. E tavehi ti, latemanin ni votiang tei mea e mu nggeih. Ngan ak misak ni oei nggialial holu, e tahe bemei e bot, sangas vamerir. E Iesu, xi por vovong. <sup>25</sup>E moletin nan xil laba lasiasi ni labit, “!Suv, ututou ni xamem li! !Ramat xi tak!”

<sup>26</sup>Iesu bit rilomun ni mi xil bitene, “?Ulimim di mikan veneh? !Neketen namim hokorong tova tang!” Di, mitamea e misemae ni votiang e oei bit, “!Ta kat!” E vatei takes, xalu lube tan e an mei bos rilomun.

<sup>27</sup>Melele xa moletin nan xil lapusi mak, latemanin e lasis pilei xil mun tang labit, “?Moletin ak be hisit moletin eah? !Neta sav xa votiang e oei, xalu mun di lulong xat raen!”

### Iesu Nggol Rerat Ninin Tesa Xil Labe Reling Moletin Lu

<sup>28</sup>Melele xa lamei ut e ri oei, Iesu del moletin nan xil laduxoh tan tahal Kadara. Vatei takes, moletin lu lunggo vangihat xil xa be von tahinen e lumei visal Iesu. Moletin xalu ak, ninin tesa xil ladi e xalu e lasak ni xalu di lubas purun moletin xil vus xa lamei sangas e rute ak. Misak ni moletin xil lasakras laka pas rute xa ludi en. <sup>29</sup>Melele xa lamei sangas, lukei nggeih ba ni Iesu lubit, “!Nat Hi! ?!Upol ni naha mi xamem!? ?Umei inggak tangan usa longpangsien mi xamem? ?Onatatil ti melengien xati teni xa ti imei?”

<sup>30</sup>Tave sotin ti, tatit vueili xil holu di lasu. <sup>31</sup>Ma ninin tesa xil ak ladak kes Iesu labit, “Xosxa obit uhol rerat xamem, uma e ni xamem muhe vueili xil xor.”

<sup>32</sup>Ma Iesu biteni mi xil bit, “!Muha!” Ma ninin tesa xil ak labe xat vueili xil. E vatei takes, tatit vueili xil ak laloh labe velite etan e ba lamerir e Oei Kaleli, e xil vus lalel. <sup>33</sup>Ngan xil xa di lalaxat vueili xil ak, ulixil mikan, ma laloh labe taon. E taon, latumul usil naha xil xa latepusi

---

**p 8:20** Sepinien xati teni bit, ‘fokis xil’ xa langgoni kuli reran xil xa di lapol ni valexil mae e tan nggoni asu xil di lapol ni. **¶ 8:23** Tumulen ak de Mak 4:35-41; e Luk 8:22-25 mun **r 8:28** Tumulen ak de Mak 5:1-20; e Luk 8:26-39 mun

e naha xa testal mi moletin xalu xa ninin tesa tete xat xalu. <sup>34</sup>Misak ni moletin xil vus te taon ak laba tangan lapusi ti Iesu. E melele xa lapusi, ladak kesi tangan vahe reling tan nae.

### Iesu Misak ni Moletin Tei xa Rin Tei Mat Mei Bos Rilomun

**9** <sup>1</sup>Iesu e moletin nan xil labe bot e langgur xoteh Oei Kaleli ladilomun labe Kapaniam, taon xati nan. <sup>2</sup>Melele xa laduxoh taon, rut moletin xil lapo moletin tei del vet man tang e lamei ve Iesu vengan xa ri moletin ak mat. E melele xa Iesu pus kila xa neketen nae di, xi biteni mi moletin xa rin tei mat bit, “Natuxoli, umaal. Ninaketeh ti mun nasa minuk ve tesaen nam xil.”

<sup>3</sup>Rut tisa xil te Rae xil na Mosis ladi sangas e lalonge. Ma labiteni mi xil mun tang labit, “!Ei, moletin ak di misep xar ni Hi, vengan xa di misepin nggoni ngan taxa lehit xi be Hi vari!”

<sup>4</sup>E Iesu mikil naha xa di lanem usili. Ma biteni mi xil bit, “?Veneh ma munggur xat nenemien tesa xil ak de tinemi? <sup>5</sup>?Midep, sepinien eah be temale mu tangan namiteni: namit, ‘Ninaketeh ti mun nasa minuk ve tesaen nam xil,’ mu namit, ‘Utamea e ukakao’? <sup>6</sup>E tangan xamim mupus kila xa Nat Moletin nggur xeihen e ut etan tangan vaketeh vahos rilomun mi moletin xil, mupus ngan ak...” E Iesu biles, pus moletin xa rin tei mat e biteni mini bit, “!Utamea, uvulun vet mam, e upoe utilomun uhe tim sam!” <sup>7</sup>Vatei takes, moletin ak mea e mikakao rilomun be tim san. <sup>8</sup>Melele xa moletin xil lapusi mak, latemanin ni e ulixil mikan. Xil lapet rat his Hi xa misa hisit xeihen ak mi moletin tei tangan vapol ni sexien xil ak.

### Iesu Mikes Matiu Tangan Ihusili

<sup>9</sup>E melele xa Iesu be reling rute ak e mikakao ba, xi pus moletin tei di dotan de nim te polien nan xa hokorong, hisen Matiu. Xi di mileh takis ra Siu xil tangan vasa ni sung mi kavmen tahal Rom. E melele xa Iesu pusi, mikesi bit, “!Amei! !Uhusil xat nou e mei uhe moletin tei navan!” Ma Matiu mea, mistokovein polien nan xil, e nggusil xat Iesu.

<sup>10</sup>Ma Matiu diamu ni Iesu e moletin nan xil labe tim san. Xi pol ni anien tei e melele xa ladotan e di langganien, moletin hau te takis e moletin sav xil mun xa lasa pe met Siu xil lamei e langganien vituei del Iesu e moletin nan xil. <sup>11</sup>Melele xa Farasi xil lapusi mak, lasis moletin xil na Iesu labit, “?Veneh ma tisa namim di ngganien vituei del moletin xil te takis e moletin tesa xil mun?”

<sup>12</sup>E melele xa Iesu milonge, biteni mi xil bitene, “Moletin xil xa latamesei ti labit linakil ti dokta. Ngan xil kestang xa lamesei iexil bei

---

<sup>s</sup> 9:1 Tumulen ak de Mak 2:1-12; e Luk 5:17-26 mun    <sup>t</sup> 9:9 Tumulen ak de Mak 2:13-17; e Luk 5:27-32 mun

tengan lapus dokta. <sup>13</sup>E xamim, muha mulang ves koute te sepinien ak xa de Vanuvei Eo na Hi xa bit,

*Teok ti tavei sanien eo xil kestang namim,*

*e ieok bei mak mu tangan iemim isae e moletin sav xil.’ (Hos 6:6)*

Vengan xa natamei ti tangan nakes moletin xil xa lamal ngamu pe met Hi tangan lihiles lihusil nou. E-e, namei tangan nakes ngan xil xa lapol ni tesaen tangan mei lihiles ra tesaen nae xil e lihusil nou.”

### **Iesu Biteni xa Pispisien Hu Nan Xil Misakras Vahusil Xat Sexien Matu Xil na Siu Xil**

<sup>14</sup>“Di, moletin xil na Sion Baptaes lamei visal Iesu e lasisi labit, “Melengien holu, xamem e Farasi xil mun mabal ra anien tangan masis e mapisen ni xa malonge vasa ve tesaen namem. E mapusi xa moletin nam xil latapol ni ti sexien ak. ?Veneh vari?”

<sup>15</sup>E Iesu dei vole ak mi xil bitene, “Melele xa moletin tei miteli, ngan xil xa lamei ve anien nen ak, labesi xil. ?Xamim munemi xa lilonge isa e lipol ni sexien xil te tangen melele xa moletin ak di tamu visal xil? !E-e, lasakras! E melengien tei di bemei xa moletin xil mei lihur rat moletin nen ak ra xil. E melengien ak vari, xil lilonge isa e lihal ra anien.”

<sup>16</sup>Di, Iesu dei vole tei mun mi xil bit, “Moletin tovuol xa vatil xol eising matu tei vatel saxut kaliko tei xa be neta hu. Vengan xa melele xa ikasi, kaliko xa be neta hu mei iletan pupu, ma ital papas eising matu ak e mei imeseh mak mu.

<sup>17</sup>“E suse nen ak, moletin tovuol vateh uae hu vahe valite matu tei xa lapol ni ni hilbe sipsip vengan nggeih ngamu. Vengan xa xosxa ipol ni, ma uae hu ak ikaio e valite teni imeseh. Maxani, valite ak isa e uae imie ihe tan. Misak ni, moletin xil ti liteh uae hu ihe valite xa be neta hu vengan memerou tamu, mikila ikaio. Imak, ma valite teni ihos e uae mun xa di en ihos.”

### **Iesu Misak ni Atuli Tei xa Mat del Atou Tei xa Mesei Lubos Rilomun**

<sup>18</sup>“Melele xa Iesu di tamu misepin usil holesok xil ak, vat tei na Siu xil bemei visali, mitingeiril mini e biteni mini bit, “Natuxahin mat taxeak tang. Amei li, e uling hem iti en, ma imeul rilomun.” <sup>19</sup>Ma Iesu mea e nggusil vat ak del moletin nan xil.

<sup>20</sup>Melele xa di lakakao laba, atou tei bemei pe tou Iesu e duxol seri eising nan. Atou ak, meseien na atou xil basi hram lu e le tei (12) e misakras vavus. <sup>21</sup>Xi duxoli vengan minemi bit, “Xosxa nituxol seri eising nan tang, ma nilonge ihos rilomun.”

---

<sup>u</sup> **9:14** Tumulen ak de Mak 2:18-22; e Luk 5:33-39 mun    <sup>v</sup> **9:17** E vole xalu ak, Iesu di biteni xa pispisien hu xil nan di nggusil sexien hu xil tang, misakras vahusil xat sexien matu xil na Siu xil.    <sup>w</sup> **9:18** Tumulen ak de Mak 5:21-43; e Luk 8:40-56 mun



<sup>22</sup>Melele xa atou ak duxol eising nan, Iesu biles, pusi e biteni mini bitene, “Atou li, umaal. Nggo neketen nam, meseien nam be relinguk ngamu.” E melele nen tak vari, meseien be relingi.

<sup>23</sup>Di, lakakao laba e laduxoh tim sa vat ak. E melele xa labe nim, Iesu pus rut moletin xil di lapol ni kikeien tei te maten, e vanut moletin tei xa mahulong lase vangit nim e di ladang ve atuli ak. <sup>24</sup>E Iesu biteni mi xil bit, “!Mustal! Atuli ak tamat ti, xi di pat tang.” E moletin xil lamem pepamen ni. <sup>25</sup>E melele xa lasil rerat moletin xil labe hale, Iesu be vangit nim. Xi ba pus atuli, e dal xat hen. Melele xa dal xati, atuli ak meul rilomun, milale e mitamea. <sup>26</sup>Longeongen usil naha xa Iesu tepol ni mikapis e ut xil vus e rute ak.

### **Iesu Misak Pilei Metevar Lu del Moletin Tei xa be Vut**

<sup>27</sup>E melele xa Iesu be reling tim sa vat ak e di nggusil suse ba, metevar lu lumei visali e lunggusili. Xalu lukei nggeih ba ni lubit, “!Ei, xouk xa ostal onngo vatimol na suv toto Deved!<sup>x</sup> !Iem isae li e xamel!”

<sup>28</sup>Lunggusili duxoh melele xa Iesu be nim tei. Metevar xalu ak mun lunggusili lube vangit nim ak e Iesu misis xalu bitene, “?Midep? ?Xamil muke reitin xa inou nakila nisak ni xamil mulketeh rilomun?”

E lubit rilomun ni mini lubit, “O suv, make reitin xa ukila upol ni.”

<sup>29</sup>Di, Iesu mite hen duxoh metealu e biteni bit, “Holesok xil istal ixoni ngan xa di muneket en.” <sup>30</sup>E metealu mei bos e luketeh rilomun. E Iesu misep xol xalu nggeih bit, “!Munahit naha ti xa napol ni mi xamil ni moletin ti!” <sup>31</sup>E melele xa lube relingi, ba lubit papas naha xa Iesu tepol ni mi xalu, ma longeongen teni mikapis e ut xil vus e rute ak.

<sup>32</sup>Melele xa moletin xalu ak lube hale, rut moletin xil lamei visal Iesu e ladel moletin tei xa be vut. Moletin ak misakras vasepin vengan xa ninin tesa tei da en. <sup>33</sup>E melele xa Iesu nggol rerat ninin tesa ak be relingi, moletin ak mikila vasepin. Melele xa rut moletin xil ak lapusi mak, latemanin ni e labiteni mi xil mun tang labit, “!Ei termali, xir mol-Isrel xil ratapus ti mu neta tova vamak!”

<sup>34</sup>E Farasi xil labit, “Moletin ak nggur xeihe nan nggo Temat tangan vaxol rerat ninin tesa xil vengan Temat be suv nae.”

### **Iesu Ien Misae e Moletin Xil e Misis tangan Hi Isa Moletin Lihe Holu Mu Mei Lipol Ite Xil**

<sup>35</sup>Dutou ni ngan ak, Iesu mikakao mikapis e taon e metimal xil vus mun e rute ak. Melele xa be ut tei, xi mipispisi mi moletin xil e nim te pispisien na Siu xil, di bithiten longeongen hos xa Hi mei ihe suv toto na

---

<sup>x</sup> 9:27 Siu xil lake reitin xa Kristo istal ixo vatimol na suv toto Deved, sakini lakes Kristo ni ‘nat Deved.’

moletin xil, e di midal rat meseien ra moletin xil vus xa lamesei. <sup>36</sup>Melele xa xi pus tatit moletin xil ak xa labe holu pupu, xi polu ni esaeen vengan xa pusi xa nenemien nae milangalu e latakil ti xa likamet tutouen ixo xave. Iesu pus xil langgoni sipsip xil xa moletin te relaxatien nae tovuol. <sup>37</sup>Misak ni, xi biteni mi moletin nan xil bitene, “Anien holu xa tematu di tuei e naho, e moletin xil te polien latapin ti tangan ha lalehi vamei. <sup>38</sup>Ma musis Suv te naho tangan isil moletin xil te polien lihe holu mu mei lileh anien xa di naho nan.”

**Iesu Misil Lelen Moletin Nan Xil xa Labe  
Lu e Le Tei (12) tangan Ha Lipol**

**10** <sup>1</sup>Iesu mikes viton moletin nan xil xa labe lu e le tei (12). Melele xa lamei visali, misa xeihen mi xil tangan likila lixol rerat ninin tesa xil e lital rerat meseien ihe reling ngan xil xa lamesei ni meseien savsav xil.

<sup>2</sup>E ngan ak be his na eloheoh xil xa labe lu e le tei (12) na Iesu:

Ngan xa diamu, Saemon (xa hisen tei mun be Pita)  
e Andriu (xa tuneli Pita).  
Tiemes (nat Sepeti)  
e Sion (xa tuneli Tiemes).

<sup>3</sup>Pilip,

Batalomiu,  
Tomas,  
Matiu (xa teleh takis),  
Tiemes (nat Alveas),  
e Tatios.

<sup>4</sup>Saemon (xa temos e vanut moletin tei xa iexil bei pupu tangan lameluv ra he mol-Rom xil),  
e Sudas Eskariot (xa tesa rat Iesu tehe he moletin tesa xil).

<sup>5</sup>Moletin lu e le tei (12) nen ak, Iesu misil lelen xil ha lipol del xat sepinien ak bit, “Xamim munava ti visal ngan xil xa latave Siu ti, mu ngan xil xa ladi taon xil na mol-Sameria xil. <sup>6</sup>Muha vis mol-Isrel xil kestang xa langgoni sipsip xil xa lakesae. <sup>7</sup>E melele xa di muba, muhithiten longeongen hos ak mi xil muhit, ‘!Hi di bemei tangan mei vahe suv toto na moletin xil!’ <sup>8</sup>Muleh rerat meseien xil ihe reling moletin xil xa lamesei, e ngan xil xa lamat, mutal rerat xil ra maten. Ngan xil xa langgur meseien leporsi, musak pilei hilibexil imese rilomun, e muxol rerat ninin tesa ihe reling moletin xil. E melele xa ti mututou ni moletin xil, xil linaxal xamim ti, vengan xa holesok xil vus xa xamim mungguri,

mutaxale ti ra Hi. <sup>9</sup>E kakaoen namim, munahur xat ti mani <sup>10</sup>mu ateli. Munahur ti mun eising, sandel mu eitingil. Nabiteni mak vengan xa momal tangan moletin te polien xil lianien ixo he ngan xil xa lapol mi xil.

<sup>11</sup>“Melele xa mumei e taon mu metimal tei, mukamet moletin tova xa ipin pe met Hi tangan vahur pilei xamim. Mutit tim san ituxoh melele xa muhe reling rute ak. <sup>12</sup>E melele muha tangan muti e tim tei, itiamu, musa tuxolxatien tei mi ngan xil xa ladi en muhit, ‘Tomat na Hi iti mi xamim.’ <sup>13</sup>Xosxa moletin xil te tim ak lapin pe met Hi, ma mupus kila xa tomat namim iti mi xil. E xosxa xil mupus kila xa latapin ti pe met Hi, ma tomat namim itilomun mi xamim, e muhe reling xil. <sup>14</sup>E xosxa moletin tovuol xa en vahei vahur pilei xamim mu valong sepinien namim, muhe reling xil. E melele xa mumea ra tim sae mu taon nae, muhas rerat meas te rute ak ra lemim pe met xil. Ngan ak ipisen ni mi xil xa lapol misa pe met Hi. <sup>15</sup>Reitin mak nabiteni mi xamim, e Melengien te Lepisien, pangasien xa Hi isa ni mi moletin xil xa ladi e taon ak ixeih mak mu ili ngan xa isa ni mi ngan xil xa lateti e taon tahal Sodom e Komorah tetiamu.”

#### **Iesu Misel Xat Moletin Nan Xil Bit Melengien Xil te Xeih Di Bemei**

<sup>16</sup><sup>z</sup>Iesu misel xat moletin nan xil bit, “!Muteong ni nou! Inou di nasil lelen xamim muha e munggoni sipsip xil xa muhe hilaep te kuli reran xil. Misak ni, xamim muxuxou kuhi tangan sexien namim imese kuhi. <sup>17</sup>Reitin, muxuxou kuhi ve xamim vengan xa vat xil na Siu xil lital xat xamim e liling xamim musoh e von lepisien nae. E xil limeas pangas xamim ni ao te xeih xil e nim te pispisien nae xil. <sup>18</sup>E vengan xa di munggusil xat nou, lipol ni xamim ha musoh pe met vat xil te kavmen, e pe met suv toto xil mun. Imak, ma mukila muhithiten longeongen hos mi xil e mi ngan xil mun xa latave Siu ti. <sup>19</sup>E melele xa xil lital xat xamim, munanexo ti ve naha xa ti muvitieni mi xil mu itep ti musa sepinien mi xil. Vengan xa, e melele nen ak, Ninin Eo isa naha xa mukila muhithiteni. <sup>20</sup>Reitin, nave xamim ti xa ti musepin, e ihe Ninin Eo na Tamemim iaxa isepin ixo xamim.

<sup>21</sup>“Moletin xil limaen tuexil tangan ha lihas vin xil, e tata xil mun ti lipol ni imak tang mi horamue nae xil. E horamue xil mun lihiles ni tamexil e ninexil mun, e limaen xil lihe he ngan xil xa lihas vin xil. <sup>22</sup>Moletin xil vus iexil iat xamim vengan di munggusil xat nou. E xamim xa musoh ixeih ituxoh hoxalite te saksisien xil ak, ma Hi iteh meulien e xamim. <sup>23</sup>Melele xa moletin xil ti lipurun xamim e metimal tei, ha mulesae muhe metimal sav. Reitin mak nabiteni mi xamim xa munave taon xil vus ti mu tahal Isrel, e Nat Moletin itilomun imei.

<sup>24</sup>“Moletin tei xa nggur pispisien nggo tisa tei, xi nanemi ti nahit xi be eilep mak mu mili tisa nan. E suse nen ak, slev tei nanemi ti nahit xi

<sup>z</sup> 10:16 Tumulen ak de Mak 13:9-13; Luk 21:12-17; 12:2-9, 51-53; 14:26-27; e Mak 9:41 mun

be eilep mak mu mili suv nan. <sup>25</sup>Ma xamim xa di muggur pispisien xil navan, muhesi xamim tangan mumei muxoni inou, tisa namim. Reitin, xamim xa munggoni slev navan, mumaal tangan mei muxoni nou, suv namim. E xosxa lakes inou, suv namim, ni ‘Belsepul’,<sup>a</sup> his tei xa misa, ma mukila xa likes xamim ni his xil mun xa isa mak mu vengan xa mube navan.

<sup>26</sup>“Misak ni, ulimim nakan ni xil ti. Holesok xil xa moletin tei bit vakutaxole, Hi isak ni mei iti kesao. Reitin, neta ngan xa miling xuxus ni, Hi ileh rerati imei e valkesao tangan moletin xil lipus kila. <sup>27</sup>Holesok xil xa inou di nabiteni mi xamim melele xa ut maluxoluk, xamim ti muhit lelen ni mi moletin xil e miehen. E neta xa di nabit xuxus ni mi xamim, ha muhithiteni pe met moletin xil holu.

<sup>28</sup>“Ulimim nakan ti ni ngan xil xa lakila lavas vin tiei namim e lasakras lavas vin ninin namim. Bos mak mu ulimim ikan ni Hi kestang xa mikila iling tiei itel ninin namim mun lalihe Upang xa misakras vamat tangan ia pangasi, vengan meulien namim di e he Hi. <sup>29</sup>Munem usil tutut tuman xil ak. Itel selen tei takes, mukila muxal lu e xil. E xosxa Hi Tamemim namaen ni ti, ma ti xil misakras vamat vamat. <sup>30</sup>E xamim, Hi buli sen hilumi xil vus xa di e vatumim. <sup>31</sup>Misak ni, ulimim nakan ti vengan xa, pe met Hi, meulien namim be eilep mak mu mili meulien na tutut tuman xil ak.

<sup>32</sup>“Moletin xa bit lelen ni xa xi be moletin navan pe met moletin sav xil, ma inou mun, nihit lelen ni xa xi be moletin navan pe met Tata navan xa de ut nesao. <sup>33</sup>E ngan xa bit lelen ni pe met moletin xil xa misin nou, inou mun, nihit lelen ni pe met Tata navan xa de ut nesao xa nasin moletin ak.

<sup>34</sup>“Munanemi munahit inou namei tangan niling tomat e ut etan. E-e. Natamei ti tangan niling tomat, e namei tangan nisak ni moletin xil ti livae mi xil mun tang. <sup>35</sup>Ngoni ngan taxa Vanuvei na Hi biteni, inou namei tangan nisak ni ...

*‘Tiramue xil lihiles livae itel tamexil,  
atuli xil lihiles livae itel ninexil,  
e havnahin xil lihiles livae itel avu sasa atou nae xil.*

<sup>36</sup> *Reitin, moletin ihe elu mi ngan xil  
xa ladi vituei dela e tim san xati.’ (Maek 7:6)*

<sup>37</sup>“Ngan xil xa eheien nae di e tamexil mu ninexil mili nou, ma latapin ti tangan mei lave moletin navan xil. E ngan xil xa eheien nae di e horamue mu atuli nae xil mili nou, ma xil mun latapin ti tangan mei

<sup>a</sup> **10:25** ‘Belsepul’ be his tei te xaren xa Siu xil di lakes Temat ni, xa koute teni be ‘Suv na angelu xil.’

lave moletin navan xil. <sup>38</sup>Ngan xil xa latapo eivave te longpangasien nae ti tangan lavusil xat nou, xil latapin ti tangan mei lave moletin navan xil. <sup>39</sup>Ngan xil xa lasak pisi tangan likenin meulien nae ve xil tang, ma meulien nae ikesae ra xil. E ngan xil xa lamaen meulien nae ikesae vengan di langgusil xat nou, ma, e ut nesao, xil likamet meulien sal.

<sup>40</sup>“E kakaoen namim, ngan xil xa ti lihur pilei xamim, ixoni ngan xa ti lihur pilei nou. E ngan xil xa ti lihur pilei nou, ixoni ngan xa ti lihur pilei Tata navan xa misil nou namei. <sup>41</sup>Reitin, moletin xa ihur pilei provet tei na Hi vengan xa mikila be provet tei, Hi isa huite teni mini ixoni ngan xa xi mun be provet tei nan. E moletin xa ihur pilei moletin xa momal vengan mikila xi be momal pe met Hi, Hi isa huite teni mini ixoni ngan xa xi mun momal pe meten. <sup>42</sup>E moletin xa misa tutouen mi moletin tei navan xa be hokorong tang pe met moletin sav xil vengan mikila xi di minggusil xat inou, tave ti neta xosxa be oei te marir tang, reitin li nabiteni mi xamim, e ut nesao, moletin ak ihur sen huite teni.”

### Iesu Misep usil Sion Baptaes

**11** <sup>1</sup><sup>b</sup>Melele xa Iesu misel xat moletin nan xil xa labe lu e le tei (12) bus, xi misil rerat xil laba. E xi mun be reling rute ak e ba be taon sav xil e provins tahal Kaleli. E melele xa di mikakao ba, di pispisi mi moletin xil e di bithiten longeongen hos na Hi mi xil.

<sup>2</sup>E melele nen ak, Sion Baptaes di tamu e nim te xeih.<sup>c</sup> Xi milongeong usil holesok xil xa Iesu di pol ni. Ma misil rut moletin nan xil tangan liha vis Iesu e lisis pilei usil polien nan. <sup>3</sup>Misak ni, xil lamei visal Iesu e lasisi labit, “?Xoux iaxa obe Kristo xa Hi tehiti xat xa isila imei, mu mutatil ngan teisav?”

<sup>4</sup>E Iesu bit rilomun ni mi xil bitene, “Mutilomun muha e muhiteni mi Sion naha xa di mulonge e di mupusi. <sup>5</sup>Ngan xil xa mete tevar, di laketeh; ngan xil xa latesakras lakakao, di lakakao; ngan xil latehur meseien leporsi, hilbexil mei bos; ngan xil vurongexil tevon, vurongexil metal; ngan xil latemat, lameul rilomun; e ngan xil xa latehe hoeo di langgur longeongen hos na Hi.<sup>d</sup> <sup>6</sup>E Hi ituxol xat ngan xil xa tine nasoh ti ve pispisien mu sexien xil navan.”

<sup>7</sup>Melele xa moletin xil na Sion Baptaes di laba, Iesu misepin mi vanut moletin xil usili bit, “?Melele xa mutehe uruvuol tangan mupus Sion Baptaes, munemi mubit ti mupus hisit moletin eah? ?Muteha tangan mupus moletin tei xa taxeih ti nggoni husmunae tei xa tepiei xa misakras vasomal melele xa votiang bui? E-e. <sup>8</sup>?E muteha tangan mupus naha? ?Moletin tei xa mising ni eising xil xa bos pupu? E-e. Vengan xa moletin

<sup>b</sup> 11:1 Tumulen ak de Luk 7:18-35 mun <sup>c</sup> 11:2 Suv Toto Herod miso Sion be nim te xeih e Mat 4:12 <sup>d</sup> 11:5 Aes 35:5-6; 61:1

xil lasing mak ladi e nim xil xa mahulong ma suv toto xil. <sup>9</sup>?Muhiteni minou, muteha tangan mupus naha vari? ?Provet tei? !Reitin! E nabiteni mi xamim xa moletin ak be eilep mak mu mili provet sav xil. <sup>10</sup>Vengan Sion be xi xa Vanuvei Eo na Hi di misep usili bit,

*'Upusi. Inou nisil eloheoh navan itiamu ni xouk.*

*Xi iaxa iha tangan isak mesen suse ve meien nam.'* (Mal 3:1)

<sup>11</sup>Reitin li nabiteni mi xamim, moletin sav tovuol xa latepesi e ut etan xa be eilep mak mu mili Sion. E moletin votei tei xa imaen Hi te ut nesao mei ihe suv toto nan, ma xi ihe eilep mak mu ili Sion pe met Hi. <sup>12</sup>E melele xa Sion di tehithiten sepinien na Hi duxoh xosali, Hi di pol nggeih tangan vasak ni haxot te lelaxatien nan mei ihe eilep mu, e ngan xil xa nenemien nae nggeih di lamos mini. <sup>13</sup>Vengan Tisen xil nan provet xil vus tetiamu tetel Rae xil na Mosis teha tetuxoh Sion latesep usil melele xa Hi mei ihe suv toto na moletin xil. <sup>14</sup>E xosxa xamim mubesi xamim tangan muke reitin en, ma Sion be Ilaetsa xa Hi tehiti xati tehiti isila imei.<sup>e</sup> <sup>15</sup>Xosxa vurongemim di, muteong kuhi ni naha xa di nabiteni.

<sup>16</sup>“?Xamim, moletin xil te xosali, munggoni naha? Xamim munggoni tutut horamue xil xa di ladotan sangas ni von posen e di lake xat xil mun tang labit,

<sup>17</sup>'Melele xa xamem di mapol ni nggoni ngan xa di mabas kitar e sien, iemim ti navei muvol vatel xamem.

E melele xa di mapol ni nggoni ngan xa di madang, iemim ti navei mutang vatel xamem.'

<sup>18</sup>Xamim munggoni tutut horamue xil ak vengan xa iemim ti tavei nou mu Sion mun. Melele xa Sion Baptaes bemei, xi di bal ra anien ve sisen e tamu ti uaen, e xamim iemim ti tavei mubit, '!Sion, ninin tesa da en!' <sup>19</sup>Di, melele xa inou, Nat Moletin, namei, nangganien e namu uaen. E xamim iemim ti tavei nou mubit, '!Pus ti moletin ak! Xi di ngga vin xi ni anien e di mumun tova tang. E xi di mikes moletin xil te takis e moletin tesa sav xil ni timue.' E sexien nar kekes ipisen ni xa visi e xir di nggusil metisouen na Hi.”

### Iesu Misepin Nggeih Xat Moletin Xil xa Lasin Ni

<sup>20f</sup>Di, Iesu misepin nggeih xat moletin xil te taon xil xa xi teha tepol ni merikel xil holu en. Vengan neta sav xa lapusi, latnaviles ti ra sexien tesa xil nae. <sup>21</sup>Xi biteni bit, “!Aue li! !Isa pupu mi xamim, Siu xil tahal Korasin! !E isa pupu mun mi xamim, Siu xik tahal Betsaeta xil! Vengan xamim mutesin merikel xil xa natepol ni pe metemim,

<sup>e</sup> 11:14 Mal 4:5    <sup>f</sup> 11:20 Tumulen ak de Luk 10:13-15 mun

Hi isa longpangasien ihe holu mi xamim. Ve vahit moletin xil tahal Taer e Saedon xa latave Siu ti, lapus hisit merekel xil vaxoni ngan xa mistal mi xamim, ma xil laviles ra tesaen nae xil nousav ngamu. Io, xil lapisen ni xa lalonge vasa vamak: lasing ni talit holesok xil e laxul ni vulmeas. <sup>22</sup>Reitin li nabiteni mi xamim xa, e Melengien te Lepisien, longpangasien xa Hi isa ni mi xamim ixeih mak mu ili ngan xa isa ni mi ngan xil xa lateti e taon xalu tahal Taer e Saedon. <sup>23</sup>?E xamim, Siu xil tahal Kapaniam, munemi xa Hi ipet rat xamim muhe ut nesao? !E-e! !Xi iso xamim muhe etan e Upang xa misakras vamat! Ve vahit moletin xil tahal Sodom lapus merekel xil vaxoni ngan xa natepol ni tetel xeihen pe metemim, taon ak da duxoh xosali. <sup>24</sup>Reitin li nabiteni mi xamim xa, e Melengien te Lepisien, longpangasien xa Hi isa ni mi xamim ixeih mak mu ili ngan xa isa ni mi ngan xil xa lateti e taon tahal Sodom ili xamim.”

### Iesu Misa Memesien mi Hi ve Movotei Xil xa Laneket En

<sup>25</sup>E melele nen ak, Iesu misis bit, “Tata, xouk obe Suv te ut nesao e ut etan. Namesuk holu vengan xa di oling xuxus ni holesok xil ak ra ngan xil labe metisou e lakilakil kuhi. E opisen koute teni mi ngan xil xa langgoni tutut horamue xil xa latasukul kuhi ti. <sup>26</sup>Tata, ngan ak be reitin vengan xa nggusil naha xa xouk iem bei tengang vastal. Reitin.”

<sup>27</sup>Di, Iesu misepin mi moletin xil bit, “Tata navan miling holesok xil vus di e heok. E moletin xil latapus kil ti Nat Hi vengan xa Tamen kestang di pus kila. E moletin xil latakil ti Hi vengan xa Natneli kestang mikila del ngan xil mun xa Natneli bosei xil tengang ipisen ni mi xil.

<sup>28</sup>“Mumei visal nou, xamim xa vemim buol ve holesok xil xa meas xa di mupoe e meulien namim, e inou nisa ngengelen mi xamim. <sup>29</sup>Muteong ni nou e muhusil xat nou, vengan xa inou nabe hanmerou e nenemien navan be tan. Imak, ma mukamet ngengelen e meulien namim. <sup>30</sup>Ve pispisien navan xil taxeih ti e holesok xil xa nilingi e xamim tengang mupol ni memeit tang.”

### Iesu Pispisi usil Sabat

**12** <sup>1h</sup>Vatei, e Sabat, Iesu e moletin nan xil lakakao xoteh naho tei te uit. E melele xa di lakakao laba, moletin nan xil, mae nggat xil, ma laki xoteh utut uit xil e di langga ni. <sup>2</sup>E melele xa Farasi xil lapusi, lasepin mi Iesu labit, “Pus ti mu. Naha xa moletin nam xil di lapol ni di nggur xoteh rae xil na Mosis usil Sabat.”

<sup>3</sup>E Iesu bit rilomun ni mi xil bit, “?Midep? ?Xamim mutavuli ti naha xa suv toto Deved e moletin nan xil latepol ni melele xa mae teat xil?

---

§ 11:25 Tumulen ak de Luk 10:21-22 mun    <sup>h</sup> 12:1 Tumulen ak de Mak 2:23-3:6; e Luk 6:1-11 mun

<sup>4</sup>Deved tehe vangit Nim Tavolin na Hi e tehur beret eo xa pris xil kestang lakila lava ni. E Deved del moletin nan xil latea beret ak, neta sav xa latehur xoteh rae tei na Mosis. <sup>5</sup>?E midep? ?E ut sav, mutavuli ti xa e Sabat xil vus, pris xil xa di lapol e Nim Eo di langgur xoteh rae xil na Mosis usil Sabat, e pe met Hi, latapol ni ti tesaen?<sup>i</sup> <sup>6</sup>E xosali, moletin tei mistal xa be eilep mak mu mili Nim Eo na Hi. <sup>7</sup>Vanuvei Eo na Hi di biteni bit, *'teok ti tavei sanien eo namim xil kestang, e ieok bei mak mu tangan iemim isae e moletin sav xil.'* (Hos 6:6) Xosxa mukil koute te sepinien ak, ma munasa ti sepinien te xeih ak mi ngan xil xa latapol ni ti neta xa vasa. <sup>8</sup>Moletin navan xil latapol ni ti neta vasa vengan xa xil di langgusil xat nou, Nat Moletin. E inou nabe eilep mak mu mili Sabat.”

<sup>9</sup>Di, Iesu e moletin nan xil labe reling rute ak e labe nim te pispisien na Farasi xil ak. <sup>10</sup>E moletin tei da en xa hen mikavui. E rut moletin xil mun ladi xa iexil bei tangan liso sepinien tei iha xat Iesu ve neta ngan. Misak ni, xil lasisi labit, “Hiteni mi xamem. ?Rae xil na Mosis maen ni tangan lasak pilei moletin tei e Sabat?”

<sup>11</sup>Iesu bit rilomun ni mi xil bit, “?Midep? ?Xosxa tei e xamim, sipsip tei san mot be vul e Sabat, ma ipol ni naha mini? Xi ha ipo rati ra vul ak. <sup>12</sup>E moletin tei bos mak mu mili sipsip tei. Ma rae nar xil maen xir ti ripol ni sexien hos xil e Sabat.”

<sup>13</sup>Di, xi biteni mi moletin xa hen mikavui bit, “So hem vama.” Ma melele xa miso hen momal, mei bos rilomun nggoni hen tei mun teisav.

<sup>14</sup>E Farasi xil lastal e lasep ves suse tova tangan lavas vin Iesu vaxo en.

### Iesu Pisen xa Xi iaxa Be Moletin te Polien xa Hi Tehosei

<sup>15</sup>E Iesu mikila xa Farasi xil ak iexil bei tangan lihas vini, ma xi be reling rute ak. E tatit moletin xil holu langgusil Iesu e xi midal rerat meseien ra ngan xil vus xa lamesei. <sup>16</sup>E melele xa di pol ni, di misep xol xil tangan linavit ti mi moletin sav naha xa xi tepol ni mi xil. <sup>17</sup>E holesok xil ak testal tangan vasak ni naha xa Hi tesep usili texo provet Aesea mei ihe reitin xa bit,

<sup>18</sup>“Ngan ak be moletin te polien navan xa natehosei,  
eheien navan di en e nabesi nou ven.

*Nise xati ni Ninin navan,  
e xi ihithiteni mi moletin xil te ut etan xa latave Siu ti usil midep Hi  
ipol ni naha xa momal mi xil.*

<sup>19</sup>Xi nangor ti natel mosav xil e nameun votei ti.

*Io, moletin ti nalong raen nave nesao usil suse xil.*

<sup>20</sup>Ve esaeen nan di e ngan xil xa lataxeih ti,  
*xi napol ni ti neta naxeih mi xil.*

<sup>i</sup> 12:5 Nam 28:9-10



*E ngan xil xa lamerou tang,  
xi napangei xil ti.*

*Xi ipol ni imak ituxoh*

*melele xa isak ni sexien xil xa momal pe meten mei ili sexien xil xa  
tamal ti.*

*21 E moletin xil te ut etan*

*mei liling nenesien nae e hisen. (Aes 42:1-4)*

### Farasi Xil Lakes Iesu ni Temat

<sup>22</sup>J<sup>J</sup>Di, rut moletin xil ladel moletin tei bemei visal Iesu. Moletin ak, meten bar e misakras vasepin vengan ninin tesa tei da en. Ma Iesu misak ni moletin ak mei miketeh e misepin rilomun. <sup>23</sup>Ngan xil xa lapusi, latemanin labit, “?Midep? ?Moletin ak be ngan xa istal ixo vatimol na suv toto Deved xa Hi tehiti xati tangan isa ni imei?”

<sup>24</sup>E melele xa Farasi xil lalong sepinien na moletin xil ak, labitene mi xil labitene, “!E-e! Moletin ak mikila vaxol rerat ninin tesa xil tang vengan di pol del xeihen xa Belsepul,<sup>k</sup> suv toto na ninin tesa xil, di misa ni mini.”

<sup>25</sup>E Iesu mikil nenemien nae, ma biteni mi xil bitene, “Xosxa moletin xil na suv toto tei di labae mi xil tang, ma xeihen na suv toto ak mei ihe neta sav tang. E xosxa moletin xil xa ladi vituei e metimal mu vatimol tei di labae mi xil mun tang, ma his metimal mu vatimol ak iclesae. <sup>26</sup>Ma xosxa Belsepul di minggol rerat ninin tesa nan xil, ma xi di bae mi xi mun tang. Xosxa imak, ma xeihen nan ilesae relingi. <sup>27</sup>?E xosxa Belsepul di misa xeihen minou tangan naxol rerat ninin tesa nan xil, ma midep mi moletin namim xil? ?Xil langgol rerat ninin tesa xil ra moletin xil del xeihen na visi? Xil iaxa di lapisen ni xa neta xa di musep usili tamal ti. <sup>28</sup>E xosxa inou di nanggol rerat ninin tesa xil ra moletin xil nggo xeihen xa Ninin na Hi di misa ni minou, ma ngan ak di pisen ni xa lelataxien na Hi xa be suv toto di mistal tuei mi xamim.

<sup>29</sup>“Nihit kila mi xamim ixo vole tei. Moletin tei misakras vahe nim ma silixin tei tangan vakan ni holesok nan xil melele xa xi di tamu tim san. Itiamu, ha ivar xat silixin ak. Ti, ikila ihe nim man e ileh vuol ni holesok nan xil vus.<sup>l</sup>

<sup>30</sup>“Ngan xil xa latamos ti vatel nou, xil di labae del nou. E ngan xil xa latatutou ni nou ti tangan maleh viton moletin xil vaxoni sipsip xil, xil di langgol rerat xil laloh tasil. <sup>31</sup>E nabitene mi xamim, Hi mikila vaketeh

---

j 12:22 Tumulen ak de Mak 3:20-30; Luk 11:14-23; e 6:43-45 mun <sup>k</sup> 12:24 ‘Belsepul’ be his tei xa Siu xil di lakes Temat ni, xa koute teni be ‘Suv na angelu xil.’ <sup>l</sup> 12:29 E vole ak, Iesu be moletin xa be nim ma Temat tangan vavar xat Temat. Ve rin ak, xi mikila vaxol rerat ninin tesa nan xil e di midal rat moletin xi ra meseien nae xil.

vamal rilomun mi ngan xil xa lapol ni hisit tesaen savsav xil mu lasep purun his Hi mu his moletin sav. E moletin xa misep purun his Ninin Eo, Hi misakras vaketeh vahos rilomun ni mini. <sup>32</sup>Reitin, ngan xil xa di lasepin misa minou, Nat Moletin, Hi mikila vaketeh vahos rilomun ni mi xil. E ngan xil xa lasepin misa mi Ninin Eo, Hi naketeh ti navos rilomun ni mi xil, xosali mu melele xa ti imei.<sup>m</sup>

<sup>33</sup>“Xosxa vatiei tei bos, ma huite teni mun ihos. E xosxa vatiei tei misa, ma huite teni mun isa. Huiei iaxa di pisen ni xa vatiei tei bos mu misa. <sup>34</sup>!E xamim munggoni vanut tetal sasa xil xa di langas vin moletin xil ni vulongexil! ?Itep ma xamim mukila musepin usil holesok xil xa bos? !Musakras vengan xa moletin xil di lasepin usil naha xa di iexil, e xamim mube moletin tesa xil. <sup>35</sup>Moletin hos tei, ien polu ni nenemien hos xil, ma di misepin usil holesok xil xa bos. E moletin tesa tei, ien polu ni nenemien tesa xil, ma xi di misepin usil holesok xil xa misa. <sup>36</sup>Nabiteni mi xamim, e Melengien te Lepisien, Hi ilepis sepinien talang namim xil vus xa di muso ni, e isa longpangasien mi xamim ven. <sup>37</sup>Reitin, itel sepinien namim xil tang, Hi ipus kila xa mumal mu mukavui, e isa naha xa imal mi xamim vus ihusili.”

### **Tisa Xil te Rae xil na Mosis del Farasi Xil Lasis Iesu tangan Vapol ni Neta Tei xa Eilep tangan Ti Like Reitin En**

<sup>38</sup>“Di, rut tisa xil te Rae xil na Mosis del Farasi xil mun lamei visal Iesu e labiteni mini labitene, “Tisa, iemem bei tangan upol ni neta tei xa eilep tangan mapus kila xa be reitin xa xoux onngo visal Hi.”

<sup>39</sup>E Iesu bit rilomun ni mi xil bitene, “Xamim, moletin xil te xosali ak, mukavui e mustokovein Hi nggoni atou xa mistokovein tiramue xati nan tangan vahur tiramue sav tova. Ve rin ak, iemim bei tangan mupus neta tei xa eilep tangan muke reitin xa natexo vis Hi namei. E ninapol ni ti neta xa eilep ve xamim. Ti mupus neta tei takes xa ixoni ngan xa testal mi provet Siona tetiamu. <sup>40</sup>Vengan provet Siona tete vang meseo melengien e vongien tol (3). E sexien nen ak, inou mun, Nat Moletin, nite pe huitan te maten melengien e vongien ihe tol (3). <sup>41</sup>E Melengien te Lepisien, mol-Nineve xil lisoh e lisepin iha xat sexien na moletin xil te xosali. Reitin, xil lisepin iha xat xamim vengan xa melele xa xil, xa latehe elu mi Siu xil, latelong sepinien na Hi xa provet Siona tehithiteni mi xil, xil latehiles ra sexien tesa nae xil. E xosali, tei xa be eilep mak mu mili Siona dak ngamu. <sup>42</sup>Reitin, e Melengien te Lepisien, suv toto tahal Seba tetiamu xa tehe atou, xi isoh e isepin iha xat moletin xil te xosali. Vengan

---

<sup>m</sup> **12:32** Iesu di misepin mak vengan xi di pol nggo xeihen na Ninin Eo, e Farasi xil labilesi labit xeihen nan nggo Temat. <sup>n</sup> **12:38** Tumulen ak de Mak 8:11-12; e Luk 11:24-26,29-32 mun

xi texo sotin pupu tangan mei valong metisouen na suv toto Solomon. E xosali, tei xa be eilep mak mu mili Solomon dak tuei.

<sup>43</sup>“Melele xa ninin tesa tei be reling moletin tei ba, di mikapis e uruvuol tangan vakamet ut tova xa bos te ngel en. E melele xa takameti, <sup>44</sup>ihiteni mi xi mun tang ihit, ‘Nitilomun nihe nim mavan xa natehe relingi natemei.’ E melele xa itilomun imei, ma ikameti xa ladaveas tuei e nim ak, laling pilei holesok xil, e ninin teisav tovuol en. <sup>45</sup>Misak ni, xi iha e ihur ninin lu e he sav (7) xa lasa mak mu ili xi. E xil lihe nim, ha liti en. Nim ak be moletin tei, e lisak ni meulien na moletin ak isa mak mu ili ngan xa teti en tetiamu. Ngan istal mi xamim, moletin tesa xil te xosali ak.”

### Iesu Bit Lelen ni xa Visi Iaxa be Ninen e Tuneli Xil

<sup>46</sup>°Melele xa Iesu di tamu misepin mi vanut moletin xa mahulong xiak, ninen e tuneli xil lamei. Lamei lasoh e hale tang e labit lasepin mini. <sup>47</sup>Ma moletin tei bemei visal Iesu e bit mese ni mini bitene, “Ninom e tumoli xil di lasoh hale iaxor, e labit lasepin minuk.”

<sup>48</sup>E Iesu bit rilomun ni mini bit, “?Visi iaxa be nana navan? ?Visi iaxa be tua navan xil?” <sup>49</sup>Di, miti mikapis e moletin nan xil e biteni bit, “?Mupusi? Ngan xil ak labe nana navan xil e tua navan xil. <sup>50</sup>Vengan ngan xil xa di lapol ni naha xa Tata navan xa de ut nesao ien bei tangan lipol ni, xil iaxa labe nana navan xil, tua navan xil, e tuxahin xil mun.”

### Iesu Pispisi usil Rin xa Hi Mei Ihe Suv Toto na Moletin Nan Xil

#### *Iesu Dei Vole Tei usil Utiei Xil xa Di Meul e Hisit Tan Teisav Xil*

**13** <sup>1</sup>E melengien nen tak, Iesu be reling nim ak e ba dotan e seri Oei Kaleli. <sup>2</sup>E vengan xa vanut moletin xil holu pupu lakapis xole, Iesu be bot tei e dotan en. E moletin xil lasoh ladi nga ut. <sup>3</sup>Di, xi dei vole xil holu mi xil bit, “!Muteong kuhi! Vatei, moletin tei be naho tangan vaso utiei en. <sup>4</sup>E melele xa miso ni, rut utiei xil lamot e suse xa tan nen nggeih, e tuman xil mei lada rerati. <sup>5</sup>Rut utiei xil lamot e tan xa hat xil holu di en e tan nen mahin tang. E inggak, utiei ak latemanon ve tan mahin. <sup>6</sup>E melele xa eai bemei nesao, ngga vin ngan xil xa lateteh, e lameles lamat. Lamat vengan xa amulite xil tave tan pupu ti. <sup>7</sup>Rut utiei xil mun lamot e tan xa munae tesa di meul en. E melele xa lateh, munae tesa xil ak mikutaxol vin xil. <sup>8</sup>E rut utiei xil ak, lamot e tan xa bos. Ma xil lameul bos, e laba ni huite xil. Ngan xil, laba ni huite xil holu; ngan xil mun laba ni huite xil holu mak mu; e ngan teisav xil mun, xil iaxa

° 12:46 Tumulen ak de Mak 3:31-35; e Luk 8:19-21 mun P 13:1 Tumulen ak de Mak 4:1-20; e Luk 8:4-15 mun

ladaxao xa ladaxao ni huite xil.<sup>9</sup> <sup>9</sup>!Xosxa vurangemim di, muteong kuhi ni naha xa di nabiteni!”

<sup>10</sup>Melele xa Iesu misepin bus, moletin nan xil lamei visali e lasisi labit, “?Xouk di ode vole xil mi moletin xil veneh?”

<sup>11</sup>E Iesu bit rilomun ni mi xil bit, “Xamim iaxa Hi tehosei xamim tangan mukil koute te sepinien xuxus usil itep xa xi mei ihe suv toto na moletin nan xil. E moletin sav xil, Hi tenahosei xil ti tangan lakila. <sup>12</sup>Ngan xil xa lakil kuh koute te sepinien xil ak, ma Hi isak ni xil likilakil pilei mak mu ha vuma ... lipolu ni kilakilen nan. E ngan xil xa latakil ti koute xil teni, ma hokorong xa di langguri, Hi ihur rati ra xil. <sup>13</sup>Inou di nasepin mi xil nggo vole xil tangan, tave ti neta xa di lapus neta ngan, e xil latapus kil ti. Reitin, tave ti neta xa di lalong netan ngan, e lalong kil ti. <sup>14</sup>Sexien nae di misak ni sepinien na provet Aesea tetiamu mei ihe reitin xa bit,

*‘Muteong vuma ... munalong kil ti neta.*

*Muketeh vuma ... munapus kil ti neta.*

<sup>15</sup>*Imak vengan xa tine nggeih.*

*Di laki xol vurange e di label xat mete.*

*Xil lapol ni mak vengan iexil ti tavei lapus kil neta ngan ni mete, mu lalong kil neta ngan ni vurange.*

*Reitin, xosxa linamak ti,*

*ma xil likil kuh koute te sepinien navan,*

*tinexil mei imerou, lihiles meulien nae,*

*e inou mei nital rat xil ra meseien nae xil.’ (Aes 6:9-10)*

<sup>16</sup>“E tuxolxatien na Hi di tuei e xamim, moletin navan xil, vengan melele xa mupus neta tei ni metemim, mupus kila. E melele xa mulong neta ngan ni vurangemim, mulong kila. <sup>17</sup>Reitin li nabiteni mi xamim, tetiamu, provet xil holu e moletin sav xil xa latemal pe met Hi, iexil tehei mak mu tangan lapus naha xa xamim di mupusi xiak, e xil latnapus ti. Io, iexil tehei tangan lalong naha xa xamim di mulonge, e xil latnalong ti.

<sup>18</sup>“Muteong kuhi ni koute te vole xa natehiteni usil moletin xa milih kon e hisit tan tesav xil. <sup>19</sup>Utut kon ngan xil xa lamot e suse xa tan nen nggeih, xi nggoni moletin tei xa milong sepinien usil rin xa Hi mei ihe Suv Toto e meulien na moletin xil. E melele xa milonge, xi talong kil ti koute teni. E Temat mitemanon bemei, minggur rat sepinien xa mot de tinen. <sup>20</sup>Utut kon ngan xil xa lamot e tan xa hat xil holu di en, xi nggoni moletin xa milong sepinien na Hi e, vatei takes, ngguri del sien. <sup>21</sup>E vengan xa amulite xil te neketen nan tameul ti mu, moletin ak misoh e neketen nan be terume tang. E melele xa sakkisien e melengien xil te xeih

<sup>9</sup> 13:8 Sepinien xati teni bit, “uit xil ak ladaxao ni huite nggoni 30, 60 e 100.”

bemei ni ve sepinien ak, vatei takes, xi mot e neketen nan. <sup>22</sup>E utut kon ngan xil xa lamot e tan xa munae tesa di meul en, xi nggoni moletin tei xa milong sepinien na Hi e minexo pupu ve holesok xil te ut etan e eheien nan di e mani mak mu holu. Ma holesok xil ak mikutaxol sepinien na Hi xa ngguri, ma tava ni ti huite e meulien nan. <sup>23</sup>E utut kon xil xa lamot e tan xa bos, xi nggoni moletin xa milong sepinien na Hi e milong kila. E meulien nan, sepinien nen ak ba ni huite. E meulien na rut moletin xil, ba ni huite xil holu; e ngan tesav xil, ba ni huite xil holu mak mu; e ngan teisav xil mun, sepinien ak daxao xa daxao ni huite xil e meulien nae.”<sup>r</sup>

*Iesu Dei Vole usil Munae Tesa Xil*

<sup>24</sup>E Iesu dei vole tei mun mi vanut moletin xil bitene, “Suse xa Hi mei ihe Suv Toto te meulien na moletin xil ixoni moletin tei xa milih utut uit e naho san. <sup>25</sup>E melele xa moletin xil vus ba lapat, elu tei na moletin ak bemei e naho san e miso utut munae tesa xil mun ba mosos del uit. Di, milesae ba. <sup>26</sup>Misak ni, melele xa uit xil ak lateh, lameul lamei nesao e langgur vei, munae tesa xil mun lameul vituei tang del xil.

<sup>27</sup>“Melele xa moletin xil te polien laba tangan lapus naho sa masta nae, lapus kil munae tesa xil en. Ma ladi lomun ba labiteni mini labit, ‘!Masta! ?Midep? ?Utut uit xil xa oteso ni e naho sam, xil latehos mu latesa tang? ?Vengan xosxa latehos, ma munae tesa xil ak latexo xave latemei?’

<sup>28</sup>“E masta nae bit rilomun ni mi xil bitene, ‘!E-e! Elu tei navan iaxa tepol ni.’

“Ma moletin te polien nan xil lasisi labit, ‘?Ma midep? ?Iem bei tangan mava maput rerat munae tesa xil ak?’

<sup>29</sup>“E masta nae bit rilomun ni mi xil bitene, ‘E-e. Muling xil limeul liti nga, maxani mutnaput rerat uit xil xa labos melele xa di muput rerat munae tesa xil. <sup>30</sup>Muling uit e munae tesa xil ti lalimeul vituei tang ituxoh melele te leh anien en. E melele xa moletin xil ti limei tangan lileh anien, nihiteni mi xil tangan ha lileh rerat munae tesa xil ak itiamu, e livar viton xil lihe vanute xil. Ti, nimei niso munae tesa xil ak lihe upang. Ti, moletin xil ak liti lomun ha lileh uit xil e ha liserep kuh xil liti e povah navan.’”

*Iesu Dei Vole Lu usil Suse xa Hi mei Ihe Suv Toto e Meulien Na Moletin Xil*

<sup>31</sup>E Iesu dei vole tei mun mi vanut moletin xil bitene, “Suse xa Hi mei ihe Suv Toto e meulien na moletin xil ixoni utut mastad xa moletin tei ngguri e ba milihi e naho nan. <sup>32</sup>Tave ti neta xa utut mastad hokorong mak mu ni utiei sav xil, e melele xa meul, di meul tepiei be nesao ba

---

<sup>r</sup> 13:23 Di biteni bit, “...huite xa be 30, 60 e 100.” <sup>s</sup> 13:31 Tumulen ak de Mak 4:30-34; e Luk 13:18-21 mun

vuma ... mei mahulong pupu mili holesok sav xil xa di lalih xil e naho. E melele xa matu, xi mei be holiei xa mahulong xa pipin tangan tuman xil limei lipol ni nunu mae xil e halite nen xil.”<sup>t</sup>

<sup>33</sup>Iesu dei vole tei mun tesav mi xil bit, “Suse xa Hi mei ihe Suv Toto ixoni is vutei xa atou tei ngguri e bilesi del bak pulaoa tei xa mahulong. E tave ti neta xa miling is hokorong tang en, is ak pol ni pulaoa mikaio ba vuma ... mei be mahulong xa mahulong.”

<sup>34</sup>E holesok xil xa Iesu misep usili mi vanut moletin xil, xi di misa ni mi xil nggo vole kestang. Xi tenavit kil ti koute nen mi xil. <sup>35</sup>Iesu pol ni mak tangan vasak ni sepinien xa Hi tesan ni mi provet tei mei vahe reitin xa bit,

*“Inou nitei vole xil.*

*Reitin, nggo vole xil, nihithiten usil holesok xil xa di texus e melele xa Hi tepeas ni ut etan, e texus tetuxoh xosali.” (Sam 78:2)*

***Iesu Bit Kil Koute te Vole usil Munae Tesa Xil***

<sup>36</sup>Melele xa Iesu misepin mi vanut moletin xil bus, be reling xil e dilomun be nim xa da en. Moletin nan xil langgusili lamei visali, e lasisi labit, “?Vole usil munae tesa xil, ukila uhit kil koute teni mi xamem?”

<sup>37</sup>Ma Iesu biteni mi xil bitene, “Koute teni mak. Inou, Nat Moletin, nabe moletin xa naso utut uit xa bos. <sup>38</sup>Naho ak be ut etan, e utut uit xil xa lameul bos labe moletin xil xa Hi be Suv Toto nae. E munae tesa xil labe moletin xil xa Temat be suv toto nae. <sup>39</sup>Elu na moletin ak xa teso xil be Temat. Melele te leh anien en be hoxalite te melengien xil xa radi en. E moletin xil xa mei lileh anien labe masxaxa xil.

<sup>40</sup>“Nggoni ngan xa laput rerat munae tesa xil e laso xil labe upang, lipol ni imak e hoxalite te melengien xil xa radi en. <sup>41</sup>Reitin, e melele nen ak, inou, Nat Moletin, nisil masxaxa navan xil tangan ha lihe ut xil vus xa di nalaxati, e liput rerat ngan xil xa di lapol misa e holesok sav xil mun xa di misak ni moletin xil di lamot e tesaen. <sup>42</sup>Ti, masxaxa xil ha liso moletin tesa xil ak lihe upang xa mahulong, e e rute ak, xil ti limuis e ti liat lohe ve longpangasien nae xil. <sup>43</sup>Ti, ngan xil xa lamal pe met Hi, liminehin ixoni eai e rute xa Tame be Suv Toto en. !Xosxa vurongemim di, muteong kuhi ni naha xa di nabiteni!”

***Iesu Dei Vole usil Sien na Ngan Xil xa Lamaen Hi Mei be Suv Toto e Meulien Nae***

<sup>44</sup>Iesu misepin rilomun mi moletin nan xil bit, “?Melele xa Hi mei be Suv Toto e meulien na moletin tei, ngan ak nggoni naha? Ixoni bokis tei xa holesok holu xa bos di en xa moletin tei teling xuxus ni tete naho tei. Bokis ak da vuma ... moletin sav tei ba mikameti. E melele xa pusi,

<sup>t</sup> 13:32 Dan 4:20-22

milonge bos xa bos ven. Ma miling xuxus rilomun ni da, di, dilomun be tim san e pos ni holesok xil vus nan. Di, nggur mani nen e ba nggal rat tan xa bokis ak da en be nan.

45 “?Reitin, melele xa Hi mei be Suv Toto e meulien na moletin tei, ngan ak nggoni naha? Ixoni moletin tei te bisnis xa di milang ves vatiei xil te tas xa bos. 46 E melele xa mikamet vatiei tei xa bos xa bos, xa mani teni mahulong, xi mitemanin. Ma dilomun be tim san, e pos ni holesok xil vus nan. Di, nggur mani nen e ba nggal vatiei te tas ak be nan.

47 “?Vatei mun, melele xa Hi mei be Suv Toto e meulien na moletin tei nggoni naha? Ixoni melele xa laso net tengah laleh meseo xil. Melele xa laso ni be tas, laleh hisit meseo sav xil holu. 48 Melele xa net polu ni meseo xil, lalihi be ut. Di, moletin xil te meseo ladotan xorelisi e laso viton kuh meseo xil xa bos labe valeat xil. E meseo xil xa lasa, laso xil laba. 49 Imak vari e hoxalite te melengien xil xa radi en. Masxaxa xil mei lilepis moletin xil te ut etan ihusil suse nen tak. Xil lileh rerat moletin xil xa lasa ra ngan xil xa lamal pe met Hi, 50 e ha liso moletin xil ak lihe upang xa mahulong. E rute ak, xil ti limuis e ti liat lohe ve longpangasien nae xil.

51 “?Midep, xamim mukil kuh koute te holesok xil ak, mu...?”

E moletin nan xil labit rilomun ni mini labit, “Io, makila.”

52 Iesu biteni mi xil bit, “Nggusil nenemien ak, tisa xil vus te Rae xil na Mosis xa lamaen Hi mei be Suv Toto e meulien nae tengah lihusil kuh pispisien nan xil, xil langgoni eilep tei xa holesok nan xil holu. Ma xi mikila ihe nim man e ileh rerat holesok xil xa bos pupu, ngan xil xa be te nousav, e ngan xil mun xa be neta hu.”<sup>u</sup>

### Iesu Ba mi Vatimol Xati Nan, e Lasin Ni

53 <sup>v</sup>Melele xa Iesu dei vole xil ak bus, xi be reling rute ak 54 e ba be Nasaret, metimal xati nan. E rute ak, Iesu be nim te pispispien, e dotan mipispisi mi moletin xil. E melele xa lalong pispisien nan xil, latemanin ni e labiteni mi xil mun tang labit, “?Moletin ak nggur kilakilen e xeihen ak nggo xave? 55 ?Tave nat moletin ti taxa di tepol ni nim xil tang? Nana nan be Meri. E tuneli xil labe Temes, Siosep, Saemon e Sudas tang. 56 Hineli xil vus ladi visal xir e rute ak. !Moletin ak be tei e xir tang! ?Mak, ma xi nggur holesok xil ak nggo xave?” 57 Ve rin ak, moletin xil tine misoh e lanem male ni Iesu.

E Iesu biteni mi xil bitene, “Moletin xil vus di lamerere ni provet tei na Hi. E moletin xil te metimal xati nan e vatimol xati nan mun, xil lanem male ni vari.”

---

<sup>u</sup> 13:52 Sepinien nen ak di misep usil pispisien xil te nousav xa di oltestamen, e pispisien hu xil na Iesu xa di e niutestamen. <sup>v</sup> 13:53 Tumulen ak de Mak 6:1-6; e Luk 4:16-30 mun

<sup>58</sup>Misak ni, e rute ak, Iesu tapol ni ti merekel xil vahe holu vengon xa neketen nae tovuol en.

### Maten na Sion Baptaes

**14** <sup>1</sup>W<sup>e</sup> melele nen ak, suv toto Herod Antipas xa milaxat provins tahal Kaleli milongeong ni holesok xil xa Iesu di pol ni. <sup>2</sup>Ma Herod biteni mi moletin te polien nan xil bit, “Iesu ak be Sion Baptaes vari. Tave ti neta xa xi mat, e meul rilomun ra maten. Ve rin ak iaxa nggur xeihen tangan vapol ni merekel xil.”

<sup>3-4</sup>Suv toto Herod Antipas minexo pupu mak vengon xi vari tesa raen tangan moletin te vaeen nan xil ha lital xat Sion, livar xati, e liso ni ihe nim te xeih. Xi tepol ni temak vengon xa Sion tesepin texeih teha xati tehit, “Herod, sexien nam xil tamal ti vengon di otehi mi Herodias, atou na tumali Pilip. Naha xa di opol ni nggur xoteh rae na Hi.” <sup>5</sup>E tave ti neta xa Herod bit vahas Sion vamat, xi tenapol ni ti vengon ulin tekan ni ekaten na moletin xil vengon xil di latenemi latehit Sion Baptaes tehe provet tei.

<sup>6</sup>Di, vatei, latepol ni anien ve melengien xa latepes suv toto Herod en. E melengien ak, atuli na Herodias tehol pe met moletin xil vus e tesak ni Herod tehesi xi tehe holu ven. <sup>7</sup>Misak ni, xi pol ni hitxatien tei te xeih mi atuli ak xa isa naha vari xa ien bei mini. <sup>8</sup>Ma atuli ak be visal ninen e misepin mini. Di, dilomun ba pus suv toto Herod e biteni mini bit, “Taxeak, ieok bei tangan uhas vin Sion Baptaes, uta xoteh vatin, e usa ni minou e tre tova.” <sup>9</sup>Melele Herod milonge mak, xi milonge misa pupu. E neta sav xa milonge mak, xi misemaen ni moletin nan xil tangan ha lipol ni, vengon ien ti tavei vahur xoteh hitxatien nan pe met moletin xil. <sup>10</sup>Ma moletin te vaeen nan xil labe nim te xeih, e lada xoteh vat Sion ra tiei nan. <sup>11</sup>Di, laling vatin de tre tei e langguri ba lasa ni mi atuli ak. E xi sung, ngguri ba misa ni mi ninen. <sup>12</sup>Melele xa moletin xil na Sion lalongeong ni xa xi mat, lamei e lapo tiei nan, ba ladihin ni. Di, ba labit mese ni mi Iesu.

### Iesu Bangan Moletin Xil xa Lali Taosen Lim (5000)

<sup>13</sup>x<sup>13</sup>Melele xa Iesu milongeong ni xa Sion mat, xi be bot del moletin nan xil e labalis labe ri oei e rute xa moletin latovuol en. E melele xa moletin xil lalonge, xil langgo taon nae xil e ba langgusili. <sup>14</sup>Ma melele xa Iesu but be reling bot, xi pus vanut moletin xil xa mahulong di ladatili tuei. E melele xa pus xil, en misae e xil e midal rat ngan xil xa lamesei ra meseien nae xil.

---

<sup>w</sup> **14:1** Tumulen ak de Mak 6:14-29; e Luk 9:7-9 mun <sup>x</sup> **14:13** Tumulen ak de Mak 6:30-44; Luk 9:10-17; e Sion 6:1-14 mun



<sup>15</sup>E melele xa eai minu, moletin nan xil lamei visali e labiteni mini labitene, “Rute ak da suei e da be vongien xiak. Bos xa usil rerat vanut moletin xil ak liha tangan ha lihe metimal xil e lixal ti anien ae.”

<sup>16</sup>E Iesu biteni mi moletin nan xil bitene, “Rinasil rerat xil ti linaha. Xamim tang musa anien mi xil tangan lia ni.”

<sup>17</sup>E labit rilomun ni mini labit, “!Ei! ?Mupol ni itep, vengon xa anien ar tapin ti? Pusi xiak, beret be lim e meseo mun be lu tang.”

<sup>18</sup>Iesu biteni mi xil bit, “Musa ni vamei minou.” <sup>19</sup>Di, xi biteni mi vanut moletin xil tangan litotan e ut tei xa bos xa husmunae di en. Melele xa ladotan bus, nggur beret lim del meseo lu, miketeh be nesao e misa memesien ba mi Hi ven. Di, bul papas beret xil e misa ni mi moletin nan xil tangan liti beret ak itel meseo mun mi vanut moletin xil. <sup>20</sup>Moletin xil vus langganien kuhi e vange polu. E melele xa moletin xil na Iesu laba mun tangan laleh saxut anien xil, lase ni be valeat lu e le tei (12) ba vuma ... xil vus lapolu. <sup>21</sup>E melele nen ak, tiramue xil xa langganien duxoh taosen lim (5000). E atou e horamue xil, latavuli xil ti.

### Iesu Mikakao e Ramut Oei

<sup>22</sup>Melele xa langganien bus, Iesu biteni mi moletin nan xil tangan litiamu ni lihe ri Oei Kaleli. E xi kestang ita tangan isil rerat vanut moletin xil lihaha. <sup>23</sup>Melele xa misil rerat moletin xil bus, xi mika sen tang be nesao e vathu tei tangan vasis. E Iesu da tasen ba duxoh vongien.

<sup>24</sup>E melele nen ak, moletin xil na Iesu ladi e bot nae e Oei Kaleli, sotin ra ut. E xil di lakameti nggeih tangan lavalis vengon labisu ni votiang tei xa nggeih e tahe xil mun di labas bot nae.

<sup>25</sup>E makoe roroh, ut taluv pilei ti mu, Iesu bemei visal xil e di mikakao e ramut oei nggoni ngan taxa di mikakao e tan tang. <sup>26</sup>E melele xa moletin nan xil lapusi xa di mikakao e ramut oei, ulixil mikan tova tang e lameun be nesao labit, “!Aue li! !Temat tei!”

<sup>27</sup>E vatei takes, Iesu misepin mi xil bit, “!Ulimim nakan ti! !Inou tang! Tinemim namalulul ti.”

<sup>28</sup>E Pita bit rilomun ni mini bit, “!Suv, xosxa be xouk reitin, uhiteni minou tangan nikakao e ramut oei e nihata visaluk!”

<sup>29</sup>Ma Iesu biteni mini bit, “!Amei!”

Misak ni Pita but be reling bot e da mikakao e ramut oei ba ni Iesu. <sup>30</sup>E melele xa Pita pusi xa votiang di bemei nggeih, ulin mikan, ma da palrir e oei. Melele xa pusi mak, miki be nesao bit, “!O suv, ututou ni nou li!”

<sup>31</sup>Vatei takes, Iesu misa hen e dal xati bit, “!Neketen nam hokorong pupu! ?Veneh ma otonesi ti e nou?”

---

γ 14:22 Tumulen ak de Mak 6:45-52; e Sion 6:15-21 mun

<sup>32</sup>E melele taxa lube bot, votiang be tan. <sup>33</sup>Melele xa lapusi mak, moletin xil xa ladi e bot lamot mi Iesu e labiteni mini labit, “!O reitin mak, xouk vari iaxa obe Nat Hi!”

<sup>34</sup>Di, langgur xoteh Oei Kaleli ba vuma ... laduxoh ut e tan tahal Kenesaret. <sup>35</sup>E melele xa moletin xil te rute ak lapus kila xa be Iesu, lasa sepinien ba mikapis rute xil vus xa di sangas. Misak ni, moletin xil holu laleh ngan nae xil xa di lamesei lamei lapus Iesu. <sup>36</sup>E ladak kesi tengan imaien xil lituxol seri eising nan tang. E xil vus xa laduxoli, meseien nae be reling xil.

**Iesu Pispisi usil Naha xa Misak ni Moletin Xil  
Lamese mu Latamese Ti Pe Met Hi**

**15** <sup>1</sup>Vatei, Farasi xil e tisa xil te Rae xil na Mosis langgo Serusalem, lamei visal Iesu e lasisi labit, <sup>2</sup>“?Veneh ma moletin nam xil latahusil xat ti sexien xil xa elda nar xil tetiamu latesa ni mi xir? Vengan moletin nam xil latakas he xil ti mu vamese, ti, lavaanian sung.”

<sup>3</sup>Iesu bit rilomun ni mi xil bit, “?E veneh vari xamim di munggur xoteh rae xil na Hi tengan muhusil kuh pispisien namim xil tang? <sup>4</sup>Vengan Hi biteni bit, *‘Mumerere ni tamemim e ninemim xil.’* (Eks 20:12) E biteni mun bit, *‘Xosxa moletin tei isuhol tamen mu ninen, ma lihasi imat.’* (Eks 21:17) <sup>5</sup>E xamim di mupispisi mi moletin xil xa likila lihiteni mi tame e nine xil lihit, ‘Holesok xil navan xa nakila nitutou ni xamil ni, ngan xil ak nasikoe xole ngamu tengan nisa ni mi Hi kestang.’ <sup>6</sup>Nggo rin ak, di mupispisi mi moletin xil xa linamerere ti mun ni tame e nine xil natel holesok nae xil. Ma pispisien namim xil di pol ni sepinien xil na Hi mei be neta sav tang. <sup>7</sup>!Xamim mumese nggo hilibemim kestang! Naha xa Hi tehiteni usil xamim texo provet Aesea momal xa bit,

<sup>8</sup> *‘Moletin xil ak di lamerere ni nou del sepinien nae xil kestang,  
e tine di sotin ra nou.*

<sup>9</sup> *Tave ti neta xa di lamot minou,  
ieok ti tavei nakil ti.*

*Vengan xil di lasa pispisien xil xa be na moletin xil tang,  
e di labiteni xa inou iaxa ieok bei tengan lihusili.’*” (Aes 29:13)

<sup>10</sup>Di, Iesu biles e mikes vanut moletin xil lamei visali e biteni mi xil bit, “!Muteong kuhi tengan mukila! <sup>11</sup>Tave holesok xil ti xa moletin tei ngguri nggo vulongen be tinen iaxa di misak ni mei tamese ti pe met Hi. !E-e, tamak ti! E sepinien xa mistal nggo vulongen iaxa mikila vasak ni moletin ak mei namese ti pe meten.”

<sup>12</sup>Melele xa Iesu be reling vanut moletin xil, moletin nan xil labiteni mini labit, “?Xouk okila xa Farasi xil tine tesoh melele xa latelong sepinien nam?”

<sup>z</sup> 15:1 Tumulen ak de Mak 7:1-23 mun

<sup>13</sup>E Iesu bit rilomun ni mi xil bitene, “Farasi xil ak langgoni vatiei xil xa Tata navan xa de ut nesao tenalih xil ti.<sup>a</sup> E limei liput rat xil itel lit xil. <sup>14</sup>Mustokovein xil liti nga. Xil labe metevar, e di lasak pisi tangan ti litiamu ni metevar sav xil mun. E xosxa metevar tei di diamu ni metevar tei mun, ma xalu vus lalimot lalihe vul tei.”

<sup>15</sup>E Pita biteni mini bit, “Hit kil koute te vole ak mi xamem li.”

<sup>16</sup>Di, Iesu misis xil bit, “?!Midep, xamim mutakil ti mu!? <sup>17</sup>?Mutakil ti xa holesok xil xa mungguri nggo vulongomim be vangemim tang. Ma di, mistal be reling tiei namim, ba be tisok tang. <sup>18</sup>E holesok xil xa di tinemim e musepin ni nggo vulongomim, xi vari iaxa di pol ni xamim mutamese ti pe met Hi. <sup>19</sup>Vengan melele xa tine moletin tei misa, xi di pol ni hisit sexien tesa xil ak: minem usil holesok xil xa misa, bas vin moletin xil, mikan ni atou na mosav xil, di pat vituei del mosav melele xa lutateli ti mu, di mikan ni neta na mosav xil, di miluvos ni his mosav xil e kot, e di misep purun his mosav xil mun. <sup>20</sup>Sexien xil ak di lapol ni moletin xil latamese ti pe met Hi. E xosxa moletin tei takas hen ti mu vamese, ti, vaanian sung, ngan ak misakras vapol ni moletin tei namese ti.”

#### Atou Tei xa Tave Siu Ti Mineket e Xeihen na Iesu

<sup>21</sup><sup>b</sup>Di, Iesu be reling rute ak e ba be rute sav tei xa be sangas ni metimal xalu tahal Taer e Saedon. <sup>22</sup>E ate-Kenan tei xa de rute ak bemei visal Iesu e dak kesi bit, “!O suv li, xouk xa ostal onngo vatimol na suv toto Deved! !Iem isae e nou li! Ninin tesa tei da xat atuli navan e di pangei tova tang.”

<sup>23</sup>E Iesu tasa ti sepinien tova mini. Ma moletin nan xil lamei visal Iesu e labiteni mini labit, “Usil rat atou ak iha vengan di mikei nggeih bemei mi xir.”

<sup>24</sup>Misak ni, xi biles e biteni mi atou ak bit, “Hi misil nou tangan namei ve mol-Isrel xil kestang xa langgoni sipsip xil san xa lakesae.”

<sup>25</sup>E ate-Kenan ak bemei e mitingeiril pe meten e dak kesi nggeih bit, “!O suv! !Tutou ni nou li!”

<sup>26</sup>E xi bit rilomun ni mini bit, “Tamal ti xa lavur anien a horamue xil e laso ni tang vaha mi kuli xil.”

<sup>27</sup>E atou bit rilomun ni mini bit, “Suv, ngan ak be reitin. E kuli xil mun xa ladi xorelis von anien en lakila lava saxut anien xil xa suv nae di ngga lingi.”

<sup>28</sup>Di, Iesu biteni mini bit, “!Atou li, neketen nam mahulong tova tang! Naha xa di osis nou ni mei istal ihe reitin.” E vatei takes, atuli nan mei bos rilomun.

---

<sup>a</sup> 15:13 Aes 60:21    <sup>b</sup> 15:21 Tumulen ak de Mak 7:24-30 mun

### Iesu Bangan Moletin Xil xa Lali Taosen Hat (4000)

<sup>29</sup>Melele xa Iesu be reling tan tahal Keneseret, xi del moletin nan xil langgusil seri Oei Kaleli. Di, labe hu tei e ba ladotan ladi. <sup>30</sup>Di, vanut moletin xil holu lamei tangan lapus Iesu e laleh ngan nae xil xa lamesei: ngan xil xa lasakras lakakao, ngan xil xa mete bar, ngan xil xa le mikavui, ngan xil xa labe vut, e holu e ngan tesav xil mun xa langgur meseien sav xil. Laling kekes ni xil pe met Iesu, e xi pol ni xil vus mei labos rilomun. <sup>31</sup>E melele xa moletin xil lapus naha xa Iesu pol ni, latemanin holu vengan xa ngan xil xa labe vut, di lasepin; ngan xil xa le xil mikavui, le mei momal; ngan xil xa lasakras lakakao, di lakakao; e ngan xil xa labe metevar, di laketeh. Melele xa lapusi mak, lapet rat his Hi na mol-Isrel xil ven.

<sup>32</sup>Di, Iesu mikes viton moletin nan xil e biteni mi xil bit, “Ieok di misae e moletin xil ak vengan ladi visal xir melengien tol ngamu e anien ae tovuol. Ieok ti tave tangan nasil rerat xil latilomun lave tim sae xil melele xa mae dit nggat xil. Maxani, vexil namal e mete xil namaluxoluk e suse.”

<sup>33</sup>E moletin nan xil lasisi labit, “!Inggak be uruvuol! ?Rikamet anien e rute xave tangan rakila rihengan vanut moletin xil xa mahulong xiak?”

<sup>34</sup>E Iesu misi xil bit, “?Beret vahis mungguri?”

Labit rilomun ni mini labit, “Beret lu e he sav (7) tang e tutut meseo vahis.”

<sup>35</sup>Ma Iesu biteni mi vanut moletin xil tangan litotan e tan. <sup>36</sup>Melele xa ladotan bus, Iesu nggur beret lu e he sav (7) e meseo vahis e misa memesien ba mi Hi ven. Di, bul papasi e misa ni mi moletin nan xil tangan ha liti mi moletin xil. <sup>37</sup>Moletin xil vus langganien e vange polu. E melele xa moletin xil na Iesu laba mun tangan laleh saxut anien xil, lase valeat lu e he sav (7) ba vuma ... xil vus polu. <sup>38</sup>Tiramue xil xa langganien e melengien ak laduxoh taosen hat (4000). E atou e horamue nae xil latavuli xil ti. <sup>39</sup>E melele xa Iesu misil rerat vanut moletin xil ak labaha, xi del moletin nan xil labe bot e ba labe rute tei xa lakesi ni Makatan.

### Rut Eilep Xil na Siu Xil Lasis Iesu Tangan Vapol ni Neta

#### Tei xa Eilep Vapisen ni xa Xi Texo Hi Reitin

**16** <sup>1</sup>Vatei, Farasi e Satusi xil lamei visal Iesu tangan lasak pisi. Ma lasisi tangan vapol ni neta tei xa eilep vapisen ni xa xi texo Hi reitin.

<sup>2</sup>E Iesu bit rilomun ni mi xil bit, “Melele xa eai minu, xamim mubiteni mubit, ‘?Mupusi? Tilang hat pili. Ngan ak pisen ni xa an ihos visuvong.’

<sup>c</sup> 15:29 Tumulen ak de Mak 8:1-10 mun <sup>d</sup> 16:1 Tumulen ak de Mak 8:11-13; e Luk 12:54-56 mun

<sup>3</sup>E melele xa ut milan, mubiteni mubit, ‘Tilang hat pili. Ngan ak pisen ni xa an isa xosali.’ Xamim mupus kil naha xa di mistal e tilang hat, e musakras mupus kil naha xa eilep xa Hi di pol ni xosali. <sup>4</sup>Xamim moletin xil te xosali ak, mubit mupus ti neta tei xa eilep vapisen ni xa natexo Hi reitin. Di mubit mupusi vengan xa meulien namim mikavui e munggoni atou tei xa be na Hi, e di maen xi mi ngan tesav xil mun. E ninapol ni ti neta tova xa eilep tangan mupusi. Ti mupus neta tei takes xa ixoni ngan xa testal mi provet Siona tetiamu.” Di, Iesu biles e be reling xil.

### **Iesu Misel Xat Moletin Nan Xil tangan Lilaxat Kuh Xil ve Pispisien Xil na Farasi e Satusi Xil**

<sup>5</sup>“Di, Iesu del moletin nan xil langgur xoteh Oei Kaleli. E melele xa laduxoh rin, moletin nan xil lanem rilomun ni xa iexil bovorong ni beret ae. <sup>6</sup>E melele xa laba, Iesu biteni mi xil bitene, “Mulaxat kuh xamim ve ‘is’ na Farasi e Satusi xil.”

<sup>7</sup>Melele xa lalong sepinien nan, lasep usili del xil mun tang labit, “Xi misepin mak mi xir vengan xa rataleh ti beret ar.”

<sup>8</sup>E Iesu milong kil naha xa di lasep usili. Ma ba biteni mi xil bitene, “!Neketen namim hokorong pupu! ?Veneh ma di musep usil beret xa ar tovuol? <sup>9</sup>?!Mutakil ti mu!? ?Iemim bovorong ni ngamu xa natehengan tiramue xil latehe taosen lim (5000) tetel beret lim (5) tang? E valeat vahis polu ni rut anien xil xa muteleh viton ni? <sup>10</sup>?E munem usil melele xa natehengan moletin latehe taosen hat (4000) tetel beret lu e he sav (7) tang. ?E valeat vahis polu ni rut anien xil xa muteleh viton ni? <sup>11</sup>?Ma veneh ma mutakil ti mu xa inou natasep usil beret ti? E mulaxat kuh xamim ve ‘is’ na Farasi e Satusi xil.” <sup>12</sup>Ma xil lanem kila sung xa xi taviteni ti tangan lilaxat kuh xil ve is te beret, e ve pispisien xil na Farasi e Satusi xil.<sup>f</sup>

### **Pita Bit Rati xa Iesu be Kristo xa Hi Tehit Xati Imei**

<sup>13</sup><sup>g</sup>Iesu e moletin nan xil lakakao laba, laduxoh rute tei sangas ni taon tahal Seseria-Filipae. E inggak, xi misis moletin nan xil bit, “?Moletin xil labiteni xa inou, Nat Moletin<sup>h</sup>, nabe visi vari?”

<sup>14</sup>E labit rilomun ni mini labit, “Rut moletin xil labit obe Sion Baptaes. E rute ngan xil labit obe provet Ilaetsa. E rute sav xil mun labit xouk obe provet Seremaea tetiamu mu provet sav tei.”

<sup>15</sup>E xi misis xil bit, “?E xamim, midep? ?Mubit inou nabe visi vari?”

---

e **16:5** Tumulen ak de Mak 8:14-21 mun    f **16:12** Pispisien xil na Farasi e Satusi xil nggoni ‘is’ e rin xa di laso rin pispisien xil holu xa tamal pupu ti del xat sepinien xil na Hi, e pispisien nae xil di duxoh mol-Isrel xil vus.    g **16:13** Tumulen ak de n Mak 8:27-30; e Luk 9:18-21 mun    h **16:13** Dan 7:13 di misep usil Nat Moletin.

<sup>16</sup>E Saemon Pita mitamea e bit, “Xouk obe Kristo. Reitin, obe Nat Hi xa meul da.”

<sup>17</sup>E Iesu biteni mini bit, “Saemon, nat Siona, tuxolxatien na Hi di minuk ngamu. Vengan xa tave moletin ti xa vahit rat ngan ak minuk. Tata navan xa de ut nesao, xi vari bit rati minuk. <sup>18</sup>E nabiteni minuk xa obe ‘Pita’ xa koute teni be ‘vatihat’. E vatihat ak, nikili ni Sias navan. E xeihen xil vus na Temat e maten lasakras mei lapurun ni. <sup>19</sup>Nisak ni xouk mei uhe vat na moletin navan xil. Ve rin ak, naha xa uhit xole e ut etan ak, Hi mun ihit xole. E naha xa umae ni e ut etan, Hi mun imae ni.” <sup>20</sup>Di, Iesu misep xol moletin nan xil tangan linahit rati ti mi moletin tova xa xi be Kristo xa Hi tehiti xati tangan imei.

### Iesu Misep usil Longpangasien, Maten e Mea Rilomunen Nan

<sup>21</sup>E melele nen ak ba, Iesu misep kila mi moletin nan xil xa ihe Serusalem. E melele xa ituxoh Serusalem, xi ihur longpangasien holu ixo he elda xil, vat xil na pris xil, e tisa xil te Rae xil na Mosis. Xi bit mese ni xa xil lihas vini. Ti, e melengien tol nen, imea rilomun ra maten.

<sup>22</sup>Melele xa Iesu biteni mak, Pita dela be rin, e misepin nggeih xati bit, “!Suv, onasepin ti namak! !Holesok xil ak misakras vastal minuk!”

<sup>23</sup>E Iesu biles, pus Pita e biteni mini bit, “!Temat, he reling nou! Nenemien ak be neta tei xa di misak pisi tangan ipol ni nou nisavut e suse navan. Vengan xouk di onggusil xat nenemien na moletin xil te ut etan, e otahusil nenemien na Hi ti.”

<sup>24</sup>Di, Iesu biteni mi moletin nan xil bit, “Xosxa moletin tova ien bei tangan ihusil nou, ma isin meulien nan, ipo eivave te maten nan, e ihusil xat nou. <sup>25</sup>Vengan xa ngan xil xa lasak pisi tangan likenin meulien nae ve xil tang, ma meulien nae ikesai ra xil. E ngan xil xa lamaen meulien nae ikesai vengan di langgusil xat nou, ma, e ut nesao, xil likamet meulien sal.

<sup>26</sup>?Naha xa bos, xosxa moletin tei mileh holesok xil vus te ut etan ak, e di misa rat meulien nan tangan vapol ni? !Neta tovuol vari! Vengan xi misakras vasa neta ngan tangan ihur rilomun ni meulien nan.

<sup>27</sup>“Tave nousav ti, inou, Nat Moletin, nitilomun itel xeihen xa tellep xa Tata navan isa ni minou e itel masxaxa nan xil. E melele nen ak, nisa kekes ni huit polien mi moletin xil vus ihusil naha xa xil latepol ni. <sup>28</sup>Reitin nabiteni mi xamim, rut xamim xa di lasoh del nou xosali, linamat ti mu e lipus melele xa inou, Nat Moletin, nimei tangan mei nihe suv toto na moletin xil vus.”

---

<sup>i</sup> 16:21 Tumulen ak de Mak 8:31-9:1; e Luk 9:22-27 mun

### Tenbe Iesu Mei Mihinehin

**17** <sup>1</sup>Melele xa melengien tei e he sav (6) mei mitavi, Iesu nggur Pita, Temes del Sion (xa be tua na Temes) e del xatel latobe nesao e vathu tei tengan xatel ak kestang latoti vituei en. <sup>2</sup>Inggak, latpus tenbe Iesu biles. Valnaon mihinehin nggoni eai, e eising nan xil mei mieh pupu e mihinehin nggoni laet. <sup>3</sup>Vatei takes, latpus Mosis e Ilaetsa lustal e ba lusepin del Iesu.

<sup>4</sup>Melele xa Pita pus xalu, biteni mi Iesu bit, “!Suv, bos xa ratdit ak! Xosxa iem bei, ma matkili ni horao ihe tol: tei ihe mam, tei ihe ma Mosis, e tei ihe ma Ilaetsa.”

<sup>5</sup>Melele xa di tamu misepin, momah tei xa mihinehin pupu mei mikutaxol xatel. E latlong rae tei mistal nggo en xa bit, “Ngan ak be Natuxoli reitin xa eheien navan di en. Inou nabesi nou pupu ven. !Muteong xati!”

<sup>6</sup>Melele xa Pita xatel latlong rae ak, uli xatel mikan pupu, e latomot latobe tan. <sup>7</sup>Melele xa ladi tamu e tan, Iesu bemei e duxol xatel bit, “Totamea. Ulimitel nakan ti mun.” <sup>8</sup>E melele xa latpet rat metexatel, lattapus ti mun moletin xalu ak, Iesu kestang de visal xatel.

<sup>9</sup>Melele xa di latsuvul ra vathu ak, Iesu misep xol xatel bit, “Mutnahiteni ti mi moletin tova usil naha xa mutepusi ituxoh melele xa inou, Nat Moletin, nimea rilomun ra maten.”

<sup>10</sup>E moletin nan xatel latsisi latbit, “?Veneh ma tisa xil te Rae xil na Mosis labiteni xa Ilaetsa imei itiamu ni Kristo xa Hi tehiti xati?”<sup>k</sup>

<sup>11</sup>E Iesu bit rilomun ni bit, “Reitin xa Ilaetsa imei tengan ipol ni holesok xil vus mei imal rilomun. <sup>12</sup>E nabiteni mi xamitel xa Ilaetsa temei ngamu e moletin xil latnapus kil ti. Xil latepol tesa mini texoni ngan xa iexil tehei. E suse nen tak, tave nousav ti, inou mun, Nat Moletin, nihur longpangasien e he xil.” <sup>13</sup>Melele xa Iesu biteni mak, ma latlong kila sung xa xi di bit usil Sion Baptaes.

### Iesu Misak Pilei Horamue Tei xa Ninin Tesa Tei Da En

<sup>14</sup>Melele xa Iesu xatel latsuvul ra vathu ak, latbisu ni vanut moletin xil. E moletin tei bemei visal Iesu, mitingeiril pe meten, <sup>15</sup>e biteni mini bit, “O suv li, iem isae e natuxoli, vengam xi mermesil e milong pangas xi pupu ven. Melengien holu, xi di mot be upang mu oei. <sup>16</sup>Natehuri temei visal moletin nam xil, e xil lasakras lapol ni mei bos rilomun.”

<sup>17</sup>Melele xa Iesu milong mak, biteni bit, “!Iva! !Xamim moletin xil te xosali ak, mukavui e neketen namim tuvuol vari! ?Niti visal xamim ituxoh

j 17:1 Tumulen ak de Mak 9:2-13; e Luk 9:28-36 mun <sup>k</sup> 17:10 Mal 4:5 <sup>l</sup> 17:14 Tumulen ak de Mak 9:14-29; e Luk 9:37-43 mun

vilieh? Veok buol ni xamim xa neketen namim tovuol. Muhur horamue ak vamei visal nou inggak.”<sup>18</sup> E melele xa Iesu pus horamue ak, minggol rerat ninin tesa be reling, e, vatei takes, horamue ak mei bos rilomun.

<sup>19</sup>Dutou ni melele nen ak, melele xa Iesu da sen tang, moletin nan xil lamei visali e lasisi labit, “?Veneh ma xamem matesakras mavol rerat ninin tesa ak?”

<sup>20</sup>E Iesu bit rilomun ni mi xil bit, “Vengan xa neketen namim hokorong pupu. Reitin nabiteni mi xamim, xosxa munggur neketen xa hokorong nggoni utut mastad, mukila muviteni mi vathu ak muvit, ‘Umea ra rute ak, e uha xor’, ma iha xor. Xosxa neketen namim di, ma neta tovuol vaxeih tengan mupol ni.”<sup>21 m</sup>

<sup>22</sup>Di, lamea reling rute ak e lakakao labe provins tahal Kaleli. E melele xa di lakakao laba, Iesu biteni mi xil bit, “Nave nousav ti, inou, Nat Moletin, limaen ni ihe he moletin xil te ut etan. <sup>23</sup>Xil lihas vin nou. E, e melengien tol nen, nimea rilomun ra maten.” Melele xa moletin nan xil lalonge mak, lanexo pupu.

### Iesu Nggal Takis te Nim Eo Nggo Merekel Tei

<sup>24</sup>Vatei, Iesu del moletin nan xil di lakakao e lamei e taon tahal Kapaniam. Inggak, moletin xil xa laleh mani te takis te Nim Eo lamei visal Pita e lasisi labit, “?Midep? ?Tisa nam di nggal takis te Nim Eo, mu taxali ti?”<sup>n</sup>

<sup>25</sup>E Pita bit rilomun ni mi xil bit, “Io, xi nggale.”

Di, Pita dilomun be tim. Xi tasepin ti mu, e Iesu misis bit, “?Saemon Pita, onemi midep? ?Suv toto xil te ut etan di laleh takis e duti ra moletin si xil?° ?Lalehi ra horamue nae xati, mu ra moletin sav xil tang?”

<sup>26</sup>E Pita bit rilomun ni mini bit, “Lalehi ra molettin sav xil.”

Iesu biteni mini bit, “Imak, ma horamue nae xati xil linaxal ti takis. <sup>27</sup>E tave ti neta xa Hi xa be Suv Toto te holesok xil vus be Tata naralu, ralixal takis te Nim Eo nan vengan xa tavos ti xa ralsak ni moletin xil ak tine vasoh ve ralu. Ma ha, uhe Oei Kaleli e uso huk. Meseo xa usare itiamu, usah vulongen, e ukamet mani tei xa ipin tangan uxal rat takis naralu ni. Ti, uhuri e usa ni mi moletin xil ak.”

### Iesu Pispisi usil Visi Iaxa Be Eilep Mak Mu Pe Met Hi

**18** <sup>1p</sup>E melele nen ak, moletin xil na Iesu lamei visali e lasisi labit, “?Visi iaxa be eilep mak mu e ngan xil xa Hi be Suv Toto nae?”

<sup>m</sup> 17:21 Rut uvei na Matiu lateling sepinien ak teti en xa bit, “Moletin mikila vaxol rerat hisit ninin tesa ak melele xa misis e di bal ra anien.” <sup>n</sup> 17:24 Takis te Nim Eo tehe drakma lu na tiramue xil kekes xa texoni vatu taosen lu (2000 vt). <sup>o</sup> 17:25 Duti nggoni vat, takis xa lalingi da xat praes te holesok xil xa langgur ra ut sav xil. <sup>p</sup> 18:1 Tumulen ak de Mak 9:33-37; e Luk 9:46-48 mun



<sup>2</sup>Iesu mikes tutut horamue tei e pol ni mei misoh pe met xil. <sup>3</sup>Di, biteni mi xil bitene, “Reitin li nabiteni mi xamim, xosxa munaviles nenemien namim ti tangan mei muxoni horamue ak, ma musakras muve rute xa Hi be Suv Toto en. <sup>4</sup>Misak ni, ngan xil xa lapol ni nenemien nae be tan nggoni horamue ak, xil lihe eilep mak mu e rute xa Hi be Suv Toto en. <sup>5</sup>E moletin tei xa nggur pilei horamue tei nggoni ngan ak e hisok, ma nggoni ngan xa di minggur pilei nou.

<sup>6</sup>“E xosxa moletin tova isak ni moletin tei xa nggusil xat nou nggoni horamue ak tangan imot e tesaen, ma Hi isa longpangasien isa mak mu mini. Bos mak mu xosxa lavar xat hat tova xa mahulong pupu vate hurauen, e laso ni vamarir e huinep te tas. <sup>7</sup>Reitin xa holesok xil di lasak pis moletin tei tangan vamot e tesaen di bemei. !E isa mak mu mi ngan xil xa labe suse te tesaen xil ak!

<sup>8</sup>“!Nggusil nenemien ak, xosxa hem mu lem misak ni xouk di omot e tesaen, ma uta xotehi e uso ni iha! Ihos mak mu xa rut tenbom tang isa e uhur meulien sal, ili ngan xa hem xalu e lem xalu lubos tang ludi e liso xouk uhe Upang xa misakras vamat. <sup>9</sup>!Xosxa metom tei misak ni xouk di omot e tesaen, ukis rati e uso ni iha! Ihos mak mu xa metom tei mikesae e uhur meulien sal, ili ngan xa metom xalu vus ludi tang e liso xouk uhe Upang xa misakras vamat.”

### Iesu Dei Vole usil Sipsip Xa Mikesae

<sup>10</sup>“Melele xa horamue ak di tamu misomal pe mete, Iesu biteni mi moletin nan xil bit, “Muxuxou kuhi ve xamim tangan munanem male ni moletin xil xa langgusil xat nou nggoni horamue ak. Reitin li nabiteni mi xamim xa masxaxa nae xil ladit pe met Tata navan e ut nesao. E xil lihit mesen ni xosxa moletin tei di pangei xil. <sup>11</sup>”

<sup>12</sup>“?Xamim munemi midep? ?Xosxa moletin tei, sipsip san xil duxoh handred tei (100) e tei e xil mikesae, ma xi ipol ni neh? ?Munemi xa ihe reling sipsip sav san xil xa labe hanutap hat e hat e le tei mun (99) liti e seri hu tei tangan ha ilang ves ngan xa mikesae? !Io! <sup>13</sup>E reitin li nabiteni mi xamim xa, xosxa ikameti, ma ihesi xi pupu ven, ili sipsip sav san xil xa latakasae ti. <sup>14</sup>Nggusil rin ak, Tamemim xa de ut nesao ien ti tavei tangan ti moletin xa nggusil xat nou nggoni horamue ak vakesae.”

### Iesu Pispisi usil Sexien tangan Moletin Imal ni Tunali xa Pol Misa Mini

<sup>15</sup>Iesu dit ni ngan taxa di misepin mi moletin nan xil usil ngan xil xa di lapol misa mi mosav xil bit, “Xosxa tumali tei pol misa minuk, xouk tasom uhe visali

---

¶ **18:8** Tumulen ak de Mat 5:30; e Mak 9:42 mun ¶ **18:10** Tumulen ak de Luk 15:3-7 mun  
 § **18:11** Tetiamu, melele xa moletin xil di latetis rilomun ni uvei ak na Matiu, rute ngan xil laso rin ni vas 11 xa de Luk 19:10 mun xa bit, “*Inou, Nat Moletin, namei tangan nalang ves hisit moletin xil xa lakesae tangan niteh meulien e xil.*”

e upisen naha xa xi tepol ni xa tenamal ti minuk. Xosxa iteong kuhi ni xouk e mulimal ni xamil, ma uhesi xouk vengan muliti ihos rilomun. <sup>16</sup>E xosxa xi nateong ni sepinien nam ti, utilomun uhe visali itel moletin sav tei mu lu mun. Xalu mun lalipusi e lalisepin mini e rin nam xa be reitin xa otesak pisi tangan umal ni xamil. <sup>17</sup>E xosxa tumali ien ti tavei tangan vateong ni xamitel, ma ha mutihit mese ni pe met vanut moletin xil te Sias na Hi. E xosxa moletin ak ien ti tavei tangan vateong ni ngan xil te Sias mun, ma mupusi ixoni ngan taxa xi takil ti Hi mu be moletin tesa tei nggoni ngan xil xa di laleh takis.

<sup>18</sup>“Reitin li nabiteni mi xamim, naha xa xamim di musep xole e ut etan, ixoni ngan xa Hi mun xa de ut nesao di misep xole. E naha xa di mumaen ni e ut etan, ma ixoni ngan xa Hi mun xa de ut nesao di maen ni.

<sup>19</sup>“Reitin li nabiteni mi xamim xa xosxa xamil lu xa mudi e ut etan ak mulimei e nenemien tei usil neta ngan e mulisis ven, ma Tata navan xa de ut nesao isa huit sisen namil. <sup>20</sup>Vengan xa melele xa moletin lu mu tol latomei vituei e hisok, inou mun nite visal xil e rute ak.”

### **Iesu Dei Vole usil Longpangasien xa Istal mi Ngan Xil xa Iexil Ti Tavei Tangan Laketeh Vahos Rilomun mi Mosav Xil**

<sup>21</sup>Di, Pita bemei visal Iesu e misisi bit, “?Suv, xosxa tua navan pol misa minou, niketeh ihos rilomun mini ituxoh vahis? ?Ituxoh lu e he sav (7)?

<sup>22</sup>Iesu bit rilomun ni mini bitene, “E-e, tave lu e he sav (7) ti. Uketeh ihos rilomun mini ihe lu e he sav (7), ti, upol ni ihe lu e he sav (7) mun, ti, upol ni ihe lu e he sav mun (7) ha vuma ... osakras ovuli mun.<sup>t</sup>

<sup>23</sup>“Nihit kil sexien ak ni vole tei. Melele xa Hi mei ihe Suv Toto e meulien na moletin xil, ngan ak ixoni suv toto tei xa ien bei tangan imal ni kaon xa moletin te polien nan xil latepol ni tetela. <sup>24</sup>E melele xa xi di momal ni kaon xil ak, ladel moletin tei xa kaon nan mili gol mani“ milian hexalu (10,000,000). <sup>25</sup>E vengan xa suse tovuol tangan moletin ak ixal rat kaon nan, suv toto nan misemaen ni tangan lipos ni xi, atou nan, e horamue nalu xil vus mei lihe slev xil, e lipos ni holesok xil vus nan mun. E suse ak, suv toto bit mani nen mei ixal rat kaon xil vus nan.

<sup>26</sup>“Melele xa moletin ak milonge mak, mitingeiril pe met suv toto e dak kesi bit, ‘!Aue li! !Usa mesal tova mun xa hokorong minou li, e nixal rat holesok xil vus xa di kaon navan!’ <sup>27</sup>Melele xa suv toto ak milonge mak, en misae en. Ma misil len kaon nan e maen ni ba ven mase.

<sup>28</sup>“E melele xa moletin ak mistal, mikamet moletin te polien sav tei xa kaon nan dela be gol mani vahis tang. E melele xa pusi, miki xat huraaen e biteni mini bit, ‘!Uxal rat mani xil vus xa otehuri ranou!’

---

<sup>t</sup> **18:22** Sepinien xati teni bit, “Upol ni lu e he sav, e upol ni imak hanutap tol e hexalu mun (7 x 70).” <sup>u</sup> **18:24** Gol mani tei takes nggoni 1000 vatu. Ngan ak be mani tei xa eilep pupu xa moletin tei misakras vaxal rati.

<sup>29</sup>“E moletin te polien ak mitingeiril pe meten e dak kesi bit, ‘!Aue li! !Usa mesal tova mun xa hokorong minou li, e nixal rat holesok xil vus xa di kaon navan!’

<sup>30</sup>“E moletin ak ien ti tavei vasa mesal mini. E ba sung, miso moletin ak be nim te xeih tangan iti en ituxoh melele xa ixal rat kaon nan xil vus. <sup>31</sup>E melele xa moletin te polien sav xil lapus naha xa testal, xil lalonge misa pupu e ba labit mese ni mi suv toto nae.

<sup>32</sup>“Di, suv toto mikes moletin ak bemei visali e misepin nggeih mini bit, ‘!Xouk xa obe moletin tei navan di opol misa xa misa! Melele xa otetak kes nou tangan ieok isae e xouk, ma natesil len kaon nam e natemaen xouk ba vem temase. <sup>33</sup>?Misak ni, veneh ma xouk iem tasae ti moletin te polien sav navan vaxoni ngan xa inou natepol ni minuk?’ <sup>34</sup>Suv toto ien mikat, ma misa rat moletin nan ak ba tangan ihur longpangasien ixo he moletin xil e nim te xeih ituxoh melele xa ixal rat kaon nan xil vus.

<sup>35</sup>“E Tata navan xa de ut nesao mun ipol ni imak tang mi xamim vus xosxa munaketeh navos rilomun mi tua namim xil ti ixo tinemim tevi.”

#### Iesu Pispisi usil Sexien xa Moletin xa Miteli Nastokovein Atou Nan Ti

**19** <sup>1</sup>Melele xa Iesu misepin usil rin xil ak bus, xi be reling provins tahal Kaleli del moletin nan xil. Ma xil labe rute tei xa mili Oeisal Sodan e provins tahal Sudea. <sup>2</sup>Vanut moletin xil holu langgusili labe rute ak, e xi misak pilei xil vus.

<sup>3</sup>E melele nen ak, rut Farasi xil lamei visali tangan ti lisak pisi. Misak ni, lasisi labit, “Uhit pisi mi xamem. ?Rae nar xil di maen ni tangan moletin tei istokovein atou nan ve nenemien xil vus tang?”

<sup>4</sup>E Iesu bit rilomun ni mi xil bitene, “?Midep? ?Xamim mutavuli ti Vanuvei Eo na Hi? Vengan xi di biteni xa, tetiamu, e melele xa Hi tepol ni holesok xil e ut etan, *‘Hi pol ni moletin, tei be malohos, e tei mun be atou.’*” (Sen 1:27) <sup>5</sup>E biteni mun bit, *‘Ve rin ak, tiramue imea reling tamen xal ninen, e ihisti itel atou nan, e tenbexalu mei ihe tei takes.’* (Sen 2:24) <sup>6</sup>Misak ni xalu lutave lu ti mu, e mei lube tei takes. Ma naha xa Hi tehisten ni, moletin tovuol vaseti xalu mun.”

<sup>7</sup>E Farasi xil lasisi labitene, “Vahit vamak, ma veneh Mosis tesemaen xir tehiti, *‘Moletin xa bit vastokovein atou nan, isa Setifiket te Silaen mini. Ti, mikila istokovein ni sung.’* (Dut 24:1)”

<sup>8</sup>E Iesu bit rilomun ni bit, “Mosis temaen xamim tangan mustokovein atou namim xil vengon xa vatummim nggeih pupu. E sexien ak tovuol e melele xa Hi tepol kokot ni holesok xil. <sup>9</sup>E nabiteni mi xamim xa xosxa moletin tei mistokovein atou nan e melele xa atou ak tapol ni ti vasa

---

v 19:1 Tumulen ak de Mak 10:1-12 mun

vatel tiramue sav, xi di pol ni neta xa misa pe met Hi. E xosxa, moletin ak mea e miteli rilomun del atou sav, pe met Hi, nggoni ngan xa xi di pol misa del atou ak.”

<sup>10</sup>Melele xa misepin mi xil bus, moletin nan xil mei labiteni mini labit, “Vahit vamak e tiramue del atou nan, ma bos mak mu tangan tiramue tei ita tasen tang e nateli ti.”

<sup>11</sup>E Iesu bit rilomun ni mi xil bit, “Tave moletin xil vus ti xa lakila lavusil pispisien ak. E rut moletin ngan xil, Hi di misa xeihen mi xil tangan lihusili. <sup>12</sup>Vengan rut moletin xil lasakras lateli vengan ut eo nae misa melele xa latepes xil. E ngan teisav xil lasakras lateli vengan xa moletin sav tepangei ut eo nae. E rute moletin sav xil mun lapol ni nenemien nae xa linateli ti tangan lipol mi Hi xa be Suv Toto nae. Ngan xil xa lakila lavusil sexien ak, ma bos tangan lihusili.”

### Iesu Misa Tuxolxatien mi Horamue Xil

<sup>13</sup>“Di, moletin xil laleh tutut horamue nae xil lamei visal Iesu tangan xi valing hen e xil e vatuxol xat xil. E melele xa moletin nan xil lapus xil, labul xat xil.

<sup>14</sup>E Iesu misepin mi xil bit, “Mumaen tutut horamue xil ak lamei visal nou, e munasikoe xol xil ti. Vengan xa Hi be Suv Toto na hisit moletin xil xa langgoni xil tang.” <sup>15</sup>Ma melele xa lamei visali, Iesu miling hen e xil e misa tuxolxatien mi xil. Di, Iesu e moletin nan xil labe reling rute ak.

### Tiram Maxoe Tei Pusi xa Nggeih Pupu tangan Vastokovein Mani Nan tangan Vahusil Xat Iesu

<sup>16</sup>“Melele xa Iesu minggusil suse ba, moletin tei bemei visali e misisi bit, “Tisa, nipol ni naha xa bos tangan nikila nihur meulien sal?”

<sup>17</sup>Iesu bit rilomun ni mini bit, “?Veneh ma di osis nou usil naha xa bos? Hi kestang bos. E xosxa iem bei ovur meulien sal, ma uteong xat rae nan xil vus.”

<sup>18</sup>Di, moletin ak misisi bit, “?E rae xave vari e xil tangan nihusili? E Iesu bit rilomun ni mini bit,

“*Munahas vin ti moletin.*

*Munakan ni atou mu tiramue na mosav ti.*

*Munakan ni ti neta na mosav xil.*

*Munaluvos ni his mosav xil ti.*

<sup>19</sup>*Mumerere ni tamemim e ninemim xil.’ (Eks 20:12-16)*

*E, ‘Iemim ihei moletin sav xil ixoni ngan taxa xamim vus di iemim bei xamim mun tang.’ (Lev 19:18)”*

---

<sup>w</sup> 19:13 Tumulen ak de Mak 10:13-16; e Luk 18:15-17 mun    <sup>x</sup> 19:16 Tumulen ak de Mak 10:17-31; e Luk 18:18-30 mun

<sup>20</sup>E tiram maxoe ak bit rilomun ni mi Iesu bit, “Inou di nanggusil xat rae xil vus ak. ?Naha mun iaxa natapol ni ti?”

<sup>21</sup>Ma Iesu biteni mini bit, “Xosxa xouk iem bei tangan mei omal tevi, ma ha upos ni holesok xil vus nam e usa mani nen mi ngan xil xa holesok nae tovuol. E xosxa upol ni imak, ma holesok nam xil e ut nesao ihe holu. Ti, utilomun e uhusil xat nou.”

<sup>22</sup>E melele xa tiram maxoe ak milong sepinien nan, xi milonge misa e be relingi vengang xa holesok nan xil labe holu e en ti tave tangan vastokoveini.

<sup>23</sup>Di, Iesu biteni mi moletin nan xil bit, “Reitin li nabiteni mi xamim, nggeih tova tang tangan moletin xa holesok nan holu vamaen Hi mei vahe Suv Toto e meulien nan. <sup>24</sup>?Munemi xa kamel tei xa be mahulong mikila vakital vaxo met nidil tei xa hokorong xa hokorong pupu? E-e, misakras. E moletin tei xa holesok nan xil holu, nggeih mak mu mili ngan ak tangan imaen Hi mei ihe Suv Toto e meulien nan.”

<sup>25</sup>Melele xa moletin xil na Iesu lalonge mak, latemanin pupu e lasisi labit, “?Imak, ma Hi mikila vateh meulien na visi vari?”

<sup>26</sup>Iesu miketeh kapis e xil e bitene, “!Iaxai vari! Moletin misakras vapol ni, e Hi kestang mikila ipol ni holesok xil vus.”

<sup>27</sup>Di, Pita biteni mini bit, “?Opusi? Xamem mastokovein holesok xil vus namem tangan mavusiluk. ?Imak, ma Hi isa naha mi xamem?”

<sup>28</sup>E Iesu biteni mi xil bitene, “Reitin li nabiteni mi xamim, e melele xa Hi ipol pilei ni holesok xil vus te ut etan mei ihe neta hu, inou, Nat Moletin, nitotan e von xeihen navan itel miehen. E melele nen ak, xamim kekes mun ti mutotan itel nou e von xeihen namim xa ihe lu e le tei (12). Ti, mulepis mol-Isrel xil vus xa langgo vatimol lu e le tei (12) xa mahulong nae. <sup>29</sup>E moletin xil vus xa di lastokovein tim sae, mu tua nae xil, mu hinexil, mu tamexil, mu ninexil, mu horamue nae xil, mu naho sae xil venou, ma Hi isa rilomun ni mi xil huite teni xa ihe handred tei (100) ili ngan xa latestokovein ni. E xil lihur meulien sal mun. <sup>30</sup>E moletin holu xa labe eilep xil xosali ak, xil mei lihe neta sav tang. E holu xa labe movotei xil xosali, xil mei lihe eilep xil sung.

### Iesu Dei Vole usil Midep Moletin te Polien Xil Vus na Hortan Tei, Lapin Tang Pe Meten

**20** <sup>1</sup>Melele xa Iesu di misepin del moletin nan xil, xi dei vole ak mi xil bit, “Suse xa Hi mei ihe Suv Toto e meulien na moletin xil ixoni hortan tei xa ba makoe roroh tamu tangan valeh viton moletin te polien xil tangan mei lapol e urvatiei san. <sup>2</sup>Melele xa ba misepin mi xil, xil lamaen ni tangan lipol mini ve mani tei xa imal ni ve melengien tei. Di, misil xil laba tangan lava lapol e urvatiei san.

<sup>3</sup>“Melele xa meteneai bemei nesao vuteili, hortan ak dilomun ba, e pus moletin sav xil xa dit laborang votei tang e von posen, e latapol ni ti neta. <sup>4</sup>Ma xi biteni mi xil bit, ‘Ei, xamim mun ha mupol

e urvatiei savan, e nixal xamim ni naha xa imal.’<sup>5</sup>Ma xil mun laba lapol.

“E piniai, xi dilomun ba, e pol ni nggoni ngan taxa tepol ni ngamu. Di, ba pol ni mun e melele xa meteneai da be tan vuteili. <sup>6</sup>E melele xa meteneai ba sangas tangan vanu, xi dilomun ba e pus rut moletin xil mun dit lasoh votei tang. Ma xi misis xil bit, ‘?Veneh ma di musoh votei mak, e mutapol ni ti neta e makoe mei duxoh mahis xiak?’

<sup>7</sup>“Ma xil labit rilomun ni mini labit, ‘Vengan moletin ti tamei tangan valeh xamem mava mapol mini.’

“Ma hortan ak biteni mi xil bit, ‘Xamim mun muha mupol e urvatiei savan.’

<sup>8</sup>“Melele xa meteneai ba minu, hortan te urvatiei ak ba biteni mi vat na moletin te polien xil bit, ‘Ukes viton moletin xil te polien limei, e usa huit polien nae mi xil. Itiamu, usa ni mi ngan xil xa lamei dutou iha vuma .... ituxoh ngan xil xa latemei tetiamu.’

<sup>9</sup>“Ma, ngan xil xa lamei e melele xa meteneai ba sangas tangan vanu, vat te polien misa huit polien nae momal ni ngan te melengien tevi tei. <sup>10</sup>Misak ni, melele xa ngan xil xa latemei tetiamu lapusi mak, xil lanemi labit xil lihuri ihe eilep mu. E melele xa lamei, xil mun langgur huit polien nae momal ni ngan te melengien tevi tei tang. <sup>11</sup>E melele xa langguri, xil laseputut ba xat hortan ak <sup>12</sup>labit, ‘Ngan xil xa lamei dutou tang, e melele xa meteneai ba sangas tangan vanu, xil lapol haoa tei takes, e onggal xil nggoni xamem tang xa makon ni polien, mapo vetin, e eai ngga pangas tenbemem.’

<sup>13</sup>“E hortan ak bit rilomun ni mi xil bit, ‘Tua navan xil, inou natapol ti vasa mi xamim. Xamim mumaen ni tangan mupol minou ve huit polien xa momal te melengien tevi tei. <sup>14</sup>Ma muleh mani namim muha. Inou ieok bei tangan nixal ngan xil xa latemei tetutou ipin ni ngan taxa xamim mungguri. <sup>15</sup>Ngan ak be mani navan, e nikila nipol ni ixoni ngan xa ieok bei ni. ?Mu midep? ?Xamim di munem misa ni xil vengan di nasa tutouen mi xil?’

<sup>16</sup>“Ma, usil sexien xil ak vari, moletin holu xa labe movotei xil tang xosali ak, xil mei lihe eilep xil. E holu e ngan xil xa labe eilep xil xosali ak, xil mei lihe neta sav tang.”

### Iesu Misep usil Maten a Mea Rilomunen Nan Vatei Mun

<sup>17</sup>“Melele xa Iesu di mikakao ba tangan vahe Serusalem, xi mileh moletin nan xil xa labe lu e le tei (12) ba laka se xil vuteili e biteni mi xil bit, <sup>18</sup>“?Mupusi? Taxeak di raba ve Serusalem xiak. E rute ak, xil limaen

y **20:17** Tumulen ak de Mak 10:32-34; e Luk 18:31-34 mun

nou, Nat Moletin, ha nihe he vat xil na pris xil e tisa xil te Rae na Mosis. Ivus ti, xil lihur nou nihe kot e limaen rat meulien navan tangan ha nimat. <sup>19</sup>Ti, lisa rat nou ha nihe he moletin xil xa latave Siu ti, e xil lipol pepamen ni nou, limeas pangas nou ni ao te xeih xil xa sanute di en, e liti xat nou e eivave. E melele xa melengien tol mei itavi, inou nimea rilomun ra maten.”

### Iesu Pispisi usil Sexien te Tutouen na Moletin Nan Xil

<sup>20</sup>Di, nine Temes xal Sion, nat Sepeti xalu, del xalu latomei tangan latopus Iesu. Xi mitingeiril pe meten tangan vasis neta ngan mini.

<sup>21</sup>Iesu misisi bit, “?Atou li, iem bei neh?”

Ma xi bit rilomun ni mini bit, “Teok bei li tangan umaen horamue navan xalu ak ha lalitotan sangas visaluk e melele xa mei uhe suv toto. Tei ite rim metu, e tei ite rim meil.”

<sup>22</sup>Ma Iesu biles miketeh pus natneli xalu e misis xalu bit, “Xamil mutakil ti naha xa di musis nou ni. ?Midep? ?Xamil mukila tamak mulihur sakpisien xil e longpangasien xil ixoni ngan taxa inou ha nihuri?”

E lubit rilomun ni mini lubit, “!Io, makila!”

<sup>23</sup>Di, Iesu biteni mi xalu bit, “Reitin, xamil mulihur longpangasien ixoni ngan xa inou nihuri. E tave ti neta xa imak, nave nou ti iaxa nihosei visi tangan mei itotan e riuk metu mu e riuk meil. Vontoen xalu ak xa tellep xiak be na ngan xalu xa Tata navan bosei xalu ngamu tangan lalihuri.”

<sup>24</sup>E melele xa moletin sav xil na Iesu xa labe he xalu (10) lalongeong usili, iexil nggat xalu. <sup>25</sup>Ma Iesu mikes viton xil vus lamei visali e biteni mi xil bit, “Mukila xa vat na moletin xil xa latave Siu ti iexil bei mak mu tangan lisak ni moletin nae xil lipus kila xa xil mak mu labe tellep lali xil. E suv nae xil mun di lapol ni nggeih mi ngan xil xa ladi pe he xil. <sup>26</sup>E xamim, sexien namim namak ti. Xosxa tei e xamim ihit mei ihe eilep mak mu ili xamim, xi mei ipol mi xamim ixoni moletin te polien tei namim. <sup>27</sup>E xosxa tei e xamim ien bei tangan vatiamu ni xamim, xi mei ihe moletin te tutouen namim ixoni slev tei. <sup>28</sup>Vengan inou mun xa nabe Nat Moletin, natamei ti tangan moletin xil ti latutou ni nou. !E-e! Inou namei tangan nitutou ni mosav xil e nisa meulien navan tangan nixal rat moletin xil holu mei limeluv ra xeihen te tesaen.”

### Iesu Pol ni Moletin Lu xa Metealu Bar Mei Luketeh Rilomun

<sup>29</sup>Iesu del moletin nan xil ba laka pas taon tahal Seriko. E melele xa di laba, vanut moletin tei xa eilep di langgusili. <sup>30</sup>E rute ak, moletin lu xa metealu bar

---

<sup>z</sup> 20:20 Tumulen ak de Mak 10:35-45 mun    <sup>a</sup> 20:29 Tumulen ak de Mak 10:46-52; e Luk 18:35-43 mun

ludotan ludi seri suse e lulonge xa Iesu mikakao mei mitavi ba. Ma xalu lukei ba ni lubit, “!Suv! !Xouk xa ostal onngo vatimol na suv toto Deved! !Iem isae li e xamel!”

<sup>31</sup>E vanut moletin xil ak labul xat xalu tangan lalotit votei. E tave ti neta xa mak, xalu lukei nggeih pilei sung lubit, “!Suv! !Xouk xa ostal onngo vatimol na suv toto Deved! !Iem isae li e xamel!”

<sup>32</sup>Melele xa Iesu milonge, misoh e mikes xalu tangan lalomei visali. Di, misis xalu bit, “?Iemil bei tangan napol ni naha mi xamil?”

<sup>33</sup>Ma xalu lubit rilomun ni mini lubit, “Suv li, iemel bei tangan upol ni metemel ihos rilomun.”

<sup>34</sup>E melele xa Iesu pus xalu, ien polu ni esaeen ve xalu. Ma misasa duxoh meteau, e vatei takes, xalu vus luketeh rilomun e lunggusil Iesu luba.

### Iesu Ba Mistal e Serusalem e Moletin Xil Lasa Merereen Mini

**21** <sup>1b</sup>Melele xa Iesu del moletin nan xil lamei sangas ni Serusalem, xil mei lastal e metimal tahal Betfas xa de sangas ni Vathu te Urvatiei te Olip. E rute ak, Iesu misil moletin nan lu <sup>2</sup>del sepinien ak bit, “Mulihe metimal xa da iaxor. E melele xa ha mulistal mulikamet dongki tei xa labar xati del tuten. Mullal rat xalu e mulitel xalu lalimei visal nou. <sup>3</sup>E xosxa moletin tei isak pisi tangan vasikoe xol xamil, mulihiteni mini mulihit, ‘Suv iaxa ien bei xalu,’ ma vatei takes, xi imaen xalu mi xamil.”

<sup>4</sup>Ngan ak testal tangan vasak ni naha xa Hi tehiteni texo provet nan mei ihe reitin xa bit,

<sup>5</sup>“*Uhiteni mi moletin xil xa ladi taon tahal Serusalem uhit,*

*!Mupus ti! Suv toto namim bemei tangan valaxat xamim.*

*Xi be hanmerou tang e di miloh nggo dongki tei tang di bemei.*

*Reitin, xi dotan de sulut dongki tei tang e di bemei.’ ” (Sak 9:9)*

<sup>6</sup>Ma moletin na Iesu xalu ak luba e lupol ni nggoni ngan xa xi tehiteni mi xalu. <sup>7</sup>Xalu ludel dongki ak del tuten latomei. Di, luden kot nalu da xol tei xalu e Iesu dotan en. <sup>8</sup>Vanut moletin xil xa mahulong mei lasak mesen suse tangan Iesu mei iloh ixo en. Laden kot nae xil e suse nan, e rute ngan xil ladei anguit liei xil xa ute di en e laling pilei di suse. <sup>9</sup>Holu e vanut moletin xil ak xa di ladiamu ni Iesu del ngan xil xa di langgusili ladutou ni di lakei nggeih labit,

“!Ripet rat xi xa mistal nggo vatimol na suv toto Deved!

*!Tuxolxatien iti mi ngan xa di bemei e his Iahova! (Sam 118:26)*

!Ripet rat his Hi xa de ut nesao!”

<sup>10</sup>E melele xa Iesu ba duxoh Serusalem, longeongen usili ba mikapis e ut xil vus e taon, e mol-Serusalem xil latemanin e di latumul usili labit, “?Visi iaxa bemei xiak?”

<sup>b</sup> 21:1 Tumulen ak de Mak 11:1-11; Luk 19:28-40; e Sion 12:12-19 mun



<sup>11</sup>E vanut moletin xil labit rilomun ni labit, “Ngan ak be Iesu, provet tei tahal Nasaret xa de provins tahal Kaleli.”

#### Iesu Minggol Rerat Moletin Holu ra Nim Eo xa Latnamerere ni Hi Ti

<sup>12</sup><sup>c</sup>Melele xa laduxoh Serusalem, Iesu be vangit vloh te Nim Eo na Hi. Melele xa pusi xa moletin xil di lapos ni holesok xil holu en, ien mikat e nggol rerat xil. Xi midivin rerat tep na ngan xil xa di laso papas mani e von totanen na ngan xil xa di lapos ni mae xil te sanien eo na Hi. <sup>13</sup>E melele xa di pol ni mak, xi bul xat xil bit, “E Vanuvei na Hi, latetisi latehit, ‘*Lakes Nim mavan ni Nim te Sisen.*’ (Aes 56:7) E xamim mupol ni sung mei be ‘*Nim ma Vati Kanen Xil.*’ ” (Ser 7:11)

<sup>14</sup>E melele xa Iesu da tamu e vangit vloh te Nim Eo, moletin xil xa metexil bar del ngan xil xa lasakras lakakao lamei visali, e xi pol ni xil mei labos rilomun.

<sup>15</sup>E melele nen mun tak, tutut horamue xil di lakekei e vangit vloh te Nim Eo labit, “!Ripet rat xi xa mistal onngo vatimol na suv toto Deved!”

E melele xa vat xil na pris xil del tisa xil te Rae na Mosis lapus merekel xil e holesok sav xil xa tellep xa Iesu di pol ni e lalong naha xa horamue xil di lakekei ni, iexil mikat xa mikat. <sup>16</sup>Ma lasis Iesu labit, “?Di olong naha xa tutut horamue xil di lakekei ni iaxai?”

E Iesu bit rilomun ni mi xil bit, “Io, nalonge. ?E midep? Xamim di mutavuli ti e Vanuvei Eo na Hi? Vengan misepin ni bit,

*‘Hi, xouk osak mesen suse tangan uteong ni memesien xil xa ihat visaluk,  
ixo tutut horamue xil e tuvava xil mun.’ (Sam 8:2)*

<sup>17</sup>Di, Iesu mistokovein xil e be reling taon tahal Serusalem. Xi be taon tahal Betani del moletin nan xil, e ba lapat en.

#### Iesu Misa Halesil Tei Ba Xat Vatit Fik Tei

<sup>18</sup><sup>d</sup>E makoe roroh, melele xa Iesu di mikakao tangan vatilomun vahe Serusalem, mae nggati e suse. <sup>19</sup>Ma miketeh e pus vatit fik tei xa dat seri suse. E melele xa be sangas visali, xi mikameti xa huite tovuol, e be ute xil tang. Misak ni, Iesu biteni mi vatit fik ak bit, “!Onatakao ti mun!” Vatei takes, ut fik xil ak mei meles e vatite mingguxu.

<sup>20</sup>Melele xa moletin nan xil lapusi, latemanin e lasisi labit, “?Vatit fik ak mei meles e mingguxu vari nga tang midep?”

---

<sup>c</sup> 21:12 Tumulen ak de Mak 11:15-19; Luk 19:45-48; e Sion 2:13-22 mun    <sup>d</sup> 21:18 Tumulen ak de Mak 11:12-14,20-24 mun

<sup>21</sup>E Iesu bit rilomun ni mi xil bit, “Reitin li nabiteni mi xamim, xosxa neketen namim di e mutanem male ni ti naha xa di musisi, xamim mun mukila mupol ni naha xa inou napol ni mi vatit fik ak. E tave ngan ak ti kestang, mukila mun musemae ni vathu ak muhit, ‘Umea uhe reling voninom e uha uso xouk uhe tas,’ ma istal ihe reitin. <sup>22</sup>Xosxa uke reitin xa neta tei mei istal, neta xil vus xa usis Hi ven imei istal ihe reitin.”

**Vat Xil na Mol-Siu Xil Lasis Iesu xa Xi di Pol ni Holesok xil e His Visi**

<sup>23</sup>‘Melele xa laduxoh Serusalem, Iesu be vangit vioh te Nim Eo. E melele xa di mipispisi mi moletin xil, vat xil na pris xil del elda xil na Siu xil lamei visali e lasisi labit, “?Xouk di opol ni holesok xil ak e his visi? ?Visi vari maen xouk tengen opol ni?”

<sup>24</sup>Ma Iesu bit rilomun ni mi xil bit, “Inou mun nisis xamim ni neta tei. Xosxa muhit rilomun ni minou, ma inou mun nihiteni mi xamim xa di napol ni holesok xil ak e his visi. <sup>25</sup>?Muhit pisi minou, Sion tebaptaes ni moletin xil e di tepol e his visi? ?Hi mu moletin tova tang?”

Xil ba, di lasopin ni mikapis e xil mun tang labit, “?Rihit naha? Xosxa rihiteni rihit, ‘Sion di tepol e his Hi,’ ma xi ihiteni mi xir ihit, ‘?Xosxa temak, veneh ma mutnake reitin ti e sepinien nan?’ <sup>26</sup>E xosxa rihiteni rihit, ‘xi di tepol e his moletin tang,’ ulixir mikan ni vanut moletin xil xa eilep xiak vengan xa xil vus lanemi labit Sion Baptaes tehe provet tei na Hi.” <sup>27</sup>Ma xil labit rilomun ni mi Iesu labit, “Xamem matakil ti xa xi di tepol e his visi.”

Ma Iesu biteni mi xil bit, “Xosxa imak, ma inou mun ninaviteni ti xa inou di napol ni holesok xil ak e his visi.”

***Iesu Dei Vole Tei usil Longxatien na Horamue Lu***

<sup>28</sup>Di, Iesu dei vole ak mi vat xil na Siu xil bitene, “?Xamim munemi midep? Moletin tei, natneli lube lu. Vatei, moletin ak ba pus ngan xa be muimol e biteni mini bit, ‘Natuxoli, xosali, ha upol e urvatiei saratel.’

<sup>29</sup>“E horamue ak bit rilomun ni mini bit, ‘teok ti tavei nama.’ E dutou ni, xi biles nenemien nan a ba pol.

<sup>30</sup>“Di, tamealu ba pus ngan xa dutou e bit sepinien xati xa tehiteni tetiamu mi muimol nan. Ma horamue ak bit rilomun ni mi tamen bit, ‘Bos ngamu tata, niha.’ E xi tava ti.

<sup>31</sup>“?Visi e xalu iaxa pol ni naha xa tamealu ien bei?”

E xil labit, “Ngan xa diamu.”

Ma Iesu biteni mi xil bit, “Reitin nabiteni mi xamim xa ngan xil xa di laleh viton mani te takis e hoeaso xil, Hi mei ihe Suv Toto e meulien nae itiamu ni xamim. <sup>32</sup>Vengan Sion teme vapisen suse xa momal pe met

Hi mi xamim tangan ti muvusili. E xamim mutake reitin ti e sepinien nan. E ngan xil xa laleh mani te takis e hoeaso xil lalonge e lake reitin e sepinien nan. E tave ti neta xa mupus holesok xil xa lapol ni, mutaviles ti ra tesaen namim e mutake reitin ti e sepinien nan.”

*Iesu Dei Vole usil Longxatien na Moletin Xil xa Di Lalaxat Urvatiei Tei*

<sup>33</sup>Di, Iesu dei vole tei mun mi vat xil na Siu xil bit, “Vatei, hortan tei milih urvatiei te grep tei san. Xi pol ni viov mikapis xole, e minggil vul tei da en xa ti lipel kikis huit grep xil en tangan lihur rat sute teni. Di, mikili ni vet tei xa be nesao tangan ti liketeh xole en. Melele xa pol vuol ni holesok xil ak, xi maen moletin sav xil tangan mei lilaxati. E xil labit xati mini xa lisa ti huit grep mini melele xa limen. Di, hortan ak mikakao ba de kantri sav tei.

<sup>34</sup>“Melengien hao mei mitavi, huit grep xil ak mei men. Ma hortan ak misil rut slev nan xil tangan ha lisis ngan xil xa di lalaxat urvatiei te grep san e lisa ti huite san xil mini. <sup>35</sup>E melele xa laduxoh urvatiei ak, moletin xil xa di lalaxati ladal xat slev nan xil ak: labas purun tei; tei mun, lamu vini; e tei mun xatel, langgove. <sup>36</sup>Di, hortan ak misil rut slev xil mun xa lali ngan xil xa tesil xil tetiamu. E moletin xil xa lalaxat urvatiei ak lapol ni mi xil nggoni ngan taxa latepol ni tetiamu. <sup>37</sup>Ma di, hortan ak misil natneli xati be visal xil vengan minemi bit, ‘Xil limerere ni natuxoli xati.’

<sup>38</sup>“E melele xa ngan xil xa di lalaxat urvatiei ak lapus natneli bemei, labiteni mi xil mun tang labit, ‘!Ei, nat hortan xati iaxa di bemei iaxor! Xi vari ihur urvatiei ak melele xa tata nan imat. !Mumei, rava ravas vini! !Imak, ma holesok nan xil mei ihe nar sung!’ <sup>39</sup>Ma xil laba, ladal xati, lakuvun rati ra urvatiei ak, e labasi mat.”

<sup>40</sup>Di, Iesu misis vat xil na Siu xil xa di lateong ni vole ak bit, “?Ma midep? ?Melele xa hortan te urvatiei itilomun imei, ma ipol ni naha mi moletin xil ak?”

<sup>41</sup>Ma xil labit rilomun ni mini labit, “Xi isa rilomun ni maten xa isa pupu mi moletin tesa xil ak. Ti, imaen urvatiei san mi moletin sav xil xa lisa ti huit grep xil mini e melele xa limen kuhi.”

<sup>42</sup>Di, Iesu biteni mi xil bitene, “?Midep? ?Xamim di mutavuli ti Vanuvei Eo? Vengan xi biteni bit,

*‘Pos xa moletin te polien xil di lasin ni,*

*xi vari iaxa mei be setoman xati te nim e mili sen pos nen xil vus.*

*Ngan ak, Hi vari pol ni,*

*e rapusi xa naha xa xi tepol ni bos pupu!’ (Sam 118:22-23)*

<sup>43</sup>“Ma, nabiteni mi xamim, hosien na Hi xa be Suv Toto xa di e xamim taxeak, Hi ileh rerati reling xamim Siu xil. E isa ni sung mi moletin xil te kantri sav xil xa likila lilong xat raen e lipisen huit hosien teni e meulien

---

<sup>f</sup> 21:33 Tumulen ak de Mak 12:1-12; e Luk 20:9-19 mun

nae. <sup>44</sup>Ngan xil xa lasin seteman ak, xosxa tei e xil imot ita xati, sin xil imavul ivus. E xosxa seteman ak imot ita xat tei e xil, ita xat kikisi.”<sup>g</sup>

<sup>45</sup>Melele xa vat xil na pris xil del Farasi xil lalong vole xil xa Iesu dei, lakila sung xa di misep usil xil. <sup>46</sup>Ma di lalang ni suse tangan lital xati. E ulixil mikan ni vanut moletin xil xa eilep xiak xa di lanemi labit Iesu be provet tei.

*Iesu Dei Vole Tei usil Suv Toto Tei xa Misilasil ni Moletin  
Xil tangan Lave Anien te Tetelien Tei na Natneli*

**22** <sup>1</sup>Melele xa Iesu da tamu e vangit vloh te Nim Eo, xi dei vole ak mun mi moletin xil bit, <sup>2</sup>“Hi xa be Suv Toto e meulien na moletin nan xil nggoni suv toto tei xa, vatei, misak mesen anien te tetelien tei na natneli. <sup>3</sup>Xi misil slev nan xil laba tangan lakes ngan xil xa suv toto ak tesilasil ve xil ngamu tangan limei e anien ak. E moletin xil ak labit linamei ti.

<sup>4</sup>“Ma suv toto ak misil slev sav nan xil e biteni mi xil bit, ‘Ha muhiteni mi ngan xil xa natesilasil ve xil muhit, “!Mumei! Inou nasak mesen anien xil holu ngamu. Labas buluk savan xil e sulut buluk xil mun xa lakaio kuhi be te anien ak. Reitin, holesok xil vus te anien te tetelien ak mese tuei di. Ma mutemanon mumei.”’

<sup>5</sup>“E moletin xil ak lanem male ni raen tang, e laba sung di lapol ni polien nae xil. Tei be naho nan, e tei mun ba pol e stoa nan. <sup>6</sup>E moletin teisav xil ladal xat slev nan xil ak, labas purun xil e lamu vin xil. <sup>7</sup>E melele xa suv toto ak milongeong usili, ien mikat xa mikat. Misak ni, misil moletin te vaeen nan xil laba lamu vuol ni ngan xil xa latehas vin slev nan xil, e ladin taon nae.

<sup>8</sup>“Di, suv toto ak biteni mi slev sav nan xil bit, ‘Anien te tetelien meses tuei di. E ngan xil xa natesilasil ve xil, meulien nae tapin ti tangan lamei lava ni. <sup>9</sup>Ma ha muhe suse xil te taon e musilasil ni moletin xil vus xa mukamet xil tangan mei lia anien te tetelien ak.’ <sup>10</sup>Misak ni xil labe suse xil e lakes viton moletin xil vus xa lakamet xil, ngan xil xa labos e ngan xil xa lasa. E nim xa anien te tetelien da en polu kuhi ni moletin xil.

<sup>11</sup>“Ngan xil xa lamei e tetelien ak, lasing kuhi ni eising xil te tetelien. E melele xa suv toto bemei tangan vapus ti ngan xil xa lamei, xi miketeh e mikamet moletin tei xa tasing ni ti eising te tetelien. <sup>12</sup>Ma suv toto ak be visali e misisi bit, ‘?Tuxoli, omei e nim ak midep vari xa otasing ni ti eising te tetelien?’ E moletin ak dat votei, e takil ti naha xa ihiteni.

<sup>13</sup>“Misak ni, suv toto biles e misemaen ni moletin te polien nan xil bit, ‘Muvar viton hen e len xil, e mukuvun rati ihe hale e ha ita nga e

<sup>g</sup> 21:44 Dan 2:44-45; Aes 8:14    <sup>h</sup> 22:1 Tumulen ak de Luk 14:15-24 mun

ut te maluxoluk. E rute ak moletin xil ti limuis e ti lingas luhe xil ve longpangasien nae xil.’ ”

<sup>14</sup>Di, Iesu misep kor usil vole ak bit, “Reitin, Hi misilasil ve moletin xil holu tangan lamei visali, e xil vahis tang iaxa bosei xil tangan liti visali.”

### Farasi Xil Lasis Iesu usil Rin te Takis

<sup>15</sup><sup>i</sup>Melele xa Farasi xil lalong vole xil xa Iesu di biteni ba xat xil, xil laba di lalang ni mesal tova xa likila lital xati ixo en ve sepinien nan. <sup>16</sup>Misak ni, lasil rut moletin nae xil del rut Siu sav xil mun xa ladi rin na suv toto Herod Antipas laba. Xil labe visal Iesu e labiteni mini labit, “Tisa, xamem makila xa xouk obe hisit moletin tei xa moletin sav xil lakila liling nenesien nae iti en. E makila mun xa xouk di opisipisi mi moletin xil ni suse te reitinen xa Hi ien bei tangan moletin nan xil lihusili. Xouk di osepini mi moletin xil vus nggoni ngan xa xil vus lapin tang, tave ti neta xa labe eilep xil mu movotei xil tang. <sup>17</sup>Ma, usa ti nenemien nam mi xamem usil rin ak. ?Rae na Mosis maen ni tangan Siu xil ti lixal takis iha mi suv toto tahal Rom, mu tamaen ni ti?”

<sup>18</sup>E Iesu pus kil nenemien tesa nae e bit rilomun ni mi xil bit, “!Xamim mubos nggo hilibemim tang! ?Veneh ma di musak pis nou? <sup>19</sup>Musa mani tova xa di langgal takis ni.” Melele xa lasa ni mini <sup>20</sup>xi misis xil bit, “?Valnao visi vari iaxa da en? ?E his visi iaxa de mani ak?”<sup>j</sup>

<sup>21</sup>Xil labit rilomun ni mini labit, “Neta xalu vus xa ladi en be na suv toto tahal Rom.”

Ma Iesu biteni mi xil bit, “Xosxa mak, ma momal tang tangan musa naha xa be na suv toto tahal Rom mini, e naha xa be na Hi, musa ni mini.”

<sup>22</sup>E melele xa lalong sepinien nan, latemanin pupu ni. Ma, labe relingi e laba.

### Satusi Xil Lasis Iesu usil Melele xa Moletin Xil Limea Rilomun ra Maten

<sup>23</sup><sup>k</sup>E melengien xati nen tak, Satusi xil xa labit moletin misakras vamea rilomun ra maten labe visal Iesu, e lasisi labit, <sup>24</sup>“Tisa, Mosis tetisi tehit xosxa moletin tei imat reling atou nan e tuvava nalu tovuol, ma tuneli sung iteli itel tunau ak. Imak, ma melele lalihur horamue tei nalu, lipusi ixoni ngan xa be nat tiramue xa mat.<sup>l</sup> <sup>25</sup>Tetiamu, tua tatei xil latehe lu e he sav (7) lateti vis xamem. Ngan xa tehe muimol teteli tetel atou tei. Di, xi mat e tuvava nalu tehe tovuol. Misak ni, tuneli mei tehur tunau

<sup>i</sup> 22:15 Tumulen ak de Mak 12:13-17; e Luk 20:20-26 mun <sup>j</sup> 22:20 Mani ak, valnao suv toto tahal Rom iaxa da en e ladis en labit, ‘Ngan ak be nat Ogastas xa be Hi.’

<sup>k</sup> 22:23 Tumulen ak de Mak 12:18-27; e Luk 20:27-40 mun <sup>l</sup> 22:24 Dut 25:5-6

nan. <sup>26</sup>Di, sexien nen tak testal mun mi tuneli xa tetutou ni. Ma di, testal mun mi ngan xa tehe tol nen e dit ba mak tang ba vuma ... duxoh ngan xa tehe tasite e tua xil ak. <sup>27</sup>E dutou ni holesok xil ak, atou ak mun mat. <sup>28</sup>?Misak ni, melele xa moletin xil vus limea rilomun ra maten, ngan xave e tua xil xa labe lu e he sav (7) xiak iaxa ihur atou ak ihe nan xati vengan xil vus lateteli tetela?”

<sup>29</sup>Iesu bit rilomun ni mi xil bit, “Xamim di mule ras suse namim vengan xa mutakil kuh ti Vanuvei Eo na Hi mu xeihe nan. <sup>30</sup>Vengan e melele xa moletin xil limea rilomun ra maten, xil mei lixoni masxaxa xil xa ladi ut nesao, e sexien te tetelien ihe tovuol mun. <sup>31</sup>?E veneh ma mutake reitin ti xa moletin xil likila limeul rilomun ra maten? ?Mutavuli ti mu naha xa Hi tesepin ni mi xamim? Vengan xi tehit, <sup>32</sup>*‘Inou nabe Hi na Ebrahim, Hi na Aesak, e Hi na Siekop.’ (Eks 3:6)* ?Mulonge? Xi **be** Hi na ngan xil xa lameul tamu ladi, e tave na ngan xil ti xa latovuol tuei.”<sup>m</sup>

<sup>33</sup>E melele xa vanut moletin xil xa eilep xiak lalong pispisien nan xil, xil latemanin ni.

#### **Iesu Pispisi usil Rae Xave Iaxa Be Eilep Mak Mu Mili Sen Rae Sav Xil**

<sup>34</sup>Melele xa Farasi xil lalongeong ni xa Iesu bas vin upang na Satusi xil, xil mei labe vituei e laba lapus Iesu. <sup>35</sup>Tei e xil xa be tisa tei te Rae na Mosis bemei tengan vasak pis Iesu ni sepinien nan xil. <sup>36</sup>Misak ni, xi misisi bit, “?Tisa, rae xave vari iaxa be eilep mak mu mili sen rae xil vus?”

<sup>37</sup>E Iesu bit rilomun ni mini bit, “*Iemim ihei Iahova xa be Hi namim ixo tinemim tevi, ixo meulien tevi namim, e ixo nenemien tevi namim.*’ (Dut 6:5) <sup>38</sup>Rae ak iaxa be eilep mak mu mili sen rae sav xil. <sup>39</sup>E tei mun xa nggoni tang e be lu nen di biteni bit, *‘Eheien namim iti e moletin sav xil ixoni ngan taxa eheien namim di e xamim mun tang.’ (Lev 19:18)* <sup>40</sup>Holesok xil vus xa di e Rae xil na Mosis e Tisen xil na provet xil tetiamu di ngamu e rae xalu ak.”

#### **Iesu Misep usil Kristo xa Hi Tehosei**

<sup>41</sup>°E melele xa Farasi xil ladi vituei tamu dela, Iesu misis xil sung bit, <sup>42</sup>“?Xamim munemi midep usil Kristo? ?Xi istal ixo vatimol na visi?”

E xil labit rilomun ni mini labit, “Xi istal ixo vatimol na suv toto Deved tetiamu.”

---

<sup>m</sup> **22:32** Neta sav xa Ebrahim, Aesak e Siekop lattemat nousav ngamu e melele xa Hi di tehiteni sepinien ak mi Mosis, Hi tehiteni xa xi be Hi natel. Xi tenaviteni ti xa tehe Hi natel. Ma Iesu bit ngan ak pisen ni xa di latomeul tamu latodi. <sup>n</sup> **22:34** Tumulen ak de Mak 12:28-34; e Luk 10:25-28 mun <sup>o</sup> **22:41** Tumulen ak de Mak 12:35-37; e Luk 20:41-44 mun

<sup>43</sup>Ma Iesu biteni mi xil bit, “?Xosxa ngan ak be reitin, veneh ma Ninin na Hi tesa nenemien mi Deved tangan ikes Kristo ak ni ‘Suv’? Vengan xi biteni bit,

<sup>44</sup>*Tahova biteni mi Suv navan bit,*

*“Utotan inggak e riuk metu,*

*ituxoh melele xa niling elu nam xil e hem.”’ (Sam 110:1)*

<sup>45</sup>“Suv toto Deved vari tekes Kristo ni ‘Suv nan’. ?E vengon xa tata tei misakras vakes natneli ni ‘suv’, Kristo istal ixo vatimol na Deved itep?”<sup>p</sup>

<sup>46</sup>E moletin xil lasakras lasa rilomun ni sepinien nan. Ma e melele nen ak ba, moletin xil ulixil mikan tangan lasis ti mun neta mini.

### Iesu Misel Xat Tisa Xil te Rae Xil na Mosis del Farasi Xil

**23** <sup>1</sup>Melele xa Iesu da tamu e vangit vloh te Nim Eo na Hi, misepin mi vanut moletin xil del moletin nan xil mun bit, <sup>2</sup>“Tisa xil te Rae xil na Mosis del Farasi xil ladi tangan laxoles Mosis e lavit kil rae xil na Hi mi moletin xil. <sup>3</sup>Ma bos xa xamim mulong xat xil e muhusil holesok xil vus xa di labiteni mi xamim tangan mupol ni. E xamim, munapol ni ti sexien xil naxoni ngan xa xil di lapol ni, vengon xil latahusil kuh ti pispisien xil xa di lapispisi ni mi mosav xil. <sup>4</sup>Xil di laling rae xil hao xa meas da xat mar moletin xil. E xil, iexil ti tavei tangan lasa hexil vatutou ni xil tangan lapoe.

<sup>5</sup>“Ngan xil ak, holesok xil vus xa di lapol ni, lapol ni tangan taxa moletin xil ti lapusi e ti lasa merereen mi xil ven. Xosxa mosav xil di labar xat tutut bokis tei di he xa sepinien na Hi da en, ma xil sung lapol ni nae eilep mak mu mili.’ Xosxa mosav xil di laling ao xil xa tepepiei di murur e kusut eising nae, xil sung di lapol ni ao nae xil latepiei pilei mu mili.’ <sup>6</sup>E anien xil xa tellep, e nim te pispisien xil mun, xil di lalapis vontoen xil xa bos xa be na ngan xil kestang xa lapo his xil xa latellep. <sup>7</sup>E von posen xil mun, xil iexil bei pupu tangan moletin xil lisemin xil itel merereen e likes xil ni ‘tisa’.

<sup>8</sup>“E xamim, linakes xamim ni tisa xil ti vengon tisa namim tei takes, e xamim vus mube tua xil tang. <sup>9</sup>E munakes ti moletin e ut etan ak ni ‘tata’

---

**p 22:45** Reitin xa Kristo ixo vatimol na suv toto Deved, e vengon xa xi ikes Kristo ni suv, di pisen ni xa Kristo ihe eilep mak mu mili, e xos, Kristo ak teta tetiamu ni. **q 23:1** Tumulen ak de Mak 12:38-39; Luk 11:43,46; e 20:45-46 mun **r 23:5** Siu xil vus xa labe malahos di laling sepinien hat (4) xa nggo Vanuvei Eo na Hi di e vangit bokis tei xa hokorong: Eks 13:1-10; 13:11-16; Dut 6:4-9; 11:13-21. Di, labare di vatixil mu hexil melele xa laba tangan lasis. Ngan ak nggusil rae tei na Mosis xa de Dut 6:8. **s 23:5** Siu xil vus xa labe malahos di laso rin ni ao xil xa tepepiei e di lalingi murur e kusut eising nae tangan isak ni xil linem xati xa di langgusil xat Hi kestang ixoni ngan xa rae na Mosis xa de Nam 15:37-41 di misep usili.

vengan Tata namim tei takes tang, ngan xa de ut nesao. <sup>10</sup>E linakes ti mun xamim ni ‘suv’ vengang suv namim tei takes, xi be Kristo. <sup>11</sup>Ngan xa di misa tutouen mi xamim nggoni slev namim, xi iaxa mei ihe eilep mak mu ni xamim. <sup>12</sup>Vengang ngan xil xa di lapol ni nenemien nae be nesao, Hi ipol ni xil lihe tan. E ngan xil xa di lapol ni nenemien nae be tan, Hi ipet rat his xil ihe nesao.

<sup>13</sup>“!Isa pupu mi xamim, tisa xil te Rae xil na Mosis del Farasi xil xa di munggul Hi nggo hilibemim tang! Hi isa pangasien mi xamim vengang xamim iemim ti tavei tengang mupol ni Hi mei vahe Suv Toto e meulien namim. E melele xa mosav xil iexil bei tengang Hi mei vahe Suv Toto nae, xamim di musikoe xol xil. <sup>14</sup>†

<sup>15</sup>“!Isa pupu mi xamim, tisa xil te Rae xil na Mosis del Farasi xil xa di munggul Hi nggo hilibemim tang! Hi isa pangasien mi xamim vengang di munggul xoteh tas e tan tengang taxa mukamet moletin ngan e muviles nenemien nan tengang vahusil xamim. E melele xa biles e nggul pispisien xil namim, xamim mupol ni mei misa pilei sung mili xamim. E momal tang tengang xi mun ihur pangasien itel xamim e Upang xa misakras vamat.

<sup>16</sup>“!Isa pupu mi xamim xa di musak tengang ti mutiamu ni moletin xil, tave ti neta xa metemim xil bar! Pangasien xa muhuri ihe eilep pupu vengang di mupispisi mi moletin xil mubit, ‘Xosxa moletin tei pol ni hitxatien tei nan e his Nim Eo, hitxatien nan be neta sav tang. E xosxa xi pol ni hitxatien nen e his gol xa di Nim Eo, ma ihur xat hitxatien ak ixeh.’ <sup>17</sup>!Metemim bar e mutalang tova tang! ?Ngan xave be eilep mak mu, gol te Nim Eo, mu Nim Eo na Hi vari xa di misak ni gol ak be eo? <sup>18</sup>E di mupispisi mi moletin xil mun mubit, ‘Xosxa moletin tei pol ni hitxatien tei nan e his hor te sanien, hitxatien nan be neta sav tang. E xosxa xi pol ni e his sanien xa lalingi di xati, ma ihur xat hitxatien ak ixeh.’ <sup>19</sup>!O, metemim li bar tova tang! ?Ngan xave be eilep mak mu, sanien mu hor te sanien xa di misak ni sanien ak mei be eo? <sup>20</sup>Ma moletin xa di pol ni hitxatien nan e his hor te sanien di pol ni mun e his holesok xil vus xa di xati. <sup>21</sup>E moletin xa pol ni hitxatien nan e his Nim Eo, xi di pol ni e his Hi xa da en. <sup>22</sup>E moletin xa di pol ni hitxatien nan e his ut nesao, xi di pol ni e his vontoen te xeihen na Hi e e his ngan xa di dotan da en.

<sup>23</sup>“!Isa pupu mi xamim, tisa xil te Rae xil na Mosis del Farasi xil xa di munggul Hi nggo hilibemim tang! Hi isa pangasien mi xamim vengang

---

† 23:14 Rut uvei na Matiu lateling sepinien ak mun xa de Luk 20:47 e Mak 12:40 xa bit, “!Isa pupu mi xamim, tisa xil te Rae xil na Mosis del Farasi xil xa di munggul Hi nggo hilibemim tang! Ve hokanen namim, di muleh holesok xil holu ra tunau xil, e pe met moletin xil, di mupol ni sisen xil xa tepiei. !Ve rin ak, Hi isa pangasien xil xa isa pupu iha xat xamim!”



di muteong xat tutut rae xil nggoni sexien xa musa taet ni tutut uvei xil te kuken ba mi Hi. E rae xil xa latellep nggoni ngan xil xa di bit mupisen sexien xil te esaean, te neketen, e mupol naha xa momal pe met Hi, xamim mutateong xati ti. Vahos mak mu vahit muteong xat rae xil xa latellep vatel ngan xil xa labe tereli mun. <sup>24</sup>!Tave ti neta xa metemim bar, e di musak tangan mutiamu ni mosav xil! Xamim di musev kuhi ni oei mamim maxani minamu ti tutut anon tova xa tamese ti, e mutamea murom tevi ni kamel tei xa mahulong xa misa mak mu mili.

<sup>25</sup>“!Isa pupu mi xamim, tisa xil te Rae xil na Mosis del Farasi xil xa di munggul Hi nggo hilibemim tang! Hi isa pangasien mi xamim vengang meulien namim nggoni valoei xil e pelet xil xa mukas kuhi nggo hale tang. E vangite xalu, mube ho mane e musak tangan muhulil kes ni naha xa xamim tang di iemim bei. <sup>26</sup>!Metemim bar tova tang! Itiamu, mukas moten vangit meulien namim. Imak, ma hale mun imese.

<sup>27</sup>“!Isa pupu mi xamim, tisa xil te Rae xil na Mosis del Farasi xil xa di munggul Hi nggo hilibemim tang! Xamim munggoni von tehinen xil xa lapol kuhi ni e lapen kuhi ni mieh. Ut xa hale, lapusi bos xa bos. E vangite xil polu ni si moletin xil e neta sav xil mun xa misa xa misa pupu. <sup>28</sup>Usil sexien ak, xamim mumal nggo hilibemim tang, e tinemim, mupolu ni luvozen e sexien tesa xil.

<sup>29</sup>“!Isa pupu mi xamim, tisa xil te Rae xil na Mosis del Farasi xil xa di munggul Hi nggo hilibemim tang! Pangasien namim isa mak mu vengang xa mupol pilei ni von tehinen na provet xil e di mumosan kuhi ni von tehinen na ngan xil xa lamal pe met Hi. <sup>30</sup>E di mubiteni mubit, ‘Vahit mateti e melengien na avu namem xil tetiamu, xamem manamos ti natel xil e melele xa latehas vin provet xil ak.’ <sup>31</sup>!Iaxai vari! Nggo sepinien xati namim, di mubiteni reitin xa mube vatimol xati na ngan xil xa latehas vin provet xil. <sup>32</sup>E melele xil namim sung, xamim ti mupol vuol ni naha xa avu namim xil tetiamu latepol kokot ni.

<sup>33</sup>“!Xamim mube tetal tesa xil! !Reitin, mube vanut tetal sosomen xil xa di munggas vin moletin xil ni vulongomim. ?Mulesae reling pangasien te Upang xa misakras vamat itep vari? !Musakras! <sup>34</sup>Misak ni, nisil provet xil, ngan xil xa lakilakil kuhi, e tisa xil mun ha lisel xat xamim tangan muhiles ra tesaen xil namim. E xamim, muhas vin rute xil e muti xat xil e eivave xil. E rute ngan xil mun, mumeas purun xil ni ao te xeih xil xa sanute di en e nim te pispisien xil namim. Muhol xil ha mutal xat xil e taon namim xil e e taon sav xil mun. <sup>35</sup>Isak ni, pangasien ve maten na moletin xil vus xa lamal pe met Hi iti e hemim. Reitin, maten na Ebel<sup>u</sup> xa temal pe met Hi xa avu namim tetiamu tehas rohon ni temat teloh teha tetuxoh maten na provet Sakaraea,<sup>v</sup> nat Berekae, xa avu namim xil

<sup>u</sup> 23:35 Sen 4:8    <sup>v</sup> 23:35 2Kr 24:20-22

latehov vini e hilaep te Nim Eo e hor te sanien, maten nae xil vus iti xat xamim. <sup>36</sup>Reitin li nabiteni mi xamim, Hi isa pangasien ve maten xil ak iha xat xamim te xosali ak.

<sup>37</sup>“!O moletin xil tahal Serusalem! Xamim iaxa mutehas vin provet xil e mutehov vin eloheoh xil xa Hi tesil xil latemei ve xamim. Melengien xil holu, ieok bei pupu tangan nakes viton xamim e nasikoe xol xamim vaxoni tuatou tei xa mikes viton tuten xil e muhin xol xil ni aveoun. E xamim iemim ti tavei. <sup>38</sup>!Ma xamim mupus ti sung! Hi nasikoe xol xamim ti mun, e imaen Nim Eo namim mei ita hon tang, moletin ti mun nava en. <sup>39</sup>Nabiteni mi xamim, taxeak iha, munapus ti mun nou ituxoh melele xa muhiteni muhit, *‘!Tuxolxatien iti mi ngan xa di bemei e his Iahova!’ (Sam 118:26)*”

### Isu Misep usil Sakpisien Xil e Melengien Xil te Xeih xa Ti Imei

**24** <sup>1</sup>“Melele xa Iesu del moletin nan xil da labe reling vangit vioh te Nim Eo, moletin nan xil di lati nim xil xa bos te Nim Eo mini. <sup>2</sup>Ma Iesu biteni mi xil bit, “?Xamim di mupus holesok xil vus ak? Reitin li nabiteni mi xamim, melengien tei di bemei xa hat xil ak xa latepol ni Nim Eo ak ni navisten xil ti mun. Moletin xil mei lihu lenen xil vus ihe tan.”

<sup>3</sup>Di, Iesu be nesao e Vathu te Urvatiei te Olip del moletin nan xil. E melele xa ba dotan, xil kestang lamei visali e lasisi labit, “?Uhiteni mi xamim, holesok xil ak usil Nim Eo istal vilieh vari? ?E naha vari ipisen ni xa xouk umei, e hoxalite te melengien xil xa radi en di bemei sangas?”

<sup>4</sup>Iesu bit rilomun ni mi xil bit, “Muxuxou kuhi ve xamim, e munamaen ti moletin mei naluvos xamim. <sup>5</sup>Vengan moletin xil holu limei e hisok e lihiteni lihiti, ‘!Inou nabe Kristo!’ Ma liluvos moletin xil holu. <sup>6</sup>Mulongeong ni xa vaeen xil xa tellep di bemei, e muhur longeongen mun usil vaeen xil xa di rute xil xa be sotin. E munatemanin ti ven. Holesok xil ak iaxa mei istal itiamu, e nave hoxalite te ut etan ti mu. <sup>7</sup>Ut tei ivae itel ut tei mun, e kantri xil lihas tan ni kantri sav xil. Ut xil hao e ut etan, mae kekaten ihas moletin xil e lul holu ilil. <sup>8</sup>E tave ti neta xa holesok xil ak mei isa itiamu ni melele xa Hi mei ihe Suv Toto na moletin xil, ngan ak nave hoxalite ti mu. Ixoni melele xa atou tei milong rohon ni mar pangasien xa di pisen ni xa, nave nousav ti, iling tuvava nan.

<sup>9</sup>“Ti, xil mei lital xat xamim e lisa rat xamim muha tangan ha lisa pangasien mi xamim e lihas vin xamim. Moletin xil te kantri xil vus iexil iat pangas xamim vengan di munggusil xat nou. <sup>10</sup>E melele nen ak, moletin xil hao likavitou ra nekaten nae e limaen rat tua nae xil lihe he elu nae xil e iexil ti iat xil mun tang. <sup>11</sup>E provet te luvosen xil hao

<sup>w</sup> **24:1** Tumulen ak de Mak 13:1-31; e Luk 21:5-33 mun

mei listal e liluvos moletin xil holu. <sup>12</sup>E vengam sexien te tesaen mei ihe holu mak mu, eheien na moletin xil holu nati ti mun e mosav. <sup>13</sup>E ngan xil xa lisoh ixeh e neketen nae ituxoh hoxalite te holesok xil vus ak, Hi iteh meulien e xil. <sup>14</sup>E melele xa longeongen usil Hi xa mei ihe Suv Toto na moletin xil ha ituxoh rute xil vus e ut etan tangan moletin xil vus lakilakil ni, e melele nen ak vari, ihe hoxalite te holesok xil vus.

<sup>15</sup>Xamim mupus sepinien na Hi xa texo provet Daniel mei istal ihe reitin xa bit, *'Xil liso neta tei xa be muis pupu ite vangit Nim Eo xa isak ni namese ti mun pe met Hi.'* (Dan 11:31) (Xouk xa di obuli sepinien ak, bos tangan ukil kuh koute teni.) <sup>16</sup>E melele xa mupusi, ngan xil xa ladi Sudea litemanon lilesae ha lixus liti e vathu xil. <sup>17</sup>Xosxa moletin tova di mingel e hale, mesal ihe tovuol tangan vatilomun vahe nim e vahur neta tova nan. <sup>18</sup>E xosxa moletin tei di pol e naho, xi nava ti mun tim tangan vahur eising tova nan. <sup>19</sup>E melele nen xil ak, isa pupu mi atou xil xa ladi ni tuvava xil e ngan xil mun xa di latunat ni tuvava xil. <sup>20</sup>Musis mi Hi tangan melengien xa ti mulesae en nave an tesa ti mu nave Sabat ti, <sup>21</sup>vengan longpangasien xil te melengien tesa xil ak isa ili melengien sav xil vus te ut etan: e melele xa Hi tepeas ni ut etan miloh mei duxoh xosali. E hisit melengien xil ak ihe tovuol mun e melengien xil mun xa ti imei itutou. <sup>22</sup>E Hi teta xoteh melengien tesa xil ak mei be tamure mu vengam xi di minem usil ngan xil xa tehosei xil labe nan. Vengam vahit napol ni ti namak, moletin ti mun nameul.

<sup>23</sup>"E melele nen ak, xil lihiteni lihiti, '!Mupus ti! Ngan ak be Kristo xa Hi tehosei!' Mu lihiteni lihiti, '!Mupus ti mu! !Xi iaxa da iaxor!' E xamim, munake reitin ti e sepinien xil ak. <sup>24</sup>Vengan Kristo te luvosen xil e provet te luvosen xil mun limei. E melele xa limei, lipol ni merekel xil e holesok xil xa tellep xa isak ni moletin xil limesep pupu ven. Xil lipol ni tangan liluvos moletin xil holu lihusil xil. E lisak tangan, nahe, xil lalihi rerat ngan xil xa Hi tehosei xil labe nan. <sup>25</sup>Ma muteong kuhi ni sepinien xil ak, vengam, inou, nabit usil holesok xil hao ngamu mi xamim xa mei istal.

<sup>26</sup>"Ma xosxa moletin tei mei ihiteni mi xamim ihiti, 'Kristo da nga xor e uruvuol,' munaha ti rute ak. E xosxa lihiteni mi xamim lihiti, 'Kristo xi tak, dat vangit nim ak,' munake reitin ti en. <sup>27</sup>Vengan, melele xa inou, Nat Moletin, nitilomun nimeji, moletin xil vus lipus kila ixoni melele xa lapus an milangas e miehien teni nggur vuol ni tilang hat nggo rin tei e ist ba duxoh rin mun e wes. <sup>28</sup>Moletin xil vus lipus kila rute xa Nat Moletin itilomun en vengam xa imei itel pangasien holu. Reitin, lipus kila en e hisit sexien xa di lale kil rute xa neta tei mat da en e melele xa lapus vanut angalu xil ladi ut tei.<sup>x</sup>

---

<sup>x</sup> 24:28 Sepinien xati teni bit, "voltsa", tuman tei xa mahulong xa di langga lakapis xol neta tei xa mat.

<sup>29</sup>“E melele xati xa melengien tesa xil ak ivus,  
*‘Eai imei imaluxoluk  
 e aveti namem ti mun.’ (Aes 13:10)*  
*‘Hitu xil likiri ra tilang hat,  
 e holesok xil mun xa di nesao,  
 Hi imulul ni xil.’ (Aes 34:4)*

<sup>30</sup>“Reitin, e melele xati nen ak, neta tei istal e tilang hat xa ipisen ni xa inou, Nat Moletin, di namei. E moletin xil vus te ut etan ti lites xil mun tang melele xa lipusi. Xil lipus *‘Nat Moletin imei etan itel momah xil te tilang hat.’ (Dan 7:13)* Xi imei itel xeihen e miehen nan. <sup>31</sup>Xi ihui amaru nan ixeih tangan vasa rerat masxaxa nan xil. E xil lihe rute xil vus e ut etan, lixo rin tei ha lihe rin tei mun, e lileh viton moletin xil vus xa Hi tehosei xil labe nan.

<sup>32</sup>“Xamim muhur pispisien ixo vatit fik. Melele xa lite xil misu rohon ni ute xil xa be neta hu, xamim mukila xa melele te an te tin di bemei. <sup>33</sup>Usil sexien nen tak, melele xa mupus holesok xil ak mei istal, mukila xa mei rilomunen navan di bemei sangas. Reitin, da ngamu e puiteh. <sup>34</sup>Reitin li nabiteni mi xamim, holesok xil ak mei istal e melele xa moletin xil te xosali ak limeul tamu liti. <sup>35</sup>Nabiteni reitin vengan xa neta sav xa ut etan itel tilang hat mun lalikesae e melengien tei, sepinien navan misakras vakesae vatova.”

***Iesu Pispisi xa Moletin Tovuol xa Vakil Melengien xa Nat Moletin Itilomun En***

<sup>36</sup>“Iesu biteni mi moletin nan xil bit, “Moletin tovuol xa vakil melengien xati xa inou, Nat Moletin, nitilomun en. Reitin, masxaxa xil xa ladi ut nesao, e inou mun, Nat Moletin, matakil ti. Hi Tamer kestang mikil haoa xati teni. <sup>37</sup>Mei rilomunen navan, Nat Moletin, ixoni melengien xil na Noah tetiamu. <sup>38</sup>Vengan, e melele nen xil ak, tetiamu ni ngan xa oei xa mahulong temei, moletin xil di lateanien e di latemun, tiramue xil e atou xil di lateteli ba tetuxoh melele xa Noah tehe vangit tuturil. <sup>39</sup>Xil latnakil ti vari naha xa mei istal ba tetuxoh melele xati xa oei xa eilep temei e mei tehas xil vus latelel. Ixo rin tak, moletin xil litemanin ni mei rilomunen navan, Nat Moletin. <sup>40</sup>E melele nen ak, xosxa moletin lu ti lalipol, Hi mei ihur rat tei ha ite visali e ut nesao, e istokovein tei xalu ita nga. <sup>41</sup>Reitin, xosxa atou lu ti lalisak mesen anien, Hi mei ihur rat tei ha ite visali e ut nesao, e istokovein tei xalu ita nga.

<sup>42</sup>“Ma, muxuxou kuhi ve xamim, vengan mutakil ti melengien eah iaxa Suv namim itilomun en. <sup>43</sup>E mukila xa xosxa moletin tei, xa nim man da, mikil melele xati xa moletin te kanen imei en, xi mikila ita nga e

iketeh xole tangan moletin te kanen namei ti e nim man. <sup>44</sup>Ma muvue xat xamim. Vengan, usil sexien nen tak, inou, Nat Moletin, nitilomun nimee e melele tei xa moletin xil linakil ti ixoni moletin te kanen.

<sup>45</sup>“?Visi iaxa be moletin te polien xa be metisou kuhi e di miteong xat rae na suv nan? Xi be ngan xa suv nan milingi be vat na moletin te polien sav xil e tim san tangan ti isa anien mi xil e melele xati teni. <sup>46</sup>Tuxolxatien iti mi moletin te polien xa, melele xa suv nan itilomun imei, ikameti xa xi di pol ni polien nan xil. <sup>47</sup>Reitin li nabiteni mi xamim xa suv nan ipet rat moletin te polien ak ihe nesao tangan ti ilaxat holesok sav nan xil mun.

<sup>48</sup>“E xosxa moletin te polien ak, vatin isa, ma ti ihiteni mi xi mun tang ihit, ‘Suv navan namei ti mok.’ <sup>49</sup>Ma iha ti ihas pangas moletin te polien sav xil mun, e ti ianien e ti imun itel vat munien xil. <sup>50</sup>E suv nan itilomun imei e melele tei xa moletin te polien ak nakil ti. <sup>51</sup>E melele xa suv nan imei, ihas pangasi, e ikuvun rati ha ite von longpangasien itel ngan xil xa di langgusil Hi nggo hilbexil tang. E xil ti limuis e ti lingas luhe xil ve longpangasien nae xil.”

*Iesu Dei Vole Tei usil Atul Maxoe He Xalu (10) xa*

*Labue Xat Xil ve Meien na Suv Nae*

**25** <sup>1</sup>Melele xa Iesu di tamu misepin mi moletin nan xil usil rin xa ti livue xat xil ve meien nan, xi de vole ak mi xil bit, “Melele xa Hi mei ihe Suv Toto na moletin xil imak: Vatei, atul maxoe he xalu (10) laba tangan lapus tetelien tei. E melele xa ut da maluxoluk, laleh laet nae xil e laba tangan lavisu mi tiramue xa iteli e lihusili lihe rute xa tetelien ita en. <sup>2</sup>Xil lim (5), vatixil tovuol, e xil lim (5) iaxa langgur vati. <sup>3</sup>Ngan xil xa vatixil tovuol laleh laet nae, e latahur ti mun oel vatel xat xil. <sup>4</sup>E ngan xil xa langgur vatixil, xil vus lapin e valihe xil xa oel di en del xat laet nae xil. <sup>5</sup>E vengan xa tiramue xa iteli tamei ti vamanon, atul maxoe xil ak, vexil memal, ma lapat.

<sup>6</sup>“Maxani, e hilaep te vongien, xil lalong moletin xil di lakekei ni labit, ‘!Xi bemei! !Ngan xa iteli di bemei! !Mei rava ravisu mini e rihusili riha!

<sup>7</sup>“Melele xa atul maxoe xil ak lalonge, latamea e lapol kuhi ni laet nae xil. <sup>8</sup>E ngan xil xa vatixil tovuol labiles lasis ngan xil xa langgur vatixil labit, ‘Musa ti oel li mi xamem, vengan laet namem sangas vamat xiak.’

<sup>9</sup>“E ngan xil xa langgur vatixil labit, ‘E-e, masakras li. Vengan xa oel namem tapin ti tangan vahe laet namim, ti, e vahe namem mun. Muha tang e sitoa nen, e ha muxal ti namim.’

<sup>10</sup>“E melele xa rut atul maxoe xil ak laba tangan laxal ti oel nae, tiramue xa iteli mei mistal. Ma atul maxoe xil xa labue xat kuh xil langgusili ba labe nim xa anien te tetelien da en. Di, lakoe xol puiteh teni.

<sup>11</sup>“E dutou ni, atul maxoe sav xil ak mun mei lastal. Xil lamei visal nim te tetelien e lakei be nesao labit, ‘!Suv, suv! !Sah puiteh li mi xamem!’

<sup>12</sup>“E tiramue xa miteli bemei e bit rilomun ni mi xil bit, ‘Nabiteni reitin li, inou natakil ti vari xamim.’”

<sup>13</sup>Di, Jesu misepin kor e vole ak bit, “Ma, muvue xat kuh xamim e munapat ti, vengam mutakil ti melele xati xa inou nitilomun en.”

*Iesu Dei Vole Tei usil Eilep Tei xa Miling Nenesien Nan De  
Moletin te Polien Nan Tol (3) Tengan Ti Lilaxat Mani Nan*

<sup>14</sup><sup>z</sup>Jesu de vole te mun mi moletin nan xil bit, “Melele xa Hi mei ihe Suv Toto na moletin xil imak: Vatei, eilep tei misak xat holesok nan xil tangan vahe rute tei xa be sotin. Di, mikes viton moletin te polien nan tol (3) e miling xatel tangan latilaxat holesok nan xil <sup>15</sup>pipini ni metisouen natel. Mi tei, eilep ak miling gol mani be taosen lim (5,000) di e hen. Mi tei mun, miling gol mani be taosen lu (2,000) di e hen. E mi ngan xa be tol nen, miling gol mani be taosen tei (1,000) di e hen.<sup>a</sup> Bus di, eilep ak ba sung.

<sup>16</sup>Melele xa eilep ak ba, vatei takes, ngan xa nggur gol mani be taosen lim (5,000) ba pol sorin ni mani ak ba vuma ... bas xoles gol mani taosen lim (5,000) mun mei del xat ngan xa da ngamu. <sup>17</sup>Usil sexien tak, ngan xa tehur gol mani tehe taosen lu (2,000), xi mun ba pol sorin ni e bas xoles gol mani be taosen lu (2,000) mun. <sup>18</sup>E moletin te polien xa tehur gol mani xa tehe taosen tei (1,000), xi ba, minggil vul, e midihin soson mani na suv nan di en.

<sup>19</sup>Melengien xil hao mei mitavi, e eilep natel dilomun e mikes viton xatel tangan valong kuhi xa latepol ni naha ni mani xil xa telingi tete heatel. <sup>20</sup>Moletin te polien nan xa tehur gol mani tehe taosen lim (5,000) bemei del xat taosen lim (5,000) mun e biteni bit, ‘Suv, oteling gol mani tehe taosen lim (5,000) teti e heok. E taxeak, pus ti. Natepol sorin ni e natehas xoles taosen lim (5,000) mun mei del xati.’

<sup>21</sup>“Melele xa suv nan pusi, biteni mini bit, ‘!Bos pupu! Xouk obe moletin te polien tei xa bos e nenesien navan di e xouk. E vengam xa di olaxat kuh holesok xil xa tereli xa natelingi teti e hem, nilinguk sung mei ulaxat holesok navan xil xa holu. Amei pus hosien itel suv nam.’

<sup>22</sup>Di, moletin te polien nan xa tehur gol mani tehe taosen lu (2,000) bemei e biteni bit, ‘Suv, oteling gol mani tehe taosen lu (2,000) teti e heok. E taxeak, pus ti. Natepol sorin ni e natehas xoles taosen lu (2,000) mun mei del xati.’

<sup>23</sup>Melele xa suv nan pusi, biteni mini bit, ‘!Bos pupu! Xouk obe moletin te polien tei xa bos e nenesien navan di e xouk. E vengam xa di olaxat kuh holesok xil xa tereli xa natelingi teti e hem, nilinguk sung mei ulaxat holesok navan xil xa holu. Amei pus hosien itel suv nam.’

<sup>z</sup> 25:14 Tumulen ak de Luk 19:11-27 mun    <sup>a</sup> 25:15 Gol mani ak, tei nggoni 1000 vatu.

24“Di, moletin te polien nan xa tehur gol mani tehe taosen tei bemei visali e biteni mini bit, ‘Suv, inou nakila li xa xouk obe moletin te xeih tei xa di oleh huiei xil ra vatiei xil xa tave xouk ti olihi, e di oleh anien mun xa mosav xil tang latelihi teti e naho sam xil. 25Uluk mikan ni xouk, ma ba nadihin mani nam de vul tei. Pus ti mu, mani xil vus nam xiak.’

26“Melele xa suv nan pusi mak, misepin nggeih mini bit, ‘!Xouk obe moletin te polien tesa tei xa obe mah tova tang! Xouk okil kuhi xa inou nabe moletin te xeih tei xa di naleh huiei xil ra vatiei xil xa tave nou ti nalihi, e di naleh anien mun xa mosav xil tang latelihi teti e naho savan xil. 27Ma, vahit vahos mak mu xa ova oling mani navan vate bangk tova tangan, melele xa nitilomun namei, nikila ma namur rat rilomun ni e vatin vata xati.’

28“Di, eilep ak biles pus moletin te polien sav nan e biteni mini bit, ‘Hur rat gol mani ra moletin te polien xai, e ha ulingi ite he ngan xa nggur gol mani taosen he xalu (10,000) ngamu. 29Vengan ngan xil xa di lapol del xat naha xa de hexil ngamu, lisa ti mun mi xil tangan isak ni hexil mei ipolu mu. E ngan xil xa latapol ni ti neta ni ngan xa de hexil ngamu, tave ti neta xa holesok nae tereli tang, lileh rerati ihe reling xil. 30Ma ha mukuvun rat moletin te polien tesa ak ihe hale, ha ite rute xa maluxoluk itel xat ngan xil xa ti limuis e ti lingas luhe xil ve longpangasien nae xil.’ ”

*Iesu Misep usil Melengien te Lepisien*

31Iesu biteni mun mi moletin nan xil bit, “Melele xa Nat Moletin<sup>b</sup> itilomun en, imei itel xat miehen e masxaxa xil vus. Ti, itotan e voninen te xeihen e ilepis moletin xil. 32E melele nen ak, moletin xil te kantri xil vus mei lihe vituei e rute tei takes. Xil mei lisoh pe meten, e xi iseti xil lihe vanute lu. Xi ipol ni ixoni moletin tei xa di milaxat sipsip xil xa di miseti nani xil reling sipsip san xil. 33Ngan xil xa langgoni sipsip xil, iling xil liti e rin metu. E ngan xil xa langgoni nani xil ha liti e rin meil.

34“Ti, xi isepin mi xil nggoni Suv Toto nae. Ihiteni mi ngan xil xa ladi e rin metu ihit, ‘!Mumei, xamim xa tuxolxatien na Tata navan di e xamim! Mei muleh holesok xil xa xi tesak mesen ni ve xamim melele xa tepeas ni ut etan. 35Vengan xa melele xa mae teat nou, mutesa anien minou; melele xa meruru teat nou, mutesa oei minou namu ni; e melele xa natemei natexoni ngan halesav tei, mutehur pilei nou natemei e tim samim xil. 36Reitin, melele xa eising navan tehe tovuol, xamim mutesing xol nou; melele xa natemesei, xamim mutelaxat kuh nou; e melele xa natete nim te xeih, xamim mei mutesao ni nou.’

37“Ti, ngan xil xa lamal pe met Hi xa liti e rin metu lihit rilomun ni mini lihit, “?Suv, vilieh vari iaxa matepusuk xa mae teatuk e matesa

---

<sup>b</sup> 25:31 Nat Moletin be his tei xa Iesu tehuri tangan vasep usil meien nan.

anien minuk; mu meruru teatuk e matesa oei minuk tangan omu ni?  
<sup>38</sup>?Vilieh vari iaxa matepusuk otexoni ngan halesav tei e matehur pilei xouk otemei e tim samem; mu eising nam tehe tovuol e matesing xolok?  
<sup>39</sup>?E vilieh mun iaxa matepusuk otemesei e matelaxatuk; mu otete nim te xeih e mabat matesao ni xouk?’

<sup>40</sup>“Ma, suv toto ak ihiteni mi xil ihit, ‘Reitin li nabiteni mi xamim, holesok xil vus xa mutepol ni mi tuak xil ak, tave ti neta xa xi tehe movotei tei tang, e pe metok, lehit ngan xa mutepol ni minou vari tang.’

<sup>41</sup>Ti, ihiteni mi ngan xil xa liti e rin meil ihit, ‘!Xamim, ngan xil xa Hi tesa halesil mi xamim, muhe reling nou! !Ha muhe Upang xa misakras vamat vatova xa Hi tesak mesen ni ngamu tangan ihe vonine Temat itel masxaxa nan xil! <sup>42</sup>Vengan melele xa mae teat nou, mutnasa ti anien minou; melele xa meruru teat nou, mutnasa ti oei minou namu ni; <sup>43</sup>e melele xa natemei natexoni ngan halesav tei, mutnahur pilei nou ti namat e tim samim xil. E melele xa eising navan tehe tovuol, mutnasing xol nou ti; melele xa natemesei, xamim mutnalaxat kuh nou ti; e melele xa natete nim te xeih, xamim mutnasao ni nou ti.’

<sup>44</sup>“Ti, moletin xil ak lisisi lihit, “?Suv, vilieh vari iaxa matepusuk xa mae mu meruru teatuk, mu otemei texoni ngan halesav tei, mu eising nam tehe tovuol, mu otemesei, mu otete nim te xeih e matnatutou ni xouk ti?’

<sup>45</sup>“Ma, xi ihiteni mi xil ihit, ‘Reitin li nabiteni mi xamim, holesok xil vus ak, xosxa mutnapol ni ti mi tuak xil ak, tave ti neta xa xi tehe movotei tei tang, e pe metok, lehit ngan xa mutnapol ni ti minou vari tang.’

<sup>46</sup>“Ma xil vus xa latamal ti pe meten, Nat Moletin iso rerat xil vus ha liti rute xa longpangasien nae xil misakras vavus vatova. E ngan xil xa lamal pe meten ha lihur meulien sal.”

### Vat na Siu Xil Lalang Ves Suse tangan Lavas Vin Iesu Vaxo En

**26** <sup>1</sup>cMelele xa Iesu pispisi ni holesok xil ak bus mi moletin nan xil, xi biteni mi xil bit, <sup>2</sup>“Nggoni ngan taxa mukila ngamu, melengien lu sutang di, ti, ripol ni Anien te Tavien. E melele nen ak vari, limaen nou, Nat Moletin, nihe he elu navan xil tangan ha liti xat nou e eivave.”

<sup>3</sup>E melele taxa Iesu di misepin, e tim xa eilep sa Kaiafas xa be Vatixar na pris xil, vat xil na pris xil del elda na Siu xil lamei vituei. <sup>4</sup>Xil di lalang ni suse tangan latal xat xuxus ni Iesu e lavasi vamat vaxo en. <sup>5</sup>Ma labiteni labit, “Rinapol ni ti e melengien te Anien te Tavien vengan, maxani, moletin xil linavae mi xil mun tang.”

<sup>c</sup> 26:1 Tumulen ak de Mak 14:1-2; Luk 22:1-2; e Sion 11:45-53 mun



### Iesu Ba ni Anien Tei e Atou Tei Pisen Merereen Mini

<sup>6</sup> <sup>d</sup>E melele xa Iesu da tamu e metimal tahal Betani, xi ba di ngganien e tim sa Saemon xa, tetiamu, meseien lepori tea tenben. <sup>7</sup>Di, atou tei bemei nim e nggur valit vokon tei xa lapol ni valite ni hat hos tei xa lakesi ni alabasta. Vokon ak, von bos xa bos e mani teni mun nggeih. E xi bemei visal Iesu e rute xa dotan da en, e mideh vokon ak ba xat vatin tangan vapisen merereen nan mini.

<sup>8</sup>E melele xa moletin na Iesu xil lapusi, iexil nggati e laseputut ni labit, “?!Veneh ma di purun vokon ak mak!?” <sup>9</sup>Vahos mak mu vahit ha vapos ni ni mani tova xa eilep. Ti, mani nen mikila vatutou ni hoeo xil.”

<sup>10</sup>E Iesu mikil naha xa di lasep usili, ma biteni mi xil bit, “?Xamim di mubul xat atou ak veneh? Xi pol ni neta tei xa bos pupu minou. <sup>11</sup>Vengan hoeo xil liti visal xamim vehakut, e inou, nasakras nate visal xamim vahehi. <sup>12</sup>Melele xa mideh vokon ak ba xat tiei navan, xi di misak mesen nou ve tehinen navan. <sup>13</sup>Reitin li nabiteni mi xamim, e rute xil vus xa lihithiten longeongen hos usil nou en, xil lihit usil naha xa atou ak tepol ni minou. E isak ni moletin xil linem xati ven.”

### Sudas Maen ni tangan Isa Rat Iesu mi Vat Xil na Pris Xil

<sup>14</sup><sup>e</sup>Di, Sudas Eskariot, xa be tei e xil xa labe lu e le tei (12) na Iesu, ba pus vat xil na pris xil. <sup>15</sup>Xi misis xil bit, “?Xosxa nisa rat Iesu mei ite hemim, ma musa naha minou?” Ma xil labuli silva mani ba duxoh hanutap tei e he xalu mun (30)<sup>f</sup> tangan lisa ni mini. <sup>16</sup>Ma Sudas maen ni. Di, e melele nen ak ba, xi milang ni suse tangan isa rat Iesu ha ite hexil ixo en.

### Iesu Nggga Anien te Tavien Del Moletin Nan Xil

<sup>17</sup><sup>g</sup>E melengien kokot te ‘Melengien xil te Beret xa Is Tovuol En,’<sup>h</sup> moletin na Iesu xil lamei visali e lasisi labit, “?Rute xave iaxa iem bei tangan masak mesen Anien te Tavien en?”<sup>i</sup>

---

<sup>d</sup> **26:6** Tumulen ak de Mak 14:3-9; e Sion 12:1-8 mun <sup>e</sup> **26:14** Tumulen ak de Mak 14:10-11; e Luk 22:3-6 mun <sup>f</sup> **26:15** Sak 11:12-13 di tesep usil 30 silva mani ak xa texoni 30,000 vt. <sup>g</sup> **26:17** Tumulen ak de Mak 14:12-21; Luk 22:7-13,21-23; e Sion 13:21-30 mun <sup>h</sup> **26:17** Melengien xil te Beret xa Is Tovuol En: E haram xil ngasen, melengien tol e he sav (8) Siu xil di langga beret xa is tovuol en tangan lanem rilomun ni melele xa latemanon latehe reling hal Isip (Eks 12:1-14). <sup>i</sup> **26:17** Anien te Tavien: Siu xil lapol ni Anien ak tangan lanem rilomun ni melele xa masxaxa xil na Hi lathas muimol xil ngasen tahal Isip. E muimol na Siu xil, re sipsip xa lakas puitech mae xil ni tesak ni Hi tetavi e xil (Eks 12:15-20).

<sup>18</sup>Iesu bit rilomun ni mi xil bit, “Muhe taon tahal Serusalem xa da iaxor, e mukamet moletin tei e rute ak. Muhiteni mini muhit, ‘Tisa bit, ‘Melengien navan bemei sangas. E inou mei nia Anien te Tavien e tim sam itel moletin navan xil.’ ” <sup>19</sup>Ma moletin nan xil laba e lapol ni nggoni ngan xa Iesu tehiteni mi xil. E rute ak, xil lasak mesen Anien te Tavien.

<sup>20</sup>E melele xa meteneai ba minu, Iesu bemei e dotan e von anienen del moletin nan xil xa labe lu e le tei (12). <sup>21</sup>E melele xa di langganien, Iesu bit lenen ni mi xil bit, “Reitin li nabiteni mi xamim, tei e xamim iaxa isa rat nou nihe he elu navan xil.”

<sup>22</sup>Melele xa lalonge mak, xil lalonge misa pupu, ma xil kekes di lasis Iesu labit, “?Suv midep li, onemi obit inou?”

<sup>23</sup>Iesu bit rilomun ni mi xil bit, “Reitin, tei e xamim vari xa di mungganien vituei del nou iaxa isa rat nou niha.<sup>j</sup> <sup>24</sup>E be reitin xa inou, Nat Moletin, nimat ixoni ngan xa Vanuvei Eo di misepin ni. !E isa pupu mi ngan xa isa rat nou! Moletin ak, vahos mak mu vahit linapesi ti vengang pangasien xa Hi isa ni mini ihe eilep pupu.”

<sup>25</sup>Di, Sudas xa isa rati iha misisi bit, “Tisa midep, onemi obit inou?”

Ma Iesu bit rilomun ni mini bit, “Ixonni ngan taxa xouk obiteni.”

<sup>26</sup>E melele xa di langganien, Iesu nggur beret e memes Hi ven. Di, bul pasi, e melele xa di miseti mi moletin nan xil, xi biteni bit, “Muhuri mua ni. Ngan ak be tiei navan.”

<sup>27</sup>Di, minggur kap xa uae ba en, memes Hi ven, e melele xa misa ni mi xil, xi biteni bit, “Xamim vus mumu ni. <sup>28</sup>Uae ak be ra navan xa isak ni hitxatien hu te xeih na Hi mei istal e ihe reitin.<sup>k</sup> Reok xa ileh ve moletin xil holu ihe sanien tei iha mi Hi tangan naketeh ti mun nasa mi xil ve tesaen nae xil. <sup>29</sup>Nabiteni mi xamim, ninamu ti mun uae ak ituxoh melele xa nimu uae hu itel xamim e rute xa Tata navan be Suv Toto en.”

<sup>30</sup>Melele xa langganien e lakikei ni sisien tei bus, xil lastal e ba labe Vathu te Urvatiei te Olip.

### Iesu Bit Lelen ni xa Moletin Nan Xil Lilesae Relingi

<sup>31</sup><sup>l</sup>Melele xa laduxoh Vathu te Urvatiei te Olip, Iesu biteni mi moletin nan xil bit, “E vongien tak, xamim vus mulesae reling nou ixoni ngan xa Hi tesepin ni e Vanuvei Eo xa bit,

<sup>j</sup> 26:23 Ngan ak isak ni naha xa Sam 41:9 tehiteni tangan istal mei ihe reitin. <sup>k</sup> 26:28 E Eks 24:6-8, Mosis miteh re buluk e hor te sanien tangan vasak ni hitxatien matu te xeih xa Hi tepol ni tetel mol-Isrel xil mei istal e ihe reitin. Usil sexien nen tak, re Iesu pol ni hitxatien hu te xeih mei istal e ihe reitin xa Hi iteh meulien na moletin xil te ut etan.

<sup>l</sup> 26:31 Tumulen ak de Mak 14:27-31; Luk 22:31-34; e Sion 13:36-38 mun

*'Inou nihas moletin xa di milaxat sipsip xil,  
e sipsip san xil liletasil relingi.'* (Sak 13:7)

32“E melele xa nimeul rilomun ra maten, inou nitiamu ni xamim ha nite Kaleli.”

33 E Pita mitamea e biteni mini bit, “!Tave ti neta xa moletin sav xil lilesae relinguk, inou ninave relinguk ti vatova!”

34 Ma Iesu bit rilomun ni mini bit, “Reitin li nabiteni minuk, e vongien tak, melele xa ut nalan ti mu e tuto xil linakorat ti mu, e xouk uhiteni ihe vatol ngamu xa otakil ti nou.”

35 E Pita biteni nggeih pilei sung bit, “!E-e, namak ti! !Tave ti neta xa nimat itelak, inou nisakras namiteni xa natakil ti xouk!” E ngan teisav xil mun labiteni nggoni tang.

### **Iesu Misis e Ut Ketsemani e Miling Meulien Nan pe He Hi**

36<sup>m</sup>Di, Iesu be rute tei xa lakesi ni Ketsemani del moletin nan xil. Melele xa laduxoh rute ak, xi biteni mi xil bit, “Mutotan muti tak e ti mutatil nou. Inou nitiamu niha nisis inggaxor.” 37 Xi minggur Pita del nat Sepeti xalu latonggusili. E melele xa latoba, nenemien na Iesu basi holu e milonge misa pupu. 38 Ma xi biteni mi xatel bit, “Tinok li polu ni nenexoen, e nalonge lehit ngan xa bit vahas vin nou. Muti tak, e ti mutiketeh itel nou.”

39 Di, Iesu mikakao reling xatel vuteili tang, mitingeiril be tan e misis mi Hi bit, “Tata li, xosxa suse sav tova mun da tamu, uhur rat longpangasien ak ihe reling nou li. E onapol ni ti naxoni ngan xa ieok bei, e upol ni ixoni ngan kestang xa xouk iem bei.”

40 Di, xi dilomun be visal xatel e mikameti xa di latopat. Ma xi biteni mi Pita bit, “?Midep xiak? ?Mutsakras mutoketeh vatel nou vahe haoa tei takes? 41 Mutiketeh e ti mutisis tangan mutnamot ti e melele xa sakpisien xil imei e xamitel. E tinemitel, iemitel bei tangan mutopol ni neta tei xa momal, e tenbemitel memel.”

42 Di, Iesu dilomun ba e misis bit, “Tata li, xosxa suse sav tovuol e be tangan xa nihur vuol ni longpangasien xil ak, ma upol ni ixoni ngan kestang xa xouk iem bei.”

43 E melele xa Iesu dilomun, mikameti xa termali latopat mun vengan lasakras latohur xat metenoh natel. 44 Ma xi be reling termali mun, e ba misis be vatol nen ni sisen nan xati tang.

45 E melele xa Iesu dilomun bemei visal termali, biteni mi xatel bit, “?Di tamu mutopat? ?Di tamu mutongel? !Topus ti! Taxeak be melele xati xa lisa rat nou, Nat Moletin, nihe he moletin tesa xil. 46 !Tomea, ratoha! Moletin xa isa rat nou, xi tu xa bemei iaxor.”

---

<sup>m</sup> 26:36 Tumulen ak de Mak 14:32-42; e Luk 22:39-46 mun

### Ladal Xat Iesu

<sup>47</sup>Melele xa Iesu di tamu misepin, Sudas, tei e xil xa labe lu e le tei (12) nan, mistal. Xi bemei del xat vanut moletin xil xa di laleh xat tiei del homenda xil te vaeen. Xil lamei langgusil nenemien na vat xil na pris xil del elda xil na Siu xil. <sup>48</sup>Sudas xa tehit xati tangan isa rat Iesu teling xati tehit, “Moletin xa nipesum ni vin, xi vari iaxa be ngan xa iemim bei. Mumei mutal xati.” <sup>49</sup>Ma Sudas mika mal visal Iesu, pesum ni vin e bit, “Tisa, bos vongien li.”

<sup>50</sup>E Iesu bit rilomun ni mini bit, “Tuxoli, pol ni tang vaxoni ngan xa xouk omei ven.”

Di, vanut moletin xil ak lamei ladal xat Iesu. <sup>51</sup>E moletin tei na Iesu milih rat tiei te vaeen nan e da xoteh vurang slev tei na Vatixar na pris xil.

<sup>52</sup>E Iesu misel mini bit, “Singin xat tiei nam mun vate voninen, vengang ngan xil xa di labae del tiei, limat itel tiei. <sup>53</sup>Vahit ngan xa ieok vahei, inou natak kes Tata navan, ma vatei takes, vasa vanut masxaxa xil te vaeen lili lu e le tei (12) xa mahulong tangan mei livae e rin navan. <sup>54</sup>?E vahit napol ni, ma Vanuvei Eo xa bit xati xa holesok xil ak istal imak mei ihe reitin itep?”

<sup>55</sup>Di, Iesu biles pus vanut moletin xil ak e biteni mi xil bit, “?Veneh ma di muleh tiei e homenda xil te vaeen tangan mei mutal xat nou? ?Munemi mubit inou di nadiamu ni moletin xil tangan mavae vaha xat kavmen nar? !E-e! Melengien xil ngasen natotan nade vangit vloh te Nim Eo e di napispisi mi moletin xil e mutamei ti tangan mutal xat nou. <sup>56</sup>E holesok xil vus ak mei mistal tangan vasak ni naha xa provet tetis usil e Vanuvei Eo mei vastal vahe reitin.” E melele xa ladal xati, moletin nan xil vus lalesae relingi.

### Langgur Iesu be Kot na Vat Xil na Siu Xil

<sup>57</sup>PNgan xil xa ladal xat Iesu ladela labe tim sa Kaiafas, xa be Vatixar na pris xil. E rute ak, tisa xil te Rae na Mosis del elda xil na Siu xil labe vituei ngamu ladi. <sup>58</sup>E Pita di mika xus e di nggusil vanut moletin xil xa di ladel Iesu laba vuma ... laduxoh vloh te tim sa Vatixar ak. E rute ak, Pita be vangit vloh e ba dotan del mereketeh xil te nim ak tangan vapus ti xa lipol ni naha mi Iesu.

<sup>59</sup>Vat xil na pris xil del eilep sav xil mun na Siu xil di lalang ni moletin tova xa mei iluvos xa Iesu pol ni tesaen tei xa likila lihasi imat ven. <sup>60</sup>E

---

<sup>n</sup> 26:47 Tumulen ak de Mak 14:43-50; Luk 22:47-53; e Sion 18:3-12 mun    <sup>o</sup> 26:53 E melele nen ak, moletin te vaeen xil tahal Rom labe 6,000 xa ladi e vanute tei. Ma Iesu bit masxaxa xil te vaeen ak lili 72,000 xa mikila vakes xil.    <sup>p</sup> 26:57 Tumulen ak de Mak 14:53-65; Luk 22:54-55,63-71; e Sion 18:13-14,19-24 mun

tave ti neta xa moletin holu lapol ni luvosen ba xat Iesu, latakamet ti neta xa lakila lasa rati ha vamat ven.

Di, moletin lu mei lusoh <sup>61</sup>e lusepin mi kaonsel ak lubit, “Xamel matelonge xa moletin ak tehit, ‘Inou nikila nihi len Nim Eo na Hi. Ti, nikili ni mun e melengien tol tang.’ ”

<sup>62</sup>Ma Vatixar mitamea e misis Iesu bit, “?Ma midep? Xouk di olong sepinien di xa di lasepin ni ba xatuk. ?Neta tovuol xa obit ovitieni?” <sup>63</sup>E Iesu dat votei tang.

Ma Vatixar misisi mun bit, “E pe met Hi xa meul, inou nasemae ni xouk tangan usepin ni naha xa be reitin. ?Reitin xa xouk obe Kristo, Nat Hi?”

<sup>64</sup>Iesu bit rilomun ni mini bitene, “Nggoni ngan xa di obiteni. E nabiteni mi xamim, taxeak iha, mupus ...

*‘Nat Moletin itotan*

*ite rin metu na Hi Suv te Xeihen.*

*E mupusi imei e ut etan*

*ixo momah xil te tilang hat!’ ” (Sam 110:1; Dan 7:13)*

<sup>65</sup>Melele xa Vatixar milong sepinien nan, ien mikat xa mikat, dal papas eising nan e miki nggeih bit, “?!Mulonge!? !Xi misep purun his Hi vari! ?Veneh ma di ralang ni sepinien tova mun tangan vaha xati? !Xamim vus mulonge xa di misep purun his Hi! <sup>66</sup>?Munemi midep vari?”

Xil vus labit rilomun ni labit, “!Momal tang tangan imat!”

<sup>67</sup>Di, xil lakusah ba xat valnaon e ladi. E rute ngan xil mun lalevesi <sup>68</sup>e labit, “?!Xosxa obit obe Kristo xati, uhit pisi, visi iaxa diuk!?”

### **Pita Biteni be Vatol xa Takil Ti Iesu**

<sup>69</sup>Melele xa Pita di tamu dotan e vangit vloh te nim ma Vatixar na pris xil, atuli tei te polien bemei visali e biteni mini bit, “Xouk mun di otehusil Iesu tahal Kaleli.”

<sup>70</sup>E Pita muun xole pe met moletin xil bit, “!Tave reitin ti! Inou natakil ti naha xa di obiteni iaxai.”

<sup>71</sup>Di, Pita mitamea e mikakao ba ve puiteh te vloh. E rute ak, atuli te polien tei mun pusi, ma biteni mi moletin xil bit, “!Moletin ak mun be tei e xil xa di latehusil Iesu tahal Nasaret!”

<sup>72</sup>Ma vatei mun, Pita muun xole e bit, “!Pe met Hi, nabiteni reitin xa natakil ti moletin ak vari!”

<sup>73</sup>Tavehi, moletin xil xa lasoh ladi lamei visal Pita e labiteni mini labit, “Xouk vari obe moletin tei nan vengan sepinien nam nggoni ngan Kaleli xil tang.”

<sup>74</sup>E Pita misepin nggeih bit, “!Natakil ti moletin xai vari xa di musep usili iaxai! !Hi isa halesil iha xat nou xosxa sepinien navan be luvosen!”

---

¶ 26:69 Tumulen ak de Mak 14:66-72; Luk 22:56-62; e Sion 18:15-18,25-27 mun

Vatei takes, tuto tei mikorat. <sup>75</sup>E melele xa milonge, Pita minem rilomun ni naha xa Iesu tehiteni mini tehit, “Ut nalan ti mu e tuto xil nakorat ti mu, e xouk uhiteni ihe vatol ngamu xa xouk otakil ti nou.” Ma tinen pangas e be reling vangit vioh ak, ba di muis nggeih.

**Sudas Ba Misaxolen Hiraen vengan xa Milonge  
Misa ve Naha xa Tepol ni mi Iesu**

**27** <sup>1</sup>E makoe roroh, vat xil na pris xil del elda xil na Siu xil lamae e nenemien tei takes tangan lihas Iesu imat. <sup>2</sup>Ma labar xati e ladela be visal Paelet xa be vat te kavmen te rute ak tangan lasa rati vaha mini.<sup>s</sup>

<sup>3</sup>Melele xa Sudas xa tesa rat Iesu pusi xa lamaen ni tangan Iesu ha imat, xi biles nenemien nan e misak tangan vasa rilomun ni silva mani xa be hanutap tei e he xalu mun (30) vaha mi vat xil na pris xil del elda xil. <sup>4</sup>Xi bit rati bit, “Inou napol misa pupu, vengan natesa rat moletin ak xa tenapol ni ti neta vasa tangan ha vamat ven.”

E xil labit rilomun ni mini labit, “Xamem mabit manakil ti. Ngan xai be nam sung.”

<sup>5</sup>Ma Sudas mirang lelen mani ak be tan e vangit vioh te Nim Eo, e miloh milesae. Di, ba bar xat hiraen ni ao tei e misaxolen xi.

<sup>6</sup>Melele xa ba, vat xil na pris xil ba lale viton silva mani xil ak e labiteni labit, “Mani ak texal rat meulien na moletin tei. Ma usil rae nar xil, tamal ti tangan raso ni vahe ateli te Nim Eo vengan mani ak tamese ti.” <sup>7</sup>Lasep usili, ma lamae e nenemien tei. Ma laleh mani xil ak e ba lapus moletin tei xa di pol ni holesok xil ni tan te pili. Del mani ak, xil langgal rat mavulut tan tei rani tangan mei ihe von tehinen tova xa ti litihin ngan halesav xil en. <sup>8</sup>Ve rin ak, lakes rute ak ni ‘Tan te Ra’ duxoh xosali. <sup>9</sup>Ma naha xa Hi tesepin ni texo provet Seremaea bemei be reitin xa bit, “Xil laleh silva mani hanutap tei e he xalu mun (30), xa momal ni mani xa mol-Isrel xil lateling xati tangan lixal rat meulien nan ni. <sup>10</sup>E del mani ak, xil langgal rat mavult tan tei ra moletin tei xa di pol ni holesok xil ni tan te pili, nggoni ngan xa Hi Suv tesemae ni minou.” (Sak 11:12-13; Ser 19:1-13; 32:6-9)

**Ladel Iesu Ba Misoh Pe Met Suv Paelet tangan lihas vini**

<sup>11</sup>E melele xati xa ngan ak di mistal, Iesu ba misoh pe met suv Paelet xa be he kavmen tahal Rom xa di milaxat provins tahal Sudea. Di, Paelet misisi bit, “?Midep? ?Be reitin xa xouk obe suv toto na Siu xil?”

Iesu bit rilomun ni mini bit, “Nggoni ngan taxa xouk obiteni.”

---

<sup>r</sup> **27:1** Tumulen ak de Mak 15:1; Luk 23:1-2; e Sion 18:28-32 mun    <sup>s</sup> **27:2** Ngan ak misak ni naha xa Aes 53:8 tehiteni mei mistal be reitin.    <sup>t</sup> **27:11** Tumulen ak de Mak 15:2-5; Luk 23:3-5; e Sion 18:33-38 mun

<sup>12</sup>E melele xa vat xil na pris xil del elda xil na Siu xil lasepin ba xati, xi tavit ti neta tangan vatutou ni rin xa nan.<sup>u</sup> <sup>13</sup>Ma Paelet misisi bit, “?Otalong ti sepinien xil xa di labiteni ba xatuk iaxai?” <sup>14</sup>E Iesu dat votei tang, e tavit rilomun ni ti sepinien nae. Melele xa suv Paelet pus sexien nan, mesep pupu ven.

<sup>15</sup>Be sexien matu tei na suv Paelet xa, e melengien xati te Anien te Tavien, xi di maen moletin tei xa moletin xil labosei tangan ha ven imase ra nim te xeih. <sup>16</sup>E melele nen ak, vatxeih tei tete nim te xeih, hisen Barabas xa moletin xil lakil kuhi mak ve sexien tesa xil xa di tepol ni. <sup>17</sup>Ma melele xa suv Paelet pusi xa vanut moletin xil ak mei ladi vituei, misis xil bit, “?Ngan xave iaxa iemim bei tangan nimaen ni ha ven imase: Barabas mu Iesu xa lakesi ni Kristo?” <sup>18</sup>Xi misis xil mak vengan xa pus kila xa vat xil na pris xil latesa rat Iesu mini vengan di lanem misa ni tang.

<sup>19</sup>E melele xa suv Paelet di tamu dotan e von koten nan, atou nan misa sepinien tei mini bit, “Onapol ni ti neta naha xat moletin xai, vengan xi momal tevi. Xosali, nanexo pupu ve metuveen tei xa natepusi usil moletin xai.”

<sup>20</sup>E vat xil na pris xil del elda xil na Siu xil lasi petine vanut moletin xil ak tangan lasis Paelet e imaen Barabas ha ven imase, e ihas Iesu imat.

<sup>21</sup>Paelet ba misis vanut moletin xil ak vatei mun bit, “?Ngan xave e xalu iaxa iemim bei tangan nimaen ni ha ven imase?”

Ma xil vus lakei ba ni labit, “!Barabas!”

<sup>22</sup>Ma Paelet misis xil mun bit, “?Xosxa imaxai, ma nipol ni naha mi Iesu xa lakesi ni Kristo?”

E xil vus lakei be nesao labit, “!Ti xati e eivave!”

<sup>23</sup>Di, Paelet misis xil mun bit, “?Veneh? ?Xi pol ni naha misa?”

E lakei nggeih pilei sung labit, “!Ti xati e eivave!”

<sup>24</sup>Melele xa Paelet pusi xa misakras vahiles nenemien nae e sangas lapol ni vaeen, xi po oei e mikas hen pe met moletin xil vus. E melele xa di pol ni, xi biteni mi xil bit, “Taxeak, nakas rat ra te maten na moletin ak ra heok, vengan napusi xa tapol ni ti neta vasa tangan ha vamat ven. !Ma xosxa imat, ren iti hemim sung!”

<sup>25</sup>E vanut moletin xil ak labit rilomun ni mini labit, “!Bos tang, ren iti e hemem itel horamue namem xil mun!”

<sup>26</sup>Ma, nggusil eheien nae, Paelet maen Barabas ba ven mase. E mi Iesu, xi misemae ni tangan moletin te vaeen nan xil ha limeas pangasi ni ao te xeih xa sanute di en, ti, litela ha liti xati e eivave.

---

<sup>u</sup> 27:12 Ngan ak misak ni naha xa Aes 53:7 tehiteni mei mistal be reitin.

### Moletin te Vaeen Xil Lapol Pepamen ni Iesu

27<sup>v</sup>Melele xa lameas pangas Iesu bus, moletin te vaeen xil na Paelet ladela labe vangit vioh te nim mae xa eilep e lakes viton moletin te vaeen sav xil vus xa ladi vituei<sup>w</sup> tangan lamei. 28<sup>x</sup>Xil ladal rat eising na Iesu e lasing xole ni kaliko tei xa pili nggoni ngan na suv toto xil. 29<sup>y</sup>Di, lapol pepamen ni nggoni ngan xa be suv toto tei. Langgil xat vatluvoluv tei ni ao tei xa sanute xil tepiei di en, e lalingi da xat vatin. Laling liei tei de hen metu, e di latingeiril pepamen pe meten nggoni ngan xa di lasa merereen nae mini. E melele xa di lapol ni, labiteni mini labit, “!O suv toto na Siu xil, xamem di mamerere ni xouk!” 30<sup>z</sup>Di, lakusah ba xati, lalihi rat eitingil ak rani, e labas vatin ni.<sup>x</sup> 31<sup>a</sup>Melele xa lapol pepamen ni bus, langgur rat kaliko te pili ak be relingi, e lasing xole ni eising nan mun. Di, ladela ba tangan ha liti xati e eivave.

### Ladi Xat Iesu e Eivave

32<sup>y</sup>Melele xa moletin te vaeen xil ladel Iesu laba, xil labisu ni moletin tei e suse, hisen Saemon tahal Saerin. Lamei visali e langgeih xati tangan vapo eivave na Iesu. 33<sup>z</sup>Di, ladel Iesu ba labe nesao e Vathu Kolkota, xa koute teni be ‘Valvat Moletin’. 34<sup>a</sup>E rute ak, lasa uae mi Iesu xa labilesi del neta tei xa mikon.<sup>z</sup> E melele xa Iesu mu pisi, misin ni. 35<sup>b</sup>Di, moletin te vaeen xil ak ladi xati e eivave. E melele xa murur da en, xil di laso daes tangan vapisen ni xa visi e xil iaxa ileh mavulut eising xil na Iesu.<sup>a</sup> 36<sup>c</sup>E rute ak, xil ladotan e di laketeh xole. 37<sup>b</sup>E eivave nan, ladi xat tisen tei de nesao ni vatin xa bit mesen rin xa ladi xati ven. Tisen ak ladisi labit, ‘Ngan ak be Iesu, Suv Toto na Siu xil.’ 38<sup>c</sup>E melele nen ak, lateti xat moletin lu xa lutepol tesa luteti eivave lu mun. Tei tete rin metu, e tei tete rin meil.<sup>b</sup>

39<sup>c</sup>Melele xa Iesu murur de eivave, moletin xil xa di lakakao langgo visali di lakuvun vati xil e di langue xati 40<sup>c</sup>labit, “!Ei, xouk xa otehiteni otehit uhulen Nim Eo na Hi, ti, ukili ni mun e melengien tol tang, bos mak mu tangan uteh meulien e xouk mun tang! !Xosxa obe Nat Hi reitin, amei etan reling eivave xai!”<sup>c</sup>

41<sup>d</sup>Usil sexien nen xil tak, vat xil na pris xil, tisa xil te rae na Mosis, del elda na Siu xil mun lapol pepamen ni Iesu. 42<sup>d</sup>Xil labiteni mini labit, “!Mupus ti mu! Xi di teteh meulien e moletin sav xil, e misaras vateh meulien e xi mun tang. !Xosxa be reitin xa xi be suv toto na mol-Isrel

---

<sup>v</sup> 27:27 Tumulen de ak Mak 15:16-20; e Sion 19:2-3 mun    <sup>w</sup> 27:27 vanut moletin tavaeen xil ak sngas latehe handred tei e he sav (600).    <sup>x</sup> 27:30 Ngan ak misak ni naha xa Aes 50:6 tehiteni mei mistal be reitin.    <sup>y</sup> 27:32 Tumulen ak de Mak 15:21-32; Luk 23:26-43; e Sion 19:17-27 mun    <sup>z</sup> 27:34 Ngan ak misak ni naha xa Sam 69:21 tehiteni mei mistal be reitin.    <sup>a</sup> 27:35 Ngan ak misak ni naha xa Sam 22:14-18 tehiteni mei mistal be reitin.    <sup>b</sup> 27:38 Ngan ak misak ni naha xa Aes 53:12 tehiteni mei mistal be reitin.    <sup>c</sup> 27:40 Ngan ak misak ni naha xa Sam 22:7-8 tehiteni mei mistal be reitin.



xil, bos xa, taxeak tang, imei etan ra eivave ak! Xosxa imak, ma xamem muke reitin en sung. <sup>43</sup>Xi miling nenesien nan e Hi e tehiteni tehit, 'Inou nabe Nat Hi.' Ma bos, xosxa Hi ien bei moletin xai, ma mei ihur rati." <sup>44</sup>E usil sexien nen tak, moletin tesa xalu xa lateti xat xalu luteti rin, xalu mun lusep pepamen ni.

### Maten na Iesu

<sup>45</sup>E piniae, maluxoluken mei da xol ut xil ngasen e dat mak duxoh haoa tol (3). <sup>46</sup>E melele xa haoa xatel ak mei latavi, Iesu miki nggeih nggo sepinien xati nan xa be Arameak bit, "*!Ilae! !Ilae! ?!Lama sabaktani!?*" (*Sam 22:1*) Koute te sepinien ak be, '!Hi navan! !Hi navan! ?!Veneh ma ostokovein nou!?'

<sup>47</sup>Melele xa rut moletin xil xa lasoh ladi lalonge, xil labit, "?Mulonge? Xi di mikes provet Ilaetsa iaxai."

<sup>48</sup>Vatei takes, tei e xil miloh ba, minggur mavulut kaliko tei, e mitarir ni be uae na mikon. Di, milingi de kusut liei tei e mei misa ni be nesao tangan Iesu vavisi. <sup>49</sup>E rute ngan xil mun labiteni labit, "Veter mu, ratiluvoluv tamu e rapus ti. ?Ilaetsa imei etan mei iteh meulien en, mu namei ti?"

<sup>50</sup>Di, Iesu miki nggeih vatei mun, milih kor ni votiang, di, mat.

<sup>51</sup>E melele nen tak vari, kaliko xa metel xa lalihi dakoe xol ut eo tei e Nim Eo, mesel be rin lu, nggo kusute nesao bemei duxoh kusute etan. E lul tei milul, hat xil mahoi <sup>52</sup>e misak ni von tehinen xil mahoi e mangang dit mak. E moletin na Hi xil holu xa latelel lateti en, xil latemeul rilomun ra maten. <sup>53</sup>Xil latehe reling von tehinen nae xil e latekakao. E melele xa Iesu temeul rilomun ra maten, moletin xil holu latepus moletin xil ak e hal Serusalem xa be taon eo na Hi.

<sup>54</sup>Melele xa vat na moletin xil te vaeen del moletin nan xil xa di lateketeh xol Iesu lalong lul ak e lapus holesok xil ak xa testal, ulixil mikan pupu. Xil labiteni labit, "!Reitin li, ngan ak tehe Nat Hi vari tang!"

<sup>55</sup>E tatit atou vutei xil lasoh ladi nga sotin vuteili ra eivave, e di lapus holesok xil xa di mistal. Tatit atou xil ak di latetutou ni Iesu e Kaleli e latehusili mun latemei e Serusalem. <sup>56</sup>E xatel tol xa latemos e atou xil ak tehe Meri tahal Makdela; Meri, nine Temes xal Siosepe; e nine horamue na Sepeti xalu.

### Laling Tiei na Iesu de Vangihat te Tehinen Tei

<sup>57</sup>E Sangas ut te vamauxoluk e Sabat mun da bemei sangas. Ma moletin tei be visal suv Paelet, hisen Siosepe. Xi be te metimal tahal Aramatea e

---

<sup>d</sup> 27:45 Tumulen ak de Mak 15:33-41; Luk 23:44-49; e Sion 19:28-30 mun

<sup>e</sup> 27:57 Tumulen ak de Mak 15:42-47; Luk 23:50-56; e Sion 19:38-42 mun

holesok nan holu. Xi mun be tei e xil xa di tehusil xat Iesu. <sup>58</sup>Melele xa ba misoh pe met Paelet, xi misisi tangan vamaen tiei na Iesu mini. Ma Paelet misemae ni moletin nan xil te vaeen tangan ha lipo rati e lisa ni mini. <sup>59</sup>Ma Siosepe ba poe e pis xole ni kaliko te mieh tei xa memese. <sup>60</sup>Di, poe e ba milingi de vangihat te tehinen nan xati xa latesah moten rohon ni tang.<sup>f</sup> Di, midivin hat tei xa eilep mei dakoe xol puiteh te vangihat ak e be relingi ba. <sup>61</sup>Meri tahal Makdela del Meri tei mun ludotan ludi nga sotin vuteili ra rute ak, momal ni puiteh te vangihat ak.

### Moletin te Vaeen Xil Laketeh Xol Vangihat te Tehinen xa Tiei na Iesu Da En

<sup>62</sup>Melele xa ut milan e Sabat, vat xil na pris xil del Farasi xil ba lapus suv Paelet. <sup>63</sup>Xil lamei visali e labiteni mini labit, “Suv, manem xati xa melele xa vat luvozen ak temeul tamu teta, xi tehiteni tehit, ‘Melengien tol mei itavi, e inou nimeul rilomun ra maten.’<sup>g</sup> <sup>64</sup>Ma usemae ni moletin te vaeen nam xil ha liketeh xol kuh vangihat te tehinen nan ha ituxoh melele xa melengien tol xatel ak mei itavi. Vengan xosxa onapol ni ti, moletin nan xil likila ha likan ni tiei nan. Ti, likila lihithiteni xa xi meul rilomun ra maten. E xosxa holesok xil ak mei istal, ma luvozen kor ak mei isa pilei sung ili luvozen xa tetiamu melele xa xi tehit xi be Kristo na Hi.’

<sup>65</sup>Melele xa Paelet milonge mak, xi maen ni e biteni bit, “Bos ngamu. Muleh tatit moletin tova te vaeen, e ha liketeh xol vangihat ak ihusil sexien xa xamim iemim bei.” <sup>66</sup>Ma laba vituei del moletin te vaeen xil ak, e labilit xol hat xa mahulong xa dakoe xol puiteh teni. Di, laling tatit moletin te vaeen xil ak laketeh xole.

### Iesu Meul Rilomun ra Maten

**28** <sup>1h</sup>Sabat bus. Di, ut milan e Sande, Meri tahal Makdela del Meri sav mun luba tangan ha lalosao ni vangihat te tehinen na Iesu.

<sup>2</sup>Vatei takes, lul tei milil nggeih vengan masxaxa tei na Hi Suv nggo ut nesao bemei etan. Xi mei midivin rat hat xa tetakoe xol puiteh, e dotan da en. <sup>3</sup>Masxaxa ak, tenben minehin pupu nggoni an xa milangas, e eising nan xil mieh xa mieh. <sup>4</sup>Melele xa moletin te vaeen xil lapusi, ulixil mikan pupu e lexil malili. Lakiri lamot labe tan e iexil bon pupu, lasakras mun lapol ni ti neta.

<sup>5</sup>E masxaxa ak biteni mi atou xalu ak bit, “!Ulimil nakan ti! Nakila xa di mullang ni Iesu xa lateti xati e eivave. <sup>6</sup>E xi tara ti mun inggak. Reitin, xi meul rilomun ngamu ra maten nggoni ngan taxa tehiteni. Lumei ha lupus ti rute xa lateling tiei nan teta en. <sup>7</sup>Taxeak tang, multemanon ha

<sup>f</sup> 27:60 Ngan ak misak ni naha xa Aes 53:9 tehiteni mei mistal be reitin.

<sup>g</sup> 27:63 Mat 16:21 <sup>h</sup> 28:1 Tumulen ak de Mak 16:1-10; Luk 24:1-12; e Sion 20:1-10 mun

milhiteni mi moletin nan xil mulhit, 'Iesu meul rilomun tuei ra maten e xi itiamu ni xamim ha ite Kaleli. Xamim ha mupusi e rute ak.' Ngan ak be sepinien xa Hi misil nou tangan mei nihiteni mi xamil."

<sup>8</sup>Ma rumali lube reling vangihat e luloh temanon luba tangan luhithiteni mi moletin xil na Iesu. Ulixalu mikan, e tave ti neta xa mak, iexalu polu ni sien. <sup>9</sup>Melele xa di tamu luba, vatakes, Iesu bisu mi xalu e biteni mi xalu bit, "!'Bos makoe! Tomat na Hi iti mi xamil." Melele xa lupusi, lumei visali, lumot ludal xat len xalu, e lusa merereen nalu mini. <sup>10</sup>Di, Iesu biteni mi xalu bit, "Ulimil nakan ti. Ha mulhiteni mi tuak xil e neketen tangan lihe Kaleli, e ha lipus nou en."

### **Moletin te Vaeen Xil Laluvos Labit Moletin na Iesu Xil Mei Lakan ni Tiei Nan**

<sup>11</sup>Melele xa atou xalu ak di tamu luba, rut moletin te vaeen xil xa di lateketeh xol vangihat ak ladilomun labe Serusalem e ba labit vuol ni holesok xil xa testal mi vat xil na pris xil. <sup>12</sup>Ma vat xil na pris xil lasepin del elda xil na Siu xil e laling xat nenemien tei. Xil langgal moletin te vaeen xil ak ni mani tei xa eilep <sup>13</sup>e labiteni mi xil labit, "Xamim ha muhithiteni muhit, 'Melele xa matepor vovong, moletin na Iesu xil latemei e hilaep te vongien, e mei latekan ni tiei nan.' <sup>14</sup>Ma xosxa longeongen teni ituxoh suv Paelet, xamem iaxa musepin e rin xa namim tangan musikoe xol xamim e xi nasa ti longpangasien mi xamim ven." <sup>15</sup>Ma moletin te vaeen xil ak laleh mani e ba lapol ni nggoni ngan xa xil latehiteni mi xil. Ma longeongen ak mikapis e rute xil vus xa Siu xil ladi en e miloh bemei duxoh xosali.

### **Iesu Mei Mistal mi Moletin Nan Xil<sup>i</sup>**

<sup>16</sup>Ma moletin na Iesu xil xa labe tei e le tei (11) xa lateti, xil labe Kaleli e ba labe vathu tei xa Iesu tepisen ni ngamu mi xil. <sup>17</sup>E rute ak, xil lapus Iesu. E melele xa lapusi, lamot mini. E rute ngan xil latake reitin kuhi ti mu en. <sup>18</sup>Di, Iesu bemei visal xil e biteni mi xil bit, "Tata navan miling holesok xil vus xa di ut nesao e ut etan di e heok. <sup>19</sup>Ma muha ve moletin xil te kantri xil vus e mupol ni xil mun mei lihe moletin navan xil. E melele xa mei lihusil nou, xamim mubaptaes ni xil e his Hi Tamer, e his Hi Natneli, e his Hi Ninin Eo. <sup>20</sup>E mupispisi mi xil tangan lilong xat holesok xil vus xa natesemae ni mi xamim. E inou, nite visal xamim vehakut ha ituxoh hoxalite te melengien xil xa radi en."

---

<sup>i</sup> **28:15** Tumulen ak de Mak 16:14-18; Luk 24:36-49; Sion 20:19-23; e Polien 1:6-8 mun

# Luk

---

## Sepinien xa Diamu

*Luk 1:1-4*

**1** <sup>1</sup> Vanuvei ak bat minuk Teopolis,<sup>a</sup> Okila xa moletin xil holu di lasak pisi xa ti latis usil naha xa testal mi xir. <sup>2</sup> Ngan xil xa lateti kokot e latepus holesok xil xa Iesu tepol ni, xil latesep usil longeongen hos mi mosav. E xil xa latelonge, latetis usili. <sup>3</sup> Ma vengan xa inou mun nanggusil kuh holesok xil ngasen ak, di nanemi nabit bos tangan nitis mese ni holesok xil ngasen xa di testal minuk, eilep namem, Teopolis. <sup>4</sup> Napol ni mak vengan xa nabit ukil kuh reitinen te holesok xil xa di otelonge.

## Masxaxa Tei Bit Kila xa Lipes Sion

*Luk 1:5-25*

<sup>5</sup> Melele xa Herot tehe suv toto tahal Sudea, pris tei te Nim Eo teta, hisen Sakaraea, xa temos e vanut pris na Abitsa.<sup>b</sup> Atou nan, hisen Elsavet, xi mun be vatimol tei na pris Eron. <sup>6</sup> Xalu vus lumal e pe met Hi Suv e lunggusil vuol ni Rae nan xil. <sup>7</sup> Sakaraea be momatu ngamu e horamue nalu tovuol vengan xa tovolih nan be lumalum.

<sup>8</sup> Vatei, Sakaraea ba tangan vapol vatel vanut pris xa xi mos en e Nim Eo na Hi. <sup>9</sup> Nggusil sexien matu na pris xil, xil latehosei Sakaraea tangan ihe Nim Eo e itin vokon e hor tangan iha mi Hi. <sup>10</sup> E melele xa Sakaraea de nim, moletin sav xil lasoh ladi hale e di lasis. <sup>11</sup> Vatakes, masxaxa tei na Hi Suv mei mistal mi Sakaraea e misoh de ri matu te hor ak. <sup>12</sup> Melele xa Sakaraea miketeh pusi, mesep e ulin mikan xa mikan. <sup>13</sup> E masxaxa bitene mini bitene, “!Sakaraea, ulum nakan ti! Hi milong sisen nam tuei. Atou nam Elsavet, veter mu ihur horamue tei namil, ihe malahos. Uling hisen ihe ‘Sion’. <sup>14</sup> Poten nan isak ni xamil mulimaal, e moletin sav holu mun limaal. <sup>15</sup> Natumali ihe moletin xa eilep e pe met Hi Suv. Xi namu

---

<sup>a</sup> **1:1** Koute te hisen ‘Teopolis’ be ‘moletin xa di ba ve kilakilen tangan vakil Hi.’

<sup>b</sup> **1:5** Pris xil ngasen langgo vatimol na Eron te tiamu. Eron, havneli xil labe hanutap tei e hat mun, e Abitsa tehe tei e xil. 1 Kron 24:1-19.

ti vari uaen mu oei te xeih sav mun. E melele xa ita tamu e vang ninen, Ninin Eo mei ipolu en. <sup>16</sup>E xi iaxa ileh mol Isrel xil ihe holu lilitomun limei visal Hi Suv nae. <sup>17</sup>E xi itiamu ni Hi Suv itel xeihen ixoni ngan xa tete provet Ilaetsa te tiamu. Xi ileh vituei ni tiramue xil itel horamue nae xil. E ihiles ngan xil xa di lalong ras, mei lihusil suse na Hi xa momal. Xi isak ni moletin na Hi xil livue xat xil ve melengien xa Suv nae istal en.”

<sup>18</sup>Ma Sakaraea misis masxaxa ak bitene, “?Inou nihur horamue itep? Nikil neta xa obiteni minou itep? Ven nabe mometu ngamu e atou navan mun be tovolih.”

<sup>19</sup>E masxaxa bit rilomun ni mini bitene, “Inou Kavriel xa di nasoh sangas visal Hi. Xi misil nou tangan xa mei nihit mese ni longeongen hos ak minuk. <sup>20</sup>E vengan xa otake reitin ti e neta xa nabiteni, ma uhe vut. Onasepin ti ituxoh melengien xa holesok xil ak mei istal.”

<sup>21</sup>E melele xa Sakaraea da tamu e Nim Eo, vanut moletin tei ladatili e di lanemi labit, “?Veneh ma ba da be nousav?” <sup>22</sup>Melele xa Sakaraea mistal, misakras vasepin mi xil. Ma lakila xa Hi pisen neta tei mini. Xi misepin pisi mi xil nggo hen vengan xa be vut dat mak.

<sup>23</sup>E melele xa polien na Sakaraea bus e Nim Eo, xi dilomun be metimal nan. <sup>24</sup>Tavehi ti, atou nan Elsavet di ni tuvava. Ma xi minggus dat tim ba duxoh aveti nan be lim (5). <sup>25</sup>E biteni mi xi tasen bitene, “Bos xa taxeak Hi Suv dutou ni nou, xi misak ni nou ninave unoun ti pe met moletin xil.”

### Masxaxa Tei Bit Kila xa Lipas Iesu

*Luk 1:26-38*

<sup>26</sup>E melele xa aveti na Elsavet be tei e he sav (6), Hi misil masxaxa Kavriel be taon tahal Nasaret xa de provins tahal Kaleli. <sup>27</sup>Kavriel nggur sepinien tei tangan iha ihit mese ni mi ate maxoe tei, hisen Meri. Meri, latesikoe xole tuei xa ihur moletin tei, hisen Siosepe, xa nggo vatimol na Suv Toto Deved te tiamu. <sup>28</sup>Ma masxaxa ak mei mistal mi Meri e bitene mini bitene, “!Bos minuk! !Hi Suv memaal pupu ve xouk e bosei xouk ra atou sav xil tangan ituxol xatuk!”

<sup>29</sup>E melele xa Meri milonge mak, minexo pupu e di minem ves koute te sepinien ak. <sup>30</sup>Di, masxaxa biteni mi Meri bitene, “!Ulum nakan ti! Hi memaal pupu ve xouk, Meri. <sup>31</sup>Xouk uti ni tuvava tei e ulingi ihe horamue. Ti, uling hisen ihe ‘Iesu’.<sup>c</sup> <sup>32</sup>Xi ihe eilep tei xa likesi ni ‘Nat Hi xa de ut nesao’. E Hi Suv ipol ni mei ihe suv toto ixoni avu nan Deved xa te tiamu. <sup>33</sup>Mol Isrel xil liti pe hen ha vuma hoxalite teni ihe tovuol.”

<sup>34</sup>Meri biteni mi masxaxa bitene, “!Inou natakil ti mu tiramue! ?Sepinien nam mei istal minou itep?”

<sup>35</sup>Ma masxaxa bit rilomun ni mi Meri bitene, “Ninin Eo imei iti e xouk, e xeihen na Hi ikapis xol xouk. Ve rin ak, horamue xa upesi ihe horamue

---

<sup>c</sup> 1:31 Koute te his ‘Iesu’ be ‘Hi iteh meulien’.

eo, e likesi ni 'Nat Hi'. <sup>36</sup>?Okil tumahin Elsavet? Xi mun ihur horamue tei nan, tave ti neta xa xi be tovoli ngamu. !Reitin mak! Elsavet xa moletin xil labit be lumalum, taxeak, aveti nan be tei e he sav (6). <sup>37</sup>Mak, ma neta tovuol xa Hi misakras vapol ni.”

<sup>38</sup>Ma Meri biteni mi masxaxa bitene, “Namaal tangan nipol ni naha xa Hi Suv bit nipol ni. Bos tang istal minou ixoni ngan taxa osepin ni minou.” Di, masxaxa belingi ba.

### Meri ba Misao ni Elsavet

*Luk 1:39-45*

<sup>39</sup>Tavehi ti, Meri mea e mitemanon be metimal tei e vathu xil tahal Sudea. <sup>40</sup>Melele xa duxoh metimal ak, xi be tim sa Sakeraea xalu e mikes Elsavet. <sup>41</sup>E melele xa Elsavet milong rae Meri, tuvava nan nggelial e vangen. Ninin Eo bemei e Elsavet, <sup>42</sup>misak ni miki be nesao bitene, “!Tuxolxatien na Hi di minuk mili e atou sav xil e di mun mi tuvava xa de xoux! <sup>43</sup>?Veneh ma neta xa bos mak mikila vastal e nou, xa nine suv navan mikila bemei visal nou? <sup>44</sup>Vengan melele xa nalong rae nam, tuvava navan memaal e nggelial e nou. <sup>45</sup>Tuxolxatien na Hi di e xoux vengon xa oteneket xa sepinien na Hi istal minuk ixoni ngan xa tesepin ni minuk.

### Kikeien te Memesien na Meri

*Luk 1:46-56*

<sup>46</sup>Meri bitene,

“Inou, napet rat his Hi.

<sup>47</sup> Namaal pupu vengon xa Hi navan be Suv xa miteh meulien navan.

<sup>48</sup> Xi en tabong ni nou ti xa nabe atou votei tang te polien nan.

Xosali iha, moletin xil ngasen ti lihithiteni xa Hi tetuxol xat nou.

<sup>49</sup> Xi xa hisen be eo tepol ni holesok xil xa tellep minou texo xeihen nan.

<sup>50</sup> Xi en isa e ngan xil xa di lamerere ni,  
xil xa ladi taxeak e ngan xil xa ti limei itutou.

<sup>51</sup> Nggo xeihen nan, Hi pol ni holesok xil tellep,  
e di nggol rerat valkoai xil xa di laling xat lingxatien nae xil.

<sup>52</sup> Xi mileh rerat suv toto xil ra von xeihen nae,  
e pet rat moletin votei xil sung.

<sup>53</sup> Hi misak ni ngan xil xa di mae nggat xil, langga vin xil ni anien xa,  
e misil rerat ngan xil xa holesok nae holu, laka hon tang laba.

<sup>54</sup> Xi bemei misa tutouen mi horamue xil xa langgo Isrel xa labe moletin nan.

Xi minem xat naha xa tehit xati, xa ipisen esaeen nan mi xil.

<sup>55</sup> Xi di pol nggusil hitxatien xil xa tepol ni mi avu nar xil, mi Ebrahim e mi vatimol nan xil, mol Isrel xil.

Hitxatien ak misakras vavus.”

<sup>56</sup>E Meri de visal Elsavet aveti tol. Di, dilomun be tim.

### Poten na Sion

*Luk 1:57-66*

<sup>57</sup>Melengien bemei pipin xa Elsavet valing horamue nan, ma milingi be malahos. <sup>58</sup>Moletin sav xil xa ladi sangas visali del vatimol nan xil lalonge xa Hi Suv pol ni bos pupu mini, ma xil mun lamaal dela. <sup>59</sup>Melele xa melengien nan be tol e he sav (8), lamei tangan vahe vexaho. E labit laling his tamen, ‘Sakaraea’, vata en, <sup>60</sup>e Elsavet bit, “E-e! Hisen ihe ‘Sion’.”

<sup>61</sup>E xil labiteni mini labitene, “!His ak tovuol e vatimol nalu!” <sup>62</sup>Misak ni, lasak pisi di lasis Sakaraea ni he xil tang xa xi ien bei liling his eah en.

<sup>63</sup>E Sakaraea bit lasa neta tova xa vakila vatis en. Ma midis, “Hisen be Sion.” Xil vus lamesep pupu ven. <sup>64</sup>E melele nen tak, Sakaraea mikila vasepin rilomun, e di pet rat his Hi. <sup>65</sup>Moletin xil vus xa ladi sangas latemanin. Ma longeongen usil holesok xil ak mikapis e rute xil xa hu di en e Sudea. <sup>66</sup>Ngan xil vus xa lalong sepinien xil ak di lanemi xa tuvava ak imeul imei itep. Lakila xa xeihen na Hi di e meulien nan.

### Ninin Eo Mei Polu e Sakaraea

*Luk 1:67-80*

<sup>67</sup>Ninin Eo bemei e Sakaraea ma xi bitehiteni bit,

<sup>68</sup>“Rimes Hi Suv na moletin xil tahal Isrel.

Xi pol ni suse tangan moletin nan xil mei vexil vamase.

<sup>69</sup>Hi isa ‘Moletin teteh meulien en’ xa nggur xeihen, mi xir.

Xi ixo vatimol na Deved xa tehe moletin na Hi.

<sup>70</sup>Hi tehit xati texo provet eo xil te tiamu,

<sup>71</sup> xa isa ‘Moletin teteh meulien en’ imei,

ileh rat xir ra he moletin xil xa di laketeh misa ni xir.

<sup>72</sup>Xi tehit xati mun xa ipisen esaeen nan mi avu nar xil,

e minem xat hitxatien eo nan

<sup>73</sup> xa tepol ni tetel avu nar Ebrahim tetel sepinien tei xa nggeih.

<sup>74</sup>Hi tehit xati xa ileh rat xir ra he ngan xil xa di laketeh misa ni xir, tangan melele xa ranggusil Hi, ulixir nakan ti e,

<sup>75</sup>e mikila riti e meulien tei xa ihe eo e imal e pe met Hi,

e melengien xil vus te meulien nar.”

<sup>76</sup>Di, xi biteni mi tuvava nan bitene,

“E xouk, natuxuli, likesuk lihit obe provet tei na Hi xa be nesao.

E xouk utiamu ni Suv ha ti usak mese ni suse nan.

77 Upisen ni mi moletin nan xil xa Hi iteh meulien nae e naketeh ti mun nasa mi xil.

78 Eheien e esaean polu en.

Xi isa ‘moletin te teh meulien en’ mei istal mi xir, ixoni eai xa mistal bemei nesao.

79 Xi ileluv xol ngan xil xa ladi ut te maluxoluk e di uli mikan ni maten;

e ileluv mun tengan ipisen suse te tomat mi xir tengan rihusili.”

80 Horamue ak meul, mei ven nggeih, e xeihen na Ninin Eo mei polu en. E melele xa xi be tiramue, xi da tasen e uruvuol be duxoh melengien xa xi pol kokot ni polien nan del moletin xil tahal Isrel.

### Iesu Tepot e Ut Etan

*Luk 2:1-7*

**2** <sup>1</sup>Vatei, e melele xa Okastas tehe Sisa<sup>d</sup> tahal Rom, tesa rae nan teha mi moletin xil e ut ngasen xa xi telaxati. Xi misa sepinien bit moletin nan xil lava, lavuli moletin xil ngasen, e latis xat hise vati vanuvei nan. <sup>2</sup>Ngan ak tehe pupuluken kokot vari xa latepol ni e melele xa Karinias tehe eilep te kavmen tahal Siria.

<sup>3</sup>Misak ni, moletin xil ngasen latetilomun latehe metimal xati na vatimol nae, be latesa hise en. <sup>4</sup>E melele nen ak, Siosep mea, reling Nasaret, metimal nan xa de provins tahal Kaleli. Di, nggur suse tengan vahe Betlehem xa de provins tahal Sudea, vengan xa Betlehem be metimal xati na Suv Toto Deved, e xi be vatimol tei nan.

<sup>5</sup>Siosep minggur Meri lube Betlehem, vengan xa hitxatien tei da xole tuei xa ihuri ihe atou nan. Meri di tuei e navehi ti iling tuvava. <sup>6</sup>Melele xa ludi Betlehem, melengien nan pipin xa valing tuvava. <sup>7</sup>Xalu luteti im ma vongoro xil vengan xa von toen sav tovuol mun xa laloti en. E inggak, Meri miling muimol nan xa be malahos. Pis xole ni kaliko tei, di milingi pat e von anien na vongoro xil.

### Moletin Xil xa Di Lalaxat Sipsip Xil Lalong Longeongen Hos

*Luk 2:8-20*

<sup>8</sup>E vongien nen tak, rut moletin xil di lalaxat sipsip xil e ut tei xa be valkesao sangas ni Betlehem. <sup>9</sup>Vatakes, masxaxa tei na Hi Suv bemei mistal, e miehena na Hi mileluv xol xil. Xil latemanin e uli mikan. <sup>10</sup>E masxaxa biteni mi xil bitene, “Ulimim nakan ti! Namei del longeongen hos tei xa isak ni moletin xil ngasen lihesi xil. <sup>11</sup>E xosali tang, e Betlehem, metimal na suv toto Deved, moletin te teh meulien en pot tuei,

<sup>d</sup> 2:1 ‘Sisa’ nggoni suv toto tei xa mili suv sav xil. Moletin xil tahal Rom labit xi nggoni hi tei vengan xa xeihen nan mahulong pupu.



xi be Suv Kristo xa Hi tehit xati xa isa ni imei. <sup>12</sup>Suse xa mupus kila en imak: mukamet tuvava tei xa lapis xole ni kaliko tei e lalingi pat de von anien na vongoro xil.”

<sup>13</sup>Vatakes, vanut masxaxa tei na Hi xa mahulong langgo ut nesao mei lastal del xat ngan xa da, e di lapet rat his Hi labitene,

<sup>14</sup>“Merereen mi Hi  
xa de ut nesao,  
e ut etan tomat iti  
mi moletin xil ngasen  
xa Hi memaal ve xil.”

<sup>15</sup>Melele xa lakikei bus, masxaxa xil laling xil e ladilomun labe ut nesao. Di, moletin xil xa di lalaxat sipsip xil lasemin xil labitene, “Rave Betlehem, rava rapus ti neta xa Hi Suv biteni mi xir.” <sup>16</sup>Ma xil latemanon, laba lakamet Meri del Siosep, e lapus tuvava nalu xa lulingi pat de von anien na vongoro xil.

<sup>17</sup>Melele xa moletin xil ak lapus tuvava Iesu, labit usil sepinien xa masxaxa tehiteni mi xil usil tuvava ak mi xalu. <sup>18</sup>Moletin xil vus xa lalonge lamesep ni sepinien nae. <sup>19</sup>E Meri miling kuh holesok xil xa di testal di nenemien nan, e vehakut di minem usili.

<sup>20</sup>E melele xa moletin xil xa di lalaxat sipsip ladilomun, xil di lamerere ni Hi e lapet rat hisen ve holesok xil xa latelonge e latepusi. Xil ngasen texoni sepinien xa masxaxa tehiteni mi xil.

### Laling His Iesu

*Luk 2:21*

<sup>21</sup>Melengien tol e he sav (8) mitavi, Iesu be vexaho nggusil sexien na Siu xil. Di, luling hisen be ‘Iesu’ nggoni xa masxaxa tehiteni mi Meri melele xa tehit xati mini xa ita iling tuvava tei.

### Siosep xal Meri Lunggur Tuvava Iesu Be Nim Eo na Hi

*Luk 2:22-24*

<sup>22-24</sup>Melengien hanutap lu (40) mitavi, Meri mei mese nggoni Rae xil na Mosis tehiteni.<sup>e</sup> Misak ni, xal Siosep, lube Nim Eo e Serusalem, e luleh mae lu tangan ihe sanien<sup>f</sup> nalu mi Hi. E melele nen ak, lunggur

---

<sup>e</sup> 2:22-24 Rae xil na Mosis: E sexien na Siu xil, atou xa miling tuvava tei tehe temu e pe met Hi ve ra te pesisen. Misak ni, xi ite tim ituxoh melengien ihe hanutap lu (40). Ti, imei imese rilomun e ihur sanien tei iha mi Hi (Lev 12:1-8). <sup>f</sup> 2:22-24 Sanien: Rae xil na Mosis bit lalisa sulut sipsip tei itel mae tei. E xosxa atou ak be hoeo, ma mikila isa mae lu tang (Lev 5:11).

tuvava Iesu mun tangan ha lalilingi e pe met Hi Suv ixoni ngan taxa Rae na Hi Suv tehiteni tehite, “Muimol xil ngasen xa labe horamue, lihe horamue<sup>g</sup> eo na Hi Suv.”

**Momatu Simeon Pet Rat His Hi ve Tuvava Iesu**

*Luk 2:25-35*

<sup>25</sup>E melengien nen ak, moletin tei tete Serusalem, hisen Simeon. Sexien xil nan momal e xi ien bei Hi. Ninin Eo polu en. Xi di datil melengien xa Hi isa tei xa mei ileh rerat mol Isrel xil ra he kavmen sav xil mei vexil imase. <sup>26</sup>Ninin Eo tehiteni mini xa xi namat ti ituxoh melele xa ipus Kristo xa Hi Suv tehosei.

<sup>27</sup>E melele xa Meri xal Siosep lunggur Iesu be Nim Eo tangan lalopol ni mini vaxoni naha xa Rae na Hi tehiteni,<sup>h</sup> Ninin Eo mun tehiteni mi Simeon tangan ihe Nim Eo. <sup>28</sup>E melele xa Simeon pus xatel, xi po xat tuvava Iesu e pet rat his Hi bitene,

<sup>29</sup>“Suv, inou nabe moletin te polien nam tang.

E taxeak, ukila umae ni nou nimat itel tomat,  
vengan xa hitxatien nam mistal tuei minou.

<sup>30</sup>Inou napus horamue ak tuei ni metok  
xa iteh meulien e moletin nam xil.

<sup>31</sup>E upol ni moletin xil tahal ut xil ngasen lipusi.

<sup>32</sup>Xi ixoni laet tei xa isak ni ngan xil xa latave Siu ti,  
lipus kil xouk e limerere ni xouk.

E miehén nan ipol ni moletin nam xil tahal Isrel lileluv tangan  
mosav xil lipusi.”

<sup>33</sup>Melele xa Simeon biteni mak, tame Iesu xal ninen lumesep pupu.

<sup>34</sup>Di, xi misa tuxolxatien mi xatel e biteni mun mi Meri bitene, “Tuvava nam ak ipol ni moletin hao tahal Isrel likiri, e rute xil lisoh. Tuvava ak xa nggo Hi, rut moletin xil lisep sisin ni. <sup>35</sup>Xi isak ni nenemien nae xa minggus imei kesao. E naha xa istal itutou, isak ni xouk mun ulonge isa, ixoni ngan xa tiei misi vin meulien nam.”

**Provet Anna Mitumul Usil Tuvava Iesu**

*Luk 2:36-38*

<sup>36</sup>E melele nen ak, provet tei de Nim Eo na Hi, hisen Anna. Xi be nat Vanuel xa be vatimol na pris Aser, e be tovolih ngamu. Melele xa tehe ate

---

<sup>g</sup> 2:22-24 *Horamue*: Eks 13:2,12    <sup>h</sup> 2:27 E Eks 13:15, Hi biteni bit muimol xil ngasen lihe nan vengán xa xi tenavas xil ti e Isip. Mak, ma e aveti kokot nan, tata e nana xil lixal rat muimol nae xil ra Hi ni ‘sekel’ ihe lim (5) xa be mani xa lapol ni nggo silva.

maxoe, teteli, e hram lu e he sav (7) tang mitavi, tiramue nan mat. <sup>37</sup>Ma xi tehe tunau ba vuma ... hram nan be hanutap hat e hat e he tei (84). E melengien xil ngasen, makoe be duxoh vongien, xi di mot mi Hi e Nim Eo, di misis e di bal ni anien ven.

<sup>38</sup>E melele xa Siosep xal Meri ludi tamu e Nim Eo del tuvava Iesu, Anna bemei vis xatel e memes Hi ven. Dutou ni, xi di mitumul usil tuvava ak mi moletin xil ngasen xa di ladatil Hi tangan mei vapol ni Siu xil tahal Serusalem e tahal ut sav xil mun vexil vamase.

### Latdilomun Latbe Nasaret

*Luk 2:39-40*

<sup>39</sup>Melele xa Siosep xal Meri lupol sen naha xa Rae na Hi Suv tehiteni, xatel latdilomun latbe Nasaret, metimal natel xati, xa de Kaleli. <sup>40</sup>E tuvava Iesu di matu, e ven mei nggeih. Xi di pol del metisouen, e tuxolxatien na Hi di en.

### Horamue Iesu Be Nim Eo na Hi

*Luk 2:41-52*

<sup>41</sup>E hram xil ngasen, tame Iesu xal ninen di lube Serusalem tangan lalopol ni Anien te Tavien en. <sup>42</sup>Ma melele xa hram na Iesu be lu e le (12), xatel vus, latoba nggoni ngan taxa di latoba vehakut ve anien ak. <sup>43</sup>Melele xa Anien te Tavien mei mitavi, tamen xal ninen lunggur suse ludilomun, e lutakil ti vari xa Iesu da nga Serusalem. <sup>44</sup>Xalu lunemi lubit di nggusil mosav xil e vanut moletin xil xa ludi en. Ma lukakao melengien tevi tei, di, lulang vesi sung. <sup>45</sup>E melele xa lutakameti ti visal vatimol nalu xil, xalu ludilomun lube Serusalem tangan lalolang vesi en.

<sup>46</sup>Melengien tol mitavi, lukamet horamue Iesu, dotan de Nim Eo, di miteong ni tisa xil te rute ak, e di misis pilei xil. <sup>47</sup>Xil vus xa lalonge, lamesep ve kilakilen nan e sepinien xa di misa rilomun ni mi tisa xil.

<sup>48</sup>Melele xa lukameti, lutemanin. Ma ninen biteni mini bitene, “?Natuxuli, veneh ma opol ni mak mi xamel? Opol ni xamel manexo pupu, e di malang vesuk e ut ngasen.”

<sup>49</sup>E Iesu bit rilomun ni mi xalu bitene, “?Mullang ves nou veneh? ?Multakil ti xa inou ti nite nim na Tata navan?” <sup>50</sup>E xalu lutakil ti koute te sepinien nan.

<sup>51</sup>Ma Iesu dilomun be Nasaret del xalu, e di miteong ni xalu. E ninen dit minem xat holesok ngasen xa testal mi xatel.

<sup>52</sup>Horamue Iesu di matu, e ven mei nggeih, e polu ni metisouen. Ngan ak misak ni Hi, del moletin xil mun, di lamaal ven.

### Setutuen na Sion xa Di Mikas Moletin Xil

*Luk 3:1-20*

**3** <sup>1</sup>E melele xa Taeberius tehe Sisa tahal Rom duxoh hram le tei bus (15), moletin hat iaxa di latetutou ni lelatxatien nan: Herot Antipas

tehe suv toto tahal Kaleli; tunali Pilip, tehe suv toto tahal Ituria tetel Trakonaetas; Lisantias tehe suv toto tahal Abilin; e Pontias Paelet tehe vat te kavmen tahal Sudea. <sup>2</sup>E melele nen ak, Anas xal Kaeapas lunggur polien te Vatixar na pris xil.

E melele ak, Hi misa sepinien tei mi Sion, nat Sakaraea, e uruvuol. <sup>3</sup>Ma Sion mikakao e ut ngasen xa di sangas visal Oeisal Sodan e di misetu mi moletin xil bitene, “!Muhiles meulien namim ra tesaen! Ti, mei nikas xamim tangan ipisen ni mi moletin xil xa Hi iketeh ihos mi xamim!”

<sup>4</sup>Provet Aesea tetis usil setutuen na Sion e melele xa tehiteni tehit,

“E uruvuol, moletin tei di miki,  
‘Musak mese ni suse na Hi Suv;  
muserep suse nan.

<sup>5</sup> Mutihin sesale xil,  
e muhil lenen hu xil.

Mumal ni suse xil xa mikavui,  
e mutihin suse xil xa misa.

<sup>6</sup> !E moletin xil vus lipus xeihen na Hi  
xa mei iteh meulien e xil!”<sup>i</sup>”

<sup>7</sup>Moletin xil holu lamei tangan Sion vakas xil e oei, e xi biteni mi xil bitene, “!Xamim munggoni vanut tetal tesa xa di langas vin moletin ni vulongel! ?Visi bit xamim mukila mulesae ra longpangasien xa Hi isa ni imei? <sup>8</sup>Mupol ni sexien xil xa ipisen ni xa mubles meulien namim reitin. E ti munahiteni ti munahit Ebrahim be avu namim, ma Hi ti imaal ve xamim vehakut. !E-e! Nabiteni mi xamim, Hi mikila vahiles hat xil ak mei laxoles xamim e lave vatimol na Ebrahim xil. <sup>9</sup>Akis mese tuei da tangan itei amulut vatiei xil ngasen xa tataxao kuhi ti. Hi itei xotehi e iso ni ihe upang.”

<sup>10</sup>E moletin xil ak lasis Sion, “?Ma xamem mupol ni naha vari?”

<sup>11</sup>Sion biteni mi xil bitene, “Xosxa tei xamim eising nan lu, ma isa tei mi mosav xa nan tovuol. Xosxa anien amim di, ma musa rute mi mosav xil.”

<sup>12</sup>Di, moletin xil xa di laleh vatu te takis lamei tangan vakas xil, e xil lasis Sion labit, “?Tisa, xamem muhiles meulien namem itep?”

<sup>13</sup>Ma Sion biteni mi xil bitene, “Munaleh vatu te takis ti nali naha xa rae mae ni.”

<sup>14</sup>E rut moletin xil te vaeen mun lasisi labit, “?E itep mi xamem? ?Xamem muhiles meulien namem itep?”

Ma Sion biteni mi xil bitene, “Munaxeih xat moletin xil ti tangan lasa vatu mi xamim. E munahur ti vatu naxo suse xa muluvos mosav e kot en. Mulonge ihos tang ve vatu xa di mungguri.”

<sup>i</sup> 3:6 Aes 40:3-5

<sup>15</sup>Xil ngasen labesi xil, e di lanem vesi labit, “Xos Sion iaxa be Kristo xa Hi tehit xati tehit imei mi xir.”

<sup>16</sup>Misak ni Sion bit rilomun ni mi xil bitene, “Nikas xamim ni oei tang. E tei xa itutou imei, ihur xeihen mu ili nou. E inou natapin ti xa nalal rat sandel nan. Xi ikas e xamim ni Ninin Eo e ni upang<sup>j</sup> <sup>17</sup>Xi bue xat xi tangan valepis moletin xil ngasen, ixoni moletin xa di po savel tangan vaseti utut uit ra valite. Utut uit xa bos, ileh xati iha ihe e nim teni; e valite, iso ni ihe upang xa misakras vamat.” <sup>18</sup>E sexien nen tak, Sion misetu ni longeongen hos mi moletin xil e misel xat xil tangan lihiles meulien nae.

### Suv Toto Herot Miling Sion e Nim te Xeih

*Luk 3:19-20*

<sup>19</sup>Di, Sion sepin nggeih mun mi Suv Toto Herot vengon xa tehur atou na tunali tehe atou nan, hisen Herotias. E Sion di tehithiten holesok hao mun xa tamal ti xa Herot tepol ni. <sup>20</sup>Misak ni, Herot pol ni neta tei xa misa pupu mili sexien sav xil nan, xi biteni mi moletin nan xil tangan lital xat Sion e lilingi e nim te xeih.

### Sion Mikas Iesu ni Oei<sup>k</sup>

*Luk 3:21-22*

<sup>21</sup>Melele xa Sion di tamu mikas moletin xil, xi mikas Iesu mun ni oei. E melele xa Iesu di misis, tilang hat misaha. <sup>22</sup>Ninin Eo bemei e tan nggoni mae, mei dotan en. E rae tei nggo ut nesao bitene, “Xouk obe natuxuli reitin e eheien navan di e xouk. Inou, namaal pupu ve xouk.”

### Avu Xil te Vatimol na Iesu

*Luk 3:23-38*

<sup>23</sup>Melele xa Iesu tepol kokot ni polien nan, hura nan tehe hanutap tei e hexalu mun (30). Xil vus lanemi labit xi be nat Siosep. E avu na vatimol na Siosep xil, hise xil temak:

Siosep tehe nat Heli, <sup>24</sup>xa tehe nat Matat, xa tehe nat Livae, xa tehe nat Melki, xa tehe nat Sanae, xa tehe nat Iosep, <sup>25</sup>xa tehe nat Matataeas, xa tehe nat Amos, xa tehe nat Neham, xa tehe nat Esli, xa tehe nat Nanggae.

<sup>26</sup>E Nanggae tehe nat Mahat, xa tehe nat Matataeas, xa tehe nat Semein, xa tehe nat Sosek, xa tehe nat Soda, <sup>27</sup>xa tehe nat Soanan, xa tehe nat Resa, xa tehe nat Serubabel, xa tehe nat Seltiel, xa tehe nat Neri.

<sup>28</sup>E Neri tehe nat Melki, xa tehe nat Adi, xa tehe nat Kosam, xa tehe nat Elmadam, xa tehe nat Er, <sup>29</sup>xa tehe nat Sosua, xa tehe nat Eliesar, xa tehe nat Sorim, xa tehe nat Matat, xa tehe nat Livae.

---

<sup>j</sup> 3:16 Upang ak ia moten ngan xil xa langgusil Iesu, e ia pangas ngan xil xa latahusil xi ti.

<sup>k</sup> 3:20-21 Matbiles tumulen ak be diamu ni Luk 3:19-20 vengon xa testal diamu ni melele xa Sion be nim te xeih.

<sup>30</sup>E Livae tehe nat Simeon, xa tehe nat Sudah, xa tehe nat Siosep, xa tehe nat Sonam, xa tehe nat Eliakim, <sup>31</sup>xa tehe nat Melea, xa tehe nat Mena, xa tehe nat Matataha, xa tehe nat Netan, xa tehe nat Deved.

<sup>32</sup>E Deved tehe nat Tiese, xa tehe nat Ovet, xa tehe nat Boas, xa tehe nat Salmon, xa tehe nat Nason, <sup>33</sup>xa tehe nat Aminatap, xa tehe nat Atmin, xa tehe nat Arni, xa tehe nat Hesron, xa tehe nat Peres, xa tehe nat Sudah.

<sup>34</sup>E Sudah tehe nat Siakop, xa tehe nat Aesak, xa tehe nat Ebrahim, xa tehe nat Terah, xa tehe nat Nahor, <sup>35</sup>xa tehe nat Seruk, xa tehe nat Rehu, xa tehe nat Pelek, xa tehe nat Eber, xa tehe nat Sela.

<sup>36</sup>E Sela tehe nat Kenan, xa tehe nat Arpaksat, xa tehe nat Sem, xa tehe nat Noah, xa tehe nat Lamek, <sup>37</sup>xa tehe nat Metusela, xa tehe nat Inok, xa tehe nat Saret, xa tehe nat Mahalalil, xa tehe nat Kenan,

<sup>38</sup>E Kenan tehe nat Enos, xa tehe nat Set, xa tehe nat Adam, xa tehe nat Hi.

### Temat Misak Pis Iesu

#### *Luk 4:1-13*

**4** <sup>1</sup>Melele xa Iesu dilomun ra Oeisal Sodan, xeihen na Ninin Eo xa tepolu en, midela be uruvuol. <sup>2</sup>E rute ak, Temat di misak pis Iesu melengien be hanutap lu (40). E melele nen ak, xi taxanien ti, ma melele xa melengien xil ak mei mitavi, Iesu mae nggati.

<sup>3</sup>Mak, ma Temat biteni mini bitene, “Xosxa xouk obe Nat Hi reitin, ma uhiles hat xil ak mei lihe beret.”

<sup>4</sup>E Iesu bit rilomun ni mini bitene, “Vanuvei na Hi biteni bit, ‘Moletin misakras vameul e anien kestang.’”<sup>l</sup>

<sup>5</sup>Di, Temat nggur Iesu be nesao e vat hu tei, e vatei takeres, xi pisen ut xil ngasen te ut etan mini. <sup>6</sup>Temat biteni mini bitene, “Niling xouk uhe suv toto xa ulaxat ut xil ak; e holesok xil vus te ut etan, nisa ni minuk. Vengan xa holesok xil vus ak di e heok, e inou, nikila nisa ni mi moletin eah xa ieok bei nabit nasa ni mini. <sup>7</sup>Xosxa umot minou tang, ma nisa sen holesok xil ak minuk.”

<sup>8</sup>E Iesu bit rilomun ni mini bitene, “Vanuvei na Hi biteni bit, ‘Umot mi Hi Suv nam, e upol mini kestang.’”<sup>m</sup>

<sup>9</sup>Di, Temat nggur Iesu be Serusalem e ba milingi misoh e taep te Nim Eo na Hi xa be nesao pupu. Di, biteni mini bitene, “Xosxa obe Nat Hi reitin, hut he tan. <sup>10</sup>Vengan xa Vanuvei na Hi biteni bit,

‘Hi isa masxaxa nan xil limei lihur xolok.

<sup>11</sup>Xil lipo xatuk tangan onasip hat ti.’”<sup>n</sup>”

<sup>l</sup> 4:4 Dut 8:3    <sup>m</sup> 4:8 Dut 6:13    <sup>n</sup> 4:11 Sam 91:11-12

<sup>12</sup>E Iesu bit rilomun ni mini bitene, “Vanuvei na Hi biteni mun bitene, ‘Onasak pis Hi ti xa be Suv nam.’<sup>o</sup>”

<sup>13</sup>Melele xa Temat misak pisi e rin xil vus, xi be ling Iesu vuteili.

### **Polien Kokot na Iesu**

*Luk 4:14-15*

<sup>14</sup>Iesu dilomun be Kaleli e polu ni xeihen na Ninin Eo. Longeongen teni mikapis e ut ngasen. <sup>15</sup>Xi ba di pispisi mi moletin xil e nim tepispisien na Siu xil, e xil di lamaal ve sepinien nan.

### **Moletin Xil Tahal Nasaret Lasin Iesu**

*Luk 4:16-30*

<sup>16</sup>Di, Iesu dilomun be Nasaret e rute xa tematu en. E Sabat, xi be nim tepispisien nggoni ngan taxa di pol vehakut ni. E melele xa mea misoh tangan xa vavuli Vanuvei Eo, <sup>17</sup>xil lasa Vanuvei na provet Aesea mini. Xi vuli bit,

<sup>18</sup>“Ninin Eo na Hi Suv bemei e nou,  
vengan xi tehosei nou tangan nihit longeongen hos nan mi ngan  
xil xa labe hoeo.

Xi misa nou namei tangan mamiteni mi moletin xil  
xa ladi nim te xeih, ha vexil vamase.

Nipol ni ngan xil xa mete bar mei liketeh rilomun.

Nileh rerat ngan xil ra he mosav xil xa di lapurun xil.

<sup>19</sup>E nihithiteni xa Hi Suv tehosei melele ak  
tangan itutou ni moletin nan xil en.”<sup>p</sup>

<sup>20</sup>Iesu boh xol vanuvei, di misa rilomun ni ba mi moletin xa di dutou e nim ak, e dotan. Moletin xil ngasen xa lateti, lale mah xat Iesu. <sup>21</sup>Di, xi biteni mi xil bitene, “Vanuvei Eo na Hi xa mutelonge inou di nabuli, taxeak tang sepinien teni mei be reitin.”

<sup>22</sup>Moletin xil vus lamesep ve pispisien xil xa bos xa di misa ni e lamaal ven. Xil di lasep usili labitene, “!Ei! ?Tave nat Siosep ti tang iaxai?”

<sup>23</sup>Iesu bit rilomun ni mi xil bitene, “Nakila xa lihiteni minou sepinien matu tei xa bitene, ‘Tokta, uhur rat meseien ra xouk.’ Iemim bei nipol inggak, e metimal xati navan, holesok xil vus xa mutelonge di natepol ni e metimal tahal Kapaniam tangan muke reitin e nou. <sup>24</sup>E nabiteni reitin mi xamim, provet tovuol tamu xa moletin xil te metimal xati nan ti lavur pilei. <sup>25</sup>Te tiamu, e melele na provet Ilaetsa, us tenamus ti huram tehe tol e rute,<sup>q</sup> e moletin xil vus mae teat xil. E Isrel, tunau xil latehe holu, <sup>26</sup>e Hi misil Ilaetsa mika kes tang ve tunau tei xa tave tahal Isrel ti. Xi de metimal tahal Sarevat<sup>r</sup> sangas ni Saedon. <sup>27</sup>Teimun, e melele na provet

sav Elisa, moletin holu tahal Isrel langgur meseien leporsi. E Elisa tenapol ni ti tenbe xil vamelese, xi tepol ni mi Neman tahal Siria kestang xa tave tahal Isrel ti.”<sup>s</sup>

<sup>28</sup>Melele xa moletin xil xa ladi nim tepispisien lalong sepinien nan, xil vus iexil mikati ven. <sup>29</sup>Ma latamea, lameru xati e langgol rati ra metimal nae. Lalihi labe seri meteh xa de sangas visal metimal nae, vengam labit litivin rat Iesu vamot vahe tan en. <sup>30</sup>E Iesu mitamea, mikakao nggo hilaep te vanut moletin xil ak, e be reling xil ba.

### Moletin Tei xa Ninin Tesa Da En

*Luk 4:31-37*

<sup>31</sup>Di, Iesu be metimal tahal Kapaniam xa de Kaleli. E rute ak, Iesu di pispisi mi moletin xil e Sabat. <sup>32</sup>Moletin xil ak lamesep vengam xa sepinien nan momal e lakila xa xeihen da en. <sup>33</sup>E melele nen ak, moletin tei xa ninin tesa da en de e nim te pispisien. Xi miki nggeih xat Iesu bitene, <sup>34</sup>“!Ei, Iesu ngan Nasaret! ?!Osak ni naha mi xamem!? ?Omei inggak tangan omu vin xamem? !Inou nakilak, xouk obe Moletin Eo na Hi!”

<sup>35</sup>Iesu misel nggeih ba ni ninin tesa ak bitene, “!Ta votei, e he reling moletin ak!” Ninin tesa bas tan ni moletin ak pe met moletin xil vus. Di, be lingi e tasa ti mun pangasien mini.

<sup>36</sup>Moletin xil vus lamesep e di lasis xil mun labitene, “?Hisit pispisien eah xiak? !Moletin ak di misepin del xeihen, e melele xa misepin nggeih mi ninin tesa xil, lateong ni e labe reling moletin xil!” <sup>37</sup>Ma longongen usil Iesu mikapis ut ngasen sangas ni Kapaniam.

### Iesu Mileh Rerat Meseien ra Moletin Holu

*Luk 4:38-41*

<sup>38</sup>Melele xa Iesu be reling nim te pispisien, xi be tim sa moletin tei tahal Kapaniam, hisen Saemon Pita. Melele xa duxoh tim, xil mei labit mese ni mi Iesu xa avu atou kokon na Saemon Pita mesei, ven minggan pupu. <sup>39</sup>Ma Iesu be visali e misel xat meseien bit, “!He relingi!” Vatakes, atou ak milonge bos, ma xi mea, be pol ni anien ae.

<sup>40</sup>E mahis, melele xa Sabat bus e moletin xil lakila lapol rilomun, moletin xil hao laleh tua nae xil xa lamesei, lamei vis Iesu. Xi miling hen e xil kekes e xil vus mei lalonge bos. <sup>41</sup>E melele xa Iesu nggol rerat ninin tesa xil ra moletin xil hao, xil di lamuis kei ba ni Iesu labitene, “!Xouk obe Nat Hi reitin!”

E xi misep xol xil tangan linasepin ti vengam lakila xa xi be Kristo xa Hi tehosei.

<sup>s</sup> 4:27 2Ki 5:1-14



### Iesu Di Pispisi e Nim Te Pispisien Xil

*Luk 4:42-44*

<sup>42</sup>E visuvong nen, e makoe roroh, Iesu be rute tei xa be uruvuol tangan xa ha vata sen en. E moletin hao te rute ak lamei lalang ni. Melele xa lakameti, xil lasak pisi lake xati tangan nave reling xil ti. <sup>43</sup>E Iesu biteni mi xil bitene, “Moletin xil te rute sav xil mun likila lilong longeongen hos xa Hi imei ihe suv toto te meulien na moletin xil. Ve rin ak iaxa, Hi tesa nou ven namei.”

<sup>44</sup>Ma xi nggulehi dit pispisi usil longeongen hos na Hi e nim te pispisien xil e rute xil ngasen e provins tahal Sudea.

### Iesu Mikes Kokot ni Moletin Hat xa Ti Lihusili

*Luk 5:1-11*

**5** <sup>1</sup>Vatei, Iesu misoh de suhon te Oei Kaleli sangas ni Keneseret e moletin xil labe holu pupu. Lamei lating xati tangan lalong ti sepinien na Hi. <sup>2</sup>Sangas e ut, Iesu mipus tuturil lu na moletin ngan xil te sar meseo en xa lateling xalu ludi. Moletin nen xil laba lakas moten net nae xil. <sup>3</sup>Di, Iesu peou be tuturil tei, xa be na Saemon Pita, e misisi tangan vativini valis luvoluv vahe ling ut. Di, Iesu dotan de tuturil ak, e di mipispisi mi moletin xil xa ladi ut.

<sup>4</sup>Melele xa Iesu misetu mi xil bus, di misepin mi Saemon Pita bitene, “Xamitel, tohalis ni tuturil valis vahe huinep, e mutistokovein net namitel ihe tan tangan mutsar ti meseo xil.”

<sup>5</sup>E Saemon Pita bit rilomun ni mi Iesu bitene, “Suv, e vongien, matbilao tova tang e mataxur ti meseo vari. E vengon xa obiteni minou mak, ma bos tang, matiso net namatel ihe tan.” <sup>6</sup>E melele xa xatel latso net be tan, meseo xil holu mei laba en vuma ... sangas langgur papas net. <sup>7</sup>Ma latokei ba ni tua natel xil xa ladi e tuturil sav mun tangan mei litutou ni xatel. Ma lamei lase tuturil xalu vus ni meseo vuma ... polu tova tang, sangas xa ti lalomarir. <sup>8</sup>Melele taxa Saemon Pita pusi mak, mot be tan mitingeiril pe met Iesu e biteni mini bitene, “!Suv, onamei ti sangas visal nou! Inou nabe moletin tesa tang.” <sup>9</sup>Pita biteni mak vengon xa xi del ngan xil vus xa ladi visali lamesep ni vanut meseo xa latesar xil.

<sup>10</sup>Xalu xa lupol del Saemon Pita, hisealu Temis e Sion xa lube nat Sepeti, xalu mun lumesep. E Iesu biteni mi Saemon Pita bitene, “!Ulum nakan ti! Taxeak iha, onasar kes ti meseo tang, e ti usar moletin xil mun.”

<sup>11</sup>Ma lalihi tuturil nae be ut, lastokovein holesok nae xil di, e laba langgusil Iesu.

**Iesu Dal Rat Moletin Tei Ra Meseien Leporsi<sup>t</sup>**

*Luk 5:12-16*

<sup>12</sup>Vatei, Iesu temei tehe taon tei. E rute ak, moletin tei da en, meseien lepori tehas pupu ni. E melele xa moletin ak pus Iesu, bemei visali e mot mitingiril be tan pe valnaon. Xi midak kesi bitene, “!Suv, xosxa iem bei, xouk okila opol ni veok vamemese!”

<sup>13</sup>Ma Iesu misa hen ba duxoli, e bitene, “!eok bei napol ni. !Vem imase!” Vatei takes, meseien nan bus, relingi vari. <sup>14</sup>E Iesu misepin nggeih ba ni bitene, “Onahithiteni ti mi mosav xil, e uha mu, upisen xouk mi pris tova xa de Nim Eo tangan ipus kuh tenbom. Ti, usa sanien eo nam mini ihusil naha xa Rae xil na Mosis tehiteni.”<sup>u</sup> Imak, ma moletin xil ngasen likila xa meseien nam bus, omemese ngamu.”

<sup>15</sup>Mak toma, e longeongen usil naha xa Iesu pol ni di kapis miloh be ut sav xil mun. Ma, vanut moletin xil holu lamei tangan xa ti litaeong ni pispisien nan e ti ileh rerat meseien ra xil. <sup>16</sup>E vehakut, Iesu milang ni ut ngan tangan ha ti ita sen en e ti isis.

**Iesu Pol ni Moletin Tei xa Rut Tenben Temat Mikakao**

*Luk 5:17-26*

<sup>17</sup>Melengien tei, Iesu di mipispisi mi moletin xil, e rut Parasi xil del tisa xil te Rae xil na Mosis mun latexo rut ut ngan xil e provins tahal Kaleli, e hal Serusalem e rut ut ngan mun e provins tahal Sudea. Xil ak mei latotan e di lataeong ni Iesu. E xeihen na Hi Suv bemei nggeih mu e Iesu tangan mikila di mileh rerat meseien ra moletin hao. <sup>18</sup>E melele nen ak, moletin ngan xil lamei lapo tei xa rut tenben mat de von paten nan. Lasak pisi lapoe vahe nim tangan vaha lalingi pe met Iesu. <sup>19</sup>E vengan xa vanut moletin xa de nim nggonaxon pupu, lasakras lave sangas visal Iesu. Mak toma, lapoe lapeou labe hilim nesao, ladal rerat rut hilim ak, e lapol ni mesal en. Di, lasae ni moletin ak del von paten nan nggo en, ba vari de hilaep te moletin xil, momal pe met Iesu. <sup>20</sup>Melele taxa Iesu mile kil neketen na termali, biteni mi moletin ak bitene, “!Tua, xosali, nakas moten met Hi ve tesaen nam tangan iketeh ihos rilomun ni xouk.”

<sup>21</sup>Melele xa Parasi xil del tisa xil te Rae xil na Mosis lalonge mak, di laseputut ni labitene, “!Ei! ?!Moletin ak di bit xi pipin mi Hi!? Hi kestang mikila ipol ni moletin imeluv ra tesaen xil nan.”

<sup>22</sup>E Iesu mikil nenemien nae, ma biteni mi xil bitene, “?Veneh ma di munemi mak? <sup>23</sup>?Midep? Be temale minou tang tangan xa namiteni

---

<sup>t</sup> 5:12 Leporsi be meseien xa pol ni hilbe moletin di mat, misak ni menuk xa da en bo. Siu xil labit meseien lepori misa mak mu mili meseien sav xil. Moletin xa ngguri natuxol ti moletin sav. Lalingi da sen nga tang. <sup>u</sup> 5:14 Lev 14:1-32

mi moletin ak namitene, ‘Omeluv ra tesaen xil nam,’ mu namiteni mini namit, ‘Mea soh e kakao?’ <sup>24</sup>E taxeak mupusi xa Nat Moletin minggur xeihen e ut etan tangan vasak ni moletin vameluv ra tesaen xil nan.” Di, Iesu biteni mi moletin ak bitene, “!Mea soh! Po von paten nam e kakao he tim.”

<sup>25</sup>Vatakes, moletin ak mitamea misomal e hilaep te moletin xil ak. Mipo von paten nan, e suse nan be tim di misa memesien ba mi Hi. <sup>26</sup>Xil vus latemanin ni e misak ni xil lanem pupu. Lames Hi ven e labitene, “!Xosali, rapus neta tei xa mahulong pupu!”

### Iesu Mikes Livae Mei Ti Ihusili

*Luk 5:27-32*

<sup>27</sup>Dutou ni ngan nen ak, Iesu mistal nggo nim ba, e pus mol Siu tei xa di pol mi kavmen, hisen Livae. Xi dotan de von polien nan tangan moletin xil ti laxal takis mini. Di, Iesu mikesi bitene, “!Amei, husil nou!” <sup>28</sup>Misak ni Livae be reling holesok nan xil di, e ba nggusil Iesu.

<sup>29</sup>Dutou ni ngan ak, Livae pol ni anien tei xa mahulong mi Iesu e tim san. Ma misis moletin te takis xil del rut moletin sav ngan xil mun tangan lamei e lavanien vituei. <sup>30</sup>Parasi xil e rut tisa te Rae xil na Mosis di laseputut ni Iesu mi moletin xil nan labitene, “?Veneh ma di mungganien e di mumun del moletin xil te takis e del rut moletin tesa sav xil ak?”

<sup>31</sup>Iesu biteni mi xil bitene, “Moletin xil xa di lanemi xa latamesei ti, iexil tavei ti tokta. E tokta be na ngan xil kestang xa lakila labit lamesei. <sup>32</sup>Inou natamei ti tangan xa ti nikes moletin xil xa labit meulien nae momal ngamu. E-e, natamei tangan ti nikes moletin tesa xil tangan ti lihiles meulien nae.”

### Moletin Xil Lasis Pilei Iesu Usil Halen ni Anien ve Sisen

*Luk 5:33-39*

<sup>33</sup>E melele Iesu da tamu e nim ma Livae, rut moletin ngan xil labitene mini labitene, “Vehakut, moletin xil na Sion di lasis e di labal ni anien ven. E moletin na Parasi xil mun mak tang. E mapusi xa moletin nam xil latapol ni ti vamak. Vehakut, dit langganien e di lamun.”

<sup>34</sup>Iesu biteni mi xil bitene, “E vong tetelien tei, moletin xil limei ve anien teni. Tamal ti tangan laval ni anien e melele xa moletin xa miteli del xat xil tamu ladi. <sup>35</sup>E melengien imei xa moletin tesa xil lihur rat nou ra moletin navan xil. Itutou ni melele nen ak, xil ti sung lihal ni anien.”

<sup>36</sup>Di, Iesu dei vole mi xil bitene, “Moletin tovuol xa vatal pas eising hu tei nan e vahur rute tangan vatil xol eising matu nan xa mahoe ni. Maxani, ipurun eising hu nan, e samulit eising hu ak tamal ti mun ni eising matu. <sup>37</sup>Moletin tovuol xa vateh uaen hu vahe valite matu xa lapol ni ni hilbe sipsip vengan xa nggeih ngamu. Maxani, uaen hu ikaeo vuma

... isak ni valite matu iposou e imahoe. Iti, uaen imie vuma ... ivus, e valite mun isa vari. <sup>38</sup>E-e, uaen hu bos xa litehi ihe valite hu xa mavoh tang. <sup>39</sup>E moletin xil xa di lamu uaen matu, xil iexil tavei ti lamu uaen hu vengan xa xil lanemi labit, 'Uaen matu bos mak mu.' ”<sup>v</sup>

### Parasi Xil Lasis Pilei Iesu Ve Rin te Sabat

*Luk 6:1-5*

**6** <sup>1</sup>Vatei, e Sabat, Iesu del moletin nan xil di lakakao langgo naho tatei te uit.<sup>w</sup> Moletin nan xil di lakixototeh uit xil ak, langgoxo utute, e di langga ni. <sup>2</sup>Rut Parasi xil lasisi labit, “?Veneh ma di mupol ni sexien xa Rae xil na Mosis bit ti rinapol ni ti e Sabat?”

<sup>3</sup>Iesu bit rilomun ni mi xil bitene, “?Xamim mutakil ti naha xa Suv Toto Deved tetel moletin nan xil latepol ni e melele xa mae teat xil? <sup>4</sup>Tave ti neta xa Rae bit pris xil kestang lia beret eo, Deved tehe Nim Eo na Hi, tehur beret xa pris xil lasa ni tuei mi Hi e tea ni. Di, tesa rute mi moletin nan xil latea ni.”<sup>x</sup>

<sup>5</sup>Di, Iesu biteni mi xil bitene, “Nat Moletin iaxa be eilep mu mili Sabat.”

### Iesu Pol ni He Moletin Bos e Sabat

*Luk 6:6-11*

<sup>6</sup>E Sabat tei mun, Iesu ba di pispisi e nim te pispisien tei. E rute ak, moletin tei xa da en, hen metu mat. <sup>7</sup>Rut tisa xil te Rae xil na Mosis del rut Parasi xil labit lakamet rin tova xa Iesu vapol ni vasa tangan ladal xati ven. Ma di lapus Iesu xa nahe vapol ni he moletin ak vahos e Sabat, mu napol ni ti. <sup>8</sup>E Iesu mikil nenemien nae, ma biteni mi moletin ak bit, “!Amei, soh inggak!” Ma moletin ak mea, ba misoh pe met moletin xil ak. <sup>9</sup>Di, Iesu biteni mi xil bitene, “Nasis xamim, ‘?Rae xil na Mosis mae ni tangan ti ripol ni naha e Sabat? ?Ripol ihos, mu ripol isa? ?Ritutou ni meulien na mosav, mu rihav vin ni?” <sup>10</sup>Miketeh mikapis e xil, di, biteni mi moletin ak bitene, “Te momal ni hem.” Xi pol ni tang, ma hen bos mun.

<sup>11</sup>Xil iexil mikat pupu, ma di lasep vesi xa lipol ni naha mi Iesu.

### Iesu Miti Moletin Nan Xil xa Labe Lu e Le Tei

*Luk 6:12-16*

<sup>12</sup>E melele nen ak, Iesu be nesao e hu tei tangan ha vasis. Xi misis mi Hi e vongien nen ak ba duxoh makoe. <sup>13</sup>Melele xa ut milan, xi ba mikes

<sup>v</sup> 5:39 E vole ak, Iesu di biteni xa pispisien hu nan teisav ni pispisien matu na Siu xil.

<sup>w</sup> 6:1 Ladi kikis utut uit xil mei be pulaoa te beret. <sup>x</sup> 6:4 Vengan xa Hi Suv en takat Deved ti melele mae teati, ma Parasi xil mun lasakras iexil vat Iesu mu moletin nan xil (1 Sam 21:6).

moletin nan xil vus lamei visali. E xi miti xil labe lu e le tei tang iaxa mei labe eloheoh nan: <sup>14</sup>Saemon (xa Iesu miling hisen tei mun be ‘Pita’) del tunali Andriu; Temis xal Sion; Pilip xal Batalomiu; <sup>15</sup>Matiu e Tomas; Temis nat Alveas; e Saemon (xa lakesi ni Silixin); <sup>16</sup>Sudas nat Temis, e Sudas Eskariot xa imae ni Iesu ihe he xil xa lihasi imat.

**Iesu Di Pispisi e Di Mileh Rerat Meseien ra Moletin Xil**

*Luk 6:17-19*

<sup>17</sup>Melele xa Iesu del moletin nan xil lasuvul e hu lamei e tan, xi misoh de ut tei xa be motan del vanut moletin nan xil xa labe holu. Vanut moletin tei xa be mahulong mun lamei e rute ak. Ngan xil ak langgo hal Serusalem e rut sav xil e provins tahal Sudea; e rut moletin xil mun langgo hal Taer xal hal Saedon xa di sangas visal tas. <sup>18</sup>Xil lamei tengen xa lateong ni Iesu e tengen xa xi valeh rerat meseien ra xil. Ngan xil mun xa ninin tesa xil di purun xil lamei, ma Iesu nggol rerat ninin tesa xil ak ra xil, ma vexil mase. <sup>19</sup>Moletin xil vus lasak labit lituxol ti Iesu, vengangen xa da en misak ni di mileh rerat meseien ra moletin xil ngasen.

**Iesu Bit Rut Moletin Xil Lilonge Ihos, e Rut Moletin Xil Lilonge Isa**

*Luk 6:20-26*

<sup>20</sup>Di, Iesu miketeh pus moletin nan xil e biteni bit,

“!Xamim xil xa holesok namim tovuol, mulonge ihos;  
vengangen xa Hi be Suv Toto e meulien namim!

<sup>21</sup>!Xamim xa taxeak di mae nggat xamim, mulonge ihos;  
vengangen xa anien amim ihe holu!

!Xamim xa taxeak di mudang, mulonge ihos;  
vengangen xa xamim mei ti mumen!

<sup>22</sup>“Xamim mumaal tang melele xa moletin xil di iexil mikat xamim, di lasin xamim, di lasep sisil xamim, e di labit mube han tesa vengangen xa di munggusil xat Nat Moletin. <sup>23</sup>Mumaal melele xa xil lapol ni mak mi xamim e muhutihut itel sien, vengangen xa sanien tei namim xa mahulong de ut nesao. Bos xa mukila xa ngan xil xa di lapol misa ni xamim, avu nae xil mun di latepol ni temak tang mi provet xil tetiamu.

<sup>24</sup>“!E isa pupu mi xamim xa taxeak holesok namim holu,  
vengangen xa mupus meulien hos ngamu!

<sup>25</sup>“!Isa pupu mi xamim xa taxeak anien amim holu;  
vengangen xa mae ti iat xamim!

“!Isa pupu mi xamim xa di mumen taxeak;  
vengangen xa xamim mulonge isa e ti mutang!

<sup>26</sup>“Isa pupu mi xamim xa moletin xil di lapet rat hisemi be nesao;  
vengangen xa avu nae xil latepol ni temak tang mi provet xil te luvosen.”

### Iemim Ihei Moletin Xil xa Di Laketeh Misa ni Xamim

*Luk 6:27-36*

<sup>27</sup>Iesu biteni mi xil bitene, “Nabiteni mi xamim, iemim ihei moletin xil xa di laketeh misa ni xamim. Mupol ihos mi ngan xil xa di lasin xamim. <sup>28</sup>Musis Hi tengang ituxol xat ngan xil xa di lasuhol xamim, e musis ve moletin xil xa lapol misa mi xamim. <sup>29</sup>Xosxa moletin tei basuk di e vim, umae ni ihas ri vim mun. E xosxa moletin tei misil rat eising nam xa mettel, umae ni isil rat ngan mun xa mahin. <sup>30</sup>Xosxa moletin tei dak kesuk ve neta tei, ma usa ni mini. Melele xa moletin tei misen rat neta tei nam, onasisi ti onahit nasa rilomun ni. <sup>31</sup>Upol ni mi mosav xil ixoni ngan xa xoux iem bei xil lipol ni minuk.

<sup>32</sup>“?Xosxa iemim bei kes ni moletin xil xa xil mun di iexil bei xamim, veneh ma Hi ituxol xat xamim ven? !Moletin tesa xil mun di lapol ni mak! <sup>33</sup>?E xosxa xamim di mupol bos mi moletin xil kestang xa di lapol bos mi xamim, veneh ma Hi ituxol xat xamim ven? !Moletin tesa xil mun di lapol ni mak! <sup>34</sup>?E xosxa mumae ni vatu mi moletin xil kestang xa mukila mubit lisa rilomun ni mi xamim, veneh ma Hi ituxol xat xamim ven? Moletin tesa xil mun di lamae ni vatu mi moletin tesa sav xil tengang ihur rilomun ni vatu nae! <sup>35</sup>!Munapol ni ti namak! !Eheien namim iti e ngan xil xa di laketeh misa ni xamim! !Mupol ihos mi xil! Mumae ni vatu mi mosav e munanemi ti munahit lisa rilomun ni. Xosxa mupol ni imak, ma Hi xa de ut nesao isa huite teni xa ihos pupu mi xamim e muhe horamue nan xil vengang xa xi mun di pol ni bos mi moletin tesa xil xa labe molep. <sup>36</sup>Mak, ma esaen namim iti e mosav, ixoni esaen na Hi Tamemim xa di e mosav.”

### Munalepis Mosav Xil Ti

*Luk 6:37-42*

<sup>37</sup>E Iesu biteni mun bitene, “Xosxa munalepis mosav xil ti, ma Hi nalepis xamim ti. E xosxa munapisen sexien tesa na mosav ti, ma Hi napisen sexien tesa xil namim ti. E xosxa mosav pol misa mi xamim, muketeh ihos tang mi xil. Mak, ma iketeh ihos mun tang mi xamim. <sup>38</sup>Musa tutouen mi mosav, ma Hi isa tutouen mi xamim. E melele xa xi isa tutouen mi xamim, ihe hao mu. Ixoni ngan taxa moletin tei xa minggutih raes amim ni kap tei xa mahulong pupu e polu ma ... dit kiri. Mak, ma sexien te tutouen namim, Hi ipol ni imak tang mi xamim.”

<sup>39</sup>Di, Iesu dei vole tei mi xil bitene, “Moletin xa meten bar misakras vatel tei mun xa meten bar. Xosxa ipol ni imak, ma xalu vus laliki lalihe vul. <sup>40</sup>Moletin xa nggur pispisien ra moletin tei, nanemi ti navit xi bos mak mu mili tisa nan. E xosxa xi ihur sen sukul en nan, ma xi mei sung ixoni tisa nan.<sup>y</sup>

---

<sup>y</sup> 6:40 Iesu biteni mak vengang xa ien bei moletin nan xil lihusil sexien nan, vengang xa xi di en sae moletin xil ngasen e mipol ni bos mi xil.

<sup>41</sup>“Veneh ma opus kil saxut liei xa hokorong tang xa de met tumali, e otakil ti vari xa marut liei xa mahulong de metom?<sup>z</sup> <sup>42</sup>?Veneh ma di obiteni mi tumali obit, ‘Tua li, mae ni namit rat saxut liei ra metom’, e otapus ti vari xa marut liei dat e metom? !Mube vat luvosen tang! Itiamu, uhur rat merut liei ra metom. Iti, ukila sung uhit rat saxut liei ra met tumali.”

### Vatiei Del Huite

*Luk 6:43-45*

<sup>43</sup>Iesu biteni mi vanut moletin xil ak bitene, “Vatiei xa bos, taso ti huite vasa; e vatiei xa misa, taso ti huite vahos. <sup>44</sup>Vatiei xil vus, lapus kila nggo huite xil xa laso ni. Misakras oleh huit manggo ra vatit vilu; e misakras oleh huit tavu ra vatit ai.<sup>a</sup> <sup>45</sup>Moletin xa meulien nan polu ni hosien, huit hosien mistal nggo en. E moletin xa meulien nan polu ni tesaen, huit tesaen mistal nggo en. Sepinien na moletin tei di pisen meulien nan polu e naha.”

### Iesu Dei Vole Usil Moletin Lu Xa Di Lupol ni Nim

*Luk 6:46-49*

<sup>46</sup>Iesu biteni mun mi moletin xil bitene, “?Veneh ma di mukes nou mubit, ‘Suv, Suv’ e di mutapol ni ti naha xa nabiteni mi xamim? <sup>47</sup>Nitei vole tei usil hisit moletin xa bemei visal nou, di miteong ni sepinien navan, e di pol nggusili. <sup>48</sup>Xi nggoni moletin tei xa bit vakili ni nim man. Ma milang ves liei xil xa nggeih e mahulong. Di, mikili kuhi ni xil, e pol sen nim man.<sup>b</sup> Di, us mus e vatiang nggeih bemei midep, e misakras vahu len ni. Nim man misoh nggeih. <sup>49</sup>E moletin xa miteong ni sepinien navan e di tapol ti vahusili, xi nggoni moletin xa mileh vot liei tesa xil tang, e mikili ni nim man ni. E melele xa us mus e vatiang nggeih bemei, nggulen nim man vari!”

### Neketen na Vat na Moletin Xil te Vaeen

*Luk 7:1-10*

**7** <sup>1</sup>Melele xa Iesu pispisi mi moletin xil bus, xi be Kapaniam. <sup>2</sup>E taon ak, vat tei na moletin xil te vaeen da. E tim san, moletin tei te polien nan mesei holu, sangas vamat, e vat ak ien bei pupu. <sup>3</sup>E melele xa xi milonge xa Iesu de e taon ak, xi misa rut elda xil na mol Siu xil tangan lava lasis Iesu mei vatutou ni moletin nan ak. <sup>4</sup>Ma elda xil ak labe visal Iesu e ladak kesi tangan vatemanon e labiteni mini labitene, “!Amei, tutou ni moletin ak li!

---

<sup>z</sup> 6:41 Koute te liei xalu ak be tesaen. <sup>a</sup> 6:44 Luk bit ‘huit fik ra vatiei xa sanute di en, e huit grep ra vatiei mun xa misa.’ <sup>b</sup> 6:48 Luk bit ‘pet nim man ni hat,’ e vengam xa sexien te pet nim mar be tisav ni mol Siu xil, matling ‘liei xil xa nggeih.’

Vengan xa xi be hisit moletin xa xamem ngasen mamerere ni. <sup>5</sup>Xi ien bei Siu xil e xi di tetutou ni xamem matehil nim te pispisien nar.”

<sup>6</sup>Ma Iesu be xil laba. E melele xa Iesu di be sangas e tim, vat ak misa tunali vutatei xil lamei e labit sepinien nan mini xa bit, “Suv, onakon ti onamei. Inou natapin ti tangan xoux omei e tim savan <sup>7</sup>mu tangan inou mun, namei visaluk. E usepin tang, nakila xa moletin navan ilonge ihos rilomun. <sup>8</sup>Ixon inou, melele xa eilep navan misepin tang minou, nanggusil raen. E melele xa inou mun nasepin tang mi moletin tei te vaeen navan, xi mun pol nggusil raeok. Nakila nasemae ni tei nihit, ‘!Ha!’ ma xi iha. Mu nihit, ‘!Amei!’ ma xi imei. E nakila nisemae ni moletin te polien navan nihit, ‘Pol ni netak!’ ma xi ipol ni.”

<sup>9</sup>Melele xa Iesu milong sepinien ak, xi mitemanin ma biles pus vanut moletin xil xa di langgusili e biteni mi xil bitene, “Reitin mak, natapus ti mu hisit neketen ak e moletin tova tahal Isrel.”

<sup>10</sup>E melele xa ngan xil xa latexo nim ma vat ladilomun laba, lapusi xa moletin te polien nan milonge bos ngamu.

### **Iesu Pol ni Horamue na Tunau Tei Meul Rilomun ra Maten**

*Luk 7:11-17*

<sup>11</sup>Dutou ni ngan ak, Iesu del moletin nan xil langgusil suse laba tangan lave taon tahal Naen, e moletin hao di langgusili. <sup>12</sup>Melele xa xil lamei sangas visal puiteh te vloh te taon ak, xil lapus vanut moletin tei ladel tiei na horam maxoe tei xa mat lava latihin ni. Horamue ak be sikes na tunau tei. <sup>13</sup>Melele xa suv Iesu pus tunau ak di dang, xi en misae en ma biteni mini bit, “Onatang ti.” <sup>14</sup>Di, Iesu ba be sangas visali e misasa dal xat vet ma ngan xa mat. Ma xil xa lapoe lasoh. Di, Iesu biteni mi ngan xa mat bitene, “!Horam maxoe, nabiteni minuk, meul!” <sup>15</sup>Ma horamue ak meul rilomun e mea. Di, misepin mun. Ma Iesu miling rilomun ni mi ninen.

<sup>16</sup>Moletin xil vus latemanin e di lapet rat his Hi e di labitene, “!Taxeak, provet tei xa be himetu de visal xir!” E ngan xil labit, “!Hi bemei tuei tangan vatutou ni moletin nan xil!”

<sup>17</sup>Ma longeongen usil Iesu mikapis e ut ngasen e Sudea del rute xil vus xa be sangas visali.

### **Eloheoh Lu na Sion xa Di Mikas Moletin Xil**

*Luk 7:18-35*

<sup>18</sup>Longeongen usil Iesu duxoh moletin xil na Sion, ma xil ba di lasep usili mini. <sup>19</sup>Xi misil rumali lu luba tangan lalsis suv Iesu lalihit, “?Xoux obe ngan xa Hi tehiti xati tehiti imei, mu mutatil tova mun tesav?”

<sup>20</sup>Melele xa lumei visal Iesu, lusisi lubitene, “Sion xa di mikas moletin xil misil xamel tangan mei malsisuk imak, ‘Xoux obe ngan xa Hi tehiti xati tehiti imei, mu mutatil tova mun tesav?’ ”



<sup>21</sup> Melele nen ak, Iesu di pol ni moletin xil xa lamesei mu ngan xil xa lalong pangas xil, mei lalonge bos. E di nggol rerat ninin tesa xil ra ngan tesav xil. E ngan xil xa mete bar, pol ni xil mei laketeh rilomun. <sup>22</sup> Ma Iesu bit rilomun ni mi moletin xalu na Sion bitene, “Muliha mulihit naha xa mulonge e mupusi mi Sion. Ngan xil xa mete tevar, lakila laketeh rilomun; e ngan xil xa latesakras kakaoen, lakakao. Moletin xil xa lathur meseien lepori, xil mei vexil memese; e ngan xil xa vurange tevon, lalongeong mun. Ngan xil xa latemat, lameul rilomun; e setuen te longeongen hos di ba mi hoeo xil. <sup>23</sup> Ngan xil xa nenemien nae di tave lu ti usil nou, Hi ituxol xat xil.”<sup>c</sup>

<sup>24</sup> Melele xa moletin xalu na Sion luba, Iesu misep usil Sion mi vanut moletin xil bitene, “?Melele xa xamim mutehe uruvuol tangan mupus Sion, mutehit mupus hisit moletin eah? ?Muteha tangan ha mupus ngan xa tenaxeih ti nggoni sulut vatiei tei xa misakras vasomal melele xa vatiang bui nggeih? !E-e! <sup>25</sup> ?Moletin eah iaxa muteha tangan ha mupusi? ?Moletin tei xa mising ni eising xil xa bos pupu? !E-e! Xil xa lasing mak e meulien nae polu e holesok holu, xil ladi e tim sa suv toto xil kestang. <sup>26</sup> ?Mak, ma visi iaxa muteha tangan ha mupusi? ?Provet tei? !Io! Xi be provet tei e nabiteni mi xamim, xi be eilep mu ni provet sav xil. <sup>27</sup> Sion be ngan xa Vanuvei na Hi di misep usili bitene,

‘Mupusi, nisa eloheoh navan iha itiamu ni xouk,  
tangan isak mese ni holesok xil itetiluk.’<sup>d</sup>

<sup>28</sup> Ngan ak reitin, moletin sav tovuol xa lapesi e ut etan xa vahe eilep mu valeli Sion. E movotei tei xa Hi be suv toto nan be eilep mu mili Sion.”<sup>e</sup>

<sup>29</sup> Melele xa moletin xil lateong ni mak, e moletin te takis xil mun, lake reitin xa suse na Hi bos mak mu vengan xa xil latelong sepinien na Sion, latehiles meulien ra tesaen nae, e latemae ni Sion mikas xil. <sup>30</sup> E Parasi xil del tisa xil te Rae xil na Mosis xa latamae ni Sion vakas xil ti, xil lasin polien na Hi e meulien nae.

<sup>31</sup> Iesu biteni mun bitene, “?Moletin xil te xosali ak, langgoni naha? ?Sexien nae nggoni naha? <sup>32</sup> Xil langgoni tutut horamue xil xa ladotan ladi e valkesao e di lake xat xil mun tang labitene,

‘Di mabas kitar nggoni melele te tetelien,  
e di mutakikei ti e mutavasias hemim ti vatel xamem.

Di, madang nggoni ngan xa madi e maten tei,  
e mutatang ti vatel xamem.’

<sup>33</sup> Nabiteni mak vengan xa melele xa Sion temei, xi di tehal ni anien ve sisen e di tamu ti uaen, ma xamim mubiteni mubit, ‘!Sion, ninin tesa tei

---

<sup>c</sup> 7:23 Aes 35:5-6; 61:1-2; Luk 4:18-19    <sup>d</sup> 7:27 Mal 3:1    <sup>e</sup> 7:28 Sion pol ni polien tei xa mahulong pe met Hi tangan xi sak mese ni suse ve Iesu. E xil xa langgusil Iesu be eilep mu mili e pe met Hi.

da en!’ <sup>34</sup>E melele xa Nat Moletin temei, xi di ngganien e di mumun, ma xamim mubiteni mubit, ‘!Pus ti mu moletin ak, xi di ngganien e di mumun pupu! Xi di mikei tua e moletin te takis xil e moletin tesa xil mun.’ <sup>35</sup>Visi e xir xa bit di nggusil metisouen na Hi, meulien nan ipisen ni.”

### Atou Tesa Tei Mideh Vokon Xat Le Iesu

*Luk 7:36-50*

<sup>36</sup>Dutou ni ngan ak, Parasi tei misis Iesu tangan vanien vatela, ma Iesu be tim san e dotan e suon tangan vanien. <sup>37</sup>Melele xa moletin xil te rute ak lalonge xa Iesu mei vanien e tim sa Parasi xiak, atou tei te suse minemi bit ha vapusi. Misak ni, minggur valit vokon tei xa vatu teni be nesao, ba. <sup>38</sup>Di, be nim e misoh pe tou Iesu e di muis. Vengan xa Iesu di bulun len be petoun, simeten di mileh e di mikas le Iesu. Di, misihia ni hilin, e pesum ni len e mideh vokon xati. <sup>39</sup>Melele xa Parasi ak pus netak, ma xi di misep tasen bitene, “!Vahit moletin ak vahe provet tei xa be reitin, xi vakila vari xa atou xa di duxoli xiak be hisit atou eah! Xi vakila xa xi be atou tei te suse.”

<sup>40</sup>Ma Iesu misepin mi Parasi ak bitene, “Saemon, ieok bei namit sepinien tei minuk.”

Ma Saemon misisi bit, “?Tisa, obit ovit neh?”

<sup>41</sup>Ma Iesu dei vole ak mini bitene, “Rumali lu luleh vatu ra eilep tei. Tei xalu nggur 500,000 vatu, e tei tisav nggur 50,000 vatu.<sup>f</sup> <sup>42</sup>Dutou ni, rumali xalu ak lusakras lalsa xoles vatu nan. Misak ni eilep en misae e xalu e misep xol xalu tangan lalnasa xoles ti neta mini. Ma nisisuk, ngan xave e xalu iaxa eheien nan iti e eilep ak ili?”

<sup>43</sup>Saemon mea e bitene, “Nanemi nabit ihe ngan xa kaon nan mahulong mu, e eilep en misae en.”

Ma Iesu biteni mini bitene, “Obiteni momal.” <sup>44</sup>Di, Iesu biles pus atou ak e biteni mi Saemon bitene, “Xouk ole kil atou ak? Melele xa namei e tim sam, xouk otasa ti oei tangan nikas leok ni. E atou ak, tekas leok ni simeten e tesihia tevue ni hilin. <sup>45</sup>Xouk otapesum ni viuk ti tangan ovur pilei nou. E atou ak, melele kokot xa temei nim, xi di tepesum ni leok xa tenangel ni ti. <sup>46</sup>Xouk otasa ti mun oel tangan naxul maxoe ni nou ni; e xi mideh vokon nan ba xat leok. <sup>47</sup>Ma nabiteni mi xamim, atou ak di ien bei nou holu, e ngan ak di pisen ni xa mikila xa naleh rat tesaen holu ra meulien nan. E ngan xa naleh rat tesaen nan hokorong, xi di pisen eheien nan hokorong minou.”

<sup>48</sup>Di, Iesu biteni mi atou ak bitene, “!Taxeak, tesaen nam, naleh rati ranuk!”

---

<sup>f</sup> 7:41 500 denarie e 50 denarie

<sup>49</sup>Rut moletin xil xa ladi di labiteni mi xil labitene, “?Hisit moletin eah ak xa mikila ileh rat tesaen ra moletin tei?”

<sup>50</sup>E Iesu biteni mi atou ak bitene, “Ve neketen nam e nou, taxeak, Hi miteh meulien e xoux. Ha itel xat tomat na Hi.”

### **Atou Xil xa Di Langgusil Iesu**

*Luk 8:1-3*

**8** <sup>1</sup>Dutou ni ngan ak, Iesu ba nggo rut taon e metimal ngan xil, di misetu usil longeongen hos xa Hi imei ihe suv toto te meulien na moletin xil. E melele nen ak, moletin nan xil xa labe lu e le (12) di langgusili. <sup>2</sup>E rut atou xil mun di langgusili: ngan xil xa Iesu tehol rerat ninin tesa latehe reling xil; e ngan xil mun xa teleh rerat meseien tehe reling xil. Tei e xil tehe Meri tahal Makdela xa Iesu tehol rerat ninin tesa xa latehe lu e he sav (7) rani; <sup>3</sup>e rut atou xil mun. E atou xil ak di lateleh watu nae ba latesa ni tangan vatutou ni Iesu e moletin nan xil. Tei e xil xa tepol ni mak tehe Susana. E tei mun tehe Soana, atou na Xusa xa be vat te polien xil e nim ma Suv Toto Herot.

### **Iesu Dei Vole Tei Usil Utiei Xil xa Di Meul e Tan Tateisav Xil**

*Luk 8:4-8*

<sup>4</sup>Moletin xil holu langgo taon ngan xil, lamei vituei tangan xa lalong ti sepinien na Iesu. Melele xa Iesu pus xil, xi dei vole ak mi xil bitene, <sup>5</sup>“Vatei, moletin tei ba tangan vaso utiei e naho nan. E melele xa miso lenen utiei san be tan, rute lakiri be tan e suse, e moletin xil di lapel xat xil e tuman xil mun mei di langga vuol ni. <sup>6</sup>E rute lakiri labe e tan xa mahin e vatihat de pan. Ma lameul vuteili tang, di, tavehi ti lameles vengan xa eai ngga vin xil. <sup>7</sup>E rut utiei ngan xil lakiri be tan e rute xa munae tesa meul en. Utiei xil ak lateh, lameul vituei del munae tesa, misak ni munae xil ak mikutaxol vin xil. <sup>8</sup>E rut utiei sav ngan xil mun, lamot e tan xa bos. Lameul labe nesao, ladaxao bos, ma huite xil kekes mili hanutap lim (100).”

Melele xa Iesu dei vole ak bus, biteni mi xil bitene, “Moletin xa vurangen da, bos xa itaeng kuhi ni sepinien xil ak.”

### **Iesu Bit Kil Kout Vole Usil Utiei Xil xa Di Meul e Hisit Tan Sav Xil**

*Luk 8:9-15*

<sup>9</sup>Dutou ni ngan ak, moletin xil na Iesu lasis pilei kout vole ak mini. <sup>10</sup>Ma xi bit rilomun ni mi xil bitene, “Xamim kestang munggur kilakilen usil rin xa Hi imei ihe suv toto e meulien na moletin xil. E mosav xil di langguri nggo vole kestang. Hisit moletin xil ak langgoni naha xa Vanuvei Eo tehiteni tehit,

‘Neta sav xa laketeh vuma ...

latapus kil ti;  
 e neta sav xa lataeong vuma ...  
 latalong kil ti.’ ”<sup>8</sup>

<sup>11</sup>Ma Iesu biteni mi xil bitene, “Koute te vole ak mak: utiei xil be sepinien na Hi. <sup>12</sup>Suse xa miso utiei en nggoni moletin xil xa lataeong ni sepinien na Hi; e dutou ni, Temat bemei, mei mileh rerat sen utut sepinien xil ak ra nenemien nae. Misak ni, lasakras lanesi en, ma latahur ti meulien hu. <sup>13</sup>Tan xa vatihat de pan nggoni moletin xil xa lamaal melele xa lalong utut sepinien na Hi, e di meul e meulien nae. E vengan xa sepinien ak taso litei ti vakeih e meulien nae, nenesien nae tarati en vahehi. Ma melele xa sakkpisien xil bemei nggeih, lamot e neketen nae. <sup>14</sup>Tan xa munae tesa meul en nggoni moletin xil xa lalong utut sepinien na Hi e sexien xil te ut etan mikutaxol vin ni. Nenemien nae polu e mani, sexien xil te ut etan, e lanexo ve holesok holu. Misak ni, utut sepinien na Hi misakras vameul vaxeih e meulien nae. <sup>15</sup>E tan xa bos nggoni moletin xil xa lalong utut sepinien na Hi e langgur xati be reitin del nenemien tei xa bos e momal. Sakkpisien xil te xeih di bemei, e sepinien ak nggulehi di meul ba vuma miso huite e meulien nae.”

### Iesu Dei Vole Usil Laet xa Pili

*Luk 8:16-18*

<sup>16</sup>Iesu dei vole tei mun mi xil bitene, “Moletin tovuol tamu xa vasahan laet nan ti vaha vakutaxole ni pesin mu vaha valingi vate pe vet man. E-e, vehakut, melele xa lasahan laet bus, lasoxole ni de nesao e von nen. Mak, ma melele xa moletin xil limei e vangit nim, lile kil laet xa di mileluv.

<sup>17</sup>“Neta xa minggus, Hi ihur rati imei kesao. E sepinien te xuxusen xil, likeikei ni mei moletin xil vus likila.

<sup>18</sup>“Mak, ma melele xa mulong sepinien navan, muteong kuhi ni; vengan xa moletin xa nggur xat koute teni, Hi isa metisouen ihe holu mu mini. E moletin xa tahur kuh ti koute teni, vuteili xa xi minemi bit mikila tuei, ikesae rani.”

### Iesu Bitehiteni xa Visi be Ninen e Tunali Xil

*Luk 8:19-21*

<sup>19</sup>E melele nen ak, nine Iesu del tunali xil lamei tangan xa mei lapusi, e latsakras latohe sangas visali vengan xa vanut moletin ak nggonaxon pupu. <sup>20</sup>Moletin tei pus xatel ma ba bitene mi Iesu bitene, “Ninom del tumali xatel mei latesoh latdi nga hale, latbit latpusuk.”

---

<sup>8</sup> 8:10 Aes 6:9

<sup>21</sup>E Iesu biteni mi xil bitene, “Nana e tua navan xil labe moletin xil xa lalong sepinien na Hi e di lapol nggusili.”

### Vatiang e Tehe Lutaeong ni Sepinien na Iesu

*Luk 8:22-25*

<sup>22</sup>Vatei, Iesu biteni mi moletin nan xil bitene, “Bos xa rihur xoteh Oei Kaleli rihe rin.” Ma labut labe tuturil tei e laba. <sup>23</sup>E melele xa tuturil miloh ba, Iesu ba pat.

Tavehi ti, vatiang tei mistal misak ni tehe xil milati hao, e oei bemei vangit tuturil. Lakameti nggeih vengan xa sangas lamarir. <sup>24</sup>Ma labe visal Iesu ba lakes rati ra paten nan e lake xati labit, “!Suv, suv! !Sangas ramarir xiak!”

Ma Iesu mitamea, e misel xat vatiang e tehe tengan lalohe tan. Vatei takes, vatiang e tehe lutaeong ni sepinien nan e lube tan, ma an mei bos mun. <sup>25</sup>Di, Iesu misis moletin nan xil bitene, “?Midep, neketen namim di xave?”

E xil uli mikan, e lamesep pupu ni naha xa lapus Iesu pol ni. Dit lasis xil mun tang labitene, “?Moletin ak be hisit moletin eah? !Tave ti neta vatiang e tehe, melele xa misel xat xalu, xalu mun lutaeong xat raen!”

### Iesu Minggol Rerat Ninin Tesa Xil ra Moletin Tei

*Luk 8:26-39*

<sup>26</sup>Iesu del moletin nan xil langgo tuturil langgur xoteh Oei Kaleli, mei labe ut sangas ni taon tahal Nggerasa. <sup>27</sup>Melele xa Iesu but reling tuturil bemei e ut, bisu mi moletin tei xa ti tete taon ak, ninin tesa xil laba xati. Be nousav xa moletin ak ti tenakavuei ti e ti tenapat ti e nim. Be di pat e vangihat xil e von tehinen tang. <sup>28</sup>Melele taxa pus Iesu, muis nggeih be nesao, mei mitingeiril momal pe valnaon. Mikei be nesao ba ni bitene, “!Iesu, Nat Hi te ut nesao! ?Upol ni naha minou? !Onasak ni nou ti li ninalong pangas nou!” <sup>29</sup>Xi biteni mak vengan xa Iesu misepin mi ninin tesa tengan xa vaheling moletin ak. Vehakut, ninin tesa ak misak ni moletin ak mitallang himetu. Moletin sav xil latetal xat pisi tengan nakakao ti. Latevar xat hen xalu e len xalu ni ao te xeih, e dit misen xotehi. Di, ninin tesa di tetivin ni ba tetasen tang e uruvuol.

<sup>30</sup>Ma Iesu misis bitene, “?Hisom visi?”

E moletin ak bit rilomun ni bitene, “!Vanute!” Biteni mak vengan xa vanut ninin tesa iaxa ladi xati. <sup>31</sup>Ninin tesa xil ak ladak kes Iesu tengan xa nasil rat xil ti ha linave vangavul xa be von pangasien nae.<sup>h</sup>

<sup>32</sup>Sangas ni xil, veili holu di langganien e seri hu. Ninin tesa xil ladak kes Iesu tengan vamae ni xil lava xat veili xil ak, ma Iesu mae ni xil laba.

---

<sup>h</sup> 8:31 Ngan ak be vul xa xoxalite teni tovuol, be von pangasien na ninin tesa xil del Temat.

<sup>33</sup>Ninin tesa xil ak, labe reling moletin ak ba, laba xat veili xil ak sung. E xil laloh laba lakiri langgo meteh laba oei, ba lamarir lalél.

<sup>34</sup>Melele xa moletin xil xa ti latelaxat veili xil ak lapus neta xa mistal, latemanon laba, labithiteni e taon e rute sav xil mun xa sangas. <sup>35</sup>Di, moletin xil xa lalongeong ni laba labit lapus ti naha xa testal xiak. Ma laba labe visal Iesu, e lapus moletin xa ninin tesa xil latehe relingi. Nenemien nan mei bos ngamu, mising xol xi, e dotan visal Iesu. Mak toma, moletin xil ak latemanin ni. <sup>36</sup>Xil xa latepus holesok xil ak testal latumul del mosav xil xa latemei, usil suse xa Iesu tepol ni moletin ak milonge bos. <sup>37</sup>Ma rut moletin xil xa ladi sangas ni metimal tahal Nggerasa lasis Iesu tangan xa ihe ling xil vengan xa uli xil mikan pupu.<sup>i</sup> Mak toma, Iesu ba mun e tuturil tangan lihe reling xil. <sup>38</sup>E moletin xa ninin tesa xil lateti xati midak kes Iesu tangan vaha vatel xat xil. E Iesu misila ba e biteni mini bitene, <sup>39</sup>“Utilomun uhe tim sam, ti uhithiteni mi moletin sav xil naha xa Hi pol ni e meulien nam.”

Ma moletin ak ba mikapis e rute xil vus e taon ak e di misep usil neta hos xa Iesu tepol ni mini.

### **Iesu Dal Rat Atou Tei ra Meseien Nan del Atuli Tei ra Maten<sup>j</sup>**

<sup>40</sup>Melele xa Iesu dilomun be e ri oei, vanut moletin tei xa latetatili lateti lamaan ven himetu ma langgur pilei. <sup>41</sup>Di, moletin tei bemei e mitingeiril momal pe valnaon, hisen Saeros. Xi be vat tei te nim te pispisien na Siu xil. Xi dak kes Iesu tangan xa vamei laloha mu e nim man, <sup>42</sup>vengan xa atuli xa be tei takeres nan vari tang, sangas vamat xiak. E hram nan be lu e le (12) tang.

E melele xa Iesu di ba, moletin xil labe holu langgonaxon e rin xil ngasen. <sup>43</sup>Di maxani, e atou tei bemei. Xi mesei hram lu e le (12) ngamu ni meseien na atou xil xa misakras vavus. Atou ak misa sen mani nan mi dokta xil tangan lipol pilei ven, e lasakras. <sup>44</sup>Misak ni nggo pe tou Iesu, bemei misasa duxol seri eising nan. Vatakes, meseien nan bus vari. <sup>45</sup>Di, Iesu misis moletin xil bitene, “?Visi iaxa duxol nou?”

Xil vus labit latakil ti, e Pita biteni mini bitene, “Suv, moletin xil labe holu pupu, langgonaxon e laduxol xoux e rim xil vus.”

<sup>46</sup>E Iesu bitene, “E-e, moletin tei duxol nou, vengan xa rut xeihen be reling nou.” <sup>47</sup>Ma atou ak pusi taxa misakras vaxus, bemei, e len di mulul, e mitingeiril pe valnao Iesu. Bit rati pe met moletin xil vus, veneh ma duxol eising nan, e midep xa meseien nan be relingi e melele xati xa

<sup>i</sup> **8:37** Moletin holu tahal Nggerasin latave Siu ti, e vengan xa lakila xa Siu xil iexil tavei vueili xil ti, uli xil mikan Iesu vengan xa lanemi labit ipol ni mak e vueili xil ngasen nae e misak ni xil lilel. Lanem usil vatu nae mili pispisien e merikel xil na Iesu.

<sup>j</sup> **8:39** Mat 9:18-26; Mak 5:41-43

duxol xati. <sup>48</sup>Di, Iesu biteni mi atou ak bitene, “Hinoxoli, neketen nam misak ni omese ra meseien nam. !Bos! Uha, e tomat iti minuk.”

<sup>49</sup>Melele xa Iesu di tamu misepin, moletin tei nggo nim ma Saeros bemei e biteni mini bitene, “Atuli nam mikesae tuei. Onasis tisa xai ti mun namei.”

<sup>50</sup>Melele taxa Iesu milong sepinien ak, ma biteni mi Saeros bitene, “!Onanexo ti! Usak ni nenesien nam ixeih xa atuli nam imeul, ma imeul rilomun.”

<sup>51-53</sup>E melele xa Iesu bemei be nim ma Saeros, moletin xil vus di lamuis e di ladang ve atuli ak. E Iesu biteni mi xil bitene, “!Munatang ti! Atuli ak tamat ti, xi di pat tang.” E xil di langue xati vengan xa lakila atuli ak mat tuei. Ma Iesu tamaen ni ti moletin sav mun vahe e vangit nim. Mileh Pita, Sion, Temis, e tame e nine atuli kestang be xatel, e labe ut xa atuli da en.

<sup>54</sup>Di, Iesu misasa dal xat hen e misepin mini bitene, “!Atuli, mea!” <sup>55</sup>Vatakes, meulien na atuli dilomun bemei en e mea misoh. Di, Iesu biteni mi xatel bit latihur neta tova latisa ni ia ni. <sup>56</sup>Tamen e ninen lumese pupu e Iesu mike xat xalu tangan xa lalnahithiteni ti mi mosav naha xi pol ni mi atuli nalu.

### Iesu Misil Lelen Moletin Nan Xil xa Labe Lu e Le (12)

**9** <sup>1</sup><sup>k</sup>Iesu mikes vituei ni moletin nan xil xa labe lu e le (12), di, misa xeihen mi xil tangan xa likila ti lihol rerat ninin tesa ra moletin xil e lisak ni ngan xil xa meseien di xat xil, ti lilonge ihos mun. <sup>2</sup>E misil lelen xil tangan xa liha ti lisetu usil Hi xa mei ihe suv toto te meulien na moletin xil, e lisak ni ngan xil xa lamesei, lilonge ihos rilomun. <sup>3</sup>Xi biteni mi xil bitene, “Munaleh ti neta natel xamim melele xa muba: eitingil, ateli, anien, vatu mu munaleh timun eising. <sup>4</sup>Xosxa muba e langgur pilei xamim e nim tei, ma muti kestang en ha vuma muling taon nen ak. <sup>5</sup>E xosxa moletin xil lataxur pilei xamim ti e taon tei, ma mulaves rerat meas ihe relingi kaelemi melele xa muheling rute ak. Ngan ak ihe selxatien mi xil ve pangasien xa istal mi xil.”

<sup>6</sup>Dutou ni sepinien nan, lamea laba labe metimal xil vus e di lasetu usil longeongen hos na Hi. E di lapol ni moletin holu xa latemesei, lalonge bos rilomun.

### Herot Milongeong Usil Iesu, e Nenemien Nan Pol Holu Usili

<sup>7</sup><sup>l</sup>E melengien nen ak, suv toto tahal Kaleli, hisen Herot Antipas, milong usil holesok xil xa Iesu di pol ni. Ma misak ni nenemien nan pol holu vengan xa rut moletin ngan xil di labiteni xa xi iaxa be Sion xa

<sup>k</sup> 9:1 Mat 10:1-15; Mak 6:7-13    <sup>l</sup> 9:7 Mat 14:1-12; Mak 6:14-29

tekas moletin xil, e meul rilomun ra maten. <sup>8</sup>Rute ngan xil labit provet Ilaetsa iaxa mistal rilomun xiak, e rut moletin mun di labiteni xa provet tei te tiamu meul rilomun ra maten. <sup>9</sup>Misak ni Herot di minem e bitene, “Inou vari tang iaxa nateta xoteh vat Sion temese. ?E visi vari iaxa di nalongeong usili xiak?” Mak, ma misak bit vapus ti Iesu.

### **Iesu Bangan Moletin Xil xa Lali Taosen Lim (5000)**

<sup>10</sup><sup>m</sup>E melele xa moletin xil na Iesu lapol bus, ladilomun. Lamei lasep mese ni mi Iesu holesok xil xa lateha di latepol ni. Ma Iesu mileh kes ni xil tang, laba ladi e taon tei xa lakesi ni ‘Betsaeta.’ <sup>11</sup>E melele xa vanut moletin ngan xil lalongeong ni xatel xa latoba, lamea langgusil xatel. E melele xa Iesu pus xil, nggur pilei xil e di misetu mi xil usil Hi xa mei ihe suv toto te meulien na moletin xil. E xi di pol ni moletin holu xa lamesei, lalonge bos rilomun.

<sup>12</sup>Pol vuma mahis, e moletin nan xil xa labe lu e le (12) lamei visali, e labiteni mini labitene, “Radi e uruvuol. Bos xa usil moletin xil ak lihe metimal xil e rute xil mun xa di sangas, tangan xa ha likamet ti anien e von paten mun en.”

<sup>13</sup>E Iesu biteni mi xil bitene, “Xamim tang musa ti anien lava ni.”

E xil labit rilomun ni mini bitene, “Xamem maleh xat beret be lim (5) e meseo be lu (2) tang. ?Midep? ?Iem bei mava maxal ti anien tangan vapin mi vanut moletin ak xa be mahulong pupu?” <sup>14</sup>(Tata xil vus xa lateti e melele nen ak sangas labe taosen lim (5000) del atou e horamue nae xil mun.)

Ma Iesu biteni mi moletin nan xil bitene, “Museti moletin xil ha litotan e vanute xil xa moletin xil sangas lihe hanutap lu e hexalu mun (50) e vanute tei.

<sup>15</sup>Ma moletin nan xil lapol usil naha xa xi biteni, misak ni moletin xil vus ladotan. <sup>16</sup>Di, Iesu mileh beret xa be lim xiak del meseo nen xa be lu, e miketeh be nesao. Di, misis, memes Hi ven, e di bul papasi. Di, misa ni mi moletin nan xil tangan xa xil laseti mi vanut moletin xil ak. <sup>17</sup>Moletin xil vus langganien ba vuma langga vin xil. Di, moletin nan xil laleh viton rut beret e meseo xa langga lingi. Lase ni be valeat xil vuma valeat lu e le (12) iaxa pol ni rut anien xa di.

### **Pita Bitehiteni xa Iesu be Kristo**

#### *Luk 9:18-22*

<sup>18</sup>Vatei, Iesu miling vanut moletin xil e mileh moletin nan xil ba ladi se tangan ti vasis. E melele xa misis bus, xi misis pilei xil bitene, “?Moletin xil di labit inou nabe visi?”

---

<sup>m</sup> 9:10 Mat 14:13-21; Mak 6:30-44; Sion 6:1-15



<sup>19</sup>E xil labit rilomun ni mini labitene, “Rute ngan xil labit xouk obe Sion xa di tekas moletin xil. Rute ngan xil mun labit xouk obe provet Ilaetsa, e ngan tesav xil mun labit xouk obe provet tei te tiamu xa meul rilomun ra maten.”

<sup>20</sup>E Iesu misis pilei xil bitene, “?E xamim, ma midep? ?Mubit inou nabe visi?”

E Pita bitehiteni bit, “Xouk, obe Kristo xa Hi tehiti xati.”

<sup>21</sup>Ma Iesu misep xol xil tangan xa linavit sepinien ak ti mi moletin sav xil. <sup>22</sup>Di, xi biteni mi xil bitene, “Reitin mak, holesok xil holu mei lisak ni Nat Moletin ti ilong pangas xi. Elda xil na Siu xil, Vat xil na pris xil, e tisa xil te Rae xil na Mosis, xil ngasen ti lisin ni. Vengan xa Hi ling xati xa xil lihasi imat. E melengien tol nen, imeul rilomun ra maten.”

### Suse Tangan Moletin Vahusil Iesu Nggeih

<sup>23</sup>Di, Iesu biteni mi xil bitene, “Xosxa tei e xamim ihit ihusil nou, ma bos xa isikoe xol xi ra holesok xil xa xi kestang di ien bei. Ti, ipo eivave nan melengien xil ngasen, ti, ihusil nou.” <sup>24</sup>Vengan xa xosxa tei e xamim bit vahur xat meulien nan, ma ikesae rani. E xosxa tei maen ni meulien nan mikesae ve nou, ma moletin ak kestang ihur meulien sal. <sup>25</sup>?Xosxa moletin tei mileh sen holesok xil te ut etan ak be nan, e tahir meulien sal ti, ma itep? Melele xa ikesae, ma itep e huit polien nan? !Ihe tovuol! <sup>26</sup>Xosxa moletin tei be unoun tangan xa vahithiteni xa di nggusil nou e pispisien navan, ma Nat Moletin mun ihe unoun ni. Reitin, ihe unoun ni melele xa imei itel miehien nan xa nggoni miehien na Tamen, e na masxaxa eo xil. <sup>27</sup>Reitin nabiteni mi xamim, rute xamim xa musoh mudi xiak, munamat ti mu ituxoh melele xa mupus Hi mei istal ihe suv toto e meulien na moletin xil.”

### Tenbe Iesu Mihinehin

#### *Luk 9:28-36*

<sup>28</sup>Melengien tol e he sav (8) mitavi ni melele xa Iesu tehiti kil holesok xil ak mi moletin nan xil; xi tehur Pita, Sion e Temis lattehusili lattehe nesao e vathu tei tangan latoha latsis. <sup>29</sup>E melele xa di misis, valnaon bemei biles e eising nan mei mieh vuma mihinehin pupu. <sup>30</sup>E vatakes, moletin lu mun mei lustal e lusepin del Iesu. E xalu ak, tei be Mosis, e tei mun Ilaetsa, <sup>31</sup>e miehien mikapis xol xatel. Lubit kila mi Iesu xa melengien mei istal tangan polien nan ivus e hal Serusalem, e ihe reling ut etan. <sup>32</sup>E melele nen ak, Pita, Sion e Temis, met xeihen bas xatel. E melele xa latmea e latketch mikapis, lattemanin xa Iesu di soh del moletin lu mun, e miehien mikapis

---

<sup>n</sup> 9:23 E melengien xil ngasen rivue xat xir tangan rihur longpangasien vengan xa di ranggusil Iesu Kristo.

xol xatel. <sup>33</sup>E melele latopusi xa Mosis e Ilaetsa sangas laloheling Iesu, Pita misep talang mini bitene, “Suv, bos mak mu xa rati tak. Ratiso horao ihe tol: tei ihe mam, tei ihe ma Mosis, e tei mun ihe ma Ilaetsa.”

<sup>34</sup>Melele xa Pita di tamu misepin, momah tei xa mattel miloh bemei da xol xil, misak ni uliatel mikan pupu. <sup>35</sup>Di, latelong rae tei nggo momah bemei bitene, “Ngan ak be horamue navan xati xa inou natehosei. !Muteong xati!”

<sup>36</sup>Melele xa rae ak misepin bus, latepusi xa Iesu misoh da tasen. Holesok xil xa Pita, Sion e Temis lattelonge e lattepusi; latnggur xati be natel tang. Lattavit pas ti mi moletin sav xil, e melele nen xil ak.

### Iesu Minggol Rat Ninin Tesa ra Horamue Tei

*Luk 9:37-43*

<sup>37</sup>E makoe nen, Iesu del moletin nan xatel, Temis, Sion e Pita, latdilomun latnggo vat hu latemei e tan. E moletin xil holu lamei labit lapus Iesu. <sup>38</sup>Moletin tei xa tete mesal te vanut moletin ak mikei nggeih ba ni Iesu bitene, “!Tisa! Ieok bei xouk li himetu xa omei opus ti mu natuxuli xa be tei takes tang navan. <sup>39</sup>Ninin tesa tei di bemei en e misak ni di mikei nggeih, di malili tova tang, e pol ni rurungon di misol mun. E melele xa ninin tesa bemei en, misak ni malili nggeih xa tave relingi ti. <sup>40</sup>Nadak kes moletin nam xil tangan xa lavol rati relingi e xil lasakrasi.”

<sup>41</sup>Iesu biteni mi moletin nan xil bitene, “Xamim moletin xil te xosali, neketen namim tovuol e vatumim nggeih pupu! ?!Nasakras nate visal xamim vehakut e ti nitutou ni xamim!”

Di, misemae ni moletin ak bitene, “Hur horamue nam vamei inggak.” <sup>42</sup>E melele xa horamue ak di kakao bemei visal Iesu, ninin tesa nan nggop tan ni e di mulul ni e tan. Di, Iesu misepin nggeih ba ni ninin tesa ak, ma be relingi. E horamue ak milonge bos mun e Iesu midali ba milingi mi tamen. <sup>43</sup>Moletin xil xa lapusi mak, lamesep tova tang ni xeihen na Hi xa mahulong.

### Iesu Misep Usil Maten Nan

*Luk 9:43-45*

Melele xa moletin xil di labesi xil ve naha xa Iesu di pol ni, xi misepin ba ni moletin nan xil bitene, <sup>44</sup>“Xamim, muteong kuhi ni sepinien navan e iemim nabong ni ti naha xa nabit namiteni mi xamim xiak. Veter mu, moletin tei imae ni Nat Moletin ihe e he moletin xil te ut etan.” <sup>45</sup>E moletin nan xil ak latakil ti koute te sepinien nan, vengan xa minggus tamu ra xil. E xil labe unoun pupu tangan lasis kuh koute mini.

### Visi be Eilep Mili?

*Luk 9:46-48*

<sup>46</sup>Dutou ni, moletin xil na Iesu di langor mi xil mun tang usil visi e xil iaxa imei ihe eilep mu e xil. <sup>47</sup>Iesu mikil nenemien nae, misak ni midali horamue

tei xa hokorong tang e pol ni mei misoh e rin. <sup>48</sup>Di, bitene mi xil bitene, “Moletin tei xa minggur pilei movotei xil nggoni horamue ak vengan xa xi di nggusil nou, ixoni ngan xa moletin ak di nggur pilei nou. E tei xa di nggur pilei nou, ixoni ngan xa di nggur pilei ngan xa misa nou namei. Vengan xa visi e xamim xa ling nenemien nan be tan e di dutou ni moletin xa tave ti neta e pe met moletin xil, xi vari iaxa be eilep mu mili teisav e xamim e pe met Hi.”

**Moletin xa Di Tavae Ti Vatel Xamim, Xi Be Tei Xamim**

*Luk 9:49-50*

<sup>49</sup>Sion biteni bit, “Suv, mapus moletin tei di nggol rerat ninin tesa xil e hisom, ma masep pangasi tangan xa napol ni ti mun vengan xa xi tave tei xamem ti.”

<sup>50</sup>E Iesu biteni mi Sion del moletin nan xil bitene, “Munasep xole ti vengan xa moletin xa di tavae ti vatel xamim, xi be tei xamim.”

**Metimal Tei Tahal Sameria Ien Tavei Vahur Pilei Iesu**

*Luk 9:51-56*

<sup>51</sup>Melele xa melengien bemei sangas tangan Hi vahur rilomun ni Iesu vahe ut nesao, xi pol ni nenemien nan nggeih tangan vahe Serusalem.

<sup>52</sup>Ma xi misil rut moletin xil ladiamu ni laba. Xil labe metimal tei na mol Sameria xil tangan lasak mese ni holesok xil en vatatili. <sup>53</sup>E moletin xil te metimal ak labit Iesu nava ti visal xil vengan lakila xa Iesu di nggusil suse tangan vahe Serusalem.<sup>o</sup> <sup>54</sup>Melele xa moletin na Iesu xalu ak, Temis xal Sion, lupus sexien ak, lusus Iesu lubitene, “?Suv, iem bei tangan malokei ve upang vaxo ut nesao mei valen xil?”

<sup>55</sup>E Iesu biles e misepin nggeih mi xalu. <sup>56</sup>Di, Iesu del moletin nan xil lakasal labe metimal tei mun tesav.

**Moletin Xil xa Labit Lavusil Iesu Linem Kuhi Mu**

*Luk 9:57-62*

<sup>57</sup>Melele xa di laba, moletin tei biteni mi Iesu bitene, “!Ut xave xa uha en, inou nihusiluk!”

<sup>58</sup>E Iesu biteni mini bitene, “Asu xil<sup>p</sup> vangavul tepaten mae di, e tuman xil mun nunum mae di. E inou, Nat Moletin, von pat en navan tovuol xa nakila nangel en.”

---

<sup>o</sup> **9:53** Mol Sameria xil del mol Siu xil di laketeh misa ni xil vengan xa mol Sameria latetelihe mi ngan xil xa tave ngan Siu e lamot mi Hi e ut sav tei. Nousav, mol Siu xil lakakao xoteh tan nae melengien tol e melele xa lave Serusalem tangan lamot mi Hi. Misak ni, mol Sameria holu iexil tavei ti lasa anien tova mu ut tepaten mi xil. Ve rin ak, mol Sameria xil latamaal ti melele lakila xa Iesu vahe Serusalem tangan vamot mi Hi.  
<sup>p</sup> **9:58** Luk bit ‘fokis xil’ xa langgoni kuli reran xil. E nggoni asu xil, lapol vangavul be nim mae.

<sup>59</sup>Iesu biteni mi moletin sav mun bitene, “!Husil nou!”

E moletin ak bit rilomun ni mini bitene, “Suv, itiamu umae ni nou nitilomun niha, nitunat ni tata navan ituxoh melele xa nitihin ni.”

<sup>60</sup>E Iesu biteni mini bitene, “Ling ngan xil xa di lalel<sup>a</sup> ti litihin nae xil xa lalel. Xouk uha usetu ni longeongen hos usil Hi xa imei ihe suv toto te meulien na moletin xil.”

<sup>61</sup>Tei mun bitene, “Suv, inou nihusiluk. E itiamu, umae ni nou ha nisepling kor ni vatimol navan xil.”

<sup>62</sup>E Iesu biteni mini bitene, “Moletin tei xa pol kokot ni polien tei e nenemien nan mili tou usil meulien matu nan, ma xi tapin ti tangan vahur polien na Hi xa be suv toto te moletin xil.”

### Iesu Misil Rerat Vanut Moletin Tangan Lava Lapol

*Luk 10:1-12*

**10** <sup>1</sup>Dutou ni ngan nen ak, Iesu bosei moletin xil xa latehe hanutap tol e lu e le mun (72). Di, misil rerat xil labe lu lu tangan lave metimal xil vus e rute sav xil mun. Iesu bit xil litiamu ni, e navehi, xi mun ha imos e xil. <sup>2</sup>Iesu biteni mi xil bitene, “Anien holu di e naho, e moletin xil xa lava ti laleh rerati latave holu ti. Mak, ma musis Suv te naho tangan xa vasa ti mun moletin xil xa liha ti lipol e naho san. <sup>3</sup>!Muha itel merouen tang! Moletin holu ti lisep pangas xamim ve sepinien namim. Reitin mak, xosali, nasil rerat xamim muva xiak, munggoni sulut sipsip xil xa laba ladi hilaep te kuli reran xil. <sup>4</sup>Muha ihe hem ihon tang. Munaleh ti vatu, mu ateli, mu sandel timun natel xat xamim. Munahas ti melengien natel moletin xil e suse namim. <sup>5</sup>E melele xa ba mube nim ngan, neta xa muhiteni itiamu, muhitene, ‘Tomat na Hi iti mi xamim e nim ak.’ <sup>6</sup>Xosxa ngan xa de nim be moletin te tomat, ma muling sepinien te tomat ixulehi itel xati. E xosxa tovuol, ma tuxolxatien te tomat ihe relingi, e itilomun imei e xamim. <sup>7</sup>Muti kat tang e nim ma moletin xil xa langgur revi xamim, e anien mu oei eah xa lasa ni mi xamim, muhuri, vangan xa moletin te polien ikila ihur huite xil te polien nan. Munalil ti e nim xil. <sup>8</sup>E melele xa mube taon tei e moletin xil te rute ak langgur pilei xamim, mua anien taxa lasa ni mi xamim. <sup>9</sup>Mupol ni ngan xil xa lamesei ladi e rute ak, lilonge ihos rilomun. E muhiteni mi xil muhitene, ‘Hi dat sangas visal xamim e bit vahe suv toto te meulien namim.’

<sup>10</sup>“E xosxa mube taon tei e moletin xil te rute ak latahur pilei xamim ti, muha musoh e valkesao e muhiteni, <sup>11</sup>!Vengan xa mutahur pilei xamel ti, iemel ti tavei meas te vonemi mun xa di xat kaelemel, malevas rati iha xat

---

<sup>9</sup> 9:60 Ngan xil xa neketen nae tovuol e Iesu, e pe met Hi xil langgoni ngan xil xa lalel tui.

xamim xa neta xa mupol ni mi xamel, imei rilomun, ia xamim. E mutakil ti vari xa xosali ak, Hi teme sangas ni xamim e tehit imei ihe suv toto e meulien namim, e di musin ni.’ <sup>12</sup>Nabiteni mi xamim, melele xa Melengien Kor imei, pangasien xa imei e moletin xil te rute ak ixeih pupu, ili pangasien xa Hi isa ni mi moletin xil xa lateti e hal Sodom te tiamu.’

### **Selxatien Ba mi Xil xa Lasin Moletin Xil na Iesu**

*Luk 10:13-16*

<sup>13</sup>“?Munem xat rute tol xa moletin xil latake reitin en sepinien nam ti? Naso sepinien ak ba xat xil: Isa tova tang mi xamim, moletin xil tahal Xorasin! Isa mun ve xamim tahal Betsaeta! Xosxa moletin xil tahal Taer mu Saedon, xa latave Siu ti, lava lapus hisit merekel vaxoni ngan xa mistal mi xamim, ma nanemi nabit xil laviles meulien nae ra tesaen. E xos vahit xil lipisen ni xa lalonge vasa vamak: lasing ni talmusu xil, e laxul ni vulmeas. <sup>14</sup>E Melengien Kor, Hi en isae e moletin xil tahal Taer e Saedon ili xamim. <sup>15</sup>?E xamim, moletin xil tahal Kapaniam munemi mubit muhe ut nesao? !E-e, muhe tan, e von upang!”

<sup>16</sup>Di, Iesu biteni mi moletin nan xil bitene, “Moletin xa di miteong ni xamim, ma di miteong ni nou. E tei xa di misin xamim, ma moletin ak di misin nou. E moletin xa di misin nou, xi di misin ngan xa misa nou namei.” Di, xil latasil laba.

### **Moletin Xil xa Iesu Tesil Rerat Xil Ladilomun**

*Luk 10:17-20*

<sup>17</sup>Melele xa moletin xil na Iesu xa labe hanutap tol e lu e le mun (72) ladilomun, xil lamaal pupu. Labiteni mi Iesu labitene, “!Suv, melele xa masemae mi ninin tesa xil e hisom, mapusi xa xil di lalong xati!”

<sup>18</sup>Iesu bit rilomun ni mi xil bitene, “Polien namim misak ni xeihen na Temat mot vari nggoni an xa milangas nggo nesao bemei e tan. <sup>19</sup>!Muteong! Nisa xeihen mi xamim tangan muhe xat uineh<sup>s</sup>, tetal xil xa misa, e holesok xil mun xa ladi e xeihen na Temat, e neta ti naxul xamim. <sup>20</sup>E munamaal ti vengan xa ninin tesa xil lalong xat xamim. Bos mak mu xa ti mumaal vengan xa Hi midis xat hisemi tuei di Vanuvei te Meulien e ut nesao.”

### **Iesu Memes Hi ve Polien na Moletin Nan Xil**

*Luk 10:21-24*

<sup>21</sup>Iesu di mei polu ni Ninin Eo, misak ni memaal himetu, ma misis bitene, “Tata, xouk obe Suv te holesok xil ngasen e ut nesao e ut etan.

---

<sup>r</sup> 10:12 E Jen 19:1-26, moletin xil tahal Sodom labit lavapurun masxaxa lu na Hi. Misak ni, Hi tesa longpangasien mi xil e melele teni e isa ni mun e Melengien Kor. <sup>s</sup> 10:19 Luk bit ‘scorpion’ xa di dili le moletin ni poisen, e vengan xa ‘scorpion’ tovuol e Vanuatu, matling ‘uineh’ xa kila mun vatili le moletin en poisen.

Namesuk himetu vengan xa naha xa xouk di ososo ni ra moletin xil xa labe metisou, di opisen ni mi movotei xil xa latasukul kuhi ti. Io Tata, ngan ak di nggusil naha xa xouk di iem bei vastal.”

<sup>22</sup>Di, Iesu biteni mi vanut moletin xil bitene, “Tata navan miling holesok xil vus di tuei e heok. Moletin xil latapus kil ti Nat Hi, Tamen kestang pus kila. E moletin xil latakil ti Tamen, Natnali kestang mikila, del ngan xil xa xi ien bei vapisen ni mi xil.”

<sup>23</sup>Di, Iesu biles, pus moletin nan xil e misepin ba ni xil tase bitene, “Sien iti mi xamim vus xa di mupus xat holesok xil xa di mistal xiak ni metemim. <sup>24</sup>Nabiteni mak mi xamim, provet xil holu te tiamu e suv toto xil holu mun iexil tehei xa ti lapus ti holesok xil xa xamim di mupusi, e latnapus ti. E iexil tehei xa lalong ti sepinien xil xa xamim di muteong ni, e latnalong ti.”

### Iesu Dei Vole Tei Usil Moletin Hos Tei Tahal Sameria

*Luk 10:25-37*

<sup>25</sup>Vatei, tisa tei te Rae xil na Mosis bemei tangan vasak pis Iesu. Ma misisi bitene, “?Tisa, nipol ni itep ma nihur meulien sal?”

<sup>26</sup>Iesu bit rilomun ni mini bitene, “?Rae xil na Mosis di biteni naha? ?Uhiteni minou?”

<sup>27</sup>Moletin ak bitene, “ ‘Tem ihei Hi xa be Suv nam ixo tinom tevi, ixo meulien tevi nam, ixo xeihen tevi nam, e ixo nenemien tevi nam.’ E ‘iem ihei tua nam ixoni ngan xa iem bei xouk tasom.’”

<sup>28</sup>Iesu bit rilomun ni bit, “Sepinien nam momal. Xosxa upol ni mak, ma uhur meulien sal.”

<sup>29</sup>E moletin ak bit vapisen ni xa xi momal tang, ma misisi mun bitene, “?E moletin si vari iaxa be tua navan?”

<sup>30</sup>Ma Iesu dei vole tei mini bitene, “Vatei, mol Siu tei mea nggo Serusalem mikakao bit vahe Seriko. Melele xa di nggusil suse ba, moletin tatei xil te kanen lamei ladal xati. Langgur rat eising nan e labasi, di, lalesae. Xil lalingi pat da nga, sangas vamat. <sup>31</sup>E melele nen tak, bos xa pris tei xa be Siu tei xa di nggusil suse bemei sangas visali. E melele xa mei pus moletin ak pat da, xi mitavi tang nggo ri suse. <sup>32</sup>Di, ngan Siu tei mun xa pol e Nim Eo na Hi nggusil suse bemei sangas visali. Xi mun mikakao e ba miketeh pus moletin ak xa pat da. E xi mun mitavi tang nggo ri suse ba. <sup>33</sup>Di, ngan Sameria tei, xa Siu xil di laketeh misa mi xil, bemei sangas visal rute xa moletin ak pat da en. E melele xa miketeh pusi, en misae pupu li en. <sup>34</sup>Misak ni xi bemei visali, e mikas moten menuk nan xil ni uae, bas oel en, e pis xol xil. Di, po rati, milingi e dongki san, e poe ba di milaxati e nim te ngelen tei. <sup>35</sup>E makoe nen, misa taosen lu (2000) vatu mi moletin te nim ak. Di, biteni mini bitene, ‘Uloxat

---

† 10:27 Dut 6:5; Lev 19:18

kuh moletin xa xiak. E xosxa mani ak tapin ti, ma nisa rute mun e melele xa nitilomun nimei.’”

<sup>36</sup>Di, Iesu misis tisa te Rae xil na Mosis bitene, “?Onemi obit naha? ?Visi e moletin xatel ak iaxa pisen sexien hos na tua tei na moletin xa moletin te kanen xil latehasi?”

<sup>37</sup>E xi bit rilomun ni mi Iesu bitene, “Moletin xa pisen esaeen nan mini.” Ma Iesu bit rilomun ni bit, “Bos, ma xouk mun uha upol ni imak tang.”

### Iesu Be Nim Ma Merta xal Meri

*Luk 10:38-42*

<sup>38</sup>Melele xa Iesu del moletin nan xil di lakakao tangan lave Serusalem, xil lamei e metimal tahal Betani. E metimal ak, atou tei da en, hisen Merta. Xi minggur pilei xil lamei e nim man. <sup>39</sup>Tunahin, hisen Meri, bemei visal Iesu e dotan sngas visal len. Xi di miteong kuhi ni pispisien nan. <sup>40</sup>E Merta misakras vateong kuhi vengang xa xi di misak mese ni anien ae. E vengang xa xi pol pupu, ma mei biteni mi Iesu bitene, “?Suv, midep? ?Onemi bos tang xa tuxahin miling polien xil ak di e bit inou tasok ti nipol ni? !Hiteni mini vamea vatutou ni nou!”

<sup>41</sup>E Suv biteni mini bitene, “Merta, onexo pupu ve holesok xil holu. <sup>42</sup>E neta tei takes momal iaxa xamil mulikila mulipol ni. Meri pol ni neta xa momal ngamu, ma inou, ninahur rati ti rani.”

### Iesu Pispisi Usil Suse te Sisen

*Luk 11:1-13*

**11** <sup>1</sup>E melengien tei, Iesu di misis e rute tei. E melele xa misis bus, moletin tei nan biteni mini bitene, “Suv, pispisi mi xamem ni suse te sisen xa momal ixoni ngan taxa Sion xa di tekas moletin xil di tepispisi mi moletin nan xil. <sup>2</sup>Ma Iesu biteni mi xil bitene, “Melele xa musis, muhitene imak:

‘Tamemem, mamerere ni hisom xa be Eo.

Masis tangan xa umei uhe suv toto  
te meulien na moletin xil te ut etan.

<sup>3</sup>Sa anien mi xamem ipin te melengien xil vus.

<sup>4</sup>E uketeh ihos li mi xamem melele xa mapol misa minuk,  
vengang xa vehakut, xamem mun di maketeh ihos  
mi ngan xil xa di lapol misa mi xamem.

Onamae ni ti sakpisien xa ipol ni mumot e tesaen.’”

### Iesu Dei Vole Usil Sexien te Sisen

*Luk 11:5-13*

<sup>5</sup>Di, Iesu biteni mi moletin nan xil bitene, “Xosxa tei xamim vahe tim sa tua tei nan e hilaep te vongien e vasisi vahitene, “?Tuak, okila osa ti

anien minou? <sup>6</sup>Vengan xa tua tei navan nggo sotin bemei e tim savan, e anien tovuol xa nasa ni mini.'

<sup>7</sup>"Ma ngan xa de nim vasepin rilomun vamei mi xouk vahitene, '!Ei, onasa polien ti minou! Puiteh mikoe ngamu, e horamue navan xil mun lapat ladel nou tuei. !Ma nasakras namea nasa neta tova minuk!'

<sup>8</sup>Nabiteni mi xamim, tave ti neta xa bit namea ti e nasa ti anien minuk vengon xa xouk obe tunali, e vengon xa otave unoun ti e dat osisi, osisi, osisi vuma xi mikila imea e isa holesok xil vus minuk xa iem bei.

<sup>9</sup>"Mak, ma nabiteni mi xamim, xosxa iemim bei neta ngan, musis Hi ven ma mukila muhuri. Xosxa mulang ni, ma mukila mukameti. E xosxa murei puiteh ven, ma mikila isah puiteh mi xamim. <sup>10</sup>Vengan xa ngan xil vus xa di lasis neta langguri; e ngan xil xa lalang ni neta likameti; e mikila isah puiteh mi moletin xil xa di larei. <sup>11</sup>?Xos xouk xa obe tata tei, e natumali misisuk xa bit va meseo tova, <sup>12</sup>ukila usa tetal xa misa sung mini? ?Mu xosxa misisuk bit va rel tuto, ma ukila usa hat<sup>u</sup> xa minggan mini? <sup>13</sup>Mak, ma tave ti neta xa mube moletin tesa xil, e mukila di musa neta xa bos mi horamue namim xil. Ma, nabiteni mi xamim, Tamemim xa de ut nesao xa bos mu mili, ti isa Ninin Eo nan mi ngan xil xa di lasisi."

#### **Rut Moletin Labit Iesu Pol ni Polien Nan Nggo Xeihen na Temat**

*Luk 11:14-23*

<sup>14</sup>Vatei, Iesu pus moletin tei xa ninin tesa da en xa misak ni be vut, misakras vasepin. Ma Iesu minggol rati be relingi e moletin ak di misepin. Moletin xil xa lapusi latemanin ni. <sup>15</sup>E rute ngan xil labiteni labitene, "Belsepul" xa be suv na ninin tesa xil iaxa di misa xeihen mini, misak ni mikila minggol rerat ninin tesa ra moletin xil." <sup>16</sup>E rut moletin sav ngan xil labit lisak pis Iesu, ma lasisi tangan vapol ni merekel tova vaxo ut nesao mi xil tangan vapisen ni xa xeihen na Hi di mini.

<sup>17</sup>E Iesu mikil nenemien nae ma biteni mi xil bitene, "Xosxa moletin xil na suv toto tei di labae mi xil, ma xeihen na suv toto ak mei ihe neta sav tang. E xosxa moletin xil xa labe vatimol tei di labae mi xil, ma his vatimol ak ikesae. <sup>18</sup>Ma xosxa ninin tesa xil na Belsepul di labae mi xil, ma xi ihur xeihen itep? Nasepin ni mak, vengon xa mubitene inou nanggol rerat ninin tesa ra moletin xil nggo xeihen na Belsepul. <sup>19</sup>E xosxa mak, ma midep mi moletin namim xil? ?Xil langgol rerat ninin tesa xil ra moletin xil del xeihen na visi? Xil iaxa di lapien ni xa neta xa musepin ni tamal ti. <sup>20</sup>?E xosxa inou di nanggol rerat ninin tesa ra moletin xil nggo xeihen na Hi, ma ngan ak di pisen ni xa Hi mistal tuei e be suv toto te meulien na moletin xil.

---

<sup>u</sup> 11:12 Luk bit 'scorpion.' <sup>v</sup> 11:15 'Belsepul' be his tei te xaren xa di lakes Temat ni xa koute teni be 'Suv na angalu xil'.



<sup>21</sup>“Belsepul nggoni moletin te xeih tei xa di bue xat kuh xi del holesok xil nan te vaeen. Mak, ma xi mikila iketeh kuhi xol nim man, e neta ti mei napangei holesok nan xil. <sup>22</sup>E melele xa tei xa nggeih mili mei mistal mini e bas tan ni, xi ileh rerat holesok xil te vaeen itel holesok xil te nim man. Xi ileh rerat vuol ni e iseti mi moletin nan xil.

<sup>23</sup>“Mak, ma ngan xil xa latamos ti vatel nou, xil di labae minou; e ngan xil xa latatutou ni nou ti tangan laleh vituei ni moletin vaxoni sipsip xil, xil di langgol rerat xil laloh tasil.”

### **Ninin Tesa xa Be Reling Moletin Mikila Itilomun**

*Luk 11:24-26*

<sup>24</sup>Di, Iesu biteni mi xil bitene, “Melele xa ninin tesa be reling moletin tei ba, di mikakao e uruvuol tangan vakamet rute tova xa bos te ngel en. E xosxa takamet ti, ma xi misep tasen bitene, ‘Nitolomun nihe nim mavan xa natexo en natemei.’ <sup>25</sup>Ma dilomun ba, e mikameti xa nim ak langgur revu tuei. <sup>26</sup>Mak, ma ba milang ni ninin tesa sav xil xa labe lu e he sav (7) xa lasa mu mili. E ileh xil vus limei liti en. Nim ak be meulien na moletin, e xil lisak ni meulien nan isa mu ili ngan xa teta en te tiamu.”<sup>w</sup>

### **Moletin xa Pol Nggusil Sepinien na Hi Ihur Tuxolxatien Nan**

*Luk 11:27-28*

<sup>27</sup>Melele xa Iesu di tamu misepin ni holesok xil ak, atou tei xa de hilaep te moletin xil mikei ba ni bitene, “Nabit Hi misa tuxolxatien mi nana nam xa telinguk e telaxat kuh xouk.”

<sup>28</sup>E Iesu misa rilomun ni sepinien ba ni atou ak bitene, “E ngan xil xa di lalong sepinien na Hi e di lapol nggusili, xil iaxa, Hi ituxol xat xil.”

### **Moletin Xil Iexil Bei Lapus Merekel Tova**

*Luk 11:29-32*

<sup>29</sup>Melele xa moletin xil mei labe holu, Iesu misepin mi xil bitene, “Moletin xil te xosali ak lasa tang. Di lasis nou tangan lipus merekela tova, e Hi napol ni ti neta. Xil ak lipus merekela na Siona kestang. <sup>30</sup>Merekela xa testal mi Siona<sup>x</sup> tepisen ni xa sepinien xa Hi tesa ni mini tangan vasa ni mi mol Nineve xil tehe reitin. Mak, ma Hi ipol ni mak mi Nat Moletin tangan ipisen ni mi moletin xil te xosali ak xa sepinien nan be reitin. <sup>31</sup>E Melengien te Lepisien, moletin xil te xosali limeul rilomun ra maten tangan Hi ilepis xil. E melele nen ak, Kuin tahal Siba xa tave Siu ti imeul mun, e isepin ixeh xat xil. Xi ipol ni mak vengan xa tekakao sotin temei

---

<sup>w</sup> 11:26 Melele xa ninin tesa tei be reling moletin tei, xosxa tamaen ni ti Ninin Eo mei napolu e meulien nan, ma ninin tesa ak ikila imei rilomun en.   <sup>x</sup> 11:30 Siona 2:17 bit Siona de vang lerumrum melengien tol, e tamat ti.

tengan valong sepinien te metisouen na Suv Toto Solomon te tiamu. !E taxeak, tei xa mili Suv Toto Solomon da xiak e xil di lasin ni! <sup>32</sup>E moletin xil tahal Nineve mun xa latave Siu ti limei e lisepin ixehi xat moletin xil te xosali ak, vengan xa xil latehiles meulien nae melele xa latelong provet Siona tesetu mi xil. !E taxeak mupusi, tei xa mili provet Siona da xiak e xil di lasin ni!”

### Iesu Dei Vole Usil Laet

*Luk 11:33-36*

<sup>33</sup>Di, Iesu dei vole tei mi xil bitene, “Moletin tovuol tamu xa vasahan laet nan, ti, ha vasoso ni mu vakutaxole ni pesin tei. !Tamak ti! Melele xa misahan ni bus, poe ba misoxolein ni de kesao. Mak, ma melele xa moletin ngan bemei e nim mikila vapus ut valeluv. <sup>34</sup>Mete xir mun nggoni laet te tenbe xir. Melele xa mete xir di bos, radi e miehien e tenbe xir mikila vapol ni holesok xil ngasen. E melele xa mete xir bar, ma radi e maluxoluken e tenbe xir misakras vapol ni neta vahe holu.” <sup>35</sup>Mak, ma mule kil kuh meulien namim, xa mudi e miehien mu maluxoluken. <sup>36</sup>Xosxa meulien namim di e miehien, e maluxoluken tovuol en, ma meulien namim ileluv kuhi ixoni laet tei xa pili e mileluv kuhi xol xamim.”

### Iesu Misepin Nggeih ve Sexien na Parasi Xil Del Tisa Xil te Rae xil na Mosis

*Luk 11:37-54*

<sup>37</sup>Melele xa Iesu misepin bus, Parasi tei mei misasi tangan ha vanien vatela e tim san. Ma Iesu be xalu luba. <sup>38</sup>E Parasi ak mitemanin melele xa pusi xa Iesu takas hen ti e ba dotan tangan vanien. <sup>39</sup>Ma suv Iesu biteni mini bitene, “O reitin, xamim Parasi xil, munggoni kap e pelet te anien en namim xa di mukas moten ni e hale tang, e vangite mumu minggoni tinemi xa polu ni nenemien te hokanen e tesaen xil. <sup>40</sup>!Mube unu xil! Mutakil ti xa Hi xa pol ni hale te neta, xi mun tang iaxa pol ni vangite? <sup>41</sup>E bos xa musa oei xa de vangit kap e anien xa de vangit pelet mi ngan xil xa labe hoeo. Mak, ma meulien namim imese kuhi pe met Hi.

<sup>42</sup>“Isa pupu mi xamim, Parasi xil, ve pangasien xil xa imei e xamim. Di musa taet mi Hi ni tutut uvei xil te kuk en xa pol ni vo anien bos. E di mutapisen eheien namim ti mi Hi mu mi mosav xil usil sexien xa momal xa ti mupol ni. Ti mupisen eheien namim vatiamu, ti, mupol ni tutut taet namim sung vatutou.

<sup>43</sup>“Isa pupu mun mi xamim, Parasi xil, vengan xa di mubosei von totanen na eilep xil e nim xil te pispisien. E von maket mun, iemim bei

---

<sup>†</sup> **11:34** Xosxa muke reitin e sepinien te reitinen, ma meulien namim polu ni miehien. E xosxa mutake reitin ti en, ma meulien namim iti e maluxoluken.

xa moletin xil ti lihur pilei xamim e ti limerere ni xamim. <sup>44</sup>Isa pupu mi xamim, vengan xa xamim, meulien namim tamemese ti. Munggoni von tehinen xil xa latasimele ti vati en, xa moletin xil di lakakao xati e latakil ti xa neta vutei bo di en.”

<sup>45</sup>Tei e xil xa be tisa te Rae xil na Mosis biteni mi Iesu bitene, “Tisa, melele xa osepim mak, opangei xamem mun vari vengan xa sexien holu namim mak tang.”

<sup>46</sup>Ma Iesu biteni mini bitene, “Isa pupu mun mi xamim tisa xil te Rae xil na Mosis, vengan xa musa rae xil holu mi moletin xil xa nggoni eipo xa meas pupu. Misak ni, xil lasakras lapoe, e xamim di mutapol ni ti neta tova vatutou ni xil ni eipo xil ak. <sup>47</sup>Isa pupu mun mi xamim, vengan xa di mupol kuhi ni tutut nim xil da xol von tehinen na provet xil xa avu namim xil mun tang te tiamu latehas vin xil. <sup>48</sup>Xil latehas provet xil, e xamim di mupol ni nim tehinen nae. Mak, ma di mupisen ni xa mubit avu namim xil lapol ni sexien tei xa bos. <sup>49</sup>Ngan ak nggoni naha xa Hi xa be metisou pupu tehiteni tehitene, ‘Inou nisil provet itel eloheoh navan xil liha mi xil. E xil ak lihas ngan xil lilel e lisak ni ixeh mu mi ngan tesav xil.’ <sup>50</sup>Mak, ma ve moletin xil te xosali ak da nga lapol sexien ak, Hi isa pangasien mi moletin xil te xosali ak ve re provet xil xa de he avu namim xil, e melele xa Hi tepeas ni ut etan ma duxoh xosali, re ak de hemim mun. <sup>51</sup>Reitin mak nabitene mi xamim, e melele xa avu namim xil latehas vin Evel duxoh melele xa latehas vin Sakaraea hilaep te hor te sanien del Nim Eo na Hi, Hi isa longpangasien ve maten xil ngasen nae mi xamim vus te xosali ak.

<sup>52</sup>“Isa pupu mun mi xamim tisa xil te Rae xil na Mosis, vengan xa moletin xil labit lamei visal Hi e munggur soson ki te puiteh xa xil lava en tangan lakila en. !Xamim iemim ti tavei muve puiteh ak, e musikoe xol moletin sav xil mun xa iexil bei lave en e lamei visal Hi!”

<sup>53</sup>E melele xa Iesu be ling nim ak, tisa xil te Rae xil na Mosis del Parasi xil, iexil mikati pupu. Misak ni, e melengien ak ba, xil latesis rovui ni sispileien xil holu xa xeih tangan vasak ni Iesu vasep usil neta holu. <sup>54</sup>Xil lateling xati tangan lasak ni Iesu vamot e sepinien nan.

### Isu Misel Xat Moletin Xil ve Sexien na Parasi Xil

#### *Luk 12:1-3*

**12** <sup>1</sup>E melele nen tak, moletin xil di labe holu xa labe holu, e dit lating lamei tangan xa lapus Iesu. Xil dit lapel xat le xil. E Iesu misepin diamu mi moletin nan xil bitene, “Muketeh kuhi ve pispisien xil na Parasi xil xa labe vat luvosen tang. Nggoni is xa pol ni pulaoa mikaio, pispisien nae di purun xuxus ni nenemien na moletin xil. <sup>2</sup>E neta xa mukutaxole, Hi ital rati imei valkesao. E neta xa moletin misak pisi di misoso ni, Hi isak ni istal imei kesao tangan moletin sav xil ti lipusi.

<sup>3</sup>Holesok xil xa di musepin ni e ut te maluxoluk, veter mu, moletin sav xil mei lilonge e melengien tang. E holesok xil xa moletin di misep piao ni e nim taxeak, dutou ni, moletin sav xil ha ti lisoh e hilaep te metimal e likei ni ixeih tangan moletin xil ngasen lilongeong ni.”

### **Ulum Ikan ni Hi Kestang**

*Luk 12:4-7*

<sup>4</sup>Iesu biteni mun mi xil bitene, “Nabiteni mi xamim, tua navan xil, ulimim nakan ni moletin xil ti xa likila ti lihas vin tiei namim. Vengan xa dutou ni, misakras lipol ni ti neta mun mi xamim. <sup>5</sup>E inou nipisen ngan xa ti ulimim ikan ni. Ulimim ikan ni Hi kestang, vengan xa melele xa bas vin moletin mat, xi nggur xeihen tangan ikila iso ni ihe Von Upang xa misakras vamat. !Reitin mak, ulimim ikan ni Hi kestang!

<sup>6</sup>“Tuholaea xil xa latereli tang, lapos ni vahe selen lu tang e tei, e Hi en tabong ni ti tova vari. <sup>7</sup>Mak iaxa, munanexo ti vengan xa meulien xamim mubos mak mu mili rut tuman xil ak xa latereli tang. Ngan ak reitin mak, Hi mikila mun hilimim kekes tang xa di e vatumi.”

### **Munahe Unoun ni Iesu Ti**

*Luk 12:8-12*

<sup>8</sup>Di, Iesu biteni mi xil bitene, “Ngan xil xa di labiteni xa langgusil nou pe met moletin xil, ma Nat Moletin mun ihiteni xa xil labe nan pe met masxaxa xil na Hi. <sup>9</sup>E ngan xil xa labe unoun tangan laviteni xa langgusil nou pe met moletin sav xil, ma Nat Moletin mun ihe unoun tangan ihiteni xa xil labe nan pe met masxaxa xil na Hi.

<sup>10</sup>“E ngan xil vus xa lisepin isa e his Nat Moletin, Hi ikila iketeh ihos ni xil tamu. E ngan xil xa lisepin isa e his Ninin Eo, ma Hi naketeh ti navos ni xil vari.

<sup>11</sup>“E melele xa moletin xil lital kuvun xamim tangan lisis pilei xamim ni neta ngan pe met eilep te nim te pispisien, mu pe met eilep xil te kavmen, munanexo ti. Munanem ti nahe holu ve sepinien xil xa ti musepin ni, <sup>12</sup>vengan xa, e melele nen ak, Ninin Eo iaxa ipispisi ni xamim ni sepinien eah xa mukila musepin ni.”

### **Iesu Dei Vole Usil Unu Tei xa Holesok Nan Holu**

*Luk 12:13-21*

<sup>13</sup>Moletin tei e vanut moletin ak misis Iesu bitene, “Tisa, tata navan mat tuei. Hiteni mi tua navan tangan vaseti holesok xil na tamemel mi xamel.”

<sup>14</sup>E Iesu bit rilomun ni mini bitene, “?Ei, visi iaxa miling nou tangan nilepis xamil mu niseti holesok na tamemil xa milingi di mi xamil?” <sup>15</sup>Di, xi biteni mi xil vus bitene, “Muvue xat xamim, muketeh kuhi xol sexien

xil ngasen te hokanen. Meulien namim tave ti holesok xil te ut etan. ?Neta sav xa moletin tei holesok nan holu, e ixal rat meulien te reitinen itep? !Misakras!”

<sup>16</sup>Di, Iesu dei vole ak mi xil bitene, “Vatei, moletin tei da, e holesok nan holu. E naho nan, anien xil xa di en holu. <sup>17</sup>Ma nenemien tei bemei en xa bitene, ‘?Nipol ni itep? E nim xil mavan, ut tovuol mun xa nileh anien savan mei naling ni vati en. <sup>18</sup>!Aha nakila! Inou nipol ni imak: nitalelen nim xil xa hokorong tang xiak, e ti, nipol ni rute xil xa lihe neta hu e lihe tellep. Ti, niso anien xil ak itel holesok sav navan xil iti kuhi en. <sup>19</sup>Imak, ma inou nite meulien tei xa bos itel holesok xil navan. Xosali iha, ti ningel kuhi, ti nianien kuhi, e ti nimun kuhi; e ti nihesi nou, vehakut.’

<sup>20</sup>“E Hi ihiteni mini ihtene, ‘!Obe unu tova tang! E vongien ak tang, nihur rat meulien nam. ?Ma di, visi iaxa ileh holesok xil ak sung xa osi revi di ihe mam?”

<sup>21</sup>“Hisit sexien ak di mistal mi ngan xil xa be hokan e di lapolu ni holesok nae xil e ut etan, e mi holesok na Hi, xi napol ni ti neta.”

### **Munanexo Ti Vengan xa Hi Mikila Milaxat Kuh Xamim**

*Luk 12:22-34*

<sup>22</sup>Di, Iesu biteni mi moletin nan xil bitene, “Mak, ma nabiteni mi xamim, munanexo ti ve meulien namim: ve naha iaxa ti mua ni, mu ve naha iaxa ti musing ni ita xol tenbemim. <sup>23</sup>Meulien xa Hi misa ni mi xamim bos mak mu mili anien xil xa di mungga ni; e tenbemim bos mak mu mili eising xil xa di musing xole xamim ni. <sup>24</sup>Mupus ti tuman xil ak, xil latalih ti naho tangan laleh anien vaxo en. Pavah mae mun tovuol tangan lasi rep xat anien ae vati en. E Hi kestang di bangan xil. E pe met Hi, xamim mubos mak mu mili tuman xil ak. <sup>25</sup>Nenexoen misakras vapol ni meulien na moletin tei vahe teviei luvoluv mu. <sup>26</sup>E vengan xa nenexoen misakras vapol ni neta xa hokorong mak e meulien namim, ma veneh iaxa di munem pupu usil holesok sav xil mun xa iemim bei?

<sup>27</sup>Munem pisi usil hungovae xil xa di lameul. Xil di latapol ti, mu di latatil ti eising nae. E nabiteni mi xamim, suv toto Solomon te tiamu, eising nan xil tehos xa tehos; e hungovae xil ak, lasing bos mak mu mili. <sup>28</sup>Hi di mising xol kuh hungovae xil ak mak, xa ladi melengien tei takes, e visuvong meles, mot. Di, moletin miteas viton ni e milehi be upang. ?E xosxa ipol ni mak mi xil, ma munemi mubit Hi misakras vasing xol xamim? !Ei, neketen namim hokorong tova tang!

<sup>29</sup>“Tavos ti xa munexo ve naha xa mua ni mu mumu ni. <sup>30</sup>Hisit nenexoen ak be na moletin xil xa latakil ti Hi. E Hi xa be Tamemim mikil naha xa xamim iemim bei. <sup>31</sup>Bos mak mu xa itiamu, ti mumae ni Hi mei ihe suv toto te meulien namim. Ti, holesok xil vus te meulien, Hi ti isa ni mun mi xamim.

<sup>32</sup>“Munggoni sulut sipsip savan xil, ma ulimim nakan ti e munanexo ti vengon xa Tamemim memaal himetu tangan imei ihe suv toto te meulien namim e isa holesok xil vus xa di hen mi xamim. <sup>33</sup>Mak, ma mupos vuol ni holesok namim xil e musa vatu teni mi hoeo xil. Misak ni, Hi ipus kil sexien xil namim e iling xat huite teni e ut nesao. E rute ak, huite xil ak lisakras lavo e moletin misakras vakan ni xil. <sup>34</sup>Nabiteni mak vengon xa meulien namim iti sangas ni rute xa ti muling xat huit polien namim iti en.”

**Moletin te Polien Xil Ti Livue Xat Xil Vengon xa Navehi Ti,  
Suv nae Itilomun  
*Luk 12:35-40***

<sup>35</sup>Iesu biteni mun mi moletin nan xil bitene, “Vehakut, muvue xat meulien namim ve naha xa imei. Ti muxoni moletin te polien xil xa di lasing xol xil ni eising te polien e di lapo laet xa di pili. <sup>36</sup>Moletin te polien hos xil ak ladatil suv nae xa be anien tei te tetelien e latakil ti xa itilomun vilieh. Xil livue xat xil vehakut tang ve melele xa suv nae imei e ikes xil, ma vatakes, xil likila lisah puiteh. <sup>37</sup>Xosxa suv ak bemei e pus moletin xil te polien nan latapat ti e dit laketeh vesi, ma ilonge ihos. Reitin li nabiteni mi xamim, moletin te polien nan xil mun lilonge ihos, vengon xa suv ak kestang imerere ni xil: xi ising ni eising te polien, ikes xil mei lianien, e xi iaxa ihengan xil. <sup>38</sup>Tave ti neta xos suv nae bemei e hilaep te vongien mu e makoe roroh, moletin hos te polien xil xa labue xat xil vehakut lilonge ihos.

<sup>39</sup>“Mukil rin ak, xosxa moletin tei mikil melele xati xa moletin te kanen imei en, ma xi ivue xat xi tangan moletin te kanen ak misakras vamei e nim man. <sup>40</sup>Nat Moletin imei istal e melele tei xa xamim munanemi ti muvit xi vamei en. Imak, ma muvue xat xamim vehakut.”

**Iesu Dei Vole Usil Hisit Moletin te Polien Lu  
*Luk 12:41-48***

<sup>41</sup>Di, Pita misis Iesu bitene, “Suv, di odei vole ak mi xamem xa mabe moletin nam xil kestang, mu mi moletin xil ngasen?”

<sup>42</sup>E suv Iesu bit rilomun ni mini bitene, “Di nasepin mi hisit moletin xil xa langgoni moletin te polien xa vehakut di pol bos e be metisou. Hisit moletin ak, suv nan ilingi ihe vat te nim man melele xa xi be ut sav tei. Suv nan inesi tangan ihe vat e ilaxat moletin sav xil te polien, e tangan iseti kuh anien ae mi xil. <sup>43</sup>Mak, ma xosxa suv nan itilomun e ipusi xa vat te nim man di pol bos, ma vat ak ilonge ihos. <sup>44</sup>Reitin li nabiteni mi xamim, suv ak ipet rat vat ak ihe nesao tangan xa ti ilaxat holesok xil vus nan.

<sup>45</sup>“E xosxa vat te nim di minemi bitene, ‘Ei, suv navan da nousav, e tamei ti mok.’ Misak ni di bas tiramue e atou sav xil te polien e nim ak, e

di ngga vin xi e di mumun vuma mitallang. <sup>46</sup>Ma ti, suv nan itilomun e melele tei xa xi tanemi ti vahit imei en. Isak ni, suv nan mei ihas purun ni e iso rati ihe von longpangasien itel mosav xil xa latepurun naha xa teti he.

<sup>47</sup>“Xosxa moletin te polien tei xa mikil kuh naha xa suv nan ien bei vapol ni, e tavue xat xi ti tengan vapol ni; ma suv nan ihas purun ni, e xi ilong pangas pupu ni xi ven. <sup>48</sup>E xosxa moletin tei te polien takil ti naha xa suv nan ien bei xi vapol ni, e di pol misa; ma suv nan ihasi ihe vuteili tang, e pangasien teni ihe hokorong tang. Ngan xil xa Hi miling holesok holu e he, Hi bit vapus holesok holu vaxo he xil. E ngan xil xa Hi miling holesok holu mu e he, Hi bit vapus holesok vahe holu mu vali vaxo he xil.”

### **Pispisien na Iesu Pol ni Moletin Xil Di Laletasil ra Xil Mun**

*Luk 12:49-53*

<sup>49</sup>Iesu biteni mi moletin nan xil mun bitene, “Inou namei tengan nasahan upang va moten ut etan. E xosxa upang ak di ngan taxeak, ma inou nimaal pupu ven. <sup>50</sup>Melengien tei xa nggeih di bemei e nou, e di nalong pangas nou ven, ha vuma ... melengien nen ak mei istal. <sup>51</sup>?Xamim munemi mubit inou namei tengan niling tomat e ut etan? E-e, ninaling tomat ti mu. Nipol ni moletin xil ti liletasil ra xil mun tang. <sup>52</sup>Mak, ma taxeak iha, vatimol tei ti liti pas xil, rute xil liketeh isa ni rute xil mun venou. <sup>53</sup>Tata xil lisel mi horamue nae xil, e horamue xil lisel ni tame xil. Nana xil lisel ni atuli nae xil, e atuli xil lisel ni nine xil. Atou xil lisel ni havnehin xil, e xil lisel ni avu sasa nae xil.”<sup>z</sup>

### **Moletin Xil Latalekil Ti Kout Polien na Iesu**

*Luk 12:54-56*

<sup>54</sup>Iesu biteni mun mi moletin xil bitene, “Melele xa mupus vatiang xa mukesi ni ‘toio’<sup>a</sup> miting momah xil xa maluxoluk bemei, mukila xa us vamus xiak, ma mus. <sup>55</sup>E melele xa mupus ‘aru’<sup>b</sup> mistal mukila xa ut vavue xiak, ma ut bue. <sup>56</sup>!Xamim, mube vat luvosen! Melele xa mupus neta tei xa mistal e ut etan mu e tilang hat, mukil koute teni. ?E veneh sung ma ti mutapus kil ti koute te naha xa di napol ni taxeak?”

### **Bos xa Radi e Tomat Itel Moletin Sav Xil**

*Luk 12:57-59*

<sup>57</sup>Di, Iesu biteni mun mi xil bitene, “?Veneh ma di mutanem kil ti suse xa bos e momal tengan xa ti mukakao vahusili? <sup>58</sup>Xosxa xa moletin xa bae del xouk bit valing xouk e kot en, ma bos mak mu xa ha usepin itela

<sup>z</sup> 12:53 Maeka 7:6    <sup>a</sup> 12:54 vatiang xa mistal e ist    <sup>b</sup> 12:55 vatiang xa mistal e notwes

tengan xa mulimal ni rin xa nggeih da xat xamil. Vengan xa xosxa otapol ni ti, ma ilinguk e he moletin te lepisien. E xi ilinguk e he polis, di, polis ilinguk e nim te xeih. <sup>59</sup>Nabiteni minuk, osakras ostal ra nim te xeih ak ha vuma ... uxal rerat holesok xil vus xa moletin te lepisien tehiteni.”<sup>c</sup>

### Muhiles ra Tesaen Namim, Maxani Mulel

*Luk 13:1-5*

**13** <sup>1</sup>E melele nen ak, rut moletin xil lamei latumul mi Iesu usil ngan Kaleli xil xa di latehas vongoro sae xil e Nim Eo xa tehe sanien nae mi Hi. E melele xa di tamu latepol ni, moletin te vaeen xil na Suv Paelet mei latehas xil e re xil teha xat sanien nae xil.<sup>4</sup> <sup>2</sup>Ma Iesu biteni mi xil bitene, “?Midep? ?Munemi mubit ngan Kaleli xil, suse xa latelel xiak di pisen ni xa tesaen nae tehe tellep mu teli na moletin sav xil tahal Kaleli? <sup>3</sup>!Tave reitin ti! Nabiteni mi xamim, xosxa munaviles meulien namim ti ra tesaen namim, ma xamim mun mumak tang. <sup>4</sup>Munem pis moletin tol e le sav (18) xa latelel sangas ni rute tei xa lakesi ni ‘Saelom’. ?Midep? ?Munemi mubit nim te keteh en xa tehe teviei tehe nesao temot mei tetaxat xil vengan xa tesaen nae xil tehe tellep mu teli tesaen na moletin sav xil tahal Serusalem? <sup>5</sup>!Tave reitin ti! Nabiteni mi xamim, xosxa munaviles meulien namim ti ra tesaen namim, ma xamim mun mulel.”

### Iesu Dei Vole Usil Vatit Fik xa Huite Tovuol

*Luk 13:6-9*

<sup>6</sup>Di, Iesu dei vole tei mi moletin xil ak bitene, “Moletin tei milih vatit fik tei de urvatiei te grep san, e vehakut xi ba di misao ni, e tapus ti huite. <sup>7</sup>Ma biteni mi moletin xa di milaxat urvatiei san bitene, ‘Huram tol tuei iaxa namei nabit napus ti huit fik ak, e natakamet ti vari. !Terati! Di misukoh xol ut votei tang.’

<sup>8</sup>“E moletin nan xa pol e urvatiei ak bit rilomun ni mini bitene, ‘Suv, lingi vata munamun mu vahe huram tova tang. Nikil ikapis xole, ti niso tisok ihe pe vatte tangan imeul ihos. <sup>9</sup>Xosxa iva e huram xor, ma bos; e xosxa nava ti ma nitei rati sung.’”<sup>e</sup>

### Iesu Pol ni Atou Tei xa Marin Mikavui Mei Bos Mun e Sabat

*Luk 13:10-17*

<sup>10</sup>Vatei, e Sabat, Iesu di pispisi mi moletin xil e nim te pispisien tei. <sup>11</sup>E pus atou tei bemei xa ninin tesa tepurun marin huram tehe tol e le

---

<sup>c</sup> 12:59 Ngan ak ixoni Hi. Mak, ma itiamu ni Melengien te Lepisien, mupol ni tomat itel Hi. <sup>d</sup> 13:1 Sexien ak pol ni moletin xil lanemi labit Hi iaxa misin sanien nae xil vengan xil latepol ni tesaen tei xa eilep pupu. <sup>e</sup> 13:9 Vole ak pisen meulien na mol Siu xil xa Hi bit vasa pangasien mi xil vengan xa tapus ti mu sexien vahos e meulien nae, e mae ni xil ladi vuteili mun mu.



sav (18). Misak ni xi misakras vasoh vama. <sup>12</sup>Melele xa Iesu miketeh pusi, miki ba ni bitene, “Nana, meseien nam be relinguk ngamu.” <sup>13</sup>Iesu miling hen en, ma varinga tang, atou ak misoh mal e di memes Hi ven.

<sup>14</sup>Ngan ak misak ni eilep te nim te pispisien ien mikat vengan xa Iesu pol ni mar atou ak bos e Sabat. Ma misel ba ni vanut moletin ak bitene, “Melengien tei e he sav (6) iaxa moletin ikila ipol en. Mumei mumeluv ra meseien namim e melengien xil ak, e nave Sabat ti.”

<sup>15</sup>E Iesu bit rilomun ni mini bitene, “!Ei, xamim mube vat luvosen tova tang! Xamim di mulal rat buluk samim xil e muleh xil be langganien e Sabat nggoni melengien sav xil mun tang. <sup>16</sup>E midep mi atou ak xa be atuli tei na Ebrahim? Temat bar xati hura be tol e le sav (18) xiak. ?Munemi mubit rasakras ralal rati ra meseien nan e Sabat?” <sup>17</sup>Sepinien na Iesu misak ni moletin xil xa laketeh misa ni labe unoun. E moletin sav xil lamaal tova tang ve polien hos xa Iesu pol ni.

**Iesu Dei Vole Lu Usil Suse xa Hi Mei Ihe Suv Toto na Moletin Xil**  
*Luk 13:18-21*

<sup>18</sup>Di, Iesu biteni mi xil bitene, “?Hi imei ihe suv toto na moletin xil itep? ?Nisepin ni imese mi xamim itep? <sup>19</sup>Nggoni utut vaak xa hokorong, mot mei de vatiei tei. Utut vaak<sup>f</sup> ak miteh, meul mei be vatiei xa eilep, ma tuman xil, mei langel e halite xil.”

<sup>20</sup>Rilomun, xi biteni mi xil bitene, “?Hi imei ihe suv toto na moletin xil itep? <sup>21</sup>Nggoni is xa atou tei miso ni vuteili tang ba del pulaoa xa mahulong. Xi bilesi vuma ... is ak pol ni pulaoa xil ak lakao, labe mahulong mu.”

**Iesu Dei Vole Usil Puiteh xa Hokorong xa Be Ut Nesao**  
*Luk 13:22-30*

<sup>22</sup>Melele xa Iesu di pol ni suse nan tangan vahe Serusalem, xi nggo metimal xil e di pispisi mi moletin xil. <sup>23</sup>E vatei, moletin tei misisi bitene, “?Suv, moletin holu iaxa lihur meulien hu e ut nesao, mu rute tang?”

<sup>24</sup>E Iesu bit rilomun ni mi xil bitene, “Ti musak pisi vehakut ti muxo puiteh xa hokorong e ut nesao vengan xa moletin holu di lasak pisi e rute xil tang likila lixo en. <sup>25</sup>Xosxa melengien imei xa suv te nim ak imea mei ikoe xol puiteh, ma xamim mumei musoh mutit hale. E ti muti puiteh e mukei iha ni suv ak muhitene, ‘Suv, sah puiteh, mavat nim.’

“E xi ihiteni mi xamim ihitene, ‘Inou natakil ti xamim e natakil ti xa xamim tahal ut xave!’

<sup>26</sup>“Ma xamim muhiteni mini muhitene, ‘Xamem di mateanien e di matemun tetel xouk e di otepispisi e metimal namem.’

---

<sup>f</sup> 13:19 Luk bit utut mastard.

<sup>27</sup>“E xi ihiteni mi xamim ihitene, ‘Inou natakil ti vari xa xamim tahal ut xave. Xamim vus musa. !Muha!’ <sup>28</sup>E melele xa xiak, xamim mupus Ebrahim, Aesak e Siakop itel provet te tiamu xil liti nim na Hi e ut nesao. !E Hi isin xamim e mutit hale! Isak ni, xamim mutang vengang mulong pangas xamim e metemim ipili vengang iemim ikat. <sup>29</sup>Moletin xil lixo hal sav xil e ut ngasen e ut etan limei vengang xa Hi ihe suv toto nae. Limei nim e litotan e von anien itela. <sup>30</sup>Ngan ak be reitin, ngan xil xa ladutou taxeak, mei litiamu. E ngan xil sung xa ladiamu, mei litutou.”

### Iesu Ien Sae Holu Ve Hal Serusalem

*Luk 13:31-35*

<sup>31</sup>E melele nen ak, rut Parasi xil lamei labiteni mi Iesu labitene, “!Bos xa umea reling rute ak uha, vengang xa Suv Toto Herot bit vahasuk omat!”

<sup>32</sup>Iesu bit rilomun ni mi xil bitene, “Muha rilomun e muhiteni mi kuli reran ak imak: xosali e visuvong, ti nixol rerat ninin tesa xil e nisak ni moletin xil xa lamesei lilonge ihos mun. E melengien tol nen, nipol sen naha xa natemei ven. <sup>33</sup>Io, xosali, visuvong, e hoeis, nihusil suse navan nihe Serusalem vengang xa e rute ak, mol Isrel xil di labas vin provet holu nae xil.

<sup>34</sup>“!O moletin xil tahal Serusalem! Xamim xa di mubas vin provet xil e di munggo vin eloheoh xil xa Hi di misa xil mi xamim. Melengien hau, ieok tehei pupu tengang naleh viton xamim mumei visal nou vaxoni toatou xa di mileh viton tuten xil lamei pe aveoun. E xamim iemim tavei. <sup>35</sup>Ma Hi iling xamim muti imak, naxur xol xamim ti mun. Ma musakras mupus nou ha vuma ... muhiteni muhitene, ‘Hi Suv, utuxol xat xi xa bemei e hisom.’”

### Iesu Dal Rat Moletin Tei ra Meseien Nan e Sabat

*Luk 14:1-6*

**14** <sup>1</sup>E Sabat tei, Iesu ba mingganien e tim sa eilep tei na Parasi xil, e Parasi sav xil di lale mah xati. <sup>2</sup>E rute ak, moletin tei xa len e hen mitep da. <sup>3</sup>Ma Iesu misis tisa xil te Rae xil na Mosis e Parasi xil bitene, “?Rae nar maen ni xa radal rat moletin tei ra meseien nan e Sabat, mu tamaen ni ti?” <sup>4</sup>E xil ladit votei, latavit ti neta. Ma Iesu duxoli, pol ni ven bos rilomun, di, misila ba.

<sup>5</sup>Di, Iesu biteni mi xil bitene, “Vahit tova xamim xa horamue nan mu buluk san vamot vahe vul e Sabat, ma mukila mutal rat vari ni?” <sup>6</sup>E xil lasakras lasa rilomun ni sepinien nan.

### Hi Di Pet Rat Moletin xa Nenemien Nan Be Tan

*Luk 14:7-14*

<sup>7</sup>E anien ak, Iesu pus kila xa rut moletin xa lasilasil ni xil di lale kis ni von totanen xil xa bos, ma xi dei vole tei mi xil bitene, <sup>8</sup>“Melele xa

§ 13:35 Sam 118:26

moletin tei misilasil ni xouk e anien tei te tetelien, onatotan ti e rute xa bos. Maxani, veter mu, moletin tei xa eilep mu ni xouk namei. <sup>9</sup>Xosxa imak, ma isak ni moletin xa misilasil ni xouk mei ihiteni minuk ihitene, ‘mae ni eilep ak vahur von toen nam.’ Imak, xouk uhe unoun vengang uhur von toen xa misa tang. <sup>10</sup>E xosxa lasilasil ni xouk, uha utotan e von toen xa be tan, tangan moletin xa misilasil ni xouk imei visaluk e ihiteni ihitene, ‘Tua, amei nesao e von toen xa bos.’ Mak, ma moletin te nim isa merereen minuk pe mete moletin xil vus. <sup>11</sup>Moletin xa di pet rat xi tasen, mei ihe tan; e moletin xa nenemien nan be tan, Hi ipet rati ihe nesao.”

<sup>12</sup>Di, Iesu bitene mi moletin xa misilasil ni xi bitene, “Xosxa opol ni anien tei, onasilasil ni tua nam xil ti, mu vatimol nam xil ti, mu ngan xil xa holesok nae holu e ladit sangas visaluk. Vengang xa xil likila lisilasil ni xouk mun, ma uhur rilomun ni naha xa otepol ni. <sup>13</sup>!E-e! Xosxa opol ni anien tei, usilasil ni hoeo xil, moletin xil xa lasakras lakakao, ngan xil xa rut tenbe mat, e ngan xil xa mete bar. <sup>14</sup>Mak, ma Hi ituxol xatuk, vengang xa xil lasakras lasa xoles neta xa opol ni mi xil. Hi kestang isa rilomun ni minuk e melengien xa moletin tehos nan xil limeul rilomun ra maten.”

### Iesu Dei Vole Usil Anien Tei xa Mahulong

#### *Luk 14:15-24*

<sup>15</sup>Melele xa moletin tei xa tete anien ak milong sepinien na Iesu, biteni mini bitene, “!Hi ituxol xat ngan xil xa xi be suv toto e meulien nae melele xa litotan e anien hos e ut nesao itela!”

<sup>16</sup>Ma Iesu dei vole ak mini bitene, “Vatei, eilep tei tehiti ipol ni anien tei xa eilep, ma tesilasil ni moletin xil holu. <sup>17</sup>Di, e melengien te anien ak, xi misil eloheoh nan tangan vahitene mi moletin xil xa tesilasil ni xil vahitene, ‘Mumei, anien mese tuei.’

<sup>18</sup>“E xil vus lasin ni ve polien sav nae xil. Tei xil bitene, ‘Inou nanggal tan tei e niha mu nisao ni. Mak, ma nasakras namaat.’

<sup>19</sup>“Tei mun bitene, ‘Inou nanggal rohon ni buluk te polien hexalu (10) xa di lalihi aean xa di dei tan, e nabit nama nasak pis xil. Ma nasakras namaat vari.’

<sup>20</sup>“Tei mun bitene, ‘Inou nateli rohon tang, ma nasakras namaat.’

<sup>21</sup>“Ma di, eloheoh ak dilomun ba bit sen sepinien xil ak mi eilep nan. E xi ien mikat pupu, e biteni mi eloheoh nan bitene, ‘Utemanon, uhe suse xil te metimal ak, ha uleh hoeo xil, moletin xil xa lasakras lakakao, ngan xil xa mete bar, e ngan xil xa rut tenbe mat.’

<sup>22</sup>“Tavehi ti, eloheoh dilomun e biteni mini bitene, ‘Suv, sepinien nam napol vuol ni tuei, e ut pipin ni moletin holu mu.’

<sup>23</sup>“Ma eilep te anien ak biteni mini bitene, ‘Uhe ut xil ngasen e suse xil vus e ukes moletin xil limei, tangan nim mavan ipolu kuhi ni xil. <sup>24</sup>Nabitene mi xamim, ngan xil xa natesilasil ni xil te tiamu, ti e xil nakar pis ti anien ak!’ ”

### Moletin xa Bit Vahusil Iesu, Bos xa Itiamu, Inem Kuhi

*Luk 14:25-33*

<sup>25</sup>Vatei, vanut moletin xil di langgusil Iesu, e xi biles e biteni mi xil bitene, <sup>26</sup>“Xosxa moletin tei bit vahusil nou, en ihei nou ili tamen, ninen, atou nan, horamue nan xil, tunali e hineli xil, e xi mun tang. Maxani, misakras vahe moletin navan. <sup>27</sup>Ngan xa tapo eivave te pangasien nan ti tangan vahusil nou, misakras vahe moletin navan. <sup>28</sup>Xosxa tei e xamim di minemi bit vahil nim tei xa mahulong; bos mak mu xa itotan e inem usili xa vatu te nim ituxol mani eah. Di, ipusi xa vatu nan pipin tangan ipol vuol ni nim ak. <sup>29</sup>Maxani, ipol ni rute tang e napol vuol ni ti. Mak, ma moletin xil vus xa lipusi, lisep sisili <sup>30</sup>e lihitene, ‘!Tavue xat xi ti vapin tangan vapol vuol ni nim man!’

<sup>31</sup>Mu ixoni suv toto tei xa mileh moletin nan xil xa labe taosen hexalu (10,000) tangan lavae vatel suv toto sav tei xa bemei del moletin nan xil xa labe taosen hanutap (20,000). Itiamu, xi itotan e inem kuhi xa xi nggur xeihen pipin tangan vavae vatel suv toto ak. <sup>32</sup>E xosxa xi mikila bit tahur ti xeihen vapin, ma isil ti eloheoh nan xil ha, lipus suv toto sav ak tangan lisisi ve suse te tomat e melele xa xi da tamu sotin. <sup>33</sup>Mak, ma itiamu, munem kuhi, tei e xamim xa misakras valing holesok ngasen nan, misakras mei vahe moletin tei navan.”

### Iesu Dei Vole Usil Sol

*Luk 14:34-35*

<sup>34</sup>E Iesu biteni mi xil bitene, “Sol bos. ?E xosxa xa konen teni be relingi, ma konen teni itilomun imei en itep? <sup>35</sup>Sol ak tavos ti ni neta tova, bos xa muso ni tang iha. Xosxa vurangemim di, bos xa muteong!”<sup>h</sup>

### Iesu Dei Vole Usil Sipsip Tei xa Tekesae

*Luk 15:1-7*

**15** <sup>1</sup>Vatei, moletin te takis xil del moletin tesa sav xil mun lamei e di lateong ni Iesu. <sup>2</sup>E Parasi xil del tisa xil te Rae xil na Mosis di lasep utut ni labitene, “Moletin ak di nggur pilei moletin tesa xil e di mingganien mun del xil.”

<sup>3</sup>Ma Iesu dei vole ak mi xil bitene, <sup>4</sup>“?Xosxa tei e xamim, sipsip san xil labe handred tei (100) e tei mikesae, ma xi ipol ni itep? Iling ngan tesav xil xa labe hanutap hat e hat e le sav mun (99) liti e munae, e iha ilang ni ngan xa mikesae vuma ikameti. <sup>5</sup>E melele xa ikameti, ilonge ihos xa ihos,

---

<sup>h</sup> **14:35** Sol xa te tiamu te naxoni sol te xosali ti, tenamese ti. Misak ni konen teni tehe relingi. Koute te vole ak mak: moletin xa nggusil pis Iesu, di, be relingi, xi nggoni sol xa konen teni be relingi. Meulien nan misakras vapol ni ti mun neta vahos.

ipoe ite vatuvun, <sup>6</sup>ti, iha mun tim. Ti, ikes viton tua nan xil e ngan xil xa ladi sangas visali, e ihitene mi xil ihitene, ‘Rihesi xir vengon xa nakamet sipsip savan xa tekesae!’ <sup>7</sup>Nabiteni mi xamim, e ut nesao imak tang, lihesi xil ve moletin tesa tei xa ihiles meulien nan ili hanutap hat e hat e le sav mun xil (99) xa lataviles meulien nae ti vengon xa xil lanemi labit lamal ngamu.”

**Iesu Dei Vole Usil Mani Tei xa Tekesae**

*Luk 15:8-10*

<sup>8</sup>E Iesu dei vole tei mun bitene, “?Xosxa atou tei xa valeh xat tutut vatu duxoh hexalu (10) e vapusi xa tei xil mikesae, ma vapol ni vatep? Isahan laet, itaveas e nim, e ilang kuhi e ut xil vus vuma mikameti. <sup>9</sup>E melele xa mikameti, mikes viton tua nan xil e ngan xil xa ladi sangas visali e biteni mi xil bitene, ‘Rihesi xir vengon xa nakamet mani navan xa tekesae.’ <sup>10</sup>Nabiteni mi xamim, imak tang e pe met Hi e masxaxa xil nan, xil lihesi xil ve moletin tesa tei xa ihiles meulien nan.”

**Iesu Dei Vole Usil Horamue Tei xa Tekesae**

*Luk 15:11-32*

<sup>11</sup>Iesu dei vole tei mun bitene, “Vatei, tiramue tei da, horamue nan tehe lu. <sup>12</sup>Ngan te tutou biteni mini bitene, ‘!Tata, seti holesok nam xil e xamel, ti, usa navan taxeak!’

“Ma tiramue ak miseti holesok nan xil mi horamue nan xalu.

<sup>13</sup>Melengien vahis mitavi, ngan dutou pos vuol ni holesok nan xil, di, ba be ut tei xa sotin del vatu nan. E rute ak, xi purun vatu nan e meulien xa tamal ti. <sup>14</sup>E melele xa pos vuol ni vatu nan xil, ut bue e anien tovuol e rute ak. Misak ni xi mei be hoeo pupu. <sup>15</sup>Ma xi ba tengon vapol mi moletin tei te rute ak. Moletin ak misila be tan nan tengon valaxat vueili san xil. <sup>16</sup>E nenemien nan, bit dit vahengan xi ni rut anien a vueili xil, e moletin ti tasa ti anien mini tengon va ni. <sup>17</sup>Di, minem kila sung, ma biteni mi xi tasen bitene, ‘Moletin xil vus te polien na tata, anien ae holu pupu, e inou, navehi ti, mae ikar vin nou inggak. <sup>18</sup>Nimea niha mun nipus tata e nihitene mini nihitene, ‘Tata, napol misa li e pe met Hi e pe metom. <sup>19</sup>Natapin ti xa okes nou ni horamue nam. Upol ni minou nixon moletin tei te polien nam tang.” <sup>20</sup>Ma mea dilomun be tim sa tamen.

“E melele xi de sotin vuteili tamu ra tim, tamen pusi. Ien misae en pupu, ma miloh ba, miso hen nggaxol horamue nan, e pesum ni vin. <sup>21</sup>E horamue biteni mi tamen bitene, ‘Tata, napol misa li e pe met Hi e pe metom. Natapin ti xa okes nou ni horamue nam.’

<sup>22</sup>“E tamen mikes moletin te polien nan xil lamei e biteni mi xil bitene, ‘Mutemanon! Muleh eising xil xa bos mei, musing xole ni. Muling ring e vakuhon e musa sandel ihesi. <sup>23</sup>!Ti, muhas sulut buluk tova xa mikaio

bos tangan ripol ni anien tei tangan rimaal ven! <sup>24</sup>!Vengan horamue navan ak temat, e taxeak, meul rilomun; xi tekesae, e taxeak, mei mistal mun!’ Ma xil lakikei e di labol ven.

<sup>25</sup>“Melele nen ak, horamue xa be muimol nan tete naho. E melele xa xi dilomun bemei sangas duxoh tim, milonge xa xil di lakikei e di labol. <sup>26</sup>Ma xi mikes moletin tei te polien bemei, e misisi, ‘?Naha xiak?’

<sup>27</sup>“E xi bit rilomun ni mini bitene, ‘Tumali dilomun bemei tim e tamom bas sulut buluk tei xa mikaio vengon xa pusi meul teda, e mei del xir mun.’

<sup>28</sup>“E melele xa muimol ak milonge mak, ien mikat, e bit nava ti e nim. Ma tamen mistal, mei dak kesi tangan vahe nim. <sup>29</sup>E xi misa rilomun ni sepinien ba mi tamen bitene, ‘!Uteong ni nou! !Hura holu ngamu napol minuk nggoni moletin te polien nam tang, e natateong ras ni ti xouk! ?Naha tova osa ni minou? !Tovuol! Otasa pas nani tova minou tangan napol ni anien tova vatel tua navan xil. <sup>30</sup>!E melele horamue nam xai, xa tepurun sen holesok nam xil e hoeaso xil, bemei mistal mun e tim, omea obas sulut buluk xa mikaio ven!’

<sup>31</sup>“E tamen bit rilomun ni mini bitene, ‘Horamue navan, vehakut xouk odi visal nou, e holesok xil vus navan be nam. <sup>32</sup>Momal tang tangan ripol ni anien ak ven e rimaal, vengon tumali temat, e taxeak, xi meul rilomun. Xi tekesae, e taxeak, rakameti mun.’ ”

### Iesu Dei Vole Usil Vat Tei xa Pol ni Vatin

*Luk 16:1-14*

**16** <sup>1</sup>E melele xa Iesu di ngganien del Parasi xil, xi biles e dei vole tei mun mi moletin nan xil bitene, “Vatei, eilep tei xa holesok nan holu nggur moletin tei nan te polien e milingi be vat te holesok nan xil. Xi pol ba vuma ... eilep ak nggur longeongen xa bit vat nan ak di talaxat kuh holesok nan xil ti. <sup>2</sup>Ma mikes vat ak mei biteni mini bitene, ‘?Naha iaxa di nalonge usiluk? Uha utis usil polien xil navan xa di otepol ni, vengon xa navehi ti, niso nuk ra polien ak.’

<sup>3</sup>“Ma vat ak misep tasen bitene, ‘Suv navan vaso nou e polien navan xiak. ?Imak, ma itep xiak? Veok te xeih ti vapin tangan natalen tan, e nabe unoun pupu tangan nasis moletin sav ni vatu. <sup>4</sup>!Aha! Nakila naha xa nipol ni. Ngan ak ipol ni melele xa nivus ra polien ak, tua navan xil liti, e lihur pilei nou nihe tim sae.’

<sup>5</sup>“Ma vat mikes kekes ni moletin xil xa laleh hon ni holesok xil e lataxale ti. Xi misis ngan diamu bitene, ‘?Xouk onggur naha ra eilep navan?’

<sup>6</sup>“E moletin ak bit rilomun ni mini bitene, ‘Naleh tutut teram te oel xa lapol ni nggo huit olip be handred tei (100).’

“Ma vat biteni mini bitene, ‘Utemanon, uhur uvei nam, e utei vatu nen imei etan e hanutap lu e hexalu mun (50) tang.’

7“Di, misis ngan tesav bitene, ‘E xouk, onggur naha ra eilep navan?’

“Xi bitene, ‘Naleh bak pulaoa be taosen tei (1,000).’

“E vat biteni mini bitene, ‘Uhur uvei nam e utei imei e tan e bak xa be handred tol e he sav (800) keatang.’

8“Misak ni, tave ti neta xa vat pol ni vatin mak, e eilep nan pet rati vengang xa xi pisen ni xa nenemien nan be teviei. Nabiteni mak vengang xa moletin xil te ut etan langgur vatie melele xa lapol del tua nae xil. Sexien nae xil mili sexien na moletin xil xa labit langgusil Hi e ladi e miehen.”

9Iesu biteni mun bitene, “Ma nabiteni mi xamim, vatu namim misakras vati vahehi. Ma muleh moletin sav xil limei visal xamim e mututou ni xil ni holesok namim xil te ut etan ak. Mak, ma melele xa muling sen holesok namim xil te ut etan, ma Hi ihur pilei xamim e ut nesao.

10Moletin xa di milaxat kuh neta tei xa hokorong, ma ikila ilaxat kuh neta tei xa mahulong. E moletin tei xa di purun neta tei xa hokorong, xi ikila mun ipurun neta tei xa eilep. 11Xosxa moletin xil linanesi ti e xouk itel holesok xil te ut etan; Hi mun misakras vanesi e xouk vatel holesok hos nan xil xa tellep mu ili. 12E xosxa mutalaxat kuh holesok xil na Hi ti xa milingi e hemim e ut etan, ma misakras vasa ti mun neta mi xamim e ut nesao.

13“Moletin te polien tei misakras vapol mi suv lu. Maxani, en iat tei, e eheien nan iti e tei xalu; mu imerere ni tei, e iketeh isa ni tei xalu. Osakras omot mi Hi vatel vatu.” 14Melele xa Parasi xil lalong sepinien xil ak, lasep pepeas ni Iesu, vengang xa eheien nae di vatu.

### **Iesu Misep Usil Sexien xa Parasi Xil Langgur Xoteh Rae Xil na Hi** *Luk 16:15-18*

15E Iesu biteni mi Parasi xil bitene, “Xamim xil ak iaxa mupol ni xamim momal e pe met moletin xil, e Hi mikil nenemien namim. Naha xa moletin di minemi bit bos, ngan ak Hi di misin ni vari tang.

16“Rae xil na Mosis e tisen na provet xil latepisen suse na Hi mi moletin xil duxoh melele xa Sion mei e di tekas moletin xil. E mei duxoh xosali iha, longeongen hos di pisen suse xa Hi imei ihe suv toto te meulien na moletin xil. Longeongen ak di mikapis e ut xil ngasen, e moletin xil holu di langgeih tangan labit Hi vamei mak. 17Neta sav xos ut nesao e ut etan lalovus e melengien tei, e mavolut sepinien xa de Rae xil na Mosis, xeihen teni misakras vavus.

18“Ve rin ak, e pe met Hi, tiramue xa miling atou nan e nggur atou sav, xi di pol ni tesaen dela. E tiramue xa miteli del atou xa tiramue nan milingi, xi mun di pol ni tesaen dela.”<sup>i</sup>

---

<sup>i</sup> 16:18 Hi bit moletin xa miteli naling atou nan ti mun. E melengien na Iesu, Parasi xil di latepol ni sexien ak tehe holu.

### Lasaros e Moletin Tei xa Holesok Nan Holu

*Luk 16:19-31*

<sup>19</sup>Iesu mitumul mi moletin xil bitene, “Vatei, moletin tei da xa holesok nan holu, mising ni eising xil xa bos e vatu nen be nesao. Xi mikila vaxal holesok xil ngasen xa xi ien bei. E meulien nan, xi milonge bos vehakut. <sup>20</sup>Moletin tei mun da xa holesok nan tovuol, hisen Lasaros. Xi menuk ba xati e misakras vakakao. Vehakut, tua nan xil lapoe ba, lalingi e hol puiteh te vloh ma moletin xa holesok nan holu tangan mikila ti vasis moletin xil ve vatu. <sup>21</sup>E vehakut, Lasaros bit va saxut anien xa moletin ak di miso ni ba. E rilomun, kuli xil mun lamei di lamumun menuk nan xil.

<sup>22</sup>“Ba vuma ... hoeo ak mat, e masxaxa xil ladela ba, lalingi de ri Ebrahim e ut nesao. Di, moletin xa holesok nan holu mun mat, ma ladihin ni. <sup>23</sup>E moletin ak be de ut sa Temat, e milong pangas xi pupu. Di, miketeh be nesao, pus Ebrahim de sotin, e Lasaros de rin. <sup>24</sup>Ma xi miki be nesao bitene, ‘Tata Ebrahim, iem isae li e nou! Sil Lasaros vaha vasa vakuhen vahe oei, e mei vatuxol meok tangan vamarir. !Vengan xa inou, nalong pangas nou pupu e upang ak!’

<sup>25</sup>“E Ebrahim biteni mini bitene, ‘Natuxuli, unem pisi mu. E meulien nam te tiamu, di mak otepus kuh hosien, e Lasaros di telong pangas xi tova tang. E taxeak, xi sung di pus hosien inggak, e xouk, di olong pangasuk. <sup>26</sup>E tei mun, vul tei xa mahulong da xoteh xir, misak ni xamem masakras mavur xotehi mavat visal xamim; e xamim mun, musakras mumei visal xamem.’

<sup>27</sup>“Ma moletin xa holesok nan tehe holu biteni mini bitene, ‘Tata Ebrahim, ieok bei li xa osil Lasaros vahe visal vatimol navan xil. <sup>28</sup>E rute ak, tua navan xil labe lim (5) ladi en, mae ni ha vassel xat xil tangan xil sung linamei ti e ut te longpangasien ak.’

<sup>29</sup>“E Ebrahim biteni mini bitene, ‘Rae xil na Mosis del sepinien na provet xil te tiamu di tuei tangan lisa selxatien mi tua nam xil. Ling xil tangan ti lilong xat naha xa sepinien xil ak di labitieni.’

<sup>30</sup>“Moletin ak bit rilomun ni mini bitene, ‘E-e, tata Ebrahim, ngan ak tapin ti mu! E vahit moletin tova vameul rilomun ra maten e vahe visal xil, ma xil lakila laviles meulien nae ra sexien tesa xil.’

<sup>31</sup>“E Ebrahim bitene, ‘Xosxa linalong xat ti Rae xil na Mosis e sepinien na provet xil, ma misakras lalong xat sepinien na moletin tei xa meul rilomun ra maten.’ ”

### Iesu Misep Usil Tesaen

*Luk 17:1-4*

**17** <sup>1</sup>Iesu biteni mi moletin nan xil bitene, “Be reitin, sexien xil xa pol ni moletin mot e tesaen ikila ti imei. !E isa pupu mi moletin xa



be suse te tesaen xil ak! <sup>2</sup>Moletin tei xa pol ni tei tesav xa te xeih ti mot e tesaen, bos mak mu vahit lavar hat xa mahulong vate hiraen e laterir ni e tas xa be huinep. Maxani, pangasien xa imei mini ihe mahulong pupu. <sup>3</sup>!Ma ulaxat kuh xouk ve naha xa opol ni!

“Xosxa tumali pol misa minuk, ha ma umal ni. E xosxa xi biles meulien nan ra tesaen ak, ma uketeh ihos mini rilomun. <sup>4</sup>E xosxa xi pol misa minuk be valu e he sav (7) e melengien tei; e melele xil ngasen xa xi pol ni mak, xi bemei visaluk biteni minuk bitene, ‘Napol misa pupu li minuk e ninapol ni ti mun vari namak.’ Ma bos xa uketeh ihos tang mini.”

### Iesu Sep Usil Neketen xa Nggeih

*Luk 17:5-6*

<sup>5</sup>E moletin nan xil labiteni mi suv Iesu labitene, “Pol ni neketen namem vaxeih mu.”

<sup>6</sup>Ma xi biteni mi xil bitene, “Neketen namim hokorong tang, vengang xa xosxa neketen namim pipin ni utut vaak tei,<sup>j</sup> ma mukila muhiteni mi vatit vaak ak muhitene, ‘!Put ratuk ra tan ak, e ha, ulih xouk ute tas!’ Ma xi iteong ni xamim.”

### Sexien Na Moletin te Polien

*Luk 17:7-10*

<sup>7</sup>Iesu biteni mun mi moletin nan xil bitene, “Mukila ngamu sexien na eilep tei xa misil moletin te polien nan tangan ha vapol e naho nan mu valaxat sipsip san xil. Melele xa pol bus, eilep nan misakras vahiteni mini vahit, ‘!Amei anien!’ <sup>8</sup>!E-e, sexien na eilep xil tamak ti! Xi mikila ihiteni mi moletin te polien nan imak, ‘Sak mese ni anien avan, ti, using xoles eising nam e uleh anien avan imei. Utatil nou mu nianien, ti, xouk sung.’ <sup>9</sup>?E eilep ak ikila imes moletin te polien nan ve xi di mipol nggusil sepinien nan? E-e, misakras. <sup>10</sup>Ngan ak nggoni xamim tang. Melele xa mupol sen polien xil xa Hi biteni mi xamim tangan mupol ni, muhiteni tang muhitene, ‘Xamem mabe moletin votei te polien, e di mapol nggusil naha tang xa Hi di misa ni mi xamem tangan mapol ni.’”

### Iesu Pol ni Moletin Hexalu xa Latemesei ni Leporsi<sup>k</sup> Mei Vexil Memese

*Luk 17:11-19*

<sup>11</sup>Melele xa Iesu del moletin nan xil di langgusil suse lave Serusalem, xil ba langgo haxot te provins tahal Sameria xal Kaleli. <sup>12</sup>Melele xa xil

---

<sup>j</sup> 17:6 Luk bit utut mustard del vatit mulberry, e vengang xa mustard del mulberry tovuol inggak, matling utut vaak xa hokorong nggoni utut mustard e vatit vaak xa mahulong mili vatit mulberry. <sup>k</sup> 17:11 Leporsi be meseien xa pol ni hilbe moletin di mat, misak ni menuk xa da en bo. Siu xil labit meseien leporsi misa mak mu mili meseien sav xil. Moletin xa ngguri natuxol ti moletin sav. Lalingi da sen nga tang.

lakakao labe metimal tei, labisu ni moletin xil labe hexalu (10) xa lalong pangas xil ve meseien leporasi. Xil ak lasoh ladi sotin <sup>13</sup>e di lakei ba ni Iesu labit, “!Iesu, Suv! !Iem isae li e xamem!”

<sup>14</sup>Iesu miketeh pus xil e biteni mi xil bitene, “Muha, mupisen xamim mi pris xil tangan lilepis vemim.” E melele xa langgulil suse labe, meseien nae be reling xil.

<sup>15</sup>Melele xa tei e xil pusi xa ven memese, xi dilomun bemei vis Iesu, e di mikei be nesao e di pet rat his Hi ven. <sup>16</sup>Xi mitingearil e pe met Iesu e misa memesien nan mini. E moletin ak be ngan Sameria, tave ngan Siu ti. <sup>17</sup>E Iesu misisi bitene, “Mutehe hexalu (10) iaxa vemim tememese. ?Ngan xil tesav xa labe hat e he sav (9) ladi xave?”

<sup>18</sup>E Iesu misis moletin nan xil bitene, “Xi tave Siu ti. ?Veneh ma xi kestang dilomun bemei tangan misa memesien nan mi Hi?”

<sup>19</sup>Ma Iesu biteni mi moletin ak bitene, “Mea, husil suse nam ha. Neketen nam misak ni vem memese.”

### Melele xa Nat Moletin Itilomun En

*Luk 17:20-37*

<sup>20</sup>Rut Parasi xil lasis Iesu labitene, “?Hi imei ihe suv toto na moletin xil vilieh?”

E xi bit rilomun ni mi xil bitene, “Hi misakras vastal e suse tova xa moletin xil lale kila. <sup>21</sup>Moletin ti misakras vahiteni vahitene, ‘!Hi be suv toto inggak!’ mu ‘!Hi be suv toto inggaxor!’ vengan xa Hi bit ihe suv toto e tinemim, e te meulien namim.”

<sup>22</sup>Di, Iesu biteni mi moletin nan xil bitene, “Melengien ngan xil xa misa ti imei, e inou natara ti mun visal xamim. E melengien xil ak, iemim ti ihei tangan muti vahos vatel Nat Moletin rilomun, tave ti neta xa melengien vahit vahe tei takes. E musakras vengan xa tave melengien nan ti mu xa vamei rilomun en. <sup>23</sup>E moletin ngan xil lihiteni mi xamim lihitene, ‘!Mupus ti Nat Moletin iaxor!’ mu ‘!Xi tak!’ E xamim munake reitin ti e tumulen nae e munahusil xil ti. <sup>24</sup>Nabiteni mi xamim mak, melengien xa Nat Moletin itilomun en ixoni ngan xa an milangas e mileluv xol ut ngasen nggo rin tei ba duxoh rin tei mun. <sup>25</sup>E itiamu, xi ilong pangas pupu ni xi, e moletin xil te xosali ak lisin ni.

<sup>26</sup>“Melengien na Nat Moletin ixoni melengien na Noah<sup>l</sup> xa te tiamu, moletin xil latnavue xat xil ti. <sup>27</sup>E melele nen ak, moletin xil ngasen di langganien, di lamun, e di lateli ba duxoh melengien xa Noah be tuturil nan xa mahulong pupu, e oei mileh bemei pol, e vatakes, bas vin xil vus.

<sup>28</sup>“Melengien na Lot<sup>m</sup> mun temak tang. Moletin xil ngasen di langganien e di lamun, di langgal e di lapos ni neta, di lapol ni naho e di

<sup>l</sup> 17:26 Sen 6:5-8; 7:6-24    <sup>m</sup> 17:28 Sen 19:1-28

lapol ni nim xil mun. <sup>29</sup>E melele xa Lot mea be reling moletin xil tahal Sodom, upang e hat xa minggan nggo nesao bemei e tan, e vatakes, ngga vin xil vus. <sup>30</sup>Ma Melengien xa Nat Moletin istal en vatei takes imak.

<sup>31</sup>“E melengien nen ak, moletin tei xa di mingel pe vatiei tei, nava ti mun nim tangan valeh holesok nan xil. E moletin xa de naho, xi nahur ti mesal tangan vatilomun ha tangan vahur neta tova ra tim san. <sup>32</sup>Munem atou na Lot. <sup>33</sup>Xosxa moletin tei bit vahur xat meulien nan, ma ikesae rani. E xosxa imae ni meulien nan ikesae, ma moletin ak ihur meulien. <sup>34</sup>Nabiteni mi xamim, e melele nen ak, tiramue xal atou nan lalipat e rong tei takes, tei xalu Hi ihur rati ihe visali e ut nesao, e tei xalu ita. <sup>35</sup>Atou lu ti lalipol vituei ni anien, tei xalu Hi ihur rati ihe visali e ut nesao, e tei xalu ita. [<sup>36</sup>Moletin lu ti lalipol e naho, tei xalu Hi ihur rati ihe visali, e tei xalu ita.”<sup>n</sup>]

<sup>37</sup>Sepinien nan misak ni moletin nan xil lasisi labitene, “?Suv, sexien xil ak listal ixo xave?”

Ma Iesu bit sepinien matu tei mi xil bitene, “Tuman xil xa lakes xil ni ‘volso’ di langga xol rute tei xa neta tei mat da en.”<sup>o</sup>

### Iesu Dei Vole Usil Sexien te Sisen

*Luk 18:1-8*

**18** <sup>1</sup>Di, Iesu dei vole tei mi moletin nan xil tangan vapispisi mi xil xa vehakut xil ti lisis e nenemien nae namot ti. <sup>2</sup>Xi biteni mi xil bitene, “E metimal tei, moletin te lepisien tei da en xa di tamerere ni ti Hi mu moletin sav xil mun. <sup>3</sup>E rute ak, tunau tei mun da en xa vehakut bemei di dak kes moletin te lepisien bitene, ‘Moletin tei di mipol nggeih pupu ba xat nou. !E rin navan, ulepisi li ihusil naha xa momal!’

<sup>4</sup>“Atou ak dak kesi vehakut ba vuma ... moletin te lepisien ak minemi bit, ‘Tave ti neta xa inou natamerere ni Hi ti mu moletin xil, <sup>5</sup>e vengau xa vehakut, atou ak di dak kes nou ve tutouen, bos xa nipol ni naha xa xi ien bei. Vengau xa xosxa ninapol ni ti, ma xi tit imei vehakut, isak ni nou veok ivuol ni.’”

<sup>6</sup>Di, Iesu biteni mun mi xil bitene, “?Sexien na moletin te lepisien ak tamal ti, e mulong naha xa xi tehiteni? <sup>7</sup>?Ma Hi midep? ?Mubit Hi misakras valepis e rin na moletin nan xil vamanon xa di ladak kesi ve tutouen melengien e vongien? <sup>8</sup>E-e, nabiteni mi xamim, Hi ilepis e rin nae ihusil sexien xa momal, e ipol ni imanon. ?E melele Nat Moletin itilomun e ut etan, mubit ikila ikamet ti moletin xil xa neketen nae nggeih en, mu misakras?”

<sup>n</sup> 17:36 Rut uvei xil xa te tiamu latamos ti e vas 36. <sup>o</sup> 17:37 Vengau xa ‘volso’ be tuman tei xa di ngga holesok xil xa lalel e labo. Mak, ma melele xa moletin xil lapus volso xil di langga lakapis xol rute tei, lakila xa neta tei mat e bo da en. Ihusil sexien tak, holesok holu listal xa lipisen ni mi moletin xil rute xa Iesu itilomun imei en.

**Iesu Dei Vole Usil Parasi e Moletin te Takis**

*Luk 18:9-14*

<sup>9</sup>E melele nen ak, rut moletin xil xa ladi, di lanemi labit lamal ngamu pe met Hi ve polien hos nae. E xil di lanem mele ni mosav xil tang. Ma Iesu dei vole ak mi xil bitene, <sup>10</sup>“Vatei, moletin lu lube Nim Eo na Hi tangan lalsis: tei xalu be Parasi, e tei xalu be moletin te takis. <sup>11</sup>Parasi ak be misoh tasen e misis bitene, ‘Hi, namesuk vengan xa inou nataxoni mosav xil ti xa di labe hokan, di lapol misa e di laleh atou na mosav xil. Namesuk mun vengan xa inou nataxoni moletin te takis ti xor. <sup>12</sup>Inou di nabal ni anien ve sisen melengien lu e wik tei, e di nasa taet te rut holesok navan xil minuk.’

<sup>13</sup>“E moletin te takis misoh de sotin e bit naketeh ti nave ut nesao. Xi minem meulien tesa nan e simeten mereh, e misis bitene, ‘!Hi, iem isae li e nou! !Nabe moletin tesa tang!’ ”

<sup>14</sup>Ma Iesu biteni mi xil bitene, “Nabiteni mi xamim, melele xa ludilomun lube tim salu, moletin te takis iaxa momal e pe met Hi, e tave Parasi ti. Vengan xa moletin xil xa di lapet rat xil, Hi ipol ni xil lihe tan. E ngan xil xa nenemien nae be tan, Hi ipet rat xil lihe nesao.”

**Iesu Duxol Xat Tutut Horamue Xil**

*Luk 18:15-17*

<sup>15</sup>E melele nen ak, rut moletin xil di laleh tutut horamue nae xil labe visal Iesu tangan valing hen e xil e vatuxol xat xil. E melele xa moletin xil na Iesu lapus xil, lasikoe xol xil labit linapol ni ti namak. <sup>16</sup>E Iesu mikes tutut horamue xil ak lamei visali e biteni mi moletin nan xil bitene, “Munasikoe xol xil ti, mumae ni xil tang limei visal nou. Vengan xa Hi memaal tangan vahe suv toto te meulien na hisit moletin xil xa langgoni tutut horamue xil ak. <sup>17</sup>!Munem xat sepinien ak! Moletin tei xa misakras vahe tan e nenemien nan vaxoni tutut horamue tei, ma Hi misakras vari vahe suv toto te meulien nan.”

**Moletin Tei xa Holesok Nan Xil Holu Ien Bei Vahur Meulien Sal**

*Luk 18:18-30*

<sup>18</sup>E melele nen ak, eilep tei na mol Siu xil da, e xi bemei misis Iesu bitene, “Tisa, xouk obos li mak. ?Nipol ni itep tangan nikila nihur meulien sal?”

<sup>19</sup>E Iesu misis rilomun ni ba mini bitene, “?Veneh ma obit nabos? Moletin ti tavos, Hi kestang bos. <sup>20</sup>Xouk okil xat Rae xil na Hi ngamu, ‘Onakan ni atou na mosav ti; onahas vin ti mosav; onakan ti; onaluvos his mosav ti; umerere ni tamom xal ninom.’ ”<sup>p</sup>

<sup>21</sup> Moletin ak bit rilomun ni mini bitene, “E melele xa natehe horamue mei duxoh xosali natahur xoteh ti Rae xil ak.”

<sup>22</sup> Melele xa Iesu milonge mak, biteni mini bitene, “Neta tei mun xa otapol ni ti mu, upos vuol ni holesok nam xil e useti vatu teni mi hoeo xil. Imak, ma e ut nesao, holesok nam xil imei ihe holu mu. Ivus, ti, umei uhusil nou.” <sup>23</sup> E melele xa moletin ak milong sepinien na Iesu, xi milonge misa, vengan xa holesok nan holu pupu.

<sup>24</sup> Iesu pusi xa moletin ak milonge misa ma biteni mi moletin xil bitene, “Ixeih pupu mi moletin tei xa holesok nan holu tangan Hi vamei vahe suv toto te meulien nan. <sup>25</sup> Minggeih pupu tangan kamel tei vakital vaxo vulut nitil tei. E minggeih mak mu mili mi moletin tei xa holesok nan holu tangan Hi vamei vahe suv toto te meulien nan.”

<sup>26</sup> Moletin xil xa lalong sepinien nan lasisi labitene, “?Visi vari ikila ihur meulien sal? !Moletin tovuol!”

<sup>27</sup> Ma Iesu bit rilomun ni mi xil bitene, “Nggeih pupu tangan moletin vahiles meulien nan tasen, e be temale tang tangan Hi ihilesi.”

<sup>28</sup> Di, Pita biteni mini bitene, “Okila xa xamem maling holesok xil vus namem, ma mei manggusiluk.”

<sup>29</sup> E Iesu biteni mini bitene, “Nakila. E reitin mak, xamim e rut moletin sav xil mun muteheling tim samim xil, mu atou namim xil, mu tua namim xil, mu tamemim xil, mu ninemim xil, mu horamue namim xil mun tangan muvusul xat Hi xa be suv toto e meulien namim. <sup>30</sup> Moletin xil ngasen xa lipol ni imak, naha xa xil lilingi, Hi isa rilomun ni mi xil ihe holu mu e ut etan, e lihur meulien sal e ut nesao.”

### **Iesu Misep Usil Maten Nan Vatei Mun**

*Luk 18:31-34*

<sup>31</sup> Iesu mileh viton moletin nan xil xa labe lu e le (12) ba ladi se xil, e xi biteni mi xil bitene, “!Muteong ni nou! Taxeak, di raba ve Serusalem. E rute ak, holesok xil vus xa provet xil te tiamu di latehit usil Nat Moletin mei istal ihe reitin. <sup>32</sup> Ngan xil limae ni mei ihe he moletin xil xa latave Siu ti. E ngan xil lisep purun ni, lipol isa mini, e likusa. <sup>33</sup> Limeas pangasi, e lihasi imat. E melengien tol nen, xi imeul rilomun ra maten.”

<sup>34</sup> E moletin nan xil latanem kil ti holesok xil ak. Koute te sepinien nan minggus ra xil. Misak ni xil latakil ti naha xa Iesu di misep usili.

### **Iesu Pol ni Moletin Tei xa Meten Bar Mei Miketeh Rilomun**

*Luk 18:35-43*

<sup>35</sup> Melele xa Iesu del ngan xil xa di langgusili lamei sangas e Seriko, moletin tei xa meten bar dotan de seri suse e di miram ve tutouen.

<sup>36</sup> Melele xa milong vanut moletin xil ak mei langgo visali, xi misis xil bit, “?Naha xiak?”

<sup>37</sup>Xil labiteni mini labitene, “Iesu ngan Nasaret iaxa di mikakao bemei xiak.”

<sup>38</sup>Ma xi mikei nggeih bitene, “!Iesu! !Nat Suv Toto Deved, iem isae li e nou!”

<sup>39</sup>Melele xa xi biteni mak, moletin xil xa ladiamu lasepin nggeih ba ni labitene, “!Tat votei!”

E xi mikei nggeih pilei sung bitene, “!Nat Suv Toto Deved! !Iem isae li e nou!”

<sup>40</sup>E melele xa Iesu milong keien nan, misoh e biteni mi xil bitene, “Mutel moletin xai vamei.” E melele xa bemei visali, Iesu misisi bit, <sup>41</sup>“?Iem bei napol ni naha minuk?”

E xi biteni mini bitene, “Suv, ieok bei naketeh.”

<sup>42</sup>Iesu biteni mini bitene, “!Ma bos, keteh! Ve neketen nam, metom bos.”

<sup>43</sup>Vatakes, xi mikila miketeh, ma misa memesien ba mi Hi e nggusil Iesu. Melele xa vanut moletin ak lapusi, xil vus lames Hi ven.

### Sakias Biles Meulien Nan

*Luk 19:1-10*

**19** <sup>1</sup>Iesu nggusil suse ba nggo Seriko tangan itavi iha. <sup>2</sup>E rute ak, eilep tei na moletin te takis xil da, hisen Sakias, e holesok nan xil holu. <sup>3</sup>Xi bit vapus ti xa Iesu be visi, e misakras vengan xa xi be tamure tang e vanut moletin tei xa mahulong pupu di langgusili. <sup>4</sup>Ma miloh diamu ni vanut moletin ak, e ba peou e vatit sabilong tei tangan ipus Iesu mei ixo visali iha. <sup>5</sup>Melele xa Iesu bemei momal ni rute ak, miketeh be nesao e biteni mi Sakias bitene, “Sakias, temanon amei e tan, vengan xa xosali nite e tim sam.” <sup>6</sup>Sakias mitemanon bemei e tan. Xi besi xi e del Iesu lube tim san. <sup>7</sup>Moletin xil vus xa lapusi laseputut ni e labitene, “Moletin ak ba tangan ha vahe tim sa moletin tesa tei.” <sup>8</sup>Melele xa ladi tamu e tim sa Sakias, xi mitamea misoh e biteni mi suv Iesu bitene, “!Suv, uteong ni nou! Niseti holesok xil vus navan ihe vanute lu, e vanute tei, nisa ni mi moletin xil xa labe hoeo. E xosxa nakan ni vatu na moletin tei, ma vatu xil ngasen xa nakan ni rani, nisa rilomun ni mini ihe hat (4) mun.” <sup>9</sup>Ma Iesu biteni mini bitene, “Xosali, Hi miteh meulien e xouk del vatimol xil nam, vengan xa xouk di opisen ni xa oneket nggoni avu nar Ebrahim te tiamu. <sup>10</sup>Nat Moletin bemei tangan valang ni hisit moletin xil xa di lakesae, e vateh meulien e xil.”

### Iesu Dei Vole Usil Eilep Tei xa Miseti Vatu Nan mi Moletin Nan Xil

*Luk 19:11-28*

<sup>11</sup>Melele xa moletin xil di lateong ni Iesu e tim sa Sakias, xi dei vole tei mi xil. Xil di lanemi labit navehi ti, Hi istal mei ihe suv toto te meulien

na moletin xil. Lapusi xa xil di lamei sangas e Serusalem, ma lanemi xa Hi iling Iesu mei ihe suv toto inggak. <sup>12</sup>Ma Iesu biteni mi xil bitene, “Vatei, eilep tei di bue xat xi tangan vahe ut tei xa sotin tangan lalingi vahe suv toto tei e ut xati nan. Ti, itilomun imei e von nen. <sup>13</sup>E diamu, xi mikes viton moletin xil te polien nan xa labe hexalu (10) lamei tangan vaseti vatu xa be handred taosen (100,000) mi xil kekes. E xi biteni mi xil bitene, ‘Muleh vatu xil ak muha, mupol itela ituxoh melele xa nitilomun en.’

<sup>14</sup>“Eilep ba, e moletin xil te ut nan iexil tavei vari. Misak ni xil lasil eloheoh nae xil tangan ha lihiteni mi moletin xil te kavmen lihitene, ‘Xamem iemem ti tavei moletin ak vamei vahe suv toto namem.’ <sup>15</sup>Tave ti neta xa lasin ni, e moletin xil te kavmen ak lapeti be suv toto nae. Di, xi dilomun be von nen.

“Melele xa dilomun, mikes moletin te polien nan xil lamei tangan vakil ti xa xil lapol ni midep del mani xa teseti mi xil. <sup>16</sup>Ngan diamu bemei, biteni mini bitene, ‘Suv, inou napol del vatu nam, ma nakamet vatu be milian tei (1,000,000) mun da xat ngan xa otesa ni minou.’

<sup>17</sup>“Eilep biteni mini bitene, ‘!Bos pupu! Xouk obe moletin te polien tei xa bos. E vengan xa olaxat kuh neta xa hokorong tang, ma nilinguk tangan ti ulaxat taon xil navan ihe hexalu (10).

<sup>18</sup>“Tei mun e xil bemei e bitene, ‘Suv, inou napol del vatu nam, ma nakamet vatu xa be handred taosen lim (500,000) mun da xat ngan xa otesa ni minou.’

<sup>19</sup>“Ma eilep ak bitene mini bitene, ‘Xouk ulaxat taon xil navan ihe lim (5).’

<sup>20</sup>“E tei mun bemei e bitene, ‘Suv, vatu nam xiak, natepis xol kuhi ni kaliko e ba natelingi tang teta. <sup>21</sup>Uluk tekan ni xouk vengan xa xouk obe moletin te xeih. Xouk okila ovur neta xa otapol ti ven, e di onggur pupu ni anien xa moletin sav xil lapol ni e naho xil sam.’

<sup>22</sup>“Di, eilep biteni mini bitene, ‘!Xouk obe moletin te polien tei xa osa tang! Nipol ni sepinien nam xil ak ianuk mun tang! Xouk okila xa inou nabe moletin te xeih, di nanggur neta xa di natapol ti ven, e di nanggur anien xa moletin sav xil di lapol ni e naho navan. <sup>23</sup>?Veneh ma otaling vatu navan ti vaha vate bangk tova? Vamak, ma melele xa nitilomun, mei namuri vatel tuten mun vata xati.’

<sup>24</sup>“Di, biteni mi ngan xil xa lasoh ladi sangas bitene, ‘Muleh rat vatu xil xai rani, e musa ni mi moletin navan xa nggur vatu xa be milian tei (1,000,000).’

<sup>25</sup>“E xil labiteni mini labitene, ‘Suv, xi nggur milian (1,000,000) ngamu!’

<sup>26</sup>“E xi bit rilomun ni mi xil bitene, ‘Reitin mak, ngan xil xa di langgur huite e neta xa nalingi e he, xil likila lihuri ihe mahulong mu. E ngan xil

xa di latahur ti vari huite; holesok xil vus xa nalingi e he, nileh rati ra xil.’

<sup>27</sup>“Ngan ak bus, eilep ak biteni mun mi moletin nan xil bitene, ‘E taxeak, ngan xil xa laketeh misa ni nou, e iexil tavei nou mei namei suv toto nae, muleh xil limei e muhas xil lilel pe metok.’”

<sup>28</sup>Melele xa Iesu misepin mi moletin xil bus, xi be Serusalem del moletin nan xil.

### Iesu Be Serusalem Nggoni Suv Toto Tei

*Luk 19:29-40*

<sup>29</sup>Melele xa Iesu bemei sangas ni metimal tahal Betfas e Betani, sangas ni Vathu te Urvatiei te Olip, e misis moletin nan lu tengen lalitiamu laliha. <sup>30</sup>E biteni mi xalu bitene, “Mulhe metimal xor, e melele xa muba en, mulkamet sulut dongki tei xa lasare da, xa moletin tovuol tamu vatotan en. Mullal rati e multeli imei inggak. <sup>31</sup>Xosxa moletin tei isis xamil xa mulal rati veneh, ma mulhiteni mini xa suv ien bei.”

<sup>32</sup>Xalu luba, e lupus holesok xil vus momal tang nggoni ngan xa Iesu tehiteni mi xalu. <sup>33</sup>E melele xa di lulal rat sulut dongki ak, moletin xil xa sae lasis xalu labitene, “?Veneh ma mubit mullal rati?”

<sup>34</sup>E xalu lubiteni mi xil lubit, “Suv ien bei.” Ma xil lamae ni mi xalu. <sup>35</sup>Di, ludeli sulut dongki ak be visal Iesu. Luden eising nalu de mar dongki, e ludutou ni Iesu ba dotan da en. <sup>36</sup>E melele xa di ba nggo dongki ak, moletin xil di laden kuh eising nae xil e suse.

<sup>37</sup>E melele xa xi bemei sangas Serusalem, momal ni suse xa nggo Vathu te Urvatiei te Olip, vanut moletin nan xil di lames Hi e di lapet rat hisen del meunen ve merekel xil xa di latepusi ti tepol ni e labitene,

<sup>38</sup> “!Hi Suv, utuxol xat suv toto xa bemei e hisom!

Iling tomat mi moletin xil itel Hi,  
e xil lipet rat hisen ihe ut nesao.”

<sup>39</sup>Di, rut Parasi xa lamos e vanut moletin ak lasepin mi Iesu labitene, “!Tisa, sepin mi moletin nam xil litit votei!”

<sup>40</sup>E Iesu bit rilomun ni mi xil bitene, “Nabiteni mi xamim, xosxa xil litit votei, ma hat xil ak sung lixoles e ti likekei ni.”

### Iesu Des Moletin Xil Tahal Serusalem

*Luk 19:41-44*

<sup>41</sup>Melele xa Iesu bemei sangas ni Serusalem, keteh pusi, ma muis <sup>42</sup>e bitene, “O mol-Serusalem xil, vahit mukil suse te tomat, ma mukila muvuri. E taxeak, vengan xa di musin nou, Hi misak ni minggus ra xamim, e mesal tovuol munamun tengen muvur xat tomat. <sup>43</sup>Melengien tei di bemei xa xil xa di labae del xamim limei, lixorelis taon namim, e xamim ngasen musakras mulesae. <sup>44</sup>Xil lihas vin xamim e limulel



holesok xil vus namim. Hat te nim xil linavil xat xil ti mun, vengan xa xamim mutapus kil ti melele xa Hi temeigen tangan vateh meulien e xamim.”

**Iesu Minggol Rerat Moletin Xil ra Nim Eo na Hi**

*Luk 19:45-48*

<sup>45</sup>Di, Iesu be Nim Eo na Hi e di minggol rerat ngan xil xa di lapos ni holesok nae xil en. <sup>46</sup>E xi biteni mi xil bitene, “Hi bit xati di e Vanuvei Eo nan bitene,

‘Nim Eo navan ihe ‘nim te sisen.’<sup>q</sup>

E xamim mubilesi mei be ‘nim te xusen’ na moletin xil te kanen.”

<sup>47</sup>Di, e melengien xil ngasen, Iesu di pispisi e Nim Eo na Hi. E vat xil na pris xil, tisa xil te Rae xil na Mosis, e vat sav ngan xil mun te rute ak lalang ves suse tangan lavasi vamat. <sup>48</sup>E xil lasakras vengan xa, vehakut, vanut moletin xil di lamosos ladela e iexil bei mak mu tangan lateong kuhi ni sepinieng xil nan.

**Eilep Xil na Siu Xil Labit Lakil ti Visi Iaxa mae ni Iesu**

**Di Pol ni Polien Nan**

*Luk 20:1-8*

**20** <sup>1</sup>Vatei, melele xa Iesu di pispisi mi moletin xil e di misetu ni longeongen hos e Nim Eo na Hi, vat xil na pris xil, tisa xil te Rae xil na Mosis, e elda xil mun lamei <sup>2</sup>lasisi labitene, “?Hiteni mi xamem, xoux di opol ni mak veneh? ?Visi iaxa misilak, mei di opol ni polien xil ak?”

<sup>3</sup>E Iesu bit rilomun ni mi xil bitene, “Itiamu, nisis pilei neta tei mi xamim. ?Muhiteni minou, <sup>4</sup>visi iaxa tesil Sion mei di tekas moletin xil, Hi mu moletin tang?”

<sup>5</sup>E xil di lasel mi xil mun tang labitene, “?Rihit itep? Xosxa rihit, ‘Hi iaxa misila,’ ma xi ihit rilomun ni ihitene, ‘?Veneh ma mutake reitin ti e pispisien na Sion?’ <sup>6</sup>E xosxa rihit, ‘Moletin tang tesila,’ ma vanut moletin xil ak lihop xir vengan xil laneket xa Sion be provet tei.” <sup>7</sup>Misak ni xil labit rilomun ni mi Iesu labitene, “Matakil ti visi tesila.”

<sup>8</sup>Ma Iesu biteni mi xil bitene, “Mak, ma inou mun nasakras namit visi iaxa di misil nou mei di napol ni polien xil ak.”

**Iesu Dei Vole Usil Moletin Xil xa Lalaxat Urvatiei te Grep**

*Luk 20:9-18*

<sup>9</sup>Di, Iesu dei vole ak mi moletin xil bitene, “Vatei, moletin tei milih urvatiei tei te grep. Milihi bus, xi milingi de he rut moletin xil tangan ti lilaxati. Di, hortan te urvatiei ak be ut tei xa be sotin, e ba dak be

<sup>q</sup> 19:46 Aes 56:7

nousav. <sup>10</sup>Melele xa melengien pipin tangan laleh viton huit grep xa men, hortan ak misil eloheoh nan tei ba tangan vasis xil lisa ti huitte san mini. E moletin tesa xil ak, xa di lalaxat urvatiei ak, labas purun eloheoh nan. Xil langgol rati ba, e taxur pas huitte tova vari. <sup>11</sup>Ma hortan te urvatiei ak misil eloheoh tei mun ba, e moletin tesa xil ak labasi mun e lapol ni unounen mini. Di, latasa ti huitte mini e langgol rati ba. <sup>12</sup>Di, misil eloheoh xa be tol nen ba, e moletin tesa xil ak labasi mun, di, langgol rati ba.

<sup>13</sup>“Ma hortan te urvatiei ak minemi bit, “?Nipol ni itep sung? !Aha! Nisa natuxuli xati xa eheien navan da en iha. Nanemi nabit xi sung, limerere ni.”

<sup>14</sup>E melele xa moletin tesa xil ak lapusi bemei, xil lasem xil labitene, “?Mupus ti? Ngan ak be horamue nan xati vari xa urvatiei te grep ak mei ite hen. !Ravasi vamat! !Imak, ma rute ak ihe sar sung!” <sup>15</sup>Misak ni, laso rati ra urvatiei ak, e labasi mat.”

Di, Iesu misis moletin xil bitene, “?Midep? ?Hortan te urvatiei ipol ni itep mi moletin tesa xil ak? <sup>16</sup>Nabiteni mi xamim, xi ipol ni imak, imei ihas xil lilel, ti, imae ni urvatiei te grep san mi moletin sav xil lilaxati.”

E melele xa moletin xil lalonge mak labiteni mini labitene, “!Ei, misakras vari tang!”

<sup>17</sup>Iesu miketeh pus xil e misis xil bitene, “?Maxani, veneh ma Vanuvei na Hi biteni mak bitene,

‘Hat tei xa lapol ni nim ni  
xa moletin xil te polien labit misa e laso ni ba,  
xi vari bemei bos mak mu mili hat teisav xil.’”

<sup>18</sup>Ti, moletin tei xa isavut e imot ita xat hat ak, sin imavul tova tang! E xosxa hat ak imot ita xat moletin tei, ma moletin ak imat vari.”

<sup>19</sup>Melele xa tisa xil te Rae xil na Mosis del vat xil na pris xil lalonge mak, vatakes lasak pisi xa ladal xat Iesu vengan xa lakila xa Iesu di misepin misa xat xil nggo vole ak. E uli mikan ni moletin xil xa ladi xorelisi vehakut.

### Sispileien ve Rin xa Langgal Takis

#### *Luk 20:20-26*

<sup>20</sup>Ma tisa xil te Rae xil na Mosis del Vat xil na pris xil lalang ves suse tangan lavur xat Iesu vaxo en. Misak ni xil lasil moletin xil te luvosen tangan lihe visal Iesu ixoni moletin hos xil. Xil labit lava lasis Iesu ni neta holu tangan lapol ni vasepin ni neta tova xa vasa, vasak ni xil lakila laling Iesu e he kavmen tahal Rom. <sup>21</sup>Moletin xil ak te luvosen labiteni

mi Iesu labitene, “Tisa, xamem makila xa naha xa xouk di obiteni mu di opispisi ni momal tevi. Xamem makila mun xa xouk opus moletin xil ngasen lapin tang, ngan xil xa latellep del moletin votei xil mun. E xouk di opispisi mi xil vus usil suse te reitinen xa Hi ien bei moletin xil lihusili. 22Mak, ma xamem iemem bei makil ti, e rin xa manggal takis ba mi Sisa tahal Rom, manggur xoteh Rae nar, mu matahur xotehi ti?”

23E Iesu mile kil luvosen nae, ma biteni mi xil bitene, 24“!Sa mani tova te takis minou! ?Nanao e his visi iaxa da en?”

E xil labitene, “Na Sisa.”

25Ma Iesu biteni mi xil bitene, “Ma naha xa be na Sisa, musa rilomun ni mini. !E naha xa be na Hi, musa rilomun ni mi Hi!”

26E xil lamesep ni sepinien nan e misak ni ladit votei. E pe met moletin xil, lasakras lapol ni Iesu vamot e sepinien nan.

**Satusi Xil Lasis Pilei Iesu Usil Melengien xa Moletin Xil Limeul  
Rilomun Ra Maten  
*Luk 20:27-40***

27Di, rut moletin xil mun xa lakes xil ni ‘Satusi’ latemei visal Iesu. Xil lanemi labit moletin misakras vameul rilomun ra maten. Ma labiteni mi Iesu labitene, 28“Tisa, Mosis tetis rae ak tehe nar: ‘Xosxa moletin mat reling atou nan e horamue nalu tovuol, ma tunali sav ihur tunau ak ihe atou nan. Mak, ma isa horamue mini xa ihur his tunali xa mat tuei.’”

29Ma vatei, tua xil labe lu e he sav (7), e ngan diamu ni xil nggur atou tei. Di, mat e horamue nalu tovuol. 30Ma tunali xa dutou nggur atou ak. Xi mun mat, e horamue nalu tovuol. 31Ma di, ngan xa be tol nen ngguri. Xi mun mat, e taling ti horamue. Sexien ak mistal ni tua xil vus ak. Xil ngasen lalel e horamue nae tovuol. 32E dutou ni, atou ak mun mat. 33?Mak, ma e melengien xa Hi isak ni moletin xil limeul rilomun ra maten ixoni rut moletin xil di labiteni, atou ak ihe atou na visi e xil, vengon xa xil vus xa latehe lu e he sav (7) lateteli tetela?”

34E Iesu bit rilomun ni mi xil bitene, “E ut etan ak, tiramue xil e atou xil likila liteli. 35E melengien xil xa ti imei, ngan xil xa Hi bit meulien nae pipin e momal pe meten limeul rilomun ra maten e ut nesao, xil linateli ti mun. 36Xil mei lixoni masxaxa xil xa lasakras lalel. E melele xa xil limeul rilomun ra maten, di pisen ni xa labe horamue xil na Hi. 37E Mosis mun tesepe mese ni tehit moletin xa mat mikila imeul rilomun ra

---

<sup>s</sup> 20:24 Mani ak, valnao Sisa tahal Rom da en, e inggak, ladis ‘Sisa Tiberias xa be Nat Okastas xa be Hi’ da en. Siu xil labit tamal ti xa laxal takis vatutou ni kavmen tahal Rom vengon xa labit Sisa mun be Hi e ngan ak di minggur xotehi Rae na Hi xa bit, ‘Munamot ti mi hi sav, e mumot mi Hi keatang!’ (Dut 20:3)   <sup>t</sup> 20:28 Dut 25:5 Siu xil lapol ni mak tangan his moletin xa mat navop ti.

maten. E tumulen te holiei tei xa upang tepili en xa Mosis tetis usili, xi biteni xa Hi Suv ‘be Hi na Ebrahim, be Hi na Aesak, e be Hi na Siakop.’<sup>u</sup>  
<sup>38</sup>Hi meul e be Hi na ngan xil xa lameul; tave Hi na ngan xil ti xa lamat. Hi di pus xir ngasen nggoni ngan taxa rameul radi.”

<sup>39</sup>Rut tisa te Rae xil na Mosis lakei ba ni labitene, “!Tisa, sepinien xa osa ni mi xil momal tevi!” <sup>40</sup>Misak ni moletin xil, uli xil mikan tangan lasis pilei ti mun neta vaha ni.

### Iesu Misis Pilei Moletin Xil Usil Kristo Be Visi

*Luk 20:41-44*

<sup>41</sup>Iesu misis pilei moletin xil bitene, “?Midep? Kristo istal ixo vatimol na Suv Toto Deved itep? <sup>42</sup>Vengan xa Deved tasen tehiteni e kikeien tei nan tehitene,

‘Hi Suv biteni mi suv navan bitene,

‘Utotan e riuk metu

<sup>43</sup> ituxoh melele xa niling ngan xil xa di labae delak liti pe hem.”

<sup>44</sup>Deved mikes Kristo ni ‘suv nan’. ?Mak, ma Kristo istal ixo vatimol nan itep?”<sup>v</sup>

### Iesu Misep Pangas Tisa Xil te Rae xil na Mosis

*Luk 20:45-47*

<sup>45</sup>Melele xa moletin xil di tamu lateong ni, Iesu biteni mi moletin nan xil bitene, <sup>46</sup>“Muvue xat xamim ve sexien na tisa xil te Rae xil na Mosis. Xil iexil bei ti lasing ni eising xil xa bos e teviei vaxoni eilep xil. Xil di lasing mak e di lakapis e mesal tangan mosav xil lipus xil e likes xil itel merereen. E di lalepis von toen na eilep xil xa bos e nim te pispisien. E melele xa moletin xil lapol ni anien xil xa tellep, lalepis rute xil xa bos mak mu. <sup>47</sup>E suse te xuxusen, moletin xil ak labe hokan, e di laleh holesok holu ra tunau xil. Di, e pe met moletin xil, xil di lapol ni sisen xil xa teviei. !Pangasien xa imei mi xil ihe mahulong mu ili na ngan teisav xil!”

### Sanien na Tunau Tei mi Hi

*Luk 21:1-4*

**21** <sup>1</sup>Melele xa Iesu da tamu e vloh te Nim Eo na Hi, miketeh e pus moletin xil xa holesok nae xil holu di lasa sanien nae xil tangan vatutou ni polien te Nim Eo. <sup>2</sup>Di, e miketeh mun e pus tunau tei xa be hoeo bemei, miso selen lu tang. <sup>3</sup>Ma Iesu biteni bit, “Nabiteni mi xamim,

<sup>u</sup> 20:37 Eks 3:6    <sup>v</sup> 20:44 Usil sexien na Siu xil, tata mu avu tei misakras vakes natnali ni ‘suv’.

tunau xa be hoeo iaxai misa sanien nan mili sen ngan tesav xil. <sup>4</sup>Ngan tesav xil di lasa sanien nae xa be rute tang te holesok nae xil, e eilep be nae. E tunau ak xa be hoeo mak, xi misa vuol ni ngan vahe te anien en nan.”

### **Iesu Sep Mese ni xa Melengien Xil te Longpangasien Di Bemei**

*Luk 21:5-19*

<sup>5</sup>Rut moletin na Iesu di laketeh mikapis e vloh te Nim Eo na Hi. Lapusi xa lasak xati bos xa bos del hat xil xa minehin pupu e del sanien hos sav xil. Misak ni di lasep usili, ma Iesu biteni mi xil bitene, <sup>6</sup>“Melengien tei di bemei xa lihulen sen holesok xil xa di mupusi xiak. Hat ti vari nasoh.”

<sup>7</sup>Moletin xil na Iesu lasisi labitene, “?Tisa, melengien ak istal vilieh? ?E naha vari iaxa istal tangan ipisen ni xa bemei sangas?”

<sup>8</sup>Iesu biteni mi xil bitene, “Muvue xat xamim. Moletin hao limei, mei lisepin e hisok lihite, ‘!Inou nabe Kristo xa Hi tehit xati!’ E lihiteni mun lihite, ‘Vongkor bemei sangas xiak!’ E munake reitin ti e xil e munahusil xil ti. <sup>9</sup>Melele xa mulongeong ni rute tei xa bae del rute sav mun, mu moletin xil di labae mi xil mun tang, ulimim nakan ti. Sexien xil ak istal itiamu, e nave Vongkor ti mu.”

<sup>10</sup>Xi biteni mun bit, “Ut tei xa eilep ti ivae itel ut sav mun, e suv toto tei ti ivae itel tei mun. <sup>11</sup>Lul ilul ixeh, mae iat moletin xil e ut xil holu, e meseien xil xa nggeih istal. An tesa xil hao istal mun, e neta xil hao listal lixo holesok xil xa di tilang hat xa isak ni moletin xil uli ikan pupu.

<sup>12</sup>“Itiamu neta xil ak istal, moletin xil lital xat xamim e lihas pangas xamim. Liling xamim e he eilep xil te nim te pispisien xil e lisa xamim muhe nim te xeh. E musoh mun pe met suv toto xil. Holesok xil ak listal mi xamim vengas xa mube moletin navan xil. <sup>13</sup>Mesal namim vari xiak tangan ti muhithiten longeongen hos mi xil. <sup>14</sup>Ve rin ak, munanexo pupu ti ve sepinien eah xa muvue xat xamim tangan muviteni. <sup>15</sup>Vengas inou iaxa nisa sepinien mi xamim e nipol ni xamim mukilakil tangan moletin xil xa di laketeh misa ni xamim misakras lasa rilomun sepinien vaha xat xamim. <sup>16</sup>Tamemim e ninemim xil, tumim xil e vatimol namim xil mun tang, iaxa limae ni xamim muha tangan ha lihas rut xamim mulel. <sup>17</sup>Xil vus iexil iat xamim vengas mupol del hisok. <sup>18</sup>E xil lasakras lapurun meulien namim. <sup>19</sup>Xosxa musoh ixeh, ma muhur meulien sal.

### **Iesu Bit Kila xa Lihulen Hal Serusalem**

*Luk 21:20-28*

<sup>20</sup>Melele xa mupus moletin te vaeen xil mei likapis xol Serusalem, ma mukila xa navehi ti lihulen ni. <sup>21</sup>Ma ngan xil xa ladi hal Sudea lilesae lihe vathu xil. Ngan xil xa ladi hal Serusalem lihe lingi, e ngan xil xa ladi ut sav xil e hal Sudea misakras ladilomun lamei en. <sup>22</sup>Melengien xil ak

ihe ‘Melengien xil te Longpangasien’ xa Hi ipol ni mei istal ixoni naha xa tehit xati e Vanuvei nan. <sup>23</sup>E melengien xil ak, isa pupu mi atou xil xa ladi e ngan xil xa di latunat ni tuvava xil. Melengien xil xa nggeih pupu istal e rute ak, e moletin xil ak lilong pangas xil pupu. <sup>24</sup>Litil vin rute xil ni tiei te vaeen. E rute ngan xil livar xat xil e lileh xil ha liti pe he suv te ut sav xil, e ti lipol ni polien xil xa nggeih pupu. E moletin xil xa latave Siu ti, lipel tan e Serusalem ha ituxoh melele xa Hi ihiteni ihit melengien nae ipin.

<sup>25</sup>“Holesok xil holu istal ixo meteneai, aveti e hitu xil. E ut etan, tahe xil xa tellep limea e limavul xat ut xil ngasen. Isak ni moletin xil e ut ngasen ti linexo e ulixil ikan e melele xa lilong tahe ivang. <sup>26</sup>Melele xa moletin xil ngasen lipus holesok xil ak mei istal e ut etan e lipusi xa holesok xil te tilang hat di bilhiles, rute xil limermesil ve ulikanen. <sup>27</sup>Ti, itutou ni, lipus Nat Hi mei istal ixo momah e itel xeihen, e miehen iminahin xole. <sup>28</sup>Melele xa holesok xil ak mei istal, musoh mal e mupet rat vatumi ihe nesao vengaxa Hi sangas vamei tangan vateh meulien e moletin nan xil.”

### Iesu Dei Vole Usil Vatiei Xil

*Luk 21:29-33*

<sup>29</sup>Di, Iesu dei vole ak mi xil bitene, “Munem pis vatit re e vatit homel. <sup>30</sup>Melele xa luso roroh, mukila xa melele bemei sangas tangan lalih naho hu te hura. <sup>31</sup>E suse nen mun tak, melele xa mupus holesok xil ak ti istal, mukila xa melengien bemei sangas xa Hi imei ihe suv toto na moletin xil vus.

<sup>32</sup>“Nabiteni reitin mi xamim, moletin xil xa lameul ladi lipus holesok xil vus ak mei listal. <sup>33</sup>Ut nesao e ut etan lalivus, e sepinien eo navan misakras vavus.”

### Moletin Na Iesu Xil Livue Xat Xil

*Luk 21:34-38*

<sup>34</sup>Iesu misel xat moletin nan xil bitene, “!Muvue xat xamim! Munanem pupu ti ve anien xa muva vin xamim ni vehakut, ve oei xa mumu ni vuma mutallang ni, mu holesok sav xil mun te ut etan ak. Maxani, melengien xa Nat Moletin itilomun en mei nastal nahe te temanin en mi xamim naxoni voh. <sup>35</sup>Vengan melengien ak mei istal mi moletin xil ngasen e ut etan. <sup>36</sup>Ti muvue xat xamim e ti musis vehakut. Mak, ma muhur xeihen tangan muhur xat meulien namim ituxoh xoxalit melengien xil xa nggeih xiak. E munave unoun ti e melele xa muha musoh pe met Nat Moletin.”

<sup>37</sup>E vehakut, Iesu di pispisi mi moletin xil e Nim Eo na Hi. E melele xa vongien bemei, xi ba di pat e Vathu te Urvatiei te Olip. <sup>38</sup>E makoe roroh xil ngasen, moletin xil di labe Nim Eo na Hi tangan lateong ni.

### Lingxatien Tengan Lavas Iesu Vamat

*Luk 22:1-6*

**22** <sup>1</sup>Melele bemei sangas tangan Siu xil lanem rilomun ni ‘Melengien xil te Beret xa Is Tovuol En.’<sup>w</sup> Melengien kokot teni vari, xil lapol ni anien xa lakesi ni ‘Anien te Tavien’ en.<sup>x</sup> <sup>2</sup>Vat xil na pris xil del tisa xil te Rae xil na Mosis di lalang ves suse tangan lavas xuxus ni Iesu vamat vaxo en. Xil uli xil mikan xa moletin xil xa di langgusili, linapol ni neta tova mi xil.

<sup>3</sup>Di, Temat bemei nggeih e nenemien na Sudas Eskariot, xa be tei e lu e le (12) na Iesu. <sup>4</sup>Ma Sudas be reling xil e ba misepin del Vat xil na pris xil del eilep xil na merketeh xil te Nim Eo usil suse xa xi mikila iling Iesu e he xil ixo en. <sup>5</sup>Xil lamaal ven e labit xati xa lixale ven. <sup>6</sup>Mak, ma Sudas mae ni. Di, ba di milang ni suse xa bos tangan iling Iesu ihe he xil ixo en e melele xa moletin xil lanave holu ti.

### Moletin Lu na Iesu Lalibue Xat Holesok Xil te Anien te Tavien

*Luk 22:7-13*

<sup>7</sup>E ‘Melengien xil te Beret xa Is Tovuol En’, melele xati tangan lapol ni ‘Anien te Tavien’, moletin xil di labas sulut sipsip xil ven. <sup>8</sup>Ma Iesu misil Pita xal Sion del xat sepinien ak, “Muliha mulsak mese ni Anien te Tavien tangan ha ria vituei ni.”

<sup>9</sup>Ma xalu lusisi lubit, “?Rute xave iaxa xoux iem bei xa maliha malsak mese ni en?”

<sup>10</sup>Xi biteni mi xalu bitene, “Melele xa mulihe hal Serusalem, moletin tei xa po valoei xa pol imei ihisu ni xamil. Mulhusili ha mulhe nim xa xi iha en. <sup>11</sup>Di, mulsis moletin xa nim man mulhitene, “Tisa bit, “?Von toen xave iaxa nitel moletin navan xil mei mua Anien te Tavien en?” <sup>12</sup>Xi itel xamil mulhe nesao e nim man e ipisen von toen tei xa mahulong xa langgur revu ngamu datil xamil. Rute ak vari iaxa mulsak mese ni holesok xil vus en.”

<sup>13</sup>Xalu luba, e lupus holesok xil vus nggoni ngan taxa Iesu tehiteni mi xalu. Ma xalu rusak mese ni anien ak en.

---

<sup>w</sup> **22:1** Melengien xil te Beret xa Is Tovuol En: E hram xil ngasen, melengien tol e he sav (8) Siu xil di langga beret xa is tovuol en tangan lanem rilomun ni melele xa latemanon latehe reling hal Isip (Eks 12:1-14). <sup>x</sup> **22:1** Anien te Tavien: Siu xil lapol ni Anien ak tangan lanem rilomun ni melele xa masxaxa xil na Hi lathas muimol xil ngasen tahal Isip. E muimol na Siu xil, re sipsip xa lakas puiteh mae xil ni tesak ni Hi tetavi e xil (Eks 12:15-20).

### Anien Eo na Suv Iesu

*Luk 22:14-23*

<sup>14</sup>E melele te anien en, Iesu ba dotan e von anien en del moletin nan xil. <sup>15</sup>Di, Iesu biteni mi xil bitene, “Teok tehei pupu xa nama Anien te Tavien ak vatel xamim. Ti, niha sung nilong pangas nou. <sup>16</sup>Nabiteni mi xamim, ninaxa ti mun Anien ak ituxoh melele xa koute teni istal, e melele xa Hi isak ni lelatiatien nan mei istal en.”

<sup>17</sup>Di, Iesu nggur kap xa uae ba en, memes Hi ven e biteni bit, “Muhuri, e xamim vus mumu ni. <sup>18</sup>Nabiteni mi xamim, taxeak iha ninamu ti mun uae ak ha ituxoh melele xa Hi imei istal ihe suv toto na moletin xil.”

<sup>19</sup>Di, Iesu nggur beret, memes Hi ven, bul pasi e misa ni mi xil e biteni, “Ngan ak be tiei navan xa nimae ni ve xamim. Vehakut xa ti mupol ni imak, ti munem xat nou ven.” <sup>20</sup>Usil sexien tak, melele xa langganien bus, Iesu nggur kap xa uae ba en, misa ni mi xil, e biteni bit, “Uae ak be reok xa ileh tangan muhur meulien ixo en, e isak ni hitxatien hu na Hi mei istal e ihe reitin.”

<sup>21</sup>“!E muteong ni nou! Ngan xa imae ni nou nihe he moletin tesa xil di dotan del nou e anien ak taxeak. <sup>22</sup>Reitin mak, Nat Moletin imat ixoni ngan taxa Hi tehit xati ngamu. E isa pupu mi moletin xa be suse teni!”

<sup>23</sup>Ma xil di lasis xil mun tang xa visi e xil ikila ipol ni rin ak.

### Moletin Xil na Iesu Di Langor ve Visi e Xil Be Eilep Mili

*Luk 22:24-30*

<sup>24</sup>Melele xa moletin xil na Iesu ladi tamu e von anien en, di langor mi xil mun usil visi e xil iaxa be eilep mili. <sup>25</sup>Ma Iesu biteni mi xil bit, “Suv toto xil na moletin xil xa latakil ti Hi di lapien xeihen nae mi ngan xil xa ladi pe he. E eilep xil mun nae di labit moletin xil lakes xil ni ‘Eilep te Tutouen.’ <sup>26</sup>E rin xa namim, namak ti. E-e. Eilep tei e xamim ipol ni nenemien nan ihe tan ixoni horam maxoe tang. E ngan xa be suv ipol ni nenemien nan ihe tan ixoni moletin te polien tang. <sup>27</sup>?Visi iaxa be eilep, ngan xa dotan di ngganien, mu ngan xa di miseti anien? Moletin xil vus lanemi labit ngan xa di dotan. E inou, nade vis xamim nanggoni ngan xa di miseti anien.

<sup>28</sup>“Xamim mutetel xat inou e sakpisien xil vus xa testal minou. <sup>29</sup>E texoni ngan taxa Tata teling xat nou tangan mei nihe suv toto tei, ma

---

<sup>y</sup> **22:20** Eks 24:6-8 Mosis miteh re buluk e hor te sanien tangan wasak ni hitxatien matu xa mol Siu xil latepol ni tetel Hi mei istal e ihe reitin. Usil sexien nen tak, re Iesu pol ni hitxatien hu mei istal ihe reitin xa Hi iteh meulien na moletin xil te ut etan.



inou mun niling xat xamim muhe suv toto xil. <sup>30</sup>Melele nihe suv toto, nisa von totanen te merereen mi xamim vus, e ti muanien e ti mumun itel nou e voninok. E ti mulaxat vatimol xil tahal Isrel xa labe lu e le (12) e mulepis meulien nae xil.”

### Iesu Bit Kila xa Pita Iluvos Ihit Takil Ti

*Luk 22:31-34*

<sup>31</sup>Di, Iesu biteni mi Saemon Pita bitene, “!Saemon, Saemon uteong ni nou! Temat tesis Hi tangan isak pis xamim vus, e Hi mae ni tangan ile kil neketen namim. <sup>32</sup>E inou nasis ve xouk Saemon tangan neketen nam navus relinguk ti. E melele xa uhiles meulien nam e neketen nam ixeih mun e nou, ma ututou ni neketen na tumali xil mei ixeih mu.”

<sup>33</sup>E Pita mitamea e biteni mini bitene, “!Suv, inou nabue xat nou tangan nihe nim te xeih itelak e nimat itelak!”

<sup>34</sup>E Iesu bit rilomun ni mini bitene, “Nabiteni minuk Pita, itiamu xa tuto ikora e makoe roroh tamu, xouk uhiteni ihe vatol xa otakil ti nou.”

### Iesu Bit Moletin Nan Xil Livue Xat Xil

*Luk 22:35-38*

<sup>35</sup>Di, Iesu misis moletin nan xil bitene, “Melele xa natesil rerat xamim, tenatel xati ti neta vaxoni paos, ateli, mu sandel. ?Mutehe terume ni neta tova?”

E labit rilomun ni labitene, “E-e, neta tovuol.”

<sup>36</sup>Iesu biteni mi xil bitene, “E taxeak, tei xa tiei te vaeen nan tovuol, ma ipos ni eising tova nan e ixal tova. <sup>37</sup>Nabiteni mi xamim, sepinien xa de Vanuvei na Hi imei ihe reitin xa bit,

‘Lapol nggeih mini

nggoni moletin xil xa di langgur xoteh rae xil.’<sup>z</sup>

Naha xa latetisi, Hi ling xati xa mei ihe reitin e meulien navan.”

<sup>38</sup>Moletin nan xil labiteni mini labitene, “!Suv, pus ti mu! Tiei lu te vaeen xiak.”

Ma Iesu bit rilomun ni bitene, “!Ei, pipin!”

### Iesu Be Vathu te Urvatiei te Olip Tangan Vasis

*Luk 22:39-46*

<sup>39</sup>Iesu be reling Serusalem e be Vathu te Urvatiei te Olip nggoni ngan taxa di pol vehakut ni, e moletin nan xil langgusili. <sup>40</sup>Melele xa laba laduxoh rute ak, Iesu biteni mi xil bitene, “Mutit ni sisen tangan Hi namaen ni ti sakpisien xil namei e xamim.”

<sup>z</sup> 22:37 Aes 53:12

<sup>41</sup>Di, be reling xil be sotin vuteili, di mitingeiril be tan e di misis bitene, <sup>42</sup>“Tata, xosxa omae ni, hur rat longpangasien xa di bemei sangas ranou. E onapol ni ti naxoni ngan xa inou ieok bei; upol ni ixoni ngan xouk kestang iem bei.” <sup>43</sup>E masxaxa tei te ut nesao mei mistal mini e misak ni ven e nenemien nan xeih mu. <sup>44</sup>Del nenexoen te longpangasien, xi misis nggeih mu. Misak ni vetin nan xa mileh, mot be tan nggoni ra.

<sup>45</sup>Melele xa Iesu misis bus, xi mea, ba rilomun visal moletin nan xil. E mikameti xa xil vus di lapat. Ve buol pupu vengan xa nenexoen di bas xil. <sup>46</sup>Ma Iesu biteni mi xil bitene, “?Veneh ma di mupat? Mutamea, mutit ni sisen tangan Hi namaen ni ti sakpisien xil namei e xamim.”

### Ladal Xat Iesu

*Luk 22:47-53*

<sup>47</sup>Melele xa Iesu di tamu misepin, Sudas xa be tei e lu e le (12) na Iesu bemei del tetit moletin tatei xil. Xi bemei visal Iesu tangan vapesum ni vin. <sup>48</sup>E Iesu biteni mini bitene, “?Sudas, xouk omae ni Nat Moletin nggo pesumen?”<sup>a</sup>

<sup>49</sup>Melele xa moletin na Iesu xil lapus naha xa di mistal, lasisi labitene, “?Suv, rakila ravae ni tiei te vaeen?” <sup>50</sup>Tei xil milat tiei tei e miseh xoteh vorang metu na moletin tei te polien na Vatixar na pris xil.

<sup>51</sup>E Iesu biteni bit, “!Ei, pipin!” Di, mitang duxol moletin ak e pol ni vurangen bos rilomun.

<sup>52</sup>Di, Iesu biteni mi Vat xil na pris xil, mereketeh xil te Nim Eo, del elda xil xa lamei tangan lital xati, bitene, “?Midep ma mumei del tiei te vaeen e homenda tangan mutal xat moletin tova te kanen? <sup>53</sup>Vehakut nade visal xamim e Nim Eo, e mutasak pis ti tangan mutal xat nou. E taxeak be mesal namim, e melele te maluxoluken xa xeihen na Temat di pol.”

### Pita Bit Takil Ti Iesu

*Luk 22:54-62*

<sup>54</sup>Xil ladal xat Iesu e ladeli ba be nim ma Vatixar na pris xil. E Pita di mile xus e di dutou ni xil. <sup>55</sup>Melele xa laduxoh nim ak, lasahan upang tei di minggan e hilaep te vioh. Ma Pita ba mos del ngan xil xa di ladotan xorelisi. <sup>56</sup>Melele xa atou tei te polien pusi xa Pita dotan de visal upang, miketeh momal ba ni e biteni bit, “Moletin ak mun tevituei tetel Iesu.”

<sup>57</sup>E Pita miluvosi bit, “!Atou, inou natakil ti moletin xai!”

<sup>58</sup>Tave nousav ti, moletin tei pus kil Pita ma biteni mini bitene, “!Xouk mun obe tei e xil!”

E Pita misep luvasi mun bitene, “Ei, tiramue, tave nou ti.”

<sup>a</sup> 22:48 E sexien na Siu xil, melele xa moletin tei mei pesum e vi mosav, di pisen merereen mini xa lube tua.

<sup>59</sup>Di, be nousav vuteili, tiramue sav mun misepin nggeih xati bit, “!Reitin mak! Tiramue ak tevituei tetel Iesu, vengan xa sepinien nan nggoni ngan Kaleli xil tang.”

<sup>60</sup>E Pita biteni nggeih bit, “!E-e, natakil ti vari naha xa di obiteni iaxai!”

Vatakes, melele xa di tamu misepin, tuto tei mikora. <sup>61</sup>E melele nen tak, suv Iesu bilés, miketeh momal ba ni Pita, ma Pita minem rilomun ni naha xa suv tehiteni mini tehiti, “!Itiamu xa tuto ikora e makoe roroh tamu, xouk uhiteni ihe vatol xa otakil ti nou.” <sup>62</sup>Ma Pita ba e di midang vengan milonge misa pupu.

### Lapol Pepamen mi Iesu e Labas Pangasi

*Luk 22:63-65*

<sup>63</sup>Mereketeh xil xa di laketeh xol Iesu lasep pepamen ni e di labas pangasi. <sup>64</sup>Labar xol meten e melele xa tei xil basi, lasisi labit, “?Xosxa obe provet tei, hit pisi, visi iaxa basuk?” <sup>65</sup>E laso sepinien hao mun xa misa ba ni.

### Langgur Iesu Be Kot

*Luk 22:66-71*

<sup>66</sup>Melele xa ut milan, elda xil, Vat xil na pris xil, del tisa xil te Rae xil na Mosis ba labe vituei e von kot en, e ladel Iesu mei misoh pe met xil. <sup>67</sup>Xil lasisi labitene, “?Hit pisi mi xamem, xouk iaxa obe Kristo xa Hi tehosei?”

E xi bit rilomun ni mi xil bitene, “Xosxa nihiteni mi xamim, ma munake reitin ti e nou. <sup>68</sup>E xosxa nisis xamim xa veneh ma mutaneket ti, ma musakras muvit kuhi minou. <sup>69</sup>E nihiteni imak, taxeak iha, Nat Moletin itotan e von xeihen e ri metu na Hi.”

<sup>70</sup>Ma xil vus lasisi labit, “?Xouk iaxa obit obe Nat Hi?”

Ma Iesu bit rilomun ni mi xil bitene, “Nggoni ngan taxa di mubiteni iaxai.”

<sup>71</sup>E xil labiteni labit, “Veneh ma rilang ves moletin tova tangan isa sepinien iha xati? Xir vus ralong sepinien tesa xil xa mistal nggo valongon e be an mun tang.”

### Iesu Misoh Pe Met Paelet

*Luk 23:1-5*

**23** <sup>1</sup>Eilep xil ngasen xa ladi kot en, lamea, e ladel Iesu ba misoh pe met Paelet, xa be Vat tahal Sudea. <sup>2</sup>Di, xil lasepin holu ba xat Iesu e pe met Paelet labitene, “Xamem makameti xa moletin ak iaxa di miling nenemien xil xa misa mi mol Siu xil tangan laketeh vasa ni kavmen tahal Rom. Di misep xol xil bit linaxal takis ti nava ni Sisa e kavmen nan. E xi biteni mun bitene xi be Kristo xa Hi tehosei, xa be suv toto tei.”

<sup>3</sup>Ma Paelet misisi bitene, “Midep? ?Xouk iaxa obe suv toto na mol Siu xil?”

E Iesu bit rilomun ni mini bitene, “Nggoni ngan taxa obitene.”

<sup>4</sup>Di, Paelet biteni mi vat xil na pris xil del tetit moletin xil ak bitene, “Natakamet ti rin tova xa misa vata xat moletin ak.”

<sup>5</sup>E xil lasel nggeih mu labitene, “Pispisien nan misi pe tine moletin xil xa ladi e Sudea tangan lanem misa holu. Tepol kokot ni e provins tahal Kaleli, e taxeak bemei duxoh inggak.”

### Iesu Misoh Pe Met Suv Toto Herot

*Luk 23:6-12*

<sup>6</sup>Melele xa Paelet milonge mak, misis xil bitene, “?Moletin ak be ngan Kaleli?” <sup>7</sup>Ma melele xa labiteni mini labit Iesu be tahal Kaleli, e rute xa Suv Toto Herot di milaxati, xi misa rat Iesu ba mi Herot vengana xa xi mun tete Serusalem e melele nen ak.

<sup>8</sup>E Herot besi xi pupu melele xa pus Iesu, vengana di telongeong ni. Be nousav pupu, xi di en tehei vapus ti. Xi di minemi bit ipus Iesu ipol ni merekel tova. <sup>9</sup>Ma Herot misis rovui Iesu ni rin xil holu, e Iesu dat votei. <sup>10</sup>Vat xil na pris xil del tisa xil te Rae xil na Mosis lamei e laso sepinien xil xa nggeih xat Iesu mi Herot. <sup>11</sup>Di, Herot del moletin nan xil te vaean lasing xol Iesu ni kaliko tei xa bos nggoni suv toto tei, e lapol pepamen mini. Di, lasa rilomun ni be visal Paelet. <sup>12</sup>E melengien ak vari, Herot del Paelet mei lubos mi xalu; e te tiamu ni ngan ak, di luteketeh tesa ni xalu.

### Paelet mae ni Iesu Ha Lihasi Imat

*Luk 23:13-25*

<sup>13</sup>Paelet mikes viton vat xil na pris xil, eilep xil del moletin sav xil. <sup>14</sup>Di, biteni mi xil bitene, “Mutehur moletin ak temei visal nou e mutehit xi iaxa di teling nenemien tesa xil mi Siu xil tangan laketeh vasa ni kavmen tahal Rom. E taxeak, e pe metemim, napus vuol ni holesok xil xa xi di pol ni. E natakamet ti rin tova xa misa xa xamim mubit xi di pol ni. <sup>15</sup>E Herot mun takamet ti rin tova xa misa vata xati, mak iaxa xi misa rilomun ni bemei visal xir. Neta tovuol xa misa xa moletin ak pol ni tangan ha vamat ven. <sup>16</sup>Mak, ma moletin navan xil liha limeas pangasi, ti, nimae ni ha ven imase. [<sup>17</sup>Sangas ni Anien te Tavien xil ngasen, Paelet di mae ni vatxeih tei na Siu xil ba di ven mase ra nim te xeih nan.<sup>b</sup>]

<sup>18</sup>Vatakes, vanut moletin ak lakei be nesao labitene, “!Has vin moletin xai! !mae ni Barabas ha ven imase!” <sup>19</sup>Barabas tehe nim te xeih vengana tehe vatit vaean tei e hal Serusalem e tehas vin moletin tei e melele nen ak.

<sup>b</sup> 23:17 Rut uvei xil xa tetiamu latamos ti e vas 17.

<sup>20</sup>Paelet ien bei tangan vamaen ni Iesu ha ven vamase, ma biteni mi vanut moletin xil ak mun bit, “!Nimae ni ha ven imase!”

<sup>21</sup>E xil lakei nggeih mu ba ni labit, “!Ti xati e eivave! !Ti xati e eivave!”

<sup>22</sup>Paelet bit rilomun ni mi xil be vatol nen bit, “?Xi pol ni naha misa? !Natakamet ti neta tova xa xi pol ni tangan ha vamat ven! Mak, ma moletin navan xil ha limeas pangasi, ti, nimae ni ha ven imase!”

<sup>23</sup>E xil lakei nggeih pilei sung xa ha liti xat Iesu e eivave, lapol ni mak vuma ... xi mae ni. <sup>24</sup>Ma Paelet pol ni mi Iesu nggusil nenemien nae. <sup>25</sup>Misak ni, Paelet mae ni Barabas ba ven mase. E Iesu sung, ma xi mae ni ba tangan moletin nan xil liti xati e eivave ihusil naha xa vanut moletin ak iexil tehei.

### Ladi Xat Iesu e Eivave

*Luk 23:26-43*

<sup>26</sup>Moletin te vaeen xil ladel Iesu laba, e labisu ni moletin tei tahal Saerin, di mikakao bemei vahe hal Serusalem, hisen Saemon. Ladal xati, e laling eivave na Iesu e vatuvun tangan ipoe ihusil xil. <sup>27</sup>Vanut moletin tei xa mahulong mun di langgusil Iesu laba, e rut atou xil di lamuis e di ladang. <sup>28</sup>E Iesu biles, keteh pus xil e biteni mi xil bitene, “Atou xil tahal Serusalem, munates nou ti! Mutes xamim itel horamue namim xil. <sup>29</sup>Melengien tesa xil di bemei xa moletin xil ti lihiteni lihite, ‘Thos pupu mi atou xil xa labe lumalum: xil xa lataling ti mu horamue mu latatunat ni ti tuvava.’ <sup>30</sup>E ti lihiteni mun mi vathu xil lihit, ‘!Tetu xat xamem!’ e mi hu xil lihit, ‘!Soson xamem!’ <sup>31</sup>?Vengan xosxa holesok xil ak di mistal mak mi moletin tehos tei xa nggoni vatiei tei xa memeas tang, ma melele xa longpangasien imei, ia len moletin tesa xil xa langgoni vatiei xa nggoxu?”

<sup>32</sup>E melele nen ak, di ladel moletin lu mun xa lutepol tesa luba tangan ha lihas vin xalu itela. <sup>33</sup>Melele xa laduxoh rute xa lakesi ni ‘Valvat Moletin,’ ladi xat Iesu del moletin tesa xalu ak e eivave tol. Tei de rin metu, e tei di rin meil. <sup>34</sup>Iesu biteni bit, “!Tata, unakete ti nasa ni xil! Xil latakil ti naha xa di lapol ni.”

E moletin te vaeen xil laso tais tangan laseti eising nan e xil. <sup>35</sup>Moletin xil hao lasoh ladi, di lakete. E eilep xil na mol Siu xil di lasep pepamen mini labitene, “Xi miteh meulien e moletin sav xil. !Bos! !E xosxa xi be Kristo reitin xa Hi tehosei, ma vasak pisi vateh meulien e xi tasen!”

<sup>36</sup>Moletin te vaeen xil mun, di lasep pepamen mini. Labe visali, e lasa uaeen xa mikon mini, <sup>37</sup>e lakei ba ni labitene, “!Xosxa obit obe suv toto na mol Siu xil, teh meulien e xouk tasom!” <sup>38</sup>Di, laling tisen tei de ramut eivave nan xa bitene, “Ngan ak be Suv Toto na Siu Xil.”

<sup>39</sup>Tei xalu xa lube moletin tesa xa lamurur ludi, misepin misa ba mi Iesu bitene, “!Xosxa xouk obe Kristo, uteh meulien e xouk itel xamel!”

<sup>40</sup>E tei mun xalu misepin nggeih ba ni tua nan bitene, “?Midep, xouk ulum takan ni Hi ti? Longpangasien naratel pipin tang. <sup>41</sup>E ralu, momal tang xa ralhur longpangasien ak vengan rupol misa, e xi tapol ni ti neta xa vasa.” <sup>42</sup>Di, xi biteni mi Iesu bitene, “Melele xa umei uhe suv toto e uhur xeihen nam, unem xat inou.”

<sup>43</sup>Ma Iesu bit rilomun ni mini bitene, “Nabit xati minuk, xosali mak, utel xat nou ha ralti rute tei xa bos xa bos.”

#### **Maten na Iesu**

*Luk 23:44-49*

<sup>44</sup>E piniae xati, ut biles bemei maluxoluk e dat mak duxoh tri klok mahis, <sup>45</sup>vengan xa eai taxan ti mun. E melele nen ak, kaliko xa da xol ut eo e Nim Eo na Hi mesel hilaep. <sup>46</sup>Di, Iesu dak kes Hi bitene, “!Tata, naling meulien navan e hem.” Biteni mak, di, mat.

<sup>47</sup>Melele xa vat na moletin xil te vaeen pus naha xa mistal, xi pet rat his Hi ven e biteni bit, “Reitin mak, moletin ak temal tevi.”

<sup>48</sup>Melele xa moletin xil xa lateti vituei lapus naha xa mistal, xil di latang vengan lalonge misa e ladilomun labe tim. <sup>49</sup>E ngan xil xa latekil kuh Iesu, del atou xil xa di latehusili e Kaleli latemei, lasoh ladi nga sotin vuteili, e di lapus holesok xil xa mistal.

#### **Tehinen na Iesu**

*Luk 23:50-56*

<sup>50-51</sup>Moletin tei da xa be moletin hos e sexien nan momal, hisen Siosep tahal Aramatea. E xi mun di datil melengien xa Hi imei istal ihe suv toto na moletin xil. E koten na vat xil na Siu xil, xi be tei e xil. E xi mun teta e melele xa latepol ni lingxatien nae xil xa lavas Iesu, e xi tenamae ti en. <sup>52</sup>Xi be visal Paelet e misisi tangan vamae ni tiei na Iesu mini. Ma Paelet mae ni. <sup>53</sup>Di, ba po rat tiei na Iesu ra eivave bemei e tan, pis xole ni kaliko tei xa mieh. Di, poe ba, milingi de vangihat hu tei xa lapei ngamu da. <sup>54</sup>Be Fraede mahis, e Sabat bemei sangas xa Siu xil lasakras lapol en.

<sup>55</sup>Atou xil xa di latehusil Iesu e latexo Kaleli latemei, xil langgusil Siosep e lapus vangihat. Lapus xat ut xa Siosep miling tiei na Iesu da en. <sup>56</sup>Di, ladilomun labe tim, e labue xat vokon e oel taxul maxoe en nae xil tangan ha lipeleini e tiei na Iesu.

E langel e Sabat nggoni ngan Rae xil na Mosis tehit xati.

#### **Iesu Meul Rilomun Ra Maten**

*Luk 24:1-12*

**24** <sup>1</sup>E Sande makoe roroh, atou xil labe vangihat. Laba del xat valit vokon e oel taxul maxoe en xil xa latevue xati tuei teti. <sup>2</sup>Laba lakameti xa vatihat xa dakoe xol puiteh te vangihat, ladivin rati tuei, <sup>3</sup>ma

labe vangite e latapus ti tiei na Suv Iesu. <sup>4</sup>Ma xil lasoh ladi e di lanexo e di lanem ves tiei na Iesu xa ba xave. Vatakes, rumali lu xa eising nalu mihinehin pupu mei lustal visal xil. <sup>5</sup>Uliatel mikan pupu e latingeiril e tan. E rumali xalu ak lubitene mi xil lubitene, “?Veneh ma di mulang ni ngan xa meul e von maten? <sup>6</sup>Xi tara ti ak, meul rilomun ngamu. ?Munem xat naha xa xi tehitene mi xamim melele xa xi teta tamu e Kaleli? <sup>7</sup>Xi tehitene xa limae ni Nat Moletin ihe he moletin tesa xil xa ha liti xati e eivave, e melengien tol nen, xi imeul rilomun ra maten.”

<sup>8</sup>Ma atou xil lanem rilomun ni sepinien nan xil. <sup>9</sup>Xil ladilomun ra vangihat e ba labit mese ni holesok xil vus mi moletin nan xil xa labe tei e le (11) del mosav xil mun. <sup>10</sup>Atou xil ak tehe Meri tahal Makdela, Soana, e Meri xa be nine Temis, del rut atou xil mun. E melele xa atou xil ak laba labit mese ni holesok xil ak mi eloheoh xil, <sup>11</sup>xil lanemi labit tumulen na atou xil ak be luvosen tang, ma latake reitin ti e xil. <sup>12</sup>E Pita mitamea miloh be vangihat, misao be vangite, e pus kaliko xa tetakoe xol tiei na Iesu da tang, e tiei tovuol mun. Di, xi dilomun be tim e di minem ves naha xa mistal.

### Moletin Lu Lubisu Ni Iesu e Suse Xa Be Emeas

*Luk 24:13-35*

<sup>13</sup>E melengien nen tak, moletin lu na Iesu di lukakao luba ve metimal tei xa hisen Emeas. Metimal ak be sotin mak, kilomita teni be tei e le (11) ra hal Serusalem. <sup>14</sup>Xalu di lutumul ni holesok xil vus xa testal. <sup>15</sup>Melele xa di tamu lutumul mak, Iesu dutou mei mos e xalu latoba. <sup>16</sup>E Hi misikoe xol nenemien nalu, ma lutale kil ti. <sup>17</sup>Iesu biteni mi xalu bitene, “?Xamil di mutumul ni naha e suse namil?”

Xalu lusoh kat, e valnao xalu be tan. <sup>18</sup>Tei e xalu xa hisen Kleopas misis Iesu bitene, “?Xouk omei rohon tang e Serusalem iaxa otakil ti holesok xil xa testal en e melengien vahis xa mitavi?”

<sup>19</sup>Iesu misis xalu bit, “?Naha xil vari?”

E xalu lubit rilomun ni mini lubitene, “Holesok xil xa testal mi Iesu ngan Nasaret. Moletin ak tehe provet tei na Hi xa tesepin e tepol tetel xeihen. Hi tetel xati e moletin xil mun latemerere ni. <sup>20</sup>E vat xil na pris xil del eilep xil na Siu xil lamae ni ba tangan ha vamat, ma moletin te vaeen xil ba lateti xati e eivave. <sup>21</sup>E xamem di matenesi matehit xi iaxa ileh rerat mol Isrel ha vexil imase. E neta tei mun, xosali be melengien tol ngamu da xol holesok xil xa testal. <sup>22</sup>E makoe roroh tamu, rut atou xil xa latemos e xamem latehe vangihat man e latetumul ni neta xa misak ni xamem mamesep. <sup>23</sup>Xil latetilomun latehei latehit mese ni mi xamem xa lattapus ti tiei na Iesu. E latehitene xa latepus masxaxa lu lutestal mi xil xa mei lutehitene mi xil lutehitene Iesu meul rilomun. <sup>24</sup>E rut xamem latehe vangihat e latkameti xa holesok xil vus momal tehusil naha xa atou xil ak latehitene. E tiei nan lattapus ti.”

<sup>25</sup>E Iesu biteni mi xalu bitene, “!Xamim mube varu! !Muraru pupu tangan muneket e holesok xil xa provet xil latehiteni! <sup>26</sup>Xil latehitene xa itiamu, Kristo ha mak ilong pangas xi. Ti, ha ihur his xa mahulong e ut te merereen.” <sup>27</sup>Di, Iesu bit kil holesok xil vus e Vanuvei na Hi xa misep usil xi. Misep kokot ni nggo tisen xil na Mosis mei duxoh ngan xil xa provet xil latetisi.

<sup>28</sup>Melele xa latemei sangas visal metimal tahal Emeas, Iesu bit ha ihur sal ni suse iha. <sup>29</sup>E xalu luke xati lubit, “Uta tamu visal xamel, meteneai ba tu xiak, navehi ut imaluxoluk.” Ma xi be xatel latodi. <sup>30</sup>E melele xa xi dotan tangan vanien vatel xalu, nggur beret, memes Hi ven, di bul pasi e misa ni mi xalu. <sup>31</sup>Di, nenemien nalu miluv e lupus kila xa xi be Iesu. E vatakes, xi mikesae ra xalu. <sup>32</sup>E xalu lusepin ni mi xalu mun tang lubitene, “!Xi vari tang xiak! Melele xa xi di tamu e tehit kil sepinien xil xa di Vanuvei na Hi mi ralu, e tinalu, ruthesi ralu pupu.” <sup>33</sup>Ma vatakes, lutamea ludilomun lube Serusalem.

Melele xa luduxoh Serusalem, lukamet moletin na Iesu xil xa labe tei e le (11) ladi vituei del rute ngan xil mun. <sup>34</sup>E xil labiteni mi xalu labitene, “!Be reitin! !Suv Iesu temeul rilomun ra maten, mei testal ni Saemon Pita!”

<sup>35</sup>Di, moletin xalu ak sung lusep kil naha xa testal mi xalu e suse. Di, lubiteni mun xa melele Iesu tevul pas beret, lutele kila.

### Iesu Mei Mistal ni Moletin Nan Xil

*Luk 24:36-49*

<sup>36</sup>Melele xa rumali lu di tamu lusep usil holesok xil ak mi xil, Iesu vari mei misoh e hilaep te xil e biteni mi xil bitene, “Tomat iti mi xamim.”

<sup>37</sup>E xil lamesep pupu e ulixil mikan ni. Lanemi labit lapus temat tei. <sup>38</sup>E xi biteni mi xil bitene, “?Veneh ma di tamu munem mele? ?E veneh ma munake reitin ti xa inou vari tang xiak? <sup>39</sup>Muketeh mupus kaeheok xalu e tavaleok xalu. Inou mak xiak. Mutang mei mutuxol nou, ma muteong kila xa husi e siuk da, vengan xa temat, husi e sin tovuol.”

<sup>40</sup>E melele xa biteni mak, pisen kaehen del tavalen xalu mi xil. <sup>41</sup>Neta sav xa lapolu e sien, xil di tamu lanem usil holesok xil ak e latake reitin ti mu en. Ma xi misis xil bitene, “?Anien ti dit ak tangan nama ni?” <sup>42</sup>Ma xil lasa rut meseo tei xa meses mini. <sup>43</sup>Di, ngguri e ngga ni pe met xil.

<sup>44</sup>Di, biteni mi xil bitene, “Ngan ak natehiteni mi xamim melele xa nateti tamu visal xamim. Holesok xil vus xa testal minou, temei tangan ipol ni naha xa latetisi e Vanuvei Matu<sup>c</sup> na Hi mei ihe reitin.”

<sup>45</sup>Di, milal nenemien nae tangan lalong kil sepinien xil xa di Vanuvei na Hi. <sup>46</sup>E biteni mi xil bitene, “Ngan ak be sepinien xa de Vanuvei na

<sup>c</sup> 24:44 E Vanuvei Matu na Hi, Siu xil lati e rute tol: ‘Rae xil na Mosis’, ‘Tisen na provet Xil’, e ‘Tisen Sav Xil’ mun.



Hi; Kristo xa Hi tehosei ha ilong pangas xi, e ha imat. E melengien tol nen, xi imeul rilomun. <sup>47</sup>Di, e hisen, moletin xil ti lisetu ni xa melele xa moletin ihiles ra tesaen nan, Hi iketeh ihos ni. Sepinien ak iha itiamu mi moletin xil tahal Serusalem, ti, ikapis ut ngasen e ut etan. <sup>48</sup>Xamim xa mupus holesok xil ak, ha ti muhithiteni mi mosav xil. <sup>49</sup>!Muteong! Inou nisa Ninin Eo xa Hi Tamer tehit xati tehit isa ni mi xamim.<sup>d</sup> Mak, ma xamim muha, mutatili e Serusalem ituxoh melele xa xeihen na Hi imei iti mi xamim.”

**Iesu Be Ut Nesao**

*Luk 24:50-53*

<sup>50</sup>Di, Iesu del moletin nan xil labe reling Serusalem e labe Betani. E rute ak, misa hen be nesao e duxol xat xil. <sup>51</sup>Melele xa di tamu mipol ni mak, Hi nggur rati be reling xil be ut nesao. <sup>52</sup>Ma xil lapet rat hisen. Di, ladihomun labe Serusalem e lapolu ni sien. <sup>53</sup>E vehakut, di labe Nim Eo e di lasa memesien ba mi Hi.

---

<sup>d</sup> 24:49 Soel 2:28-29

# Acts

## *Sepinien xil xa diamu te Polien Xil na Eloheoh Xil*

### **Visi iaxa tetis vanuvei ak?**

Moletin xa tetis vanuvei ak, hisen Luk. Xi tenave tei ti e eloheoh xil xa latehe lu e le (12), xi tenave Siu tei ti e mei teneket e Iesu Kristo. Luk tehe dokta tei (Kol 4:14) xa tesukul kuhi, e di tekete kuhi ve holesok xil xa testal e meulien na Iesu (Luk 1:3). Xi tekete kuhi xa Sias testal tetep e Serusalem e teha tetuxoh rute sav xil mun tetep (Polien 1:8). Xi di tekapis ut xil holu tetel eloheoh Pol (Kol 4:14; 2 Tim 4:14; Pil 1:24, e Polien 16:10-17; 20:5-21:18; 21:1-28:16). Xi tetis vanuvei xalu ak: 'Longeongen Hos xa Luk Midisi' e 'Polien Xil na Eloheoh Xil'. Polien Xil, Luk tetisi e 63 AD, e melele xa Pol teti Rom e di tetatil melele xa suv toto tahal Rom ilepisi (Polien 28:30).

### **Visi iaxa tevuli vanuvei ak tetiamu?**

Luk tetis vanuvei ak teha mi timue tei nan xa hisen Teopolis (Luk 1:1; Polien 1:1). Luk tetis vanuvei ak teha mini, e tekila xa moletin xil holu xa latave Siu ti livuli.

### **Luk tetis vanuvei ak veneh?**

**Luk tehit vapisen kila xa Sias testal tetep** — Vanuvei te Polien Xil misep usili xa Sias testal kokot e Serusalem. Xi misep usil polien xa Iesu tesa ni mi eloheoh xil e mi Kristin xil ngasen (1:7-8). Xi pisen ni mun xa xeihen na Ninin Eo teme e moletin xil xa laneket e Iesu tetep, e tesak ni neketen nae te xeih mu (2:1-12). Luk misep kil sexien xa Kristin xil latepol vituei tetiamu, e di latetutou ni moletin xil tetep (2:43-46). E misep usil sexien xa Sias meul e mei be mahulong e rute savsav xil (2:47).

**Luk tehit vapisen kila xa xeihen na Ninin Eo tesak ni Sias temeul tetep** — E vanuvei nan, e rut sepinien xa diamu, Luk misep kila xa Sias testal e SERUSALEM texo hisit merekel xil (2:14-7:60) xa mak: moletin na Iesu xil lasepin ni sepinien sav xil xa mosav xil lalong kila (2:4,7-12); eloheoh xil ladal rat moletin xil holu ra meseien nae (3:1-10; 5:15-16); e sepinien nae del setuen nae xil nggur xeihen (4:8-13,30-31). Di, sakpurunien tei xa mahulong mei misak ni Kristin xil lalesae ra Serusalem, labe ut sav xil e provins tahal SUDEA e provins tahal SAMERIA (8:1,4-5) xa latave sotin ti ra hal Serusalem. E melele xa Iesu biles meulien na

Pol, Hi misila del Kristin sav xil tangan lavur longeongen hos usil Iesu Kristo vaha mi mol Siu sav xil xa lade UT SAV XIL E UT ETAN xa kavmen tahal Rom di telaxat xil. E ngan xil xa latave Siu ti xa ladi Afrika, Siria, Esia, Masedonia e Rom mun (12:1-28:30) mei laneket.

**Luk tehit vasep kila vatit neketen na Kristin xil** — Luk di midis rut setuen xa Pita tesetu ni mi Siu xil usil vatit neketen nan (2:14-41; 4:8-12; 10:34-48), del rut setuen xa Pol tesetu ni mi moletin xil xa latave Siu ti (13:16-41; 17:22-32; 22:1-21; 26:1-29). Luk pisen ni xa longeongen usil Iesu Kristo di mikapis ut holu, e sepinien teni momal tangan moletin xil te kantri sav xil xa sexien nae misav lakila mei lineket en. Luk teta kat tetel Pol melele xa Pol di tetatil suv toto tahal Rom tangan ikesi ha ilepisi (28:30). Misak ni, moletin holu lanemi labit Luk iaxa tetis uvei xalu ak, ‘Longeongen Hos usil Iesu Kristo xa Luk midisi’ e ‘Polien Xil na Eloheoh Xil’ tangan vatutou ni Pol e vapisen kil vatit neketen nan mi suv toto tahal Rom.

**Luk tehit vapisen kila xa sakpurunien xil misakras vahas tan ni Sias na Iesu Kristo** — Kristin xil holu xa lasetu ni longeongen hos, xil lakameti nggeih e meulien nae. Rute ngan xil, laso xil labe nim te xeih (nggoni Pita-4:3; 12:3-17; e Pol-16:22-40). Rute ngan xil, labas vin xil (nggoni Stivin-7:59-60 e Tiemes-12:2). Rute ngan xil, vanut Siu xil del vanut moletin xil xa latave Siu ti lapol misa mi xil (nggoni Pol-15:19; 17:5-9; 18:6; 19:23-41). E sakpurunien xil xa nggeih xiak misakras vahas tan ni Sias na Iesu Kristo vengan xa Ninin Eo di mi xil. Xi pol ni Sias meul sung be mahulong e mei nggeih mu.

### **Nenemien tei xa be eilep e vanuvei ak de 1:8**

*Iesu biteni bit, “Xamim mukil rin ak kestang, melele xa Ninin Eo imei e xamim, mupolu ni xeihen. Ma ti musep usil nou e hal Serusalem, e ut xil xa di provins tahal Sudea, e provins tahal Sameria, e ut sav xil mun iha ihur vuol ni ut etan.”*

### **Naha xa di vanuvei ak?**

1. Polien na Pita del Siu xil (1:1-12:25)
  - a. Sias na Iesu Kristo testal kokot e Serusalem (1:1-7:59)
  - b. Sias ba be provins tahal Sameria e Siria (8:1-12:25)
2. Polien na Pol del Ngan xil xa Latave Siu ti (13:1-28:31)
  - a. Kakaoen kokot na Pol tangan vahit usil longeongen hos mi moletin xil e provins tahal Kalesia e Pampilia (13:1-14:28)
  - b. Kaonsel te Sias tahal Serusalem misep usil moletin xil xa latave Siu ti xa mei laneket (15:1-15:35)
  - c. Kakaoen na Pol xa be lu nen ba duxoh provins tahal Esia e Masedonia (15:36-18:28)
  - d. Kakaoen na Pol xa be tol nen ba duxoh provins tahal Esia e Masetodia mun (19:1-21:14)
  - e. Pol misep usil neketen nan e von koten tahal Serusalem, Sesaria, e ba duxoh Rom (21:15-28:25)

**1** <sup>1</sup>Toxoli Teopolis,  
Nadis vanuvei ak bat minuk.

Vanuvei xa natetisi tehat minuk tetiamu<sup>a</sup>, natehit usil holesok xil xa Iesu di tepol ni e di tepispisi ni e melele xa tepol kokot ni polien nan xil <sup>2</sup>be duxoh melengien xa Hi tehur rati tehe ut nesao. E tetiamu ni ngan xa Hi tehur rati, Iesu tepispisi mi xil texo xeihen na Ninin Eo mi moletin xil xa tehosei xil mei latehe eloheoh nan. <sup>3</sup>Melele xa Iesu tehur longpangasien nan e temat, melengien hanutap lu (40) xi testal mi xil e suse holu xa tepisen ni xa xi temeul rilomun reitin. Xil latepusi, e xi tesepin mi xil usil suse xa Hi mei ihe suv toto na moletin xil en. <sup>4</sup>E melele xa Iesu teti tamu tetel moletin nan xil, tesel xat xil ni sepinien ak tehit, “Munahereling Serusalem ti mu, e mutatil sanien te Ninin Eo xa natehiteni mi xamim xa tata navan tehit xati xa isa ni mi xamim. <sup>5</sup>Reitin, tetiamu Sion teterir ni moletin xil e oei tang, e navehi ti, Hi iterir ni xamim e Ninin Eo.”<sup>b</sup>

### Hi Nggur Rat Iesu Be Ut Nesao

<sup>6</sup>Di, e melengien tei mun, eloheoh xil mei labe vituei del Iesu e lasisi labit, “?Suv, taxeak, melengien momal tangan mei ove suv toto na mol-Isrel xil vaxoni Suv Toto Deved tetiamu, mu tamal ti mu?”

<sup>7</sup>E Iesu biteni mi xil bitene, “Melengien ak, Tata kestang nggur xeihen tangan ihosei. Tave tangan ti xa xamim mukila. <sup>8</sup>Xamim mukil ngan ak kestang, melele xa Ninin Eo imei e xamim, mupolu ni xeihen. Ma ti musep usil nou e hal Serusalem, e ut xil xa di provins tahal Sudea, e provins tahal Sameria, e ut sav xil mun iha ihur vuol ni ut etan.” <sup>9</sup>Melele xa bit sepinien ak bus e xil dit tamu lapusi, Hi nggur rat Iesu be ut nesao, e momah tei mei da xole.

<sup>10</sup>E melele xa di tamu laketeh be tilang hat, vatakes, moletin lu xa lusing mieh lusoh visal xil. <sup>11</sup>E lubiteni mi xil lubitene, “!Ei, mol-Kaleli xil! ?Veneh ma di musoh e di muketeh be nesao? Iesu xa Hi nggur rati reling xamim tangan vahe ut nesao, xi mun tang itilomun imei ixoni ngan taxa di mupusi be ut nesao iaxai.”

### Labosei Matias Tangan Ixoles Sudas xa Temat

<sup>12</sup>Di, eloheoh xil labe reling Vathu te Urvatiei te Olip, ladilomun labe Serusalem xa tave sotin ti. <sup>c</sup> <sup>13</sup>Melele xa laduxoh taon, labe nim tei e labe

<sup>a</sup> **1:1** Luk tetis vanuvei tei nggusil meulien na Iesu tuei bat mi Teopolis. <sup>b</sup> **1:5** Melele xa labaptaes ni moletin tei e oei, ngan ak pisen ni xa biles meulien nan mei mineket e Iesu. Melele xa Kristin tei misa meulien nan mi Iesu, Hi Tamen di baptaes ni e Ninin Eo, Ninin Eo mei polu e meulien nan, di misa xeihen mini, e di pisen suse xa momal mini. <sup>c</sup> **1:12** Vathu te Urvatiei te Olip be kilomita tei ra hal Serusalem.

von toen nen tei mun xa de nesao. Moletin xil ak tehe Pita, Sion, Temis e Andriu; Pilip e Tomas; Batalomiu e Matiu; Temis (xa be nat Alveas), Saemon (xa tevae teha xat kavmen tahal Rom tetiamu), e Sudas (nat Temis). <sup>14</sup>Vehakut, xil mei di lasis vituei, e tetit atou tei lamei lamos del xil. E tua na Iesu xil mun, del ninen, Meri, mei lamos del eloheoh xil ak.

<sup>15</sup>Melengien vahis mei mitavi, moletin xil vus xa di laneket e Iesu mei labe vituei. Xil vus sangas laduxoh handred tei e hanutap tei (120). Di, Pita mitamea misoh e misepin mi xil bitene, <sup>16</sup>“Toxoli e hinoxoli xil, Vanuvei na Hi mei mistal be reitin usil Sudas. Ninin Eo tepol ni Suv Toto Deved teke mese ni xa Sudas ileh moletin xil mei lital xat Iesu. <sup>17</sup>Sudas tehe tei e xir xa Iesu tehosei, e xi mun tepol texoni xir.”

<sup>18</sup>(Vatu xa Sudas tehuri ve sexien tesa xa tepol ni, xi texal rat tan tahalu ni. E tan nen tak, xi mot en, e vangen mesel e tinen xil mistal.<sup>d</sup> <sup>19</sup>Moletin xil vus xa ladi Serusalem latelongeong ni, ma nggo sepinien nae lakes rute ak ni, ‘Akeldama,’ xa koute teni bit, ‘Tan te Ra.’)

<sup>20</sup>E Pita biteni mun bitene, “E Suv Toto Deved biteni e Sam tei bit,

‘Hi Suv, upol ni nim man mei ihe hon tang,  
e moletin itovuol iti itilomun en.’<sup>e</sup>

Misepin ni mun bit,

‘Bos xa moletin tova ixolesi e ihur von nen.’<sup>f</sup>

<sup>21</sup>“Mak, ma moletin tova mei imos e xamem, tei xa tehupil xamem tetiamu e melele xil ngasen xa Suv Iesu di tekakao tetel xamem. <sup>22</sup>Tei xa teta tetel xir e melele xa Sion di tekas moletin xil, mei duxoh melengien xa Hi tehur rat Iesu tehe ut nesao. Rihosei tei e xil vari mei ihur polien itel xamem e ti ihit rati mi mosav xil xa tepus Iesu temeul rilomun ra maten reitin.” <sup>23</sup>Ma xil labosei moletin lu: Siosep Barsabas (xa hisen tei mun be Sastas) e Matias.

<sup>24</sup>Di, lasis mi Hi labitene, “Suv, xouk okil nenemien na moletin xil vus, ma upisen ni mi xamem xa visi e xalu ak iaxa otehosei <sup>25</sup>tengan mei ipol ixoni eloheoh nam. ?Visi e xalu ihur xoles von Sudas, xa telingi tangan ninin nan iha ihe voninen xati?” <sup>26</sup>Di, tei e eloheoh xil milihni pepa tei xa his Matias da en. Misak ni Matias vari iaxa mos e eloheoh xil xa latehe tei e le sav (11).

---

<sup>d</sup> 1:18 Matiu 27:1-10 bitene vat xil na pris xil langgur vatu na Sudas, e langgal tan tei ni. Lanemi labit vatiei xa Sudas misar hiraen en misoh de tan ak. E melele xa ao meot, xi mot bemei tan, mei dipas vangen. <sup>e</sup> 1:20 Sam 69:25 <sup>f</sup> 1:20 Sam 109:8

### Ninin Eo Bemei e Moletin Xil xa Laneket e Iesu

**2** <sup>1</sup> Melele xa melengien te anien xa lakesi ni ‘Pentekos’<sup>8</sup> bemei, moletin xil vus xa laneket e Iesu lamei ladi vituei e nim tei. <sup>2</sup> Vatakes, lalong tangalen tei nggo ut nesao bemei nggoni votiang tei xa mu nggeih. Tangalen ak mise sen nim xa ladotan ladi en. <sup>3</sup> Di, neta tei mistal e nim ak xa pili nggoni upang, e mitasil ba misoh e vat xil kekes. <sup>4</sup> Xil vus mei lapolu ni Ninin Eo, e misa xeihen mi xil misak ni xil di lasepin nggo sepinien sav xil xa tave nae xati ti.

<sup>5</sup> E melele nen ak, Siu xil xa neketen nae nggeih e Hi latexo kantri xil ngasen e ut etan lamei e Serusalem tangan lamot mi Hi e melengien te Pentekos. <sup>6</sup> Melele xa moletin xil ak lalong tangalen ak, holu lamei vituei e rute ak. E melele xa lalong sepinien nae xati xil xa nggo ngan xil xa laneket e Iesu, latemanin ni. <sup>7</sup> Xil lamesep pupu e lasis xil labitene, “!Ei, moletin xil xa di lasepin iaxai, xil vus labe ngan Kaleli xil tang! <sup>8</sup> ?Midep ma ralong xil di lasepin nggo sepinien nar xati xil? <sup>9</sup> Xir rabe ngan Partia, Midia, e Ilam; ngan Mesopotemia, Sudea e Kapadosia; ngan Pontas e Esia; <sup>10</sup> ngan Prikia e Pampilia; ngan Isip e rin xil xa be Libia sangas visal Saerin. Rute ngan xir langgo Rom, ngan xil labe Siu xati, e rute sav ngan xil xa langgusil xat Rae na Siu xil. <sup>11</sup> E rute xir mun labe ngan Krit e Arebia. !E tave ti neta xa ranggo ut sav xil holu, e xir vus di ralong xil di lasepin e sepinien nar xati xil nggusil holesok xil xa tellep pupu xa Hi di tepol ni!” <sup>12</sup> Xil vus latemanin e lanem tova tang. Ma lasis pilei xil mun labitene, “?Netak, koute teni midep?”

<sup>13</sup> E rute xil lasep pepamen ni ngan xil xa laneket e Iesu labitene, “!Moletin xil xai lamun tova tang!”

### Pita Misetu mi Moletin Xil

<sup>14</sup> Di, Pita misoh del eloheoh sav xil xa labe tei e le (11) e miki nggeih ba ni vanut moletin xil ak bitene, “Xir xa rabe Siu, e xamim vus xa mudi e Serusalem, muteong ni nou e nihit koute te netak mi xamim. <sup>15</sup> Moletin xil ak latamun ti vaxoni ngan xa di munemi. Taxeak be naen klok makoe tang. <sup>16</sup> E-e, naha xa mupusi nggoni ngan taxa provet Soel teke mese ni tetiamu tehit,

<sup>17</sup> ‘Hi biteni bit, ‘E melengien xil xa sangas ni Vongkor,  
 inou nisa Ninin Eo navan mi moletin xil ngasen.  
 Horamue e atuli namim xil  
 ti like mese ni sepinien navan.  
 Horam maxoe xil

---

<sup>8</sup> 2:1 Pentekos be anien tei xa Siu xil lapol ni melengien hanutap lu e hexalu mun (50) dutou ni ‘Anien te Tavien.’

- ti lipus hisit metuveen melele xa latapat ti,  
 e momatu namim xil  
 ti lipus kil neta mun ixo metuveen melele xa lapat.  
 18 E melengien xil ak, inou niteh rat Ninin Eo navan  
 mi moletin navan xil vus ituxoh tiramue e atou xil mun xa labe  
 slev tang.  
 Xil mun, ti like mese ni sepinien navan xil.  
 19 Inou nipol ni holesok xil xa tellep listal e tilang hat,  
 e nipisen xeiheh navan e ut etan.  
 E ut etan, nipol ni holesok xil listal ixoni melele te vaeen:  
 ra ileh, upang e eas ituvan ut ngasen.  
 20 E tilang hat, meteneai mei imaluxuluk,  
 e aveti imei ipili ixoni ra.  
 Melele xa lipus holesok xil ak ivus, melengien na Hi Suv xa  
 mahulong pupu mei istal xa mei ilepis moletin xil vus.  
 21 E ngan xil xa litak kes nou ve tutouen,  
 inou niteh meulien e xil.<sup>h</sup>

22 “!Toxoli xil tahal Isrel, muteong ni sepinien xil ak! Melele xa Iesu tahal Nasaret teti tamu mi xamim, Hi tepisen ni tememese tang mi xamim xa xi iaxa tehosei. Xamim mukil xa Hi tehosei vengan xa misa xeiheh mini tangan ti ipol ni merekel xil e holesok sav xil xa tellep pe valnaomi xa misak ni mutemanin. 23 Nggusil lingxatien nan, Hi xa mikil holesok xil ngasen xa mistal teling Iesu pe hemim. E xamim, mutehasi temat melele xa mutesi petine moletin xil xa latahusil ti Rae xil na Hi tangan ha liti xati ite eivave. 24 Di, Hi tepol ni teme a rilomun ra maten tangan naxulehi ti nate pangasien teni. Vengan xeiheh te maten misakras vahur xati. 25 Ngan ak nggoni ngan xa Suv Toto Deved tesepe usil Iesu tetiamu tehit,

‘Vehakut, napus Hi Suv de riuk metu.

De sangas visal nou,  
 ma inou, leok tamulul ti.

- 26 Mak, ma inou tinok memaal,  
 nasa memesien ba mini.

E naling nenesien navan tangan isikoe xol tiei navan.

- 27 Reitin, nakila xa namaen ninin navan ti nate von maten.

Namae ni ti tiei na moletin eo nan navolel ti e vul.

- 28 Xi pisen suse xa nimeul ixo en.

Nihesi nou vehakut,  
 vengan xa de sangas visal nou.’ ”<sup>i</sup>

<sup>h</sup> 2:21 Soel 2:28-32    <sup>i</sup> 2:28 Sam 16:8-11

<sup>29</sup>Pita biteni mun mi xil bitene, “Toxoli xil, inou nihiteni imal tang mi xamim usil avu nar, Deved: xi temat, e latetihin ni e von tehinen nan xa da tak duxoh xosali. <sup>30</sup>Rakila xa xi tehe provet tei. Xi tekila xa Hi tepol ni hitxatien tei te xeih mini xa ipol ni vatimol tei nan mei ihur voninen, ihe Suv Toto.<sup>j</sup> <sup>31</sup>Suv Toto Deved pus kil naha xa Hi ipol ni e melengien xil xa ti imei. Ma misep usil mea rilomunen na Kristo melele xa tehiteni tehit,

‘Hi naling xi ti nate von maten,  
e namaen ni ti tiei nan navolel ti e vul.’<sup>k</sup>

<sup>32</sup>Hi tepol ni Iesu temea rilomun ra maten, e xamem vus matepusi. <sup>33</sup>Hi tepet rati tehe ut nesao ba de rin metu, e Tamen tesa Ninin Eo mini nggoni ngan taxa tehit xati. Taxeak, naha xa mupusi e mulonge be Ninin Eo nen tak xa xi misa ni mi xamem. <sup>34</sup>Rakila xa tenave Suv Toto Deved ti iaxa tehe ut nesao. E xi vari tang tesepin usil Kristo melele xa tehit,

‘Hi Suv biteni mi Suv navan bitene,  
‘Utotan e riuk metu,

<sup>35</sup> ituxoh melele xa niling ngan xil xa laketeh misa ni xouk liti pe hem.’<sup>l</sup>

<sup>36</sup>“!Misak ni, moletin xil vus tahal Isrel ti likil kuhi mak xa Iesu, xi iaxa Hi pol ni be Kristo e be Suv nar, xi vari muteti xati e eivave!”

<sup>37</sup>Melele xa moletin xil lalong sepinien ak, iexil bon e tine muis. Ma lasis Pita del eloheoh sav xil mun labitene, “?Tua xil, xamem mupol ni itep?”

<sup>38</sup>Ma Pita biteni mi xil bitene, “Xamim kekes muhiles ra tesaen xil namim e mumae ni xamem muterir ni xamim e oei e his Iesu Kristo. Mak, ma Hi ileh rerat tesaen xil namim e iketeh ihos mun ni xamim. Ma isa Ninin Eo ihe sanien tei nan mi xamim. <sup>39</sup>Mupol ni imak vengan xa Hi tepol ni hitxatien ak mi xamim e mi horamue namim xil; e mi ngan xil vus xa ladi sotin. Hi Suv tehit xati xa isa Ninin Eo nan mi xil ngasen xa xi ikes xil limei lihe moletin nan xil.”

<sup>40</sup>Pita misel xat xil nggeih ni sepinien sav xil mun. Xi di dak kes xil bitene, “!Muis Hi iteh meulien e xamim ra longpangasien xa isa ni imei mi moletin tesa xil te xosali ak!” <sup>41</sup>Di, moletin xil holu lake reitin e sepinien nan, ma lamae ni eloheoh xil laterir ni xil e oei. E melengien nen ak, moletin xil laduxoh taosen tol (3000) mei lamos del ngan xil xa laneket e Iesu. <sup>42</sup>E melengien xil ngasen, moletin xil ak di langgusil xat sexien xil ak: lamei vituei, lateong xat naha xa eloheoh xil di lapispisi ni mi xil, laseti anien mi xil, langgur Anien Eo na Suv, e di lasis.

j 2:30 Sam 132:11; 2Sam 7:12,13    k 2:31 Sam 16:10    l 2:35 Sam 110:1



### Sexien na Ngan Xil xa Laneket e Iesu

<sup>43</sup>Melengien xil hau tetavi, Hi di tepol ni merekel xil e sexien xil holu xa tellep texo he eloheoh xil. Tesak ni moletin xil vus latetemanin ni, e latemerere ni Hi. <sup>44</sup>Ngan xil vus xa lateneket e Iesu, latexulehi mei di latehe vituei, e di lateso viton holesok nae xil tengan ti litutou ni ti e xil xa latehe tamure ni neta ngan. <sup>45</sup>Tesak ni rute ngan xil latepos ni tan nae mu rut holesok nae xil, e latesa vatu teni ba tetutou ni ngan xil xa latehe tamure ni neta. <sup>46</sup>Melengien xil ngasen, mei lateti vituei e vioh te Nim Eo na Hi e di lateanien vituei e tim sae xil. Latepol tetel memaalen e tetel tinae hos. <sup>47</sup>Di latepet rat Hi, e moletin xil vus di latemerere ni xil. E vehakut, Suv Iesu di tesak ni moletin hao mei latemos e xil e lateneket en, e xi di tete meulien e xil.

### Hoeo Tei xa Len Mikali, Mikakao Rilomun

**3** <sup>1</sup>Vatei, e tri klok mahis xa be melele te sisen na Siu xil, Pita xal Sion lube Nim Eo na Hi tengan lalosis. <sup>2</sup>E melele nen ak, rut moletin xil lapo tua tei nae xa latepesi, e len tekali vari, e lalingi sangas ni puiteh te vioh te Nim Eo xa lakesi ni ‘Puiteh xa Bos’. Melengien xil ngasen di lapoe ba di lalingi e rute ak tengan ti varam ni vatu mi moletin xil xa di lamei e Nim Eo. <sup>3</sup>Melele xa xi pus Pita xal Sion lumei sangas tengan lalohe nim, miram ni xalu tengan lalosa neta tova mini. <sup>4</sup>Xalu luketeh momal ba ni, e Pita biteni mini bitene, “!Ketehe pus xamel!” <sup>5</sup>Ma xi miketeh pus xalu e minemi bit ti ihur neta tova ra xalu. <sup>6</sup>E Pita biteni mini bitene, “Vatu navan tovuol vari, e naha xa nangguri, nisa ni minuk. !E his Iesu Kristo tahal Nasaret, tamea! !Kakao!” <sup>7</sup>Di, dal xat hen metu e dutou ni mitamea misoh. Vatakes, len xalu momal e mei ngeih. <sup>8</sup>Xi butahut be nesao, misoh e di mikakao. Di, be xatel latbe vioh te Nim Eo na Hi. E inggak mun, xi di mikakao, di butahut, e di pet rat his Hi. <sup>9</sup>E melele xa moletin xil lapusi xa di mikakao e di pet rat his Hi mak, <sup>10</sup>lapus kila xa xi be hoeo taxa di tetotan vehakut tete vis ‘Puiteh xa Bos,’ e di teram mi moletin xil. Xil vus lamesep e latemanin ni naha xa mistal mini.

### Pita Misetu mi Moletin Xil e Vioh te Nim Eo

<sup>11</sup>Melele xa moletin ak di tamu maheah xat Pita xal Sion, moletin xil vus latemanin e di labesi xil. Laloh lamei visal xatel e rute ak xa lakesi ni ‘Horao ma Suv Toto Solomon.’ <sup>12</sup>Melele xa Pita pus moletin xil ak, xi biteni mi xil bitene, “?Toxoli xil tahal Isrel, veneh ma mumesep? ?Veneh ma di mupus xamel mak? ?Munemi mubit moletin ak mikakao nggo xeihen namel tang, mu vengan xa sexien namel momal pe met Hi? !E-e! <sup>13</sup>Xi xa be Hi na Ebrahim, Hi na Aesak, Hi na Siakop, e Hi na avu nar xil, xi vari iaxa pet rat hisen Iesu be ut nesao, xi xa be moletin te polien nan. E xamim, mutesi ni

pe met Paelet e mutelingi tehe hen tangan vahasi vamat. Xi bit vamae ni ha ven vamase, e xamim mutamae ni ti. <sup>14</sup>Xi xa be moletin eo xa bos mutesi ni, e mutesis Paelet sung tangan vamae ni moletin tei xa di bas vin moletin xil mei ven vamase. <sup>15</sup>Xamim mutepol ni ngan xa be Vatit Meulien temat, e Hi tepol ni temeul rilomun ra maten. Xamel matepusi, e taxeak di masep mese ni mi xamim. <sup>16</sup>Xeihen te his Iesu misak ni moletin xa len tekali xiak bemei bos. Naha xa mupusi mistal nggo neketen e his Iesu Kristo. Xi vari tang iaxa pol ni moletin ak milonge bos pe metemim.

<sup>17</sup>“Tua navan xil, nakila xa naha xa xamim tetel vat namim xil mutepol ni mi Iesu, mutepol ni vengan xa mutenakil ti. <sup>18</sup>E suse ak, Hi tepol ni lingxatien nan mei testal tehe reitin. Vengan xa tetiamu, texo provet xil nan, Hi teke mese ni xa Kristo nan mei ilong pangas xi. <sup>19</sup>Mak, ma jemim isae ve tesaen xil namim e muhiles meulien namim. Mumei visal Hi tangan iketeh ihos mun mi xamim, <sup>20</sup>ipol ni sien iti e meulien namim, e isa rilomun ni ngan xa tehosei tangan vateh meulien e xamim, Iesu Kristo. <sup>21</sup>Xi ixulehi itat ut nesao ha vuma ... Hi ipol ni holesok xil vus imei ihe neta hu. Ixoni naha xa Hi tehit xati tetiamu texo provet eo nan xil. <sup>22</sup>Texoni ngan Mosis tehiteni tehitene, ‘Hi xa be Suv namim ipet rat tei e xamim imei ihe provet tei ixoni nou. Muteong xat holesok xil ngasen xa xi ihiteni mi xamim. <sup>23</sup>E xosxa ti e xamim linateong xat provet ak ti, ma Hi isil rerat xil ra moletin nan xil e ihas xil lilel.’”<sup>m</sup>

<sup>24</sup>E Pita biteni mun mi xil bitene, “Reitin mak, provet Samuel del provet xil xa latemei tetutou ni, xil vus lateke mese ni holesok xil xa di mistal taxeak. <sup>25</sup>Xir del provet xil ak, rabe mol-Isrel xil, ma hitxatien xa nggeih xa Hi tepol ni tetel xil be nar vus. Nggoni ngan Hi tehit xati mi Ebrahim tehiteni, ‘Ixo vatimol nam xil, inou nituxol xat moletin xil ngasen te ut etan.’”<sup>n</sup> <sup>26</sup>Mak, ma melele xa Hi tesa moletin nan teme, tesa ni mi xir tetiamu. Bit vatuxol xat xir melele xa isak ni xir rihiles meulien nar ra sexien tesa xil nar.”

#### Pita Xal Sion Lusoh Pe Met Vat Xil te Kaonsel na Siu Xil

**4** <sup>1</sup>Melele xa Pita xal Sion di tamu lusepin mi moletin xil, rut pris xil mei lastal, del mereketeh xil te Nim Eo, del Satusi xil mun. <sup>2</sup>Iexil mikat vengan xa eloheoh xalu ak di lupispisi mi moletin xil xa likila limeul rilomun ra maten ixoni Iesu. <sup>3</sup>Ma xil ladal xat xalu e laling xalu e nim te xeih ba duxoh melengien sav vengan xa be mahis tuei. <sup>4</sup>E moletin holu xa lalong sepinien nalu, lake reitin en. Misak ni, xil xa laneket e Iesu sangas laduxoh taosen lim (5000).

<sup>5</sup>E maxoe nen, vat xil na Siu xil, elda xil, del tisa xil te Rae xil na Mosis lamei vituei e Serusalem. <sup>6</sup>Xil ladotan del Anas xa be Vatixar na pris xil; e

<sup>m</sup> 3:23 Dut 18:15,18,19    <sup>n</sup> 3:25 Sen 22:18

eilep sav xil xa lastal langgo vatimol nan nggoni Kaeapas, Sion, e Aleksanda. 7Xil ladel Pita xal Sion mei lusoh pe met xil, e lasis xalu labitene, “?Neta xa mupol ni, munggur xeihen teni nggo xave? ?Mupol ni netak e his visi?”

<sup>8</sup>Di, Ninin Eo mei polu e Pita, ma bit rilomun ni mi xil bitene, “Vat xil e elda xil na Siu xil, <sup>9</sup>xosali, mudel xamel tangan musis xamel ve sexien hos xa mapol ni mi moletin xa len tekali. Mubit mukil ti xa xi telonge tehos tetep. <sup>10</sup>Mak, ma malsep kila mi xamim, itel moletin xil ngasen tahal Isrel imak: nggo xeihen te his Iesu Kristo tahal Nasaret, moletin ak len bos e mea misoh pe met xamim. Iesu ak iaxa xamim muteti xati e eivave teha temat, e Hi tepol ni temea rilomun ra maten. <sup>11</sup>Iesu be ngan xa Vanuvei na Hi di tesepe usili tehit,

‘Hat tei xa lapol ni nim ni,  
xa moletin xil te polien labit misa e laso ni ba,  
xi vari bemei bos mak mu mili hat tesav xil.’<sup>o</sup>

<sup>12</sup>Iesu kestang mikila iteh meulien e xir. E ut etan ak, his moletin sav tovuol mun xa Hi misa ni tangan mei vateh meulien e xir.”

<sup>13</sup>Melele xa vat xil te Kaonsel lalong Pita xal Sion lusepin bos mak, latemanin ni xalu. Tave ti neta xa lutasukul kuhi ti, ulixalu takan ti. E xil lapus kila mun xa xalu di lutehusil Iesu. <sup>14</sup>E lasakras lasep sisil xalu, vengan lapusi xa moletin xa len mei bos di tamu misoh del xalu. <sup>15</sup>Ma xil lasil rat xatel latbe hale vuteili. Melele xa latoba, xil di lasep tetavoe ve rin xa be natel mi xil mun tang <sup>16</sup>labit, “?Ripol ni itep mi xalu? Moletin xil vus e Serusalem lakila xa xalu ak lupol ni merekel tei xa eilep pupu. Rasakras raviteni ravit tave reitin ti. <sup>17</sup>Xosxa rabbit moletin xil linalongeong ni ti usil merekel ak, ma rike xat xalu tangan lalnasepin ti mun mi moletin xil usil Iesu.”

<sup>18</sup>Di, lakes rilomun ni xalu lumei nim, e lake xat xalu nggeih tangan lalnasepin ti e lalnispisi ti mun mi moletin xil usil Iesu. <sup>19</sup>E Pita xal Sion lubit rilomun ni mi xil lubitene, “Xamim muhit naha xa momal pe met Hi. ?Xamel maliteong xat xamim, mu Hi? !Muhiteni! <sup>20</sup>Vengan xa xamem masakras mavit manasepin ti ve neta xa mapusi e malonge.” <sup>21</sup>Ma vat xil te Kaonsel lake xat xalu nggeih rilomun e lamae ni xalu be vexalu mase. Xil lasakras lasa pangasien mi xalu vengan xa moletin xil vus di lapet rat his Hi ve naha xa testal. <sup>22</sup>Moletin xil lakila xa naha xa testal be merekel vengan moletin xa len tekali e temei tehos rilomun, haram nan mitavi e hanutap lu (40).

### **Moletin Xil xa Laneket e Iesu Lasis Hi Tangan Valeh Rat Ulikanen Vahe Reling Xil**

<sup>23</sup>Melele xa vat xil te Kaonsel lamae ni Pita xal Sion ba vexalu mase, ludilomun ba lupus timue nalu xil xa laneket e Iesu. E melele xa lupus

---

o 4:11 Sam 118:22

xil, lubit mese ni mi xil sepinien xil xa vat xil na pris xil, del elda xil latehiteni mi xalu. <sup>24</sup>E melele xa lalonge, xil vus lasis vituei ba mi Hi labitene, “Hi Suv, xouk xa opol ni ut nesao, ut etan, tas, e holesok xil vus xa ladi en; <sup>25</sup>nggo xeihen te Ninin Eo, xouk otesepin texo avu namem Deved xa tehe moletin te polien nam xa otehit,

‘?Veneh ma ngan xil xa latave Siu ti di iexil mikat?

?Veneh ma moletin xil di lapol ni lingxatien xil xa mei be neta sav tang?

<sup>26</sup>Suv toto xil te ut etan di labue xat xil ve vaeen,

e vat xil lamei vituei tngan livae mi Hi Suv e mi Kristo nan xa xi tehosei.<sup>p</sup>

<sup>27</sup>Reitin mak, Suv Toto Herot e Pontias Paelet mei lutevituei e Serusalem tetel ngan xil xa latave Siu ti e Siu xil tngan lavae mi Iesu, xa be moletin te polien nam xa be eo. <sup>28</sup>Naha xa lapol ni mi Iesu tehusil naha xa xouk oteling xati tuei texo xeihen nam otehit mei istal. <sup>29</sup>Hi Suv, taxeak, ulong kil sepinien xil nae xa labiteni ba xat xamem, moletin te polien nam xil. Uhur rat ulikanen ihe reling xamem tngan mukila musa sepinien nam itel xeihen. <sup>30</sup>Usa xeihen nam mi xamem li tngan mukila mutal rerat moletin xil ra meseien nae, e mupol ni merekel e holesok sav xil xa tellep ixo his Iesu xa be moletin te polien nam xa be eo.”

<sup>31</sup>Melele xa lasis bus, nim xa ladi en mulul. E xil vus lapolu ni Ninin Eo, e ba di lasetu ni sepinien na Hi del xeihen, e uli takan ti.

### Sexien Hos na Moletin Xil xa Laneket e Iesu

<sup>32</sup>Vanut moletin xil xa laneket e Iesu ladi vituei bos e nenemien nae be tei takes. Tovuol e xil vahe hokan ni neta ngan, xil vus lamae ni holesok nae xil tngan itutou ni mosav ni. <sup>33</sup>Del xeihen na Ninin Eo, eloheoh xil di labit usil mea rilomunen na Iesu. E Hi di duxol xat xil ni holesok xil ngasen. <sup>34</sup>Xil latave tamure ni ti neta, vengan xa vateinga, ngan xil xa tan nae e nim mae di, lapos ni. Di, langgur vatu nen <sup>35</sup>e lasa ni ba ni eloheoh xil. Di, laseti vatu xil ak ba dutou ni ngan xil xa nae tovuol.

<sup>36</sup>Mak, ma moletin tei teta, hisen Siosepe tahal Saepras. Xi nggo vatimol na Livae. Ve sexien hos nan, eloheoh xil laling xoles hisen be ‘Banabas’ xa koute teni be ‘moletin xa di pet rat nenemien na mosav xil.’ <sup>37</sup>E melele nen tak, xi pos ni tan tei nan e misa vatu nen ba ni eloheoh xil.

### Hi Bas Ananaeas xal Savira ve Luvosen Nalu

**5** <sup>1</sup>Moletin tei mun del atou nan lupos ni rut tan nalu, hisealu Ananaeas e Savira. <sup>2</sup>Luling xati xa lalkixat xat rut vatu nen ihe

nalu, e rute, Ananaeas milehi ba, misa ni mi eloheoh xil e biteni mi Pita bit, “Vatu xil vus xiak.”

<sup>3</sup>Di, Pita biteni mini bitene, “?Ananaeas, veneh ma omae ni Temat mei polu e nenemien nam? ?Veneh ma xouk obit oluvos Ninin Eo melele xa otepos ni rut tan nam e okixat xat rut vatu teni be nam? <sup>4</sup>Tetiamu, tan tehe nam. E melele xa opos ni, vatu xil vus nen be nam. ?Mak, ma veneh ma obit opol ni vamak? !Luvosen xa opol ni xiak, otapol ni ti mi moletin tova, e opol ni mi Hi vari!” <sup>5</sup>Melele xa Ananaeas milonge mak, vatakes, mot e mat. Moletin xil vus xa lalongeong ni, le mulul ven. <sup>6</sup>Di, horam maxoe vutei xil lamei nim, mei lapis xol tiei nan. Di, lapoe ba, ladihin ni.

<sup>7</sup>Haoa tol mitavi, atou nan bemei nim. E xi takil ti vari xa tiramue nan mat. <sup>8</sup>E Pita misisi bit, “?Hit kuhi mu minou, ngan ak be vatu xil vus xa xamil tiramue nam mutehuri e tan xa mutepos ni?”

Atou ak bit rilomun ni mini bit, “Io, xil vus iaxai.”

<sup>9</sup>Ma Pita biteni mini bitene, “?Veneh ma xamil tiramue nam mubit mulsak pis Ninin na Hi? ?Olonge? Moletin xil xa ba ladihin tiramue nam, di lamei sangas ni puiteh. E mei lipo xouk mun uha.” <sup>10</sup>Vatakes, xi mun mot e mat pe met Pita. E melele xa horam maxoe xil lamei nim, lakameti xa xi mun mat. Ma lapoe ba ladihin ni de ri tiramue nan. <sup>11</sup>Ngan xil vus te sias tahal Serusalem, del mosav xil mun xa lalongeong ni naha xa mistal, le mulul tova tang.

### **Eloheoh Xil Lapol ni Merekel Xil del Sexien Xil Holu xa Tellep**

<sup>12</sup>E melele nen ak, eloheoh xil di lapol ni merekela xil del sexien xil holu xa tellep pe met moletin xil. Vehakut, ngan xil xa laneket e Iesu mei di labe vituei e rute tei e vloh te Nim Eo xa lakesi ni ‘Horao ma Suv Toto Solomon.’ <sup>13</sup>Neta sav xa moletin xil ngasen lamerere ni xil, moletin xil xa lataneket ti mu, uli mikan tangan lamei vituei vatel xil. <sup>14</sup>E Hi mileh moletin holu lamei e laneket e Iesu. Misak ni xil mei labe holu mu. <sup>15</sup>Ve polien xa eloheoh xil di lapol ni, moletin xil laleh ngan xil xa lamesei mei laling xil ladi suon mae e seri suse. Xil labit xosxa nini Pita ituxol xil melele xa ikakao imei, ma xil lilonge ihos. <sup>16</sup>E vanut moletin xil holu lamei langgo taon xil xa mikapis e Serusalem. Xil ladel ngan xil xa lamesei e ngan xil xa ninin tesa xil lapolu e xil. E xil vus mei lalonge bos rilomun.

### **Vat Xil na Siu Xil Di Lasak Pangas Eloheoh Xil**

<sup>17</sup>Di, Vatixar na pris xil del Satusi xil lanem misa ni eloheoh xil e labit lisak pangas xil. <sup>18</sup>Misak ni, ladal xat xil e laso xil labe nim te xeih. <sup>19</sup>E vongien nen tak, masxaxa tei na Hi mei misah puiteh te nim te xeih e del xil lastal. Di, xi biteni mi xil bitene, <sup>20</sup>“Muha, musoh e vloh te Nim Eo na Hi. Musa sen sepinien xil ngasen usil meulien hu ak mi moletin xil.” <sup>21</sup>Ma

eloheoh xil lalong xat sepinien nan, e melele xa ut da milan, xil labe vloh te Nim Eo na Hi e di lapispisi mi moletin xil.

E melele nen tak, Vatixar na pris xil del vat sav xil lamei e lakes viton elda xil na Siu xil lamei vituei e totanen tei na Kaonsel nae. Di, lasil merketeh xil labe nim te xeih tangan lileh eloheoh xil ak limei lisoh pe met xil. <sup>22</sup>E melele xa merketeh xil labe nim te xeih, latapus ti xil. Ma ladilomun ba labit mese ni mi vat xil te Kaonsel labitene, <sup>23</sup>“Melele xa mabe nim te xeih, mapusi xa puiteh mikoe nggeih tang, e merketeh xil dit laketeh xole. !E melele xa masah puiteh mabe nim, matale xoteh ti moletin!” <sup>24</sup>Melele xa vat xil na pris xil del vat na merketeh xil te Nim Eo lalong sepinien ak, latakil ti naha xa nggul eloheoh xil. <sup>25</sup>Di, moletin tei bemei visal xil e biteni bit, “!Muteong! !Moletin xil xa muteling xil e nim te xeih, taxeak, di lapispisi mi moletin xil e vloh te Nim Eo na Hi!” <sup>26</sup>Ma vat na merketeh xil del rut moletin nan xil ba laleh eloheoh xil labe von Kaonsel. Xil latapol ni ti vaxeih mi xil vengau ulixil mikan xa moletin xil linahop vin xil.

<sup>27</sup>Laleh eloheoh xil lamei nim, e lapol ni xil lasoh pe met moletin xil te Kaonsel ak. Di, Vatixar na pris xil misis xil bitene, <sup>28</sup>“Mateke xat xamim te xeih xa munapispisi ti mun usil his moletin ak. E xamim dit mupispisi ni ba tang. Ma taxeak, Serusalem polu ni pispisien namim. !E mubit muling maten nan mun vate xat xamem!”

<sup>29</sup>E Pita del eloheoh xil labit rilomun ni mini labitene, “!Xamem muteong xat Hi kestang, e nave moletin xil ti! <sup>30</sup>Hi na avu nar xil pol ni Iesu temea rilomun ra maten, xi iaxa mutesak ni temat melele xa lateti xati e eivave. <sup>31</sup>E xi, Hi tepet rati ba de rin metu e misa xeihen mini tangan mei ihe Vat ni moletin xil tevusien e iteh meulien e xil. Mak, ma Hi di misa mesal mi mol-Isrel xil tangan lihiles ra tesaen nae e mei iketeh ihos rilomun ni xil. <sup>32</sup>Xamem iaxa di masep usil holesok xil ak, e Ninin Eo mun di pisen ni be reitin. Ninin Eo ak, Hi misa ni mi moletin xil xa di lalong xati.”

<sup>33</sup>Melele xa vat xil te Kaonsel lalong sepinien ak, iexil nggat pupu ni eloheoh xil e labit lavas vin xil. <sup>34</sup>E Parasi tei mitamea misoh, hisen Kameliel. Xi be tisa tei te Rae xil na Mosis e moletin xil vus di lamerere ni. Xi misis vat te Kaonsel tangan vasil rerat eloheoh xil lastal vuteili mu. <sup>35</sup>Di, biteni mi Kaonsel bitene, “Tua navan xil tahal Isrel, mulaxat xamim ve naha xa mubit mupol ni mi moletin xil ak. <sup>36</sup>?Munem moletin tei xa hisen Teotas? Huram vahis xa ba ngamu, xi testal e tevae tetel mol-Rom xil. Xi tehiteni tehit xi be eilep tei, e moletin xil xa lamos en labe handred hat (400). E melele xa mol-Rom xil labas vin ni, moletin nan xil lateletasil, ma polien nan telel. <sup>37</sup>Dutou ni ngan ak, Sudas tahal Kaleli testal e melele kavmen tepol ni pupuluenu te moletin xil. Xi teleh vanut moletin tei latehusili e xil mun latevae tetel mol-Rom xil. Xi mun

labas vin ni, ma moletin nan xil xa lathusili lateletasil. <sup>38</sup>Mak, ma e rin na moletin xil ak, inou nabiteni mi xamim mak: !Vat nae mat ngamu! !Munapol ni ti neta nasa mi xil! !Muling xil liti nga! Xosxa naha xa xil laling xati e lapol ni mistal nggo nenemien na moletin tang, ma mei ilel. <sup>39</sup>E xosxa mistal nggo Hi, ma xamim misakras musikoe xol xil. Maxa ni, munakamet ti xa di mubae mi Hi.”

Melele xa lalong sepinien nan, xil lamaal e nenemien nan. <sup>40</sup>Di, lakes rilomun ni eloheoh xil lamei nim, e lasis mereketeh nae lameas pangas xil. Di, lake xat xil tangan linavit usil ti mun Iesu, e lamae ni xil ba vexil mase. <sup>41</sup>Melele xa eloheoh xil labe reling Kaonsel, labesi pupu ni xil vengan lakila xa Hi di pet rat xil melele xa mae ni xil langgur longpangasien ve his Iesu. <sup>42</sup>E melengien xil ngasen, e vloh te Nim Eo e e tim sae xil mun, xil dit lapispisi e lasetu ni longeongen hos usil Iesu xa be Kristo xa Hi tehosei.

### Eloheoh Xil Labosei Rut Moletin te Tutouen

**6** <sup>1</sup>E melengien xil ak, melele xa moletin xil xa laneket e Iesu mei labe holu mu, ngongoren tei mistal. Rut Siu xil xa lasepin ni sepinien tahal Kris labit melele xa ngan xil xa lasepin ni sepinien xati na Siu xil di laseti anien, di latasa kuh ti mi tunau nae xil. <sup>2</sup>Ma eloheoh xil xa labe lu e le (12) lakes viton ngan xil vus xa laneket mei labe vituei. Di, labiteni mi xil labitene, “Tamal ti tangan xamem maling polien te setutuen e ti maseti anien xil ak. <sup>3</sup>Tua xil, bos mak mu xa xamim muhosei moletin tehos xil lihe lu he sav (7) xa nenesien na mosav xil di en. Misak ni muhosei ngan xil xa mukila mubit labe metisou e Ninin Eo polu e xil. Ti, muling xil tangan ti lilaxat polien ak. <sup>4</sup>Mak, ma xamem musa xamem tangan ti musis e ti musetu ni sepinien na Hi keatang.”

<sup>5</sup>Ma vanut moletin xil ak lamaal pupu ve nenemien na eloheoh xil. Ma xil labosei Stivin xa neketen nan nggeih e Ninin Eo polu en. Labosei Pilip mun, del Prokorus, Nikanor, Timon, Parmenas, e Nikolaus xa be ngan Sentael tei tahal Antiok xa tehusil xat Rae na Siu xil. <sup>6</sup>Di, ladel xil ba lasoh pe met eloheoh xil, e xil laling he e xil e lasis Hi tangan ituxol xat polien nae.

<sup>7</sup>Ma di, longeongen hos usil Iesu mikapis ut Serusalem. Misak ni moletin holu mun lamei laneket e Iesu, e pris ngan xil mun lamos e xil e laneket.

### Vat Xil na Siu Xil Ladal Xat Stivin

<sup>8</sup>E melele nen ak, Hi di duxol xat Stivin e di misa xeihen mini. Misak ni xi di pol ni merekel xil e sexien xil holu xa tellep xa pol ni moletin xil di lamesep ven. <sup>9</sup>E rut Siu xil mei langor mi Stivin. Ngan xil ak, vehakut di lamei vituei e ut tei xa lakesi ni ‘Nim te Pispisien na Ngan xil

xa Lameluv.<sup>9</sup> Rute xil lastal langgo hal Saerin e hal Aleksandria; e rute xil langgo provins tahal Silisia e Esia. <sup>10</sup>E melele xa xil labit langgor mi Stivin, Ninin Eo misa metisouen mini, ma lasakras lavit rilomun ni ti neta mini. <sup>11</sup>Misak ni, xil langgal xuxus ni moletin tatei xil tangan liluvos lihit, “!Xamem malong moletin xai misepin misa usil Mosis e usil Hi mun!” <sup>12</sup>Sepinien nae misak ni moletin xil, elda xil, del tisa xil te Rae xil na Mosis, nenemien nae misa ni Stivin. Ma ladal xati e langguri ba misoh pe met Kaonsel.

<sup>13</sup>Di, laleh rut moletin xil tangan ti liluvos ni hisen. Xil labiteni labit, “Vehakut, moletin ak di misepin misa ba ni Nim Eo nar e ba ni Rae xil na Mosis mun. <sup>14</sup>Xamem malong xi biteni xa Iesu ak tahal Nasaret ihu len Nim Eo na Hi e ti ihiles sexien xil vus xa Mosis tesa ni teme mi avu nar xil.” <sup>15</sup>Moletin xil vus xa ladotan e Kaonsel lalemah xat Stivin e lapusi xa valnaon di minehin nggoni valnao masxaxa tei.

### Stivin Misetu Mi Kaonsel na Siu Xil

**7** <sup>1</sup>Di, Vatixar na pris xil misis Stivin bit, “?Midep? ?Sepinien xil ak be reitin?”

<sup>2</sup>Stivin bit rilomun ni mi xil bitene, “!Tata xil e tua navan xil, muteong ni nou! Tetiamu ni ngan xa avu nar Ebrahim teha tate Heran, Hi te miehien testal mini e Mesopotemia <sup>3</sup>e tehiteni mini tehiti, ‘Umea reling ut sam itel vatimol nam xil e uhe ut tei xa inou nipisen ni minuk.’ <sup>4</sup>Ma xi tehe reling ut san e tan na mol-Kaltia xil e teha tete Heran. E dutou ni ngan xa tamen temat, Hi tesila mei tete kantri ak xa xamim, Siu xil, mudi en taxeak. <sup>5</sup>Hi tenasa ti tan ak mini. Reitin, tenasa ti mavulut tan mini xa vahit vahe nan xati. E mi vatimol nan xil xa listal itutou ni, Hi tehiti xati xa isa ni mi xil ihe nae. Hi tepol ni hitxatien ak mi Ebrahim melele xa horamue nan tehe tovuol tamu. <sup>6</sup>Ngan ak tehe naha xa Hi tehiteni mini tehiti, ‘Vatimol nam xil ha liti ut sav tei. Lihe slev xil na moletin xil te rute ak, e xil ti lisak purun xil haram ihe handred hat (400). <sup>7</sup>Itutou ni, inou, nisa longpangasien mi ngan xil xa moletin nam xil di latepol mi xil. Di, vatimol nam xil limea ra rute ak litiomun mei limot minou inggak.’ <sup>8</sup>Di, Hi tesa sexien te vexaho mi Ebrahim xa pisen ni xa xi del vatimol nan xil labe na Hi. E melele xa latepes Aesak, melengien be tol e he sav (8) tang mei tetavi, Ebrahim tepol ni tehe vexaho. E Aesak mun tepol ni Siakop tehe vexaho, e Siakop tepol ni natnali xil xa latehe lu e le (12) latehe vexaho, ngan xil ak latehe avu nar xil.

<sup>9</sup>“Horamue na Siakop xil iexil teat Siosepe xa tehe tua nae, ma latepos ni teha tehe slev tei e Isip. E Hi teti mini <sup>10</sup>e tehur rati ra longpangasien

---

<sup>9</sup> 6:9 Lakesi ni mak, vengan xa moletin xil xa di lamei vituei en, tetiamu, xil latehe slev xa lateti e he mosav xil. E dutou, ba lameluv.



xil xa teti xati. Misak ni melele xa Siosep tesoh pe met suv toto tahal Isip, Hi tesa metisouen mini e misak ni suv toto ak temaal ven e tepol ni Siosep telaxat kantri nan tetel holesok xil vus xa teti e nim man. <sup>11</sup>Di, mae kekaten tei xa eilep tekapis e Isip tetel Kenan, e tesak ni longpangasien holu teti xat moletin xil ngasen. Avu nar xil tetiamu mun latehe terume ni anien. <sup>12</sup>E melele xa Siakop telongeong ni xa anien teti e Isip, xi tesa horamue nan xil xa labe avu nar xil lateha. Ngan ak tehe kakaoen kokot nae xa latehe Isip. <sup>13</sup>Di, e valu nen xa latetilomun lateha, Siosep tehit kil xi mi tunali xil, ma suv toto tahal Isip tele kil kuh vatimol xil na Siosep sung. <sup>14</sup>Ma Siosep tesa sepinien tehur pileien teha mi tamen Siakop tehiteni mini tetel vatimol nan xil vus xa latehe hanutap tol e lim e le tei mun (75) tangan limei liti visali e Isip. <sup>15</sup>Misak ni Siakop tehe Isip. E e rute ak, xi tetel horamue nan xil lateti ba tetuxoh melele xa latelel. <sup>16</sup>E tiei nae xil latleh rilomun ni tehe Sekem, e inggak, latetihin xil lateti von tehinen xa Ebrahim texal rati ra horamue xil na Hamor ni mani tei nan.<sup>7</sup>

<sup>17</sup>“Huram holu mei mitavi. E melele xa Hi tepusi temal xa hitxatien xa tepol xati tetel Ebrahim sangas vastal vahe reitin, Siu xil xa lateti Isip mei latehe holu. <sup>18</sup>Di, suv toto sav tei xa tenanem xat kuh ti mun his Siosep mei telaxat kantri tahal Isip. <sup>19</sup>Xi teluvos Siu xil xa latehe avu nar xil e tesak purun xil. Xi tepol ni te xeih mi xil tangan liling tuvava nae xil liti hale tangan lilel. <sup>20</sup>Mosis, latepesi e melele ak vari. Hi tepusi xa valnaon tehos xa tehos, e tamen xal ninen lutelaxati e tim aveti tol. <sup>21</sup>E melele xa lutelingi tete hale, atuli na suv toto tahal Isip tekameti e telaxati texoni horamue nan xati. <sup>22</sup>Misak ni latepispisi mini ni kilakilen xil vus tahal Isip, e xi mei tehe eilep tei usil sepinien nan e e polien nan.

<sup>23</sup>“Melele xa huram nan tetuxoh hanutap lu (40), tepol ni nenemien nan tehit wakil ti moletin xil xati nan, mol-Isrel xil, ma teha tesao e xil. <sup>24</sup>E melele tepus ngan Isip tei di tehas purun ngan Isrel tei, teha tangan vatutou ni. Ma, xi sung tesa xolesi mi ngan Isip ak e tehasi temat. <sup>25</sup>Xi tenemi tehit mol-Isrel xil xa latehe vatimol xati nan lile kila xa Hi iteh meulien e xil ixo hen, e xil latnale kil ti. <sup>26</sup>E melengien sav nen, xi tepus ngan Isrel lu di luteti xalu, ma xi teha tangan valing tomat rilomun vatel xalu. Tehiteni mi xalu tehit, ‘Tiramue xalu, muliteong. Xamil vus mube ngan Isrel tang. ?Veneh ma di mututu?’

<sup>27</sup>E ngan xa di tehas purun tunali tetivin rat Mosis tehe rin e tesisi te xeih tehiteni, ‘?Moletin visi milinguk mei obe vat namem tangan ti olepis xamem? <sup>28</sup>?Obit ovas inou mun vaxoni ngan taxa otehas vin ngan Isip nanganoh?’ <sup>29</sup>Melele xa Mosis telonge temak, telesae ra hal Isip e teha tete tan tahal Midian. E rute ak, tehur atou xa teling horamue nan lu.

---

r 7:16 Sen 23:1-20; 33:19; 49:29-33; 50:7-13,25-26; Sos 24:32

<sup>30</sup>“Di, haram hanutap lu (40) mun mei mitavi, e masxaxa tei mei testal mi Mosis texo upang xa tepili e holiei tei e rute tei xa be uruvuol, sangas ni Vathu Senae. <sup>31</sup>Melele xa Mosis tepusi, temesep pupu e telis tehe sangas ni tangan vale kuhi. E melele xa temei sangas, telong rae na Hi Suv xa tesepin mini tehit, <sup>32</sup>‘Inou nabe Hi na avu nam xil, nabe Hi na Ebrahim, Hi na Aesak, e Hi na Siekop.’ Melele xa telonge temak, Mosis temalili pupu e ulin tekan vaketeh. <sup>33</sup>Hi Suv tehiteni mini tehite, ‘Sil rat sandel nam vengam xa rute xa di osoh en be ut eo. <sup>34</sup>Inou napus vuol ni longpangasien xil na moletin navan xil xa lateti e hal Isip, e nalong tangan nae. Misak ni namei etan tangan niteh meulien e xil. Amei, inou nisilak utilomun uhe Isip.’

<sup>35</sup>“Mosis tak tehe ngan xa mol-Isrel xil latesin ni melele xa latesisi latehit, ‘?Visi xa milinguk obe vat namem tangan ti olepis xamem?’ Texo sepinien na masxaxa xa testal mini texo upang xa pili e holiei tei, Hi tesil Mosis tangan ha ilaxat mol-Isrel xil e isak ni vexil imase. <sup>36</sup>Melele xa xi teleh rat moletin xil ra hal Isip, tepol ni sexien xil xa tellep e Isip, e Tas Tepili, e e uruvuol xa lateti en haram hanutap lu (40). <sup>37</sup>Mosis nen tak tehiteni mi mol-Isrel xil tehite, ‘Hi isa provet tei imei mi xamim ixoni ngan taxa xi tesa nou natemei. Provet ak istal ixo tei e xamim.’ <sup>38</sup>Mosis ak be ngan taxa teti mi mol-Isrel xil melele xa lateti uruvuol. Xi teti mi avu nar xil tetiamu, melele xa masxaxa tei tesepin tetela e Vathu Senae. Xi tehur sepinien te meulien texo Hi e tesa ni mi xir.

<sup>39</sup>“E avu nar xil latnalong xat ti sepinien na Mosis. Xil latesin ni e latepol ni nenemien nae latehit litalomun lihe Isip. <sup>40</sup>Ma latehiteni mi Eron latehit, ‘Pol ni hi sav xil ihe namem tangan ti litiamu ni xamem, vengam xa matakil ti naha xa nggul Mosis xa teleh rat xamem ra hal Isip.’ <sup>41</sup>Ma e melele nen ak, latepol ni hi tei xa tehur nanao na buluk. Di, latemot mini e latehas vongoro tei tehe sanien nae mini. Di, latepol ni anien tei xa eilep e langga vin xil ni ve nanao xa xil tang latepol xati ni he. <sup>42</sup>Ma Hi tekavitou ni xil e temae ni xil latemot mi hitu xil. Ngan ak nggoni ngan taxa Hi tehit usili e Vanuvei nan texo provet xil tehit, ‘?Mol-Isrel xil, tetep, melele xa muti e uruvuol haram hanutap lu (40), mutehas vongoro xil tangan vahe sanien namim minou?

<sup>43</sup>E-e. E mutemea sung, mutepo xat nim tavolin na hi Molek, e muteleh xat hi Revan xa nggur nanao na hitu xil.

Xalu lutehe nanao xa mutepol ni tangan ti mumot mi xalu.

Misak ni, inou nisil rerat xamim muha muhe slev xil e rute xil xa ha ili hal Babilon.’”<sup>s</sup>

<sup>44</sup>Stivin biteni mun mi xil bit, “Avu nar xil latemot mi Hi e nim tavolin nan melele xa lateti tamu e uruvuol. Nim tavolin ak, latepol ni tehusil ngan xa Hi

<sup>s</sup> 7:43 Amo 5:25-27

tehiteni e tepisen ni mi Mosis. <sup>45</sup>Dutou ni, moletin xil ak lasa ni mi avu nar xil, e xil latepo xat nim tavolin ak melele xa latehusil Sosua ba latehur rat tan na moletin xil xa Hi tehoh rerat xil. Ma nim tavolin ak tetak teta tetuxoh melele xa Deved mei tehe suv toto. <sup>46</sup>Hi temaal ve Deved, ma Deved misisi tangan vamaen ni vapet kuh nim tova vahe na Hi xa be Hi na Siekop. E Hi tamaen ni ti. <sup>47</sup>E tehe Solomon sung iaxa tehil nim man. <sup>48</sup>E Hi te ut nesao misakras vate nim xa moletin tang pol ni. Nggoni ngan xa provet Aesea tehiteni tehit,

<sup>49</sup> ‘Hi suv biteni bit, “Ut nesao be hor te xeihen navan  
e ut etan be ut xa di naling leok di en.

?Hisit nim eah iaxa mukila muhili ihe mavan?

Musakras muvil nim tova xa vapin tangan mei nangel en.

<sup>50</sup> Holesok xil ngasen xa di ut nesao e ut etan,  
inou tang napol ni.”<sup>t</sup> ”

<sup>51</sup>Stivin biteni mun mi xil bitene, “!Vatimum nggeih tova tang! Vurangemim bon ni sepinien na Hi, e vehakut di mupol nggoni ngan xil xa latakil ti Hi! Munggoni avu namim xil tang. !Vehakut di musin polien xil na Ninin Eo!  
<sup>52</sup>Provet xil ngasen, avu namim xil latesak purun xil. Tetiamu, latehas eloheoh xil xa di latehiteni xa Ngan xa Momal xa Hi tehosei imei. E taxeak, xamim vari tang iaxa musa rati be he ngan xil xa latehasi temat, ma xamim vari tang mutehasi. <sup>53</sup>!Xamim iaxa muthur xat Rae eo na Hi xa masxaxa xil latehuri teme mi avu namim xil, e xamim mutalong xati ti!”

### Langgov Vin Stivin

<sup>54</sup>Melele xa vat xil te Kaonsel lalong sepinien na Stivin, iexil mikat pupu e mete pili xati. <sup>55</sup>E Ninin Eo mei polu e Stivin, misak ni miketeh momal be ut nesao. Melele xa miketeh, pus miehen na Hi e pus Iesu di misoh de rin metu. <sup>56</sup>Ma xi biteni mi xil bit, “?Mupusi? !Napus tilang hat masel e Nat Hi di misoh de rin metu na Hi!”

<sup>57</sup>Melele xa vat xil te Kaonsel lalonge mak, laki xol vurange. Di, xil vus lakei nggeih e laloh laba ni. <sup>58</sup>Di, langguri be hale ra taon, e ba di langgove. E xil xa lasep sisili e langgov kokot ni, latling kot nae xil teti he horam maxoe tei xa hisen Sol. <sup>59</sup>E melele xa xil di langgov Stivin, xi miki ba ni Suv bit, “!Suv Iesu, uhur ninin navan ihat visaluk!” <sup>60</sup>Di, mitingeiril etan e miki nggeih bit, “!Suv, onanem xat ti tesaen nae xa di lapol ni xiak!” Biteni mak, di, mat.

**8** <sup>1</sup>E moletin tei da tak, hisen Sol. Xi memaal xa labas vin Stivin mak.

### Sol Misak Purun Vanut Moletin Xil xa Laneket e Iesu

E melele ak vari, sakpurunien tei xa eilep mistal ba xat ngan xil te sias tahal Serusalem. Lasak ni holu e xil lalesae ba ladi e rute sav xil e

<sup>t</sup> 7:50 Aes 66:1-2

provins tahal Sudea e Sameria. E eloheoh xil na Iesu latnalesae ti, ladi kat ladit Serusalem. <sup>2</sup>E melele xa Stivin mat, rut moletin xa neketen nae nggeih e Hi laba lapo tiei nan e ba ladihin ni. Xil ladang nggeih ve maten nan.

<sup>3</sup>E Sol, di misak purun ngan xil xa laneket tengen vahu len Sias na Iesu Kristo. Xi mikakao e nim xil ngasen, e midal xat tiramue e atou xil xa laneket e Iesu, di miso xil labe nim te xeih.

### **Pilip Misetu mi Mol-Sameria Xil Usil Iesu**

<sup>4</sup>Moletin na Iesu xil xa latlesae ra hal Serusalem, labe ut xil ngasen, ba di latsetu ni longeongen hos usil Iesu mi moletin xil. <sup>5</sup>Tei e xil xa hisen Pilip be taon tei xa eilep tahal Sameria e di misetu mi moletin xil te rute ak xa Iesu be Kristo xa Hi tehiti xati tehiti imei. <sup>6</sup>E melele xa moletin xil lalong sepinien nan e lapus holesok xil xa tellep xa di tepol ni, xil vus lalong kuh naha xa xi biteni. <sup>7</sup>Latepus temat xil lathe reling moletin xil hao tetel tangen xil xa te xeih. E holu xa rut tenbe xil temat mu latsakras lakakao, xil vus mei latlonge tehos. <sup>8</sup>Misak ni, moletin xil vus e rute ak labesi pupu ni xil.

<sup>9</sup>Moletin tei de rute ak, hisen Saemon. Xi di tepol ni moletin xil tahal Sameria latmesep ve vongou xil xa di tepol ni. Xi di po xi bit be eilep tei. <sup>10</sup>Ma moletin xil vus te rute ak, ngan xil xa latellep e movotei xil mun, di lateong ni e labiteni labit, “Xi be hi tei xa lakesi ni ‘Ngan xa Nggeih’ xa bemei e ut etan.” <sup>11</sup>Xil di latehusili nousav vengan xa holesok xil xa dit tepol ni tesak ni xil latmesep ven. <sup>12</sup>E melele xa moletin xil lalong sepinien na Pilip usil sexien xa Hi mei ihe Suv Toto e meulien nae e usil Iesu xa be Kristo na Hi, moletin xil ak laneket en. Tiramue xil e atou xil hao lamei e lamae ni tengen Pilip iterir ni xil e oei. <sup>13</sup>Saemon mun mike reitin e sepinien na Pilip e mae ni derir ni e oei. E dutou ni ngan ak, xi nggusil xat Pilip e di mesep pupu ve merekel e holesok sav xil xa tellep xa di pol ni.

<sup>14</sup>Longeongen usil naha xa mistal e Sameria duxoh eloheoh xil na Iesu e Serusalem. Lalonge xa mol-Sameria xil lake reitin e sepinien na Hi, ma lasil Pita xal Sion lube visal xil. <sup>15</sup>Melele xa ba lustal, lusi ve ngan xil xa laneket tengen mei lapolu ni Ninin Eo <sup>16</sup>vengan xa mei tenapolu ti mu e tova xil. Pilip teterir ni xil e oei e his Iesu kestang. <sup>17</sup>Ma melele xa Pita xal Sion luling he xalu e xil, Ninin Eo mei polu e xil.

<sup>18</sup>Melele xa luduxol xat xil, Saemon pusi xa Hi misa Ninin Eo mi xil. Misak ni xi misa vatu mi xalu <sup>19</sup>e misi xalu bit, “Lusa xeihen xai minou tengen moletin eah xa inou nituxol xati, xi mun ikila ihur Ninin Eo.” <sup>20</sup>E Pita misep pangasi bit, “!Xouk uhe Von Upang itel xat vatu nam ve nenemien nam xa obit okila oxal rat sanien na Hi ni vatu! <sup>21</sup>Xouk otapin ti omos e polien namem vengan meulien nam tamal ti e pe met Hi.

<sup>22</sup>Itiamu, uhiles nenemien tesa nam, e usis mi Hi Suv tangan xa, xosxa imae ni, ma iketeh ihos rilomun ni xouk ve nenemien tesa nam xa obit opol ni. <sup>23</sup>Taxeak, uhiles meulien nam wengan napusi xa di onem misa ni xeihen xil namem e tesaen di bar xolok.”

<sup>24</sup>Melele xa Saemon milonge mak, dak kes Pita xal Sion bitene, “Lusis li mi Suv ve nou tangan xa holesok xil xa di musepin ni naxui nou.”

<sup>25</sup>Dutou ni ngan ak, Pita xal Sion lubit usil kakaoen nalu tetel xat Iesu Kristo e lusetu ni sepinien usil Suv Iesu mi moletin xil. Di, ludilomun lube Serusalem. E suse nalu, lusetu ni longeongen hos e metimal xil hao tahal Sameria.

### Pilip Derir ni Eilep Tei tahal Itiopia e Oei

<sup>26</sup>Di, masxaxa tei na Hi biteni mi Pilip bit, “Uvue xatuk e ukakao uhe saot e uhusil suse xa nggo Serusalem ba be Kasa. Suse ak ba nggur xoteh uruvuol.” <sup>27</sup>Ma Pilip bue xat xi, di, ba. E melele nen ak, eilep tei tahal Itiopia di nggusil suse ak. Xi be moletin xa di milaxat watu xil na Kandis, suv toto tahal Itiopia xa be atou. Moletin ak tehe Serusalem tangan vamot mi Hi <sup>28</sup>e di minggusil suse nan tangan vatilomun vahe ut san. Xi nggo kat tei xa hos milihi, e melele xa ba, di buli rut sepinien e Vanuvei na Hi xa provet Aesea tetisi. <sup>29</sup>Ma Ninin Eo biteni mi Pilip bitene, “Uha, ha ute sangas visal moletin xa de kat iaxor.” <sup>30</sup>Misak ni Pilip miloh ba e milonge xa moletin ak di buli sepinien xa provet Aesea tetisi. Ma misisi bit, “?Xouk okil koute te naha xa di obuli iaxai?”

<sup>31</sup>Eilep ak bit rilomun ni mini bit, “?Xosxa moletin ti nasep kil kuh minou, ma nikila itep?” Ma xi misis Pilip tangan vapeou vaha vatotan vatela e kat nan. Ma Pilip pol ni nggoni ngan xa xi biteni. <sup>32</sup>Sepinien xa de Vanuvei na Hi xa moletin ak di buli biteni mak bit:

“Moletin ak, nasi ti melele xa moletin xil litela ha lihasi imat,  
ixoni sipsip tei xa ladela tangan lavasi vamat.

Xi navit ti neta melele xa lipol isa mini,  
ixoni sulut sipsip tei xa tatangal ti melele xa lakot rerat hilin.

<sup>33</sup>Xil lipol ni unounen mini.

E melele te lepisien, xil linahusil ti suse xa momal.

Moletin ihe tovuol xa ikila isep usil horamue nan xil,  
wengan xa lihur xoteh meulien nan ra ut etan.”<sup>u</sup>

<sup>34</sup>Eilep ak misis Pilip bit, “?Hiteni minou, provet ak di misep usil visi vari xiak? ?Di misep usil xi mun tang, mu mosav tova?” <sup>35</sup>Di, Pilip misep kil koute te sepinien ak mini e misetu mun ni longeongen hos usil Iesu

<sup>u</sup> 8:33 Aes 53:7-8

mini. Ma eilep ak mike reitin en. <sup>36</sup>Melele xa di lunggusil suse luba, lumei e rute tei xa oei di en. Ma eilep ak biteni bit, “Oei xi tak. Xosxa onemi bos, ma ubaptaes ni nou li en.”

<sup>37</sup>E Pilip bit rilomun ni mini bit, “Nakila niterir ni xouk en xosxa oneket nggo meulien tevi nam.”

Ma xi biteni bit, “Inou nake reitin xa Iesu Kristo be Nat Hi.”

<sup>38</sup>Ma eilep ak misemae ni moletin nan tangan vapol ni kat nan vangeli. Di, xal Pilip, lube tan e oei, e Pilip derir ni en. <sup>39</sup>E melele xa lumea lukakao reling oei, vatakes, Ninin Eo na Hi mei nggur rat Pilip be rute sav. E eilep ak, xi tapus ti mun e nggusil suse nan ba del sien. <sup>40</sup>E Pilip mitemanin e pusi xa da ngamu e Asotas.<sup>v</sup> E suse nan xi di misetu ni longeongen hos e taon xil ngasen vuma ... duxoh Sesaria.

### Sol Bemei Mineket e Iesu

**9** <sup>1</sup>E melele nen tak, Sol di misa sepinien xil xa nggeih bit ihas vuol ni moletin xil xa laneket e Iesu. Misak ni, be visal Vatixar na pris xil <sup>2</sup>e misisi tangan vatis uvei xil xa vasep kil polien nan mi vat xil te nim te pispisien xil xa ladi e Damaskas. Ma xi misa uvei xil ak xa mae ni xa melele xa ikamet tiramue mu atou tei xa di laneket e Iesu, ikila ital xati e ihuri imei mun e Serusalem.

<sup>3</sup>Melele xa Sol di bemei sangas e taon tahal Damaskas, vatakes, miehen tei xa minehin pupu nggo ut nesao e mei mileluv xole, <sup>4</sup>e xi mot be tan. Di, milong rae tei xa biteni mini bitene, “Sol! Sol! ?Veneh ma di osak purun nou del moletin navan xil mak?”

<sup>5</sup>E Sol biteni mini bit, “?Suv, xouk visi?”

E rae ak biteni mini bit, “Inou Iesu, ngan xa di osak purun ni. <sup>6</sup>E umea e uhe taon xai tahal Damaskas. E rute ak iaxa lihit naha xa upol ni.”

<sup>7</sup>Moletin xil xa laba del xat Sol, lalong rae ak e latapus ti moletin. Uli mikan e ladit votei tang. <sup>8</sup>Melele xa Sol mitamea ra tan e miketeh, misakras vapus neta tova. Ma xil lateli e hen e ladeli be Damaskas.

<sup>9</sup>Melengien tol Sol dat mak, taketeh ti, e bit naxanien ti e namu ti neta.

<sup>10</sup>E taon tahal Damaskas, moletin tei xa mineket da en, hisen Ananaeas. E Suv Iesu misepin mini nggo metuveen tei e biteni mini, bitene, “!Ananaeas!”

E xi bit rilomun ni bit, “Inou xiak Suv.”

<sup>11</sup>Ma Suv biteni mini bit, “Uvue xatuk e uha uhusil suse xa lakesi ni ‘Suse xa Momal’. E tim sa Sudas, usis ves moletin tei tahal Tarsis, hisen Sol. Xi di misis. <sup>12</sup>E metuveen tei, tepus moletin tei hisen Ananaeas xa bemei miling hen en tangan vaketeh rilomun.”

<sup>13</sup>Ananaeas bit rilomun ni mini bit, “Suv, moletin holu di lasep usil moletin ak ve holesok holu xa misa xa di pol ni mi moletin eo nam xil e

<sup>v</sup> 8:40 Taon tahal Asotas be 20 kilomita ra ut xa Pilip pus eilep tahal Itiopia en.

Serusalem. <sup>14</sup>E taxeak bemei inggak, e nggur xeihen nggo Vatixar na pris xil tangan mei ital xat moletin xil vus xa di lamot minuk.”

<sup>15</sup>E Suv biteni mini bit, “Ha pusi, vengang inou nabosei ngamu tangan ipol minou. Xi isep usil hisok mi ngan xil xa latave Siu ti, mi suv toto xil, e mi mol-Isrel xil mun. <sup>16</sup>E inou iaxa nipisen hisit longpangasien xil mini xa ihuri ve hisok.”

<sup>17</sup>Ma Ananaeas ba, be nim xa Sol da en, miling hen en e biteni mini bit, “Tua Sol, Suv Iesu xa testal minuk e suse melele xa di omei inggak, xi vari iaxa misil nou. Xi misil nou namei tangan xouk okila uketeh rilomun e mei upolu ni Ninin Eo.” <sup>18</sup>Vatakes, neta tei xa nggoni kahbe meseo mot reling meten, ma xi miketeh rilomun. Di, mitamea misoh, e Ananaeas derir ni e oei. <sup>19</sup>E dutou ni ngan xa ngganien bus, ven mei nggeih rilomun.

### Sol Misetu e Damaskas

Sol da melengien vahis mun e Damaskas del moletin xil xa laneket e Iesu. <sup>20</sup>Xi mika mal be nim te pispisien xil na Siu xil e di misetu xa Iesu be Nat Hi reitin.

<sup>21</sup>Xil vus xa lalong sepinien nan latemanin, ma di lasis xil mun tang labit, “?Tave xi ti iaxa di tehas vin moletin na Iesu xil e Serusalem? Malonge bemei inggak tangan vatal xat ngan xil xa langgusil Iesu e valeh xil lava mun visal vat xil na pris xil. ?Midep?”

<sup>22</sup>E setutuen na Sol mei nggeih pilei sung e pisen ni momal xa Iesu iaxa be Kristo xa Hi tehosei tangan vamei. Misak ni Siu xil xa ladi Damaskas lasakras lavit rilomun ni sepinien tova vaha mini.

<sup>23</sup>Melengien hao mei mitavi, rut Siu xil mei ladotan vituei e lapol ni lingxatien tei tangan lihas vin Sol. <sup>24</sup>Melengien e vongien xil ngasen di laketeh xol puiteh te vloh xa mikapis xol taon ak tangan livulu xati e lihas vini. E Sol milongeong ni lingxatien nae. <sup>25</sup>Ma e vongien tei, ngan xil xa laneket nggo pispisien nan lasoson ni de ateli tei xa eilep xa lasar xat ao da en. Di, laso kital ni nggo mesekital tei xa de nesao e seri vloh ak, e lasae ni be tan. Ma di, Sol milesae ba.

### Sol Dilomun Be Serusalem

<sup>26</sup>Sol dilomun be Serusalem e misak tangan mei vamos e ngan xil xa laneket e Iesu. E xil vus uli mikan ni e latake reitin ti en melele xa xi biteni mi xil bit be tei e xil. <sup>27</sup>Di, tei e xil xa laneket, hisen Banabas, bemei mini e dela lube visal eloheoh xil na Iesu. Xi dap lenen kuhi sung mi xil xa Sol tepus Suv e suse e Suv tesebin mini tetep. Xi biteni mun mi xil bit Sol ulin takan ti melele xa di tesetu usil his Iesu e Damaskas. <sup>28</sup>Ma lamae ni Sol mos e xil, e di mikapis e ut xil ngasen e Serusalem e di misetu usil his Iesu del xeihen. <sup>29</sup>Di misepin mun e di mingor del Siu xil

xa lasepin ni sepinien tahal Kris. Ma xil di lalang ves suse tova xa lihasi imat ixo en. <sup>30</sup>E melele xa ngan xil xa laneket lalongeong ni, xil ladela labe taon tahal Sesaria. E rute ak, xil lasa ni nggo tuturil tei be taon tahal Tarsis.

<sup>31</sup>Dutou ni ngan ak, ngan xil te Sias na Iesu xa ladi e provins xil tahal Sudea, Kaleli e Sameria, xil di lateti e tomat. Xil mei latemerere kuhi ni Suv Iesu, e tetel tutouen na Ninin Eo neketen nae teme tei xeih pilei sung e moletin holu mei latemos e xil.

### Pita Pol ni Le Aeneas Bos Rilomun

<sup>32</sup>Pita, xa be tei e eloheoh xil na Iesu, di tekapis e ut xil ngasen. E vatei, ba misao ni moletin eo xil na Hi xa ladi e taon tahal Lita. <sup>33</sup>E rute ak, xi pus moletin tei xa rin tei mat, hisen Aeneas. Huram tol e he sav (8) xi takakao ti, e pat dat rong mak tang. <sup>34</sup>Pita biteni mini bit, "Aeneas, Iesu Kristo pol ni vem bos ngamu. !Utamea, e uvulun suon mam!" Vatakes, Aeneas mitamea misoh. <sup>35</sup>Moletin xil vus xa ladi e taon tahal Lita e rute sav mun xa ladi ut xa lakesi ni 'Saron' lapusi mak, ma labiles meulien nae e laneket e Suv Iesu.

### Pita Dal Rat Dorkas ra Maten

<sup>36</sup>E taon tahal Sopa, atou tei da en xa neketen nan nggeih e Iesu, hisen Tapita. E moletin xil lakesi ni ni hisen tei mun xa nggo sepinien tahal Kris labit 'Dorkas'.<sup>w</sup> E meulien nan, xi di tepol ni polien tehos xil e di tetutou ni moletin xil xa lathe hoeo. <sup>37</sup>E melele xa Pita da tamu e rute ak, atou ak nggur meseien tei, ma mat. Atou xil lakas moten tiei nan memese tengen ha lithin ni. Di, lalingi pat e von toen xa be lu nen nesao e nim man. <sup>38</sup>Taon ak tahal Sopa tave sotin ti ra taon tahal Lita. Ma melele xa moletin xil tahal Sopa xa laneket lalongeong ni xa Pita dat Lita, lasil tiramue lu lube visali del xat sepinien ak, "!Utemanon li, umei visal xamem!" <sup>39</sup>Ma vatakes, Pita bue xat xi e be xatel latoba. Melele xa latduxoh tim sa Dorkas, xil ladela be von paten nan xa de nesao e nim man. E rute ak, tunau xil xa lateti mei lakereli xol Pita. Di ladang e lapien ni mini eising xil xa Dorkas tetili melele xa temeul tamu teta. <sup>40</sup>Ma di, Pita misil rerat xil lastal ra von toen ak e mitingearil misis. Di, biles pus tiei na Dorkas e biteni bit, "!Tapita, tamea!" Ma xi miketeh. E melele xa pus Pita, mitamea dotan. <sup>41</sup>Di, Pita dal xat hen e dal rati misoh. Bus, mikes ngan xil xa laneket del tunau xil e pisen Dorkas mi xil xa meul rilomun. <sup>42</sup>Longeongen usili ba mikapis e ut xil ngasen e Sopa. Ma moletin holu mei laneket e Suv Iesu. <sup>43</sup>Pita de visal xil e

<sup>w</sup> 9:36 Siu holu latehur his lu mu tol, tei e Arameak na Siu xil, e tei mun e sepinien Krik tahal Kris. Hisen Tapita e Dorkas, koute teni be 'deer'.



Sopa nousav vuteili e e nim ma Saemon xa di pol ni holesok xil ni hilbe buluk.<sup>x</sup>

### Hi Pisen ni mi Pita xa Moletin Xil Ngasen Lakila Laneket

**10** <sup>1</sup>E taon tahal Sesaria, moletin tei da en xa hisen Konilias. Xi be ngan Rom tei e be vat na vanut moletin te vaeen tei xa lakes xil ni ‘Ngan Itali xil’. <sup>2</sup>Xi be moletin xa merere pupu ni Hi na Siu xil e di mot mini, xi del ngan xil xati xa ladi nim man. Vehakut, di misa tutouen mi Siu xil xa labe hoeo e di misis mi Hi. <sup>3</sup>Vatei, e 3 klok mahis, Konilias di misis e tim san e pus neta tei xa nggoni metuveen tei. E metuveen ak, pus masxaxa tei na Hi bemei sangas visali e mikesi bit, “!Konilias!”

<sup>4</sup>Melele xa pusi mak, Konilias mitemanin e ulin mikan pupu e bit rilomun ni mini bit, “Io, Suv. ?Okes nou?”

Masxaxa biteni mini bitene, “Hi milong sisen xil nam e mipus kil tutouen xa di osa ni ba ni hoeo xil. Holesok xil xa di opol ni nggoni sanien eo tei mi Hi xa von mikon. <sup>5</sup>Taxeak, usil moletin ti tangan lihe taon tahal Sopa e ha lipus moletin tei, hisen Saemon Pita, tangan imei tim sam. <sup>6</sup>Xi de visal moletin tei xa di pol ni holesok xil ni hilbe buluk. Moletin ak, hisen Saemon e nim man de sangas ni tas.” <sup>7</sup>Di, masxaxa ak be relingi ba. Ma Konilias mikes viton slev lu te polien nan del moletin te vaeen tei xa be mereketeh nan xa xi mun di mot mi Hi. <sup>8</sup>Di, mitumul usil holesok xil xa testal mini, e di, misil xatel latobe Sopa.

<sup>9</sup>E visuvong nen, sangas vahe piniae, moletin xatel ak latemei sangas ni Sopa. E melele nen tak, Pita be nesao e nim xa da en tangan vasis. <sup>10</sup>Mae nggati bit vanien, e anien tameses ti mu. E melele xa di lasak mese ni, pus neta tei nggoni metuveen tei. <sup>11</sup>E metuveen ak mipus tilang hat masel e neta tei nggoni kaliko xa mahulong lasae ni nggo kusute xatel nggo ut nesao bemei e ut etan. <sup>12</sup>E vangit kaliko ak, xi pus hisit vongoro sav xil, tetal xil, e tuman xil. <sup>13</sup>Melele xa pusi mak, milong rae tei misepin mini bitene, “!Pita tamea! Uhas ti xil e ua ni.”

<sup>14</sup>E Pita misepin rilomun mini bit, “!Suv, nasakras napol ni vamak! E meulien navan, natakak pis ti mu holesok xil xa latamese ti mu xa tavos ti pe metom tangan lava ni.”<sup>y</sup>

<sup>15</sup>Rae ak misepin rilomun mini bitene, “!Naha xa Hi bit ‘xi memese ngamu’, xouk onanemi ti onahit ‘xi tavos ti pe meten!’” <sup>16</sup>Sexien ak mistal mi Pita be vatol. Di, kaliko ak dilomun be ut nesao.

<sup>17</sup>Melele xa Pita di tamu minem usil koute te neta xa pusi, moletin xatel xa Konilias tesil xatel, latkamet nim ma Saemon e latemei latesoh sangas visal puiteh te vioh. <sup>18</sup>Latsisi latbitene, “?Moletin tova dat inggak xai xa hisen Saemon Pita?”

<sup>x</sup> 9:43 leather    <sup>y</sup> 10:14 Rae na Siu xil misep xol xil tangan linaxa ti holesok xil xa mak.

<sup>19</sup>Melele xa Pita di tamu minem usil naha xa tepusi, Ninin Eo mei misepin mini bitene, “Moletin tol mei latdi tak e di latallang ni xouk. <sup>20</sup>Uhe tan, uvue xatuk tangan uha ihe xamitel. Onanem pupu ti tangan ove xamitel vengan xa inou iaxa nasil xatel latemei.” <sup>21</sup>Ma Pita be tan e biteni mi moletin xatel ak bitene, “Inou iaxa di mutlang ni nou. ?Mutomei ve neta tova?”

<sup>22</sup>Xatel latbiteni mini latbitene, “Vat namatel, Konilias, iaxa misil xamitel matomei. Xi be moletin tei xa bos, di mot mi Hi, e Siu xil vus di lamerere pupu ni. Masxaxa eo tei na Hi mei testal mini e tehiteni mini iaxa misil xamitel matomei ve xouk tangan umei tim san. Masxaxa ak bit bos xa xi ilong kil ti naha xa xouk ukila uhiteni mini.” <sup>23</sup>Ma Pita misis xatel tangan latipat tamu itela e nim ak.

Di, e makoe nen, Pita del rut moletin ngan xil tahal Sopa xa laneket, labue xat xil. Di, be xil laba. <sup>24</sup>E visuvong nen, e mahis, laduxoh Sesaria. E rute ak, Konilias di datil Pita, xi del rut vatimol nan e rut timue tehos nan xil xa tesilasil ni xil tangan limei. <sup>25</sup>Melele xa Pita be nim, Konilias mei miteingeiril pe meten e mot mini. <sup>26</sup>E Pita dal rati e bitene, “!Mea soh! !Inou mun nabe moletin tang!” <sup>27</sup>Ma Konilias mea e Pita dit misepin mini. Lukakao lube nim e Pita pusi xa ut pol ni moletin xil ngamu. <sup>28</sup>Ma misepin mi xil bitene, “Xamim vus mukil kuhi xa Rae na Siu xil bit masakras mavituei vatel ngan xil xa latave Siu ti. E Hi pisen ni tuei minou xa ninanemi ti ninahit moletin tova misa mu tamese ti. <sup>29</sup>Misak ni melele xa osa sepinien bit nime, namaen ni e namei komanon. ?Ma nasis xamim, veneh ma musilasil ve nou?”

<sup>30</sup>Konilias biteni mini bitene, “Melengien tol mitavi, e 3 klok mahis nggoni ngan taxa radi xiak, inou di natesis e nim mavan. varinga tang, napus moletin tei mising ni eising tei xa minehin pupu, mei misoh momal pe metok. <sup>31</sup>Xi biteni minou bitene, ‘Konilias, Hi mikil xouk, di milong sisen xil nam e mipus kil tutouen xa di osa ni ba ni hoeo xil. <sup>32</sup>Taxeak, usil moletin ti xil lihe Sopa tangan ha lipus moletin tei, hisen Saemon Pita. Xi de visal moletin tei xa di pol ni holesok xil ni hilbe buluk. Moletin ak, hisen Saemon, e nim man de sangas ni tas.’ <sup>33</sup>Mak iaxa natemanon nasa sepinien bat ve xouk, ma bos mak mu xa omei. Xamem vus mei madi vituei inggak pe met Hi Suv tangan xa muteong ni naha xa Hi misa ni minuk tangan xa mei uhiteni mi xamem.”

<sup>34</sup>Di, Pita biteni mi xil bitene, “Taxeak, nakil kuhi sung mak xa Hi taketeh ti vahos ni Siu xil kestang, e pe meten, moletin xil vus lapin tang. <sup>35</sup>Hi memaal ve ngan xil vus xa di lamot mini e di lapol momal, tave ti neta xa xil labe moletin te rute sav xil. <sup>36</sup>Xamim mukil sepinien xa Hi misa ni tuei bat mi moletin xil tahal Isrel xa bit longeongen hos te tomat bemei mi xir nggo Iesu Kristo. !Xi be Suv na moletin xil ngasen! <sup>37</sup>Mukila ngamu sexien xil xa mistal mikapis e provins tahal Sudea.

Testal kokot texo provins tahal Kaleli tetouto ni melele xa Sion di tesetu usil teriren xa di tepol ni mi moletin xil. <sup>38</sup>Mukila ngamu usil Iesu tahal Nasaret iaxa Hi tepol ni tepolu ni Ninin Eo e tesa xeihen mini. Iesu tekapis ut ngasen e di tepol ni polien hos xil e di tetal rerat ngan xil vus xa xeihen na Temat teti xat xil mei vexil temase. Xi tekila tepol ni temak vengang xa Hi teti visali. <sup>39</sup>Xamem iaxa matepus holesok xil xa di tepol ni e taon tahal Serusalem e rute sav mun e von ne Siu xil. Di, lasak ni temat melele xa lateti xati tete eivave. <sup>40</sup>Melengien tol tetavi, Hi tesak ni temea rilomun ra maten e mei testal <sup>41</sup>mi rut xamem tang xa Hi tehosei xamem ngamu. Reitin mak, dutou ni melele xa temea rilomun ra maten, xamem mateanien e matemun tetela. <sup>42</sup>Iesu tesep mae ni xamem tengang ti musetu ni longeongen hos nan mi moletin xil e musep kila xa xi iaxa ben ngan xa Hi tehosei tengang ti ilepis moletin xil ngasen, ngan xil xa lameul ladi e ngan xil xa lalel tuei. <sup>43</sup>Provet xil vus di latesepin usili latehit moletin xil vus xa laneket e hisen, Hi iketeh ihos rilomun ni xil.

#### Ninin Eo Mei Polu e Moletin Xil xa Latave Siu Ti

<sup>44</sup>Melele xa Pita di tamu misepin, Ninin Eo bemei polu e meulien na ngan xil xa di lataeong ni sepinien nan. <sup>45</sup>Siu xil xa laneket ngamu xa tehe xil mi Pita latexo Sopa latemei, xil lamesep pupu vengang xa lapusi xa Hi misa Ninin Eo nan mei polu e ngan xil mun xa latave Siu ti. <sup>46</sup>Lalong kila vengang xa lalong xil lasepin nggo sepinien xil xa tave nae xati ti e di lakikei lapet rat his Hi. Di, Pita biteni mi xil bitene, <sup>47</sup>“!Ngan xil ak, lapolu ngamu ni Ninin Eo nggoni xir tang! ?Mak, ma visi tova mikila vasikoe xol xir tengang rinaterir ni xil ti e oei?” <sup>48</sup>Misak ni, Pita misemae tengang literir ni xil e oei e his Iesu Kristo. Di, xil lasis Pita xateng tengang latiti melengien ihe vahis mun itel xil.

#### Ngan Xil te Sias tahal Serusalem Lalongeong ni xa Ngan Xil xa Latave Siu Ti Mei Laneket

**11** <sup>1</sup>Longeongen xa bit ngan xil xa latave Siu ti lake reitin e sepinien na Hi mei duxoh eloheoh xil na Iesu del Siu sav xil mun xa laneket e ladi Sudea. <sup>2</sup>E melele xa Pita bemei e Serusalem, rut Siu xil lamei lasepin nggeih xati vengang xa lanemi labit ngan xil vus xa laneket e Iesu lihusil xat sexien te vexaho. <sup>3</sup>Xil labiteni mi Pita labitene, “Xouk oteha otete tim sa ngan xil xa latave Siu ti e di oteanien mun tetel xil.”<sup>z</sup>

<sup>4</sup>Ma Pita misep kila mi xil usil holesok xil xa testal kokot mini ba duxoh hoxalite teni bitene, <sup>5</sup>“Melele xa natete taon tahal Sopa, di natesis. E melele xa di tamu natesis, natepus metuveen tei. E metuveen ak, tilang

<sup>z</sup> 11:3 Mol-Siu xil labit melele xa lavituei del ngan xil xa latave Siu ti, ngan ak ipol ni limei lihe muis pe met Hi.

hat temasel e kaliko tei xa mahulong latesae ni texo kusute xatel texo ut nesao temei temal vari ni nou. <sup>6</sup>Natetei hiraek teha en, natepus hisit vongoro ngasen, ngan xil xa lamah e ngan xil xa labe vuran, tetal xil e tuman xil mun. <sup>7</sup>Di, natelong rae tei temei ni nou tehitene, ‘!Pita tamea! !Uhas ti xil e ua ni!’

<sup>8</sup>“E inou natehitene, ‘!Suv, nasakras napol vamak! E meulien navan, inou natarak pis ti mu holesok xil xa latamese ti mu xa tavos ti pe metom tangan lava ni.’

<sup>9</sup>“Di, rae texo ut nesao tesepin rilomun minou tehitene, ‘Naha xa Hi bit memese ngamu, xouk onanem ni ti onahit tavos ti.’ <sup>10</sup>Sexien ak testal minou tehe vatol, di, kaliko ak tetilomun tehe ut nesao.

<sup>11</sup>varinga tang, moletin tol xa latosil xatel latexo Sesaria latemei latesoh momal visal nim xa nateta en. <sup>12</sup>E Ninin Eo tehiteni minou tangan nihusil xatel matiha, ninanem ti nasa ve xil. Di, moletin xil ak mun tahal Sopa xa labe tei e he sav (6) latehe xametel mateha matehe nim e tim sa moletin tei, hisen Konilias. <sup>13</sup>Xi tehiteni mi xametel xa masxaxa tei mei testal mini. Masxaxa ak tesoh e tim san e tesa sepinien ak mini tehit, ‘Usil moletin ti xil lihe taon tahal Sopa tangan ha lipus moletin tei, hisen Saemon Pita. <sup>14</sup>Moletin ak ihiteni minuk itel ngan xil vus xa ladi e tim sam usil suse xa muhur meulien hu en.’

<sup>15</sup>“E melele xa di tamu natesepin, Ninin Eo mei tepolu e meulien nae texoni ngan xa tepol kokot ni mi xir. <sup>16</sup>Di, natenem rilomun ni naha xa Suv Iesu tehiteni mi xamem tehitene, ‘Sion teterir ni moletin xil ni oei, e xamim, literir ni xamim e Ninin Eo.’ <sup>17</sup>?Misak ni xosxa Hi bit ngan xil ak lakila lihur sanien nan nggoni ngan taxa tesa ni mi xir melele xa rateling neketen nar e Iesu Kristo, ma inou nabe visi iaxa nakila nisikoe xol Hi?”

<sup>18</sup>Melele xa lalong Pita misepin mak, latasepin ti mun vari vasa. Di, lapet rat his Hi e labit, “Taxeak, Hi misah suse tangan moletin sav xil xa latave Siu ti likila mei lihiles meulien nae e lihur meulien hu.”

### **Longeongen Hos Bemei mi Moletin Xil tahal Antiok**

<sup>19</sup>Melele xa sakpurunien temei te xeih e Serusalem, tetutou ni melele xa Siu xil latehov vin Stivin, rut ngan xil xa laneket e Iesu latetasil latehe rute sav xil. Rute latehe Ponisia, rute latehe aelan tahal Saepras e rute sav mun latehe taon tahal Antiok. E melele xa lateti e rute xil ak, di latesetu mi Siu xil kestang. <sup>20</sup>E rute e xil xa latehe ngan Saepras e ngan Saerin, melele xa latexo Serusalem latemei Antiok, xil di latsetu usil Suv Iesu mun mi ngan xil xa latave Siu ti. <sup>21</sup>Xeihen na Suv di mi xil, e moletin holu labiles meulien nae e laling neketen nae e Suv Iesu.

<sup>22</sup>E Serusalem, ngan xil te sias lalongeong ni xa ngan xil xa latave Siu ti mei di laneket. Mak, ma lasil Banabas be Antiok. <sup>23</sup>Melele xa Banabas ba duxoh Antiok, pusi xa tuxolxatien na Hi di mi xil e memaal ven. Di, misel

xat xil tangan lisoh ixeih e neketen nae e lihusil kuh Suv Iesu. <sup>24</sup>Banabas be moletin tei xa bos, neketen nan nggeih e Ninin Eo polu en. Mak, ma setuen nan misak ni moletin holu labiles meulien nae mei laneket e Suv Iesu.

<sup>25</sup>Di, Banabas be taon tahal Tarsis tangan valang ves Sol. <sup>26</sup>Melele xa mikameti, dela lube Antiok. Huram tevi tei, luleh viton ngan xil te sias tahal Antiok e di lupispisi mi moletin holu. E rute ak vari, ngan xil xa laneket, latekes kokot ni xil ni 'Kristin'.<sup>a</sup>

<sup>27</sup>E melele nen ak, provet ngan xil te Sias tahal Serusalem lamei e Antiok. <sup>28</sup>Tei e xil xa hisen Akabas misoh e hilaep te moletin xil e xeihen na Ninin Eo mei polu en. Xi mike mese ni xa pangasien tei te mae kekaten imei ikapis e ut etan (ngan ak testal sung e melele xa Klodias tehe suv toto tahal Rom).<sup>b</sup> <sup>29</sup>Kristin xil kekes e Antiok laling xati xa lisa ti sanien eah xa xi mikila ipol ni iha itutou ni tua nae xil xa ladi provins tahal Sudea. <sup>30</sup>Ma lapol ni, e lalingi e he Banabas xal Sol tangan ha lalsa ni mi elda xil te Sias tahal Serusalem.

### Suv Toto Herot Pol ni Sakpurunien Ba Xat Kristin Xil

**12** <sup>1</sup>E melele nen tak, Suv Toto Herot pol ni sakpurunien bemei xat ngan xil te sias tahal Serusalem. <sup>2</sup>Misemae ni rut moletin nan xil te vaeen laba lada xoteh hurae Temis, xa tunali Sion. <sup>3</sup>Melele taxa pusi xa Siu xil lamaal ve neta xa pol ni, ma misa sepinien tangan ha lital xat Pita mun. Xi pol ni mak momal e Melengien xil te Beret xa Is Tovuol En.<sup>c</sup> <sup>4</sup>Melele xa ladal xat Pita, langguri ba e lalingi e nim te xeih. E Herot misemae ni vanut moletin te vaeen hat tangan ti liketeh xole. Herot minemi bit itutou ni Anien te Tavien,<sup>d</sup> ihuri imei pe met moletin xil, e ilepisi. <sup>5</sup>E melele xa Pita da tamu e nim te xeih, ngan xil te sias tahal Serusalem di latangel ni ti sisen ven.

### Pita Ven Mase Ra Nim te Xeih

<sup>6</sup>Diamu e melele xa Herot bit ihur Pita ha ilepisi, e vongien nen momal, Pita di pat e nim te xeih. Hen xalu labar xati ni sen e moletin

<sup>a</sup> 11:26 Tetiamu, mosav xil latesep pepamen ni ngan xil xa laneket e Iesu e latekes xil ni 'Kristin', xa koute teni be 'moletin xa nggusil Kristo.' Xil lanemi labit Iesu tehe vatxeih tei xa tehur longpangasien ve sexien tesa nan. E melele xa ngan xil xa laneket latelong ni his ak, xil lamaal tang ven. <sup>b</sup> 11:28 Ngan ak tehe reitin, e AD 41-54 us tamus ti e anien mun tenapin ti. E melele nen ak, Sias tahal Antiok tetutou ni Kristin xil tahal Serusalem. <sup>c</sup> 12:3 Melengien xil te Beret xa Is Tovuol En: E huram xil ngasen, melengien tol e he sav (8) Siu xil di langga beret xa is tovuol en tangan lanem rilomun ni melele xa latetemanon latehe reling hal Isip (Eks 12:1-14). <sup>d</sup> 12:4 Anien te Tavien: Siu xil lapol ni Anien ak e melengien kokot vari te Melengien xil te Beret xa Is Tovuol En tangan lanem rilomun ni melele xa masxaxa xil na Hi lathas muimol xil ngasen tahal Isip. E muimol na Siu xil, re sipsip xa latekas puiteh mae xil ni, tesak ni Hi tetavi e xil (Eks 12:15-20).

te vaeen lu ludi e rin xalu. E puiteh te nim te xeih, moletin lu mun lusoh ludi e hale. <sup>7</sup>Vatakes, masxaxa tei na Suv mei mistal, e miehen tei mileluv xol ut xa Pita da en. Xi dil valxou Pita e milale ni. Di, biteni mini bitene, “!Temanon! !Tamea!” Vatakes, sen meluv reling hen, mot be tan. <sup>8</sup>Masxaxa biteni mini bitene, “Lihi xat atuatu nam e hes xat sandel nam.” Ma Pita pol ni mak. Di, masxaxa biteni mun mini bitene, “Using ni kot nam e uhusil nou.” <sup>9</sup>Ma Pita mitamea, nggusil masxaxa lustal ra nim te xeih. E di minemi bit holesok xil ak tave reitin ti, be metuveen tei tang. <sup>10</sup>Lukakao luba luli vanut moletin te vaeen tei. Di, lukakao luba vuma ... luli vanut moletin te vaeen tei mun. E melele xa luduxoh puiteh te viov te nim te xeih xa be aeane, lupusi xa misaha tasen. Ma lustal e lukakao e suse tei e Serusalem luba. Vatakes, masxaxa ak be relingi e Pita mikameti xa misoh tasen.

<sup>11</sup>Di, Pita minem kil neta xa mistal mini e misep tasen bitene, “!Be reitin! Hi Suv misa masxaxa nan bemei tangan vahur rat nou ra he Suv Toto Herot e ra holesok xil xa Siu xil di lanemi labit ti lipol ni minou.”

<sup>12</sup>Melele xa Pita minem kila rilomun, xi ba be nim ma Meri, nine Sion Mak. E rute ak, moletin xil holu xa laneket ladi vituei e di lasis. <sup>13</sup>Melele xa Pita bemei mirei puiteh, atou te polien tei bemei xa hisen Roda e xi bit vakil ti visi iaxa de hale. <sup>14</sup>E melele xa atou ak milong kil rae Pita, mesep e memaal pupu. Tangan vasah puiteh, e xi miloh sung ba biteni mi ngan xil xa ladi nim bit, “!Pita, xi taxa misoh de hale xiak!”

<sup>15</sup>Xil labit, “?!Otallang!?” E xi nggulehi dit biteni xa xi milong Pita mak. Ma xil labiteni mini labit, “Xos masxaxa nan tang iaxa di onlonge iaxai.”

<sup>16</sup>Melele xa di lasepin usili, Pita nggulehi dit miti puiteh vuma ... tei e xil misaha. E melele xa lapusi xa be xi reitin, lamesep pupu. <sup>17</sup>Pita mike xat xil nggo hen bit litit votei. Di, bit kila mi xil xa Suv iaxa misak ni mistal reling nim te xeih. Biteni mun mi xil bitene, “Muhit usil holesok xil ak mi Temis e ngan tesav xil mun xa laneket.” Di, be reling xil ba be rute sav.

<sup>18</sup>E makoe nen, moletin te vaeen xil xa latling xil ti lateketeh xol Pita, lanexo pupu e di labit, “?Pita ba xave?” <sup>19</sup>Melele xa Herot milongong ni, misil moletin te vaeen xil nan ba lalang ni, e xil mun latakameti ti. Di, misis pilei mereketeh xil ak. Di, misemae ni tangan lihas vin mereketeh xil ak. Dutou ni ngan ak, Herot be reling Sudea e ba di vuteili e Sesaria.

### Suv Toto Herot Mat

<sup>20</sup>Melele xa Herot di tamu e Sesaria, moletin xil tahal Taer e Saedon lapol ni neta tei xa misak ni ien minggat xil. Ma bit moletin xil nan lanasa ti mun anien mi xil. Ma moletin te rute xalu ak, lasil vanut moletin tei tangan lava lapus Herot. Diamu, lasis tutouen mi moletin tei

na Herot xa nenesien nan di en, hisen Blastas. E del tutouen nan, Herot mae ni xa laling xat melengien tei tangan moletin xil tahal Taer e Saedon limei tangan lipol ni hitxatien te tomat itela.

<sup>21</sup>E melengien teni, Herot mising ni eising tei xa bos xa bos na suv toto xil, e bemei dotan de hor nan. Di, misa sepinien tei ba mi xil. <sup>22</sup>Moletin xil labit lisak ni valonge vahos, ma lakei ba ni labitene, “!Rae nam taxoni moletin sav ti! !Rae nan nggoni hi tei vari!” <sup>23</sup>Herot milong sepinien nae e mae ni xil labiteni mak, e tasa ti merereen vaha mi Hi. Misak ni, vatei takes, masxaxa tei na Hi Suv bemei e pol ni mesei. Tavehi ti, tomasis xil labe tinen e langga ni vuma ... mat.

<sup>24</sup>E sepinien eo na Hi xa Herot di tevae tetela, xi mei mahulong mu e mikapis ut xil ngasen.

<sup>25</sup>E melele xa Banabas e Sol lupol vuol ni polien xil xa sias tahal Antiok latesa xalu lutehe Serusalem ven tangan lalsa tutouen mi hoeo xil, ludilomun lube Antiok, e Sion Mak ba xatel.<sup>e</sup>

### Ninin Eo Bosei Banabas xal Sol ve Polien Tei

**13** <sup>1</sup>E sias tahal Antiok, provet e tisa ngan xil lateti en: Banabas, Simeon (xa be timaluxoluk tei), Lusias (tahal Saerin), Manaen (xa tehe timue hos tei na Suv Toto Herot), e Sol. <sup>2</sup>Vatei, melele xa di lamot mi Hi e di labal ni anien, Ninin Eo bemei misepin mi xil bitene, “Muha muling Banabas e Sol ti lalipol ni polien xa inou nabosei xalu tuei ven.” <sup>3</sup>Ma xil langgulehi di labal e di lasis. Di, laling he e Banabas e Sol e lasil rat xalu luba.

### Banabas e Sol Lube Saepras

<sup>4</sup>Dutou ni xa Ninin Eo misa rat Banabas e Sol ra hal Antiok, xalu luba lube Selusia. Lunggo tuturil e rute ak lube aelan tahal Saepras. <sup>5</sup>Melele xa lube ut e hal Salamis, lube nim te pispisien xil e di lusetu usil sepinien na Hi mi Siu xil. Sion Mak mun be xatel e di dutou ni xalu.

<sup>6</sup>Di, Banabas e Sol lunggur xoteh aelan tahal Saepras luba lube taon tahal Pampos. E inggak, lubisu mi Siu tei, hisen Eleimas.<sup>f</sup> Xi be moletin tei te vongou e di miluvos moletin xil bit xi be provet tei na Hi. <sup>7</sup>Vehakut, de sangas visal vat tei te kavmen xa di milaxat rute ak, hisen Serkias Polas. Xi be moletin tei xa tehe eimae, e melele xa milonge xa Banabas e Sol ludi inggak, mikes xalu lumei tangan lalsetu ni sepinien na Hi vateong ni. <sup>8</sup>E Eleimas misep sisis hisealu tangan vasak ni vat na kavmen naneket ti e Iesu. <sup>9</sup>Ninin Eo bemei polu e Sol (xa hisen tei mun be Pol), ma miketeh pus Eleimas <sup>10</sup>e misepin nggeih ba mini bitene, “!Xouk obe nat Temat! !Di obae mi sexien xil vus xa bos! !Opolu ni hisit luvosen xil

<sup>e</sup> 12:25 Pol 11:29-30    <sup>f</sup> 13:6 E sepinien na Siu xil lakesi ni ‘Bar-Iesu’.

ngasen e vehakut di osak pisi di obiles longeongen hos usil Suv Iesu mei be luvosen tang! <sup>11</sup>Ve sexien ak, Suv isa pangasien imei e xouk. Metom xalu mei ivar e onapus ti mun miehen ihe nousav vuteili.” Vatakes, Eleimas, meten be momah, dit mitavuel. Ma di kapis tangan vakamet moletin tova vatal xat hen vahe suse mini.

<sup>12</sup>Melele xa vat na kavmen pusi mak, mesep pupu e mei mineket e Suv Iesu ve pispisien nalu.

### **Pol xal Banabas Lube Taon tahal Pisitia-Antiok**

<sup>13</sup>Pol e ngan tesav xil mun laling Pampos, langgo tuturil labe taon tahal Perka xa de provins tahal Pampilia. E rute ak, Sion Mak be reling xil dilomun be Serusalem. <sup>14</sup>Di, langgo Perka laba labe taon tahal Pisitia-Antiok. E Sabat, labe nim te pispisien na Siu xil e ladotan en. <sup>15</sup>Di, moletin tei buli sepinien tei e Rae xil na Mosis e ngan xa Provet xil latetisi. Melele xa buli bus, vat xil te nim te pispisien ak lasil moletin tei ba misis Pol xal Banabas bitene, “Toxoli xalu, xosxa munggur xat neta tova tangan xa mulihiteni vatutou ni moletin xil ak, ma bos xa mei mulhiteni.”

<sup>16</sup>Ma Pol mea, misa hen be nesao tangan liti votei e bitene, “Xamim xa mube Siu, e xamim xa mutave Siu ti xa di mumot mi Hi, bos xa muteong ni nou. <sup>17</sup>Hi na Siu xil iaxa tehosei avu nar xil e tesak ni moletin nar xil mei latehe holu tova tang melele xa lateti e Isip, tave ti neta xa latnave hortan ti te rute ak. Di, Hi teleh rerat xil ra rute ak texo xeihen nan. <sup>18</sup>E neta sav xa sexien xil nae misa, xi telaxat kuh xil e uruvuol haram hanutap lu (40). <sup>19</sup>Di, kantri lu e he sav (7) xa mahulong pupu xa lateti e tan xa mahulong tahal Kenan, Hi tehu len xil e tesa tan nae mi avu nar xil tangan mei ihe tan xati nae. <sup>20</sup>Melele xa latemei e Isip ba duxoh melele xa tan tahal Kenan mei de he, haram handred hat e hanutap lu e hexalu mun (450) tetavi.

“Di, Hi tepet rat suv xil te lepisien tangan ti lipol mi xil ba duxoh melele xa tepet rat Samuel tehe provet nae. <sup>21</sup>E melele xa moletin xil latsis Hi tangan vapet rat suv toto tei valaxat xil, ma Hi tehosei Sol, nat Kis xa texo vatimol na Bensamin. E xi telaxat mol-Isrel xil haram hanutap lu (40). <sup>22</sup>Di, dutou ni ngan xa Hi tesu rat Sol, xi pet rat Deved sung mei tehe suv toto nae. Hi tehit usil Deved temak, ‘Deved, nat Tiese, napusi xa xi be hisit moletin tei xa inou namaal pupu ven. Xi mikila vapol ni holesok xil vus vaxoni ngan xa inou di ieok bei.’

<sup>23</sup>“Hi tehit xati xa moletin tei istal ixo vatimol na Suv Toto Deved tangan mei vateh meulien e Siu xil. Moletin ak be Iesu Kristo. <sup>24</sup>E melele xa Iesu tenapol ti mu, Sion tesetu mi mol-Isrel xil vus tangan lihiles ra tesaen xil nae e limae ni mei literir ni xil e oei. <sup>25</sup>Di, sangas ni melele xa Sion tepol vuol ni polien nan, xi tesis pilei moletin xil tehitene, ‘?Xamim



munemi mubit inou nabe visi? ?Mubit inou nabe xi xa Hi tehit xati tehit isa ni imei? E-e, tave nou ti. Xi itoutou imei, e inou natapin ti tangan xa mei nihe slev nan e namur rat sandel nan.'

<sup>26</sup>“!Toxoli xil te vatimol na Ebrahim, del xamim vus xa di mumot mi Hi e mutave Siu ti, muteong kuhi ni nou! Hi tesa sepinien teteh meulien en mi xir. <sup>27</sup>Xi tesa kokot ni mi Siu xil tahal Serusalem tetel vat nae xil texo tisien na provet xil xa di latvuli e Sabat xil ngasen. E xil latele ras sepinien xil ak, e latnale kil ti xa Iesu be Kristo xa miteh meulien e xil. E neta sav xa lale rasi, melele xa latepol ni suse xa Iesu temat texo en, latesak ni sepinien na provet xil ak mei testal tehe reitin. <sup>28</sup>Tave ti neta xa latnakamet ti neta vasa xa Iesu vapol ni tangan ha vamat ven, e latesi petine Paelet tangan vamae ni lava lavasi vamat. <sup>29</sup>E melele xa latepol ni holesok xil ngasen tehusil naha xa Vanuvei na Hi tehit xati, xil latehur rat tiei nan ra eivave, be latelingi tete vangihat tei. <sup>30</sup>!E Hi tetal rat rilomun ni ra maten! <sup>31</sup>Di, melengien holu, Iesu di testal mi ngan xil xa latehe xil latexo Kaleli mei latehe Serusalem. E taxeak, xil sung di lasep usili mi Siu xil. <sup>32</sup>E xamem mamei tangan masep mese ni mi xamim xa naha xa Hi tehit xati mi avu nar xil tetiamu, <sup>33</sup>xi pol ni bemei be reitin tuei mi xir melele xa tepol ni Iesu temea rilomun ra maten. Ngan ak nggoni ngan taxa Sam xa be lu (2) di tehiteni usil Iesu tehit,

‘Xouk obe natuxuli,  
e xosali, inou nabe tamom.’<sup>g</sup>

<sup>34</sup>“Hi tetal rat Iesu ra maten e tamaen ni ti mun tangan tiei nan volel. Ngan ak nggoni ngan taxa Hi tehit usili tehit,  
‘Hitxatien eo xa natepol ni mi Deved,  
nipol ni mun mi xamim.’<sup>h</sup>

<sup>35</sup>“E Sam sav mun tesep usili tehitene,  
‘Hi Suv, onamae ni ti tiei na moletin eo nam navolel ti e vul.’<sup>i</sup>

<sup>36</sup>“E Deved xa xiak, melele xa xi tepol vuol ni holesok xil xa Hi teling xati tangan ti ipol ni, di, mat. Xil latelingi pat e von tehinen tetel avu nan xil, e tiei nan teta tevolel. <sup>37</sup>E ngan ak tamak ti mi ngan xa Hi tetal rati ra maten. <sup>38</sup>Toxoli xil, sepinien xa matsa ni mi xamim mak: Iesu mikila ileh rerat tesaen xil namim e isak ni Hi iketeh ihos mun ni xamim. <sup>39</sup>E ngan xil vus xa laling neketen nae en, vexil imase ra tesaen xil xa Rae xil na Mosis misakras valeh rati ra xil. <sup>40</sup>Ma mulaxat kuh xamim tangan xa naha xa provet xil latehit mese ni tuei nastal ti mun mi xamim. Latesepin ni latehitene,

---

<sup>g</sup> 13:33 Sam 2:7    <sup>h</sup> 13:34 Aes 55:3    <sup>i</sup> 13:35 Sam 16:10

41 '!Muteong, xamim xa munem mele ni naha xa Hi di pol ni!

!Mutemanin en e mumat!

Tave ti neta xosxa moletin sav tei tomak vamei vasep kila mi xamim,  
naha xa di napol ni mi xamim xosali be neta tei xa musakras  
muke reitin en.' ”j

42 Melele xa Pol e Banabas lusepin bus, lube reling xil ra nim te pispisien. Di, moletin xil lasis xalu tangan laililomun lalisep usil holesok nen ti mun e Sabat xa itutou imei. 43 Dutou ni totanen ak, moletin xil holu langgusil xalu laba, ngan xil xa labe Siu e ngan xil xa latave Siu ti e di langgusil xat Rae na Siu xil e lamot mi Hi nae. Lusepin mi xil e lusel xat xil tangan lixulehi liling nenesien nae e eheien hos na Hi.

44 E Sabat sav mun, sangas moletin xil vus te taon tahal Pisitia-Antiok lamei tangan lalong usil sepinien nalu usil Suv Iesu. 45 E melele xa Siu xil lapus vanut moletin xa be mahulong mak, ma lanem misa pupu ni xalu. Misak ni laseputut ni Pol e lasep sisin holesok xil vus xa di misep usili.

46 Ma Pol xal Banabas lusepin nggeih ba ni xil lubitene, “Hi tehit xati tangan sepinien nan vamei kokot mi xamim. E vengan xa di musin ni e iemim tavei muvur meulien sal, ma malhe reling xamim. Xosali maliha sung mi ngan xil xa latave Siu ti. 47 Hi Suv tesa selxatien ak ba mi xamim tehit,

‘Napol ni xamim mube miehen mi ngan xil xa latave Siu ti.

Mak, ma muhur sepinien teteh meulien en iha mi moletin xil vus te ut etan.’ ”k

48 Melele xa ngan xil xa latave Siu ti lalonge mak, lamaal pupu e lapet rat sepinien na Hi. Ngan xil vus xa Hi tehosei xil tangan lihur meulien sal, ngan xil ak laling neketen nae e Suv Iesu.

49 Ma sepinien na Suv miloh mikapis ut ngasen e rute nen ak. 50 E rut Siu xil laba lapus rut vat xil del rut atou ngan xil mun xa labe eilep e polien nae xa di lamos e Siu xil, e lasak ni nenemien nae misa ba ni Pol e Banabas. Misak ni, moletin xil lasil rat xalu lube reling taon nae.

51 Ma Pol e Banabas lumea lurang meas ra kaelealu ba xat taon nae tangan vassel kat xil xa pangasien tei mei xat xil. Di, luba lube taon tahal Aekoniam. 52 E moletin xil tahal Pisitia-Antiok xa mei laneket e Iesu, Ninin Eo bemei polu e xil e sien na Hi di e xil.

### Rut Moletin Xil Langgol Rerat Pol Xal Banabas ra Hal Aekoniam

**14** <sup>1</sup>Di, e Aekoniam, nggusil sexien matu nalu, Pol xal Banabas lube nim te pispisien na Siu xil e di lupispisi kuhi mi xil. Misak ni

j 13:41 Hab 1:5 k 13:47 Aes 42:6; 49:6

Siu xil holu del ngan xil xa latave Siu ti, mei laneket e Iesu. <sup>2</sup>E rut Siu xil xa latake reitin ti e pispisien nalu, lasusu petine ngan tesav xil xa latave Siu ti tangan iexil vakat e lavae mi Kristin hu xil. <sup>3</sup>Misak ni, xalu ludi be nousav e rute ak e ulixalu takan ti. Di lusetu kuhi mi moletin xil usil eheien hos na Iesu, e Suv di pisen ni xa sepinien nalu be reitin nggo xeihen xa misa ni mi xalu tangan lupol ni merekel xil e sexien sav xil xa tellep. <sup>4</sup>Ma moletin xil te taon ak ladi pas xil be vanute lu: vanute tei langgusil Siu xil, e vanute tei mun langgusil eloheoh xalu.

<sup>5</sup>Di, rut moletin xil xa latave Siu ti del Siu xil e vat nae xil, lapol ni lingxatien tei tangan lava ni xalu ha lavov vin xalu. <sup>6</sup>Melele xa eloheoh xalu lulongeong ni lingxatien ak, xalu lulesae lube Laekonia, ba ludi taon xalu ak, Derbi del Listra, e ut nen xil mun xa di sangas. <sup>7</sup>E rute xil ak, xalu di lusetu ni longeongen hos usil Iesu.

#### **Moletin Xil tahal Listra Lanemi Labit Pol xal Banabas Lube Hi Lu**

<sup>8</sup>E taon tahal Listra, moletin tei da en xa misakras vakakao vengan xa len xalu tesa melele xa latepesi. <sup>9</sup>Xi dotan tang da, di miteong ni sepinien na Pol. Pol pusi e pus kila xa neketen nan pipin tangan mikila ikakao. Ma miketeh momal ni <sup>10</sup>e mikei ba ni bitene, “!Xouk, umea soh!” Ma moletin ak but be nesao e mikakao. <sup>11</sup>Melele xa vanut moletin xil ak lapus holesok xil xa tellep ak xa Pol di pol ni, xil di lakei nggeih nggo sepinien nae tahal Laekonia labit, “!Xalu ak lube hi lu xa lutemei etan e lubiles xalu lumei lunggur tiei nggoni moletin!” <sup>12</sup>Ma xil lakes Banabas ni ‘hi Sius,’ e Pol ni ‘hi Hermis’ vengan xa Pol be tei e xalu xa di misetu holu mi moletin xil. <sup>13</sup>Sangas ni taon ak, nim eo tei da xa di lamot mi hi Sius en. E pris tei teni nggur longeongen, ma bemei visal puiteh te vloh te taon ak del xat buluk lu xa laso xol en hungovae de huraealu. Di, xi del vanut moletin xil ak labit lavas buluk xalu ak vahe sanien eo tei nae mi xalu.

<sup>14</sup>Melele xa Pol xal Banabas lule kil naha xa xil labit ti lipol ni, xalu lulonge misa pupu. Ludal papas eising nalu e luloh lube hilaep te vanut moletin xil ak e di lukei nggeih lubitene, <sup>15</sup>“!Moletin xil! ?Veneh ma mupol ni sexien xil ak? !Xamel ak mabe moletin tang manggoni xamim! Mamei inggak tangan malsa longeongen hos na Hi mi xamim. Xi bit muviles ra nanao votei xil ak e mumot mini kestang. Xi iaxa meul e pol ni ut nesao e ut etan, pol ni tas del holesok xil vus xa ladi en. <sup>16</sup>Tetiamu, temae ni moletin xil tahal kantri xil ngasen tangan lihusil nenemien nae xil tang e ti limot mi hi sav xil. <sup>17</sup>E tave ti neta xa latakil ti, xi di pisen sexien nan xil mi xil nggo holesok hos xil xa di pol ni. Xi misa us mi xamim nggo ut nesao e mei mikas anien samim xil e naho e pol ni meul bos. Xi bos mak, e di misa pupu ni anien mi xamim e di pol ni mubesi xamim.” <sup>18</sup>Tave ti neta xa xalu luso sepinien xil ak, sangas lusakras lalosikoe xol moletin xil ak tangan linavas buluk xalu ti ak nave sanien eo nae mi xalu.

<sup>19</sup>Rut Siu xil langgo taon tahal Pisitia-Antiok e taon tahal Aekoniam mei lastal e Listra. Lasep luvos vanut moletin xil ak tangan lanem vasa ni xalu. Ma xil langgov Pol e lalihi ba laso ni be reling taon nae vengan xa lanemi labit mat. <sup>20</sup>E dutou ni, moletin xil xa laneket e Iesu mei lakapis xole. Vatakes, xi mitamea e ladilomun lube taon tahal Listra. Ut milan, xal Banabas lube taon tahal Derbi.

### **Pol Xal Banabas Ludilomun Lube Antiok**

<sup>21</sup>Pol xal Banabas lusetu ni longeongen hos na Hi e Derbi e moletin holu mei laneket e Iesu. Di, ludilomun e suse nalu lumei Listra e Aekoniam. Di, lunggur sal ni lube Pisitia-Antiok. <sup>22</sup>E ut xil ngasen, ba di lusao ni moletin xil xa laneket e Iesu. Lupol ni nenemien nae ngeih mu e lusel xat xil tangan lisoh ixeh e neketen nae. Xalu di lupispisi mi xil lubit, “Ixo suse te longpangansen, ma rikila riha rihe ut xa Hi be Suv Toto en.” <sup>23</sup>E sias xil ngasen xa lusao ni, di luling elda xil tangan lilaxat xil. E diamu ni melele xa luba, di lubal ni anien e di lulis ba ni Suv Iesu tangan ilaxat kuh elda xil xa lateling neketen nae en.

<sup>24</sup>Usil kakaoen nalu, lunggur xoteh ut xil tahal Pisitia e lube provins tahal Pampilia. <sup>25</sup>E rute ak, xalu lusetu ni sepinien na Hi e taon tahal Perka. Di, lube taon tahal Atalia. <sup>26</sup>E rute ak, lubut e tuturil tei e ludilomun lube Antiok. Rute ak iaxa moletin xil latsis xol xalu tangan Hi iti mi xalu e polien nalu e taxeak lumei e lupol vuol ni.

<sup>27</sup>Melele xa mei lustal e Antiok, luleh viton ngan xil te sias te rute ak. Lutumul usil holesok xil xa Hi tepol ni texo polien nalu. Lusep kila mi xil xa Hi tesah suse mi moletin xil xa latave Siu ti tangan mei lineket e Iesu. <sup>28</sup>E ludi rute ak nousav nen li del xil.

### **Vat xil na Kristin xil xa Ladi Serusalem Lasep Tetavoe Usil Ngan Xil xa Latave Siu Ti xa Mei Laneket e Iesu**

**15** <sup>1</sup>Rut moletin xil langgo Sudea lamei e Antiok, e di lapispisi mi moletin xil xa laneket labit, “Rae xil na Mosis biteni bit Hi misakras vateh meulien e xamim xosxa munave vexaho ti.” <sup>2</sup>Melele xa Pol xal Banabas lulonge mak, lungor pupu del xil ve ngan ak. Misak ni xil labosei Pol, Banabas, del rut moletin sav xil mun tangan lihe Serusalem ha lisepin itel eloheoh xil e elda xil ve sexien te vexaho ak.

<sup>3</sup>Ma ngan xil te sias tahal Antiok lasil xil laba. Melele xa lakakao laba, di lasao ni moletin xil xa laneket e rute xil vus e Ponisia del provins tahal Sameria. E melele xa lapus xil, labiteni mi xil e rin xa moletin hao xa latave Siu ti di labiles meulien nae e mei laneket e Iesu. Longeongen ak misak ni Kristin xil ngasen ak labesi pupu ni xil.

<sup>4</sup>Melele xa laduxoh Serusalem, ngan xil te sias, del eloheoh xil e elda xil mun langgur pilei xil. Di, Pol xal Banabas lubit vuol ni holesok xil vus

xa Hi tepol ni texo xil tetel ngan xil xa latave Siu ti. <sup>5</sup>E melele xa di tamu lusepin, rute e ngan xil xa laneket xa di lamos e Parasi xil lasoh e labiteni labit, “Xosxa ngan xil xa latave Siu ti labit mei lamos e xir, bos xa xil mun lihe vexaho e lilong xat Rae xil na Mosis.”

<sup>6</sup>Di, eloheoh xil del elda xil lamei labe vituei e kaonsel tei tangan lamal ni ngongoren ak. <sup>7</sup>Lasep tetavoe ni be nousav. Di, Pita misoh e biteni mi xil bitene, “Toxoli xil, xamim vus mukila xa tetiamu, Hi tehosei nou ra xamim tangan nisetu ni longeongen hos mi ngan xil xa latave Siu ti tangan lilonge e lineket en.<sup>l</sup> <sup>8</sup>E Hi, xa mikil vuol ni nenemien na moletin xil, tepisen ni xa xi tehosei moletin xil ak xa latave Siu xil ti melele xa tesa Ninin Eo mi xil nggoni ngan taxa tesa ni mi xir. <sup>9</sup>Naha xa Hi di pol ni mi xil pipin tang mi xir. Nggoni xir, xi mikas moten meulien nae ra tesaen vengam xa laneket e Iesu. <sup>10</sup>?Ma taxeak, veneh ma mubit musak pis Hi melele xa muling Rae nar xil nggoni eipo tei xa meas da xat moletin hu xil na Iesu xa latave Siu ti? Eipo ak, xir del avu nar xil tetiamu rasakras rapoe. <sup>11</sup>!Rinapol ni ti namak! Xir xa di raneket e Iesu, ranggur meulien hu nggo eheien hos nan kestang. Ma xil mun mak tang.”

<sup>12</sup>Di, melele xa Banabas xal Pol di lutumul usil merekel e holesok xil xa tellep xa Hi tepol ni texo xalu tetel moletin xil xa latave Siu ti, moletin xil vus xa ladi, ladit votei. <sup>13</sup>E melele xa lusepin bus, tei e xil, hisen Temis misepin mi xil bitene, “Toxoli xil, muteong ni nou. <sup>14</sup>Saemon Pita misep kila ngamu sexien xa Hi tepisen eheien nan tetiamu mi ngan xil xa latave Siu ti e teleh rerat rute e xil tangan mei lihe nan e ti lipet rat hisen. <sup>15</sup>Sepinien na Saemon Pita nggoni sepinien na Hi xa texo provet xil tetiamu xa tehit,

<sup>16</sup>‘Itutou ni ngan ak, inou nitilomun

e nisak ni vatimol na Suv Toto Deved isoh rilomun.

Reitin, neta sav xa vatimol nan temot, inou nipol ni isoh ixeih mu.<sup>m</sup>

<sup>17</sup>Ma moletin sav xil te ut etan limei visal nou,

ngan xil xa latave Siu ti xa nabosei xil labe navan, xil limei visal nou.

<sup>18</sup>Ngan ak be sepinien navan xa natehit mese ni nousav temei.<sup>n</sup>”

<sup>19</sup>Di, Temis biteni mun bitene, “Nenemien navan xiak. Nanemi nabit bos xa rinapol ni ti naxeih pupu mi ngan xil xa latave Siu ti xa di lasa meulien nae xil mi Hi. <sup>20</sup>!E-e! Bos xa risa uvei tova tang ihe visal xil, e risep xol xil tangan linaxa ti anien xil xa tamese ti xa latesa ni teha mi nanao xil. Linapat ti mun natel atou mu tiramue sav. Linaxa ti mun hisi

<sup>l</sup> 15:7 Pol 10:1-44    <sup>m</sup> 15:16 Vatimol na Suv Toto Deved di misep usil Iesu xa Hi ital rat rilomun ni ra maten e ipol ni mei ihe Suv Toto na moletin xil ngasen, ngan xil xa labe Siu e mosav xil mun.    <sup>n</sup> 15:18 Amo 9:11-12 (LXX)

te vongoro xil xa ra di tamu en, mu ngan xil xa latesar xoteh hurae tang. <sup>21</sup>Vengan xa tetiamu bemei duxoh xosali, e Sabat xil vus, moletin xil di lalong kil Rae xil na Mosis melele xa di labuli e nim te pispisien xil. E di lasetu usil sepinien nan e taon xil ngasen.

**Kristin Kaonsel tahal Serusalem Ladis Uvei  
Ba Ni Kristin Xil xa Latave Siu Ti**

<sup>22</sup>Di, ngan xil vus te sias tahal Serusalem lamae ni tangan eloheoh xil e elda xil lihosei rut moletin nae xil tangan lisil xil lihe Antiok itel xat Pol xal Banabas. Ma xil labosei rumali lu xa lube vat na moletin xil e sias ak, hisealu Saelas del Sudas (xa hisen tei mun Barsabas). <sup>23</sup>Ma lasa uvei ak mi xatel latengguri latoba. Uvei ak biteni mak:

“Xamem, eloheoh xil del elda xil, mabit mavit bos makoe mi xamim, tua namem xil xa mutave Siu ti xa mudi taon tahal Antiok, e rute sav xil e provins tahal Siria e provins tahal Selisia.

<sup>24</sup>Malongeong ni xa rut moletin namem xil labat e lasa sepinien tei xa tepol ni xamim lemim malilil e nenemien namim tata kat ti. Xamem matnasa ti sepinien mi xil tangan lavat laviteni mi xamim vamak. <sup>25</sup>Misak ni, xamem matetotan vituei e matemei e nenemien tei takes. Di, matehosei moletin lu e masil xalu tangan lalhur nenemien namem ihat visal xamim. Xalu luka vituei del xat Banabas xal Pol xa lube tua hos nar. <sup>26</sup>Xalu ak, sangas laloli sen meulien nalu ve polien na Iesu Kristo, Suv nar. <sup>27</sup>Ma masil Sudas xal Saelas lubat. Xalu lalsepin ni sepinien xil imal tang mi xamim ixoni ngan taxa madisi xiak. <sup>28</sup>Ninin Eo bit bos tangan nasa ti mun rae xil mi xamim, ma xamem mun mamae ni tangan manasa ti mun eipo xa meas mi xamim. E muhusil kes ni rae xil taxa tellep xa bit: <sup>29</sup>munaxa ti anien xil xa latesa ni teha mi nanao xil; munaxa ti mun hisi te vongoro xil xa ra di tamu en; munaxa ti mun vongoro xil xa latesar xoteh hurae tang; e munapat ti mun natel atou mu tiramue sav xil. Xosxa muhusil kuh rae xil ak, ma ihos pupu mi xamim.

Ngan ak be hoxalite te sepinien namem. Bos mahis mi xamim vus.”

<sup>30</sup>Ma Sias tahal Serusalem lasil Sudas, Saelas, Pol, del Banabas latobe Antiok. Melele xa latduxoh rute ak, latleh viton ni Kristin xil vus e latosa uvei ak mi xil. <sup>31</sup>Melele xa moletin xil labuli, xil labesi xil himetu ve sepinien te selxatien xil xa di en. <sup>32</sup>Sudas xal Saelas lube provet, e lusepin teviei del xil e ludal rat nenemien nae e rusak ni xil lasoh nggeih e neketen nae. <sup>33</sup>Melele xa ludi be nousav vuteili visal xil, Kristin xil labit lisil xalu itel xat tomat na Hi laltilomun lalihe visal ngan xil xa latesa xalu lutemei. <sup>34</sup>E Saelas bit ita tamu visal xil.

<sup>35</sup>E Pol xal Banabas ludi vuteili tamu e Antiok. Xalu del moletin sav xil holu mun, di lapispisi mi moletin xil xa laneket e di lasetu ni sepinien na Suv.

### Pol Xal Banabas Lukati Xalu

<sup>36</sup>Di, vatei, Pol biteni mi Banabas bit, “Raltilomun ha ralsao ni ngan xil xa laneket e taon xil vus xa di rutsetu ni sepinien usil Suv Iesu en, e ralpus ti xa ladi midep.” <sup>37</sup>Banabas mae ni e bit bos xa lalhur Sion Mak ihe xatel. <sup>38</sup>E Pol minemi tamal ti tangan lalhuri, vengan xa tetiamu, xi tehusil xat xalu e tenapol vuol ni polien nan xil ti. Xi teheling xalu e Pampilia tamu.<sup>o</sup> <sup>39</sup>Ma ngongoren ak mei nggeih pilei e misak ni lukati xalu. Banabas nggur Sion Mak ba lubut e tuturil tei lube Saepras, <sup>40</sup>e Pol bosei Saelas tangan ihe xalu. Di, Kristin xil lasis ve xalu tangan Hi Suv ilaxat kuh xalu. <sup>41</sup>Xalu ba di lukapis e lusao ni ngan xil te sias xil xa ladi e provins tahal Siria e provins tahal Silisia. Lusak ni xil mei lasoh nggeih mu e neketen nae.

### Timoti Mei Mos e Polien na Pol xal Saelas

**16** <sup>1</sup>Di, Pol nggur sal ni be Derbi e Listra. E rute ak, horam maxoe tei xa di mineket e Iesu da en, hisen Timoti. Ninen be Siu tei xa xi mun mineket, e tamen be ngan Kris. <sup>2</sup>Kristin sav xil tahal Listra e Aekoniam lanemi labit Timoti be moletin hos tei. <sup>3</sup>Pol ien bei vahur Timoti vahe xalu, ma pol ni be vexaho. Xi pol ni mak vengan xa Siu xil vus xa ladi rute xil ak lakila xa Timoti tave vexaho ti mun vengan xa tamen tave Siu ti. <sup>4</sup>Melele xa di latkakao e taon xil, xatel di latbit kil rae xil xa eloheoh xil del elda xil tahal Serusalem latepol ni mi ngan xil xa latave Siu ti. E di latsel xat xil tangan lilong xat rae xil ak. <sup>5</sup>Misak ni ngan xil te sias xil vus, neketen nae mei nggeih mu. E melengien xil ngasen, moletin sav xil mun lamei lamos del xil.

### Pol Metuve e Pus Ngan Masedonia Tei

<sup>6</sup>E kakaoen na Pol xatel Saelas e Timoti, Ninin Eo tamaen xatel ti tangan latsetu ni sepinien na Hi e provins tahal Esia. Misak ni latnggo sutang e rute xil tahal Frikea e provins tahal Kalesia. <sup>7</sup>E melele xa latduxoh haxot te provins tahal Misia e provins tahal Bitinia, Ninin Eo na Iesu tamaen xatel ti tangan latohe Bitinia. <sup>8</sup>Ma xatel latkakao latoba latnggo provins tahal Misia e ba latbe Troas. <sup>9</sup>E vongien nen, Pol metuve e pus moletin tei tahal Masedonia. Xi misoh e di mikesi bit, “!Amei li e Masedonia e mei ututou ni xamem!” <sup>10</sup>Melele xa Pol pus metuveen ak, minem kila xa Hi ien bei xa ha latsetu ni longongen hos nan mi ngan

<sup>o</sup> 15:38 Polien 13:13 di misep usili.

Masedonia xil. Misak ni latbue xat xatel e inou mun, Luk, namos e xatel<sup>p</sup> matobe.

### **E Taon tahal Pilipae, Lidia Mei Mineket**

<sup>11</sup>Xamotel matnggo tuturil tei e Troas e matnggur xoteh tas matbe Samotres. Di, e makoe nen, tuturil ak be ut e taon tahal Neapolis. <sup>12</sup>Di, matkakao matnggo rute ak ba mattestal e taon tahal Pilipae xa be taon tei xa eilep e provins tahal Masedonia. Kavmen tahal Rom tehur taon ak mei tehe taon tei mun nan.<sup>q</sup> Xamotel matdi melengien vahis mun en.

<sup>13</sup>E Sabat, xamotel matbe reling taon e matbe rute tei sangas ni oeisal. Matenemi matobit rute ak iaxa be von sisen na Siu xil. Ma matdotan e di matsepin del atou votei xil xa mei ladi vituei ngamu. <sup>14</sup>Tei e xil xa di miteong ni xamotel, hisen Lidia. Xi tahal Taeatira e xi iaxa di pos ni kaliko xil xa bihili e bos pupu. Xi be atou tei xa tave Siu ti e vehakut di mot mi Hi. E Hi misah puiteh e meulien nan tengan wakil kuh naha xa Pol di misepin ni. <sup>15</sup>E melengien nen tak, xi del ngan xil vus xa ladi tim san lamae ni Pol derir ni xil e oei. Di, misis xamotel bit, “Xosxa mutbit nabe moletin na Hi reitin, mei ha mutti nim mavan.” Ma matmae ni be xamotel matodi.

### **Moletin Xil tahal Pilipae Laso Pol Xal Saelas Lube Nim te Xeih**

<sup>16</sup>Vatei, matoba tengan mathe von sisen e matbisu mi atuli tei xa be slev. Atuli ak, ninin tesa tei da en xa misak ni mikila vake mese ni naha xa istal e melengien xil xa ti imei. Atuli ak, moletin xil holu lamei tengan xi ti vahit kil holesok xil xa istal e meulien nae. Misak ni moletin xatel xa atuli ak de pe heatel, di latlihi vatu xil xa holu nggo en. <sup>17</sup>Xi di nggusil Pol e xamotel e di mikei nggeih bitene, “!Moletin xil ak labe slev xil na Hi xa mili hi sav xil! !Xil di lasep kil suse xa Hi iteh meulien e xamim ixo en!” <sup>18</sup>Melengien holu xi di pol ni mak, misak ni Pol ien mikat ma biles biteni mi ninin tesa ak bitene, “!E his Iesu Kristo, nasemae ni xa uhe reling atuli xai!” Ma vatakes, ninin ak be relingi.

<sup>19</sup>Melele xa moletin xatel xa di pol mi xatel latpus kila xa atuli ak misakras valihi ti mun vatu vahe natel, latdal xat Pol xal Saelas e latdel xalu lube von koten xa de hilaep te taon. <sup>20</sup>Latdel xalu luba lusoh e pe met moletin xil te lepiesien e von vitueien e latbiteni mi xil latbit, “Moletin xalu ak di lupol ni holesok xil xa misa e taon nar. Lube Siu <sup>21</sup>e di lupispisi xa xir, mol-Rom xil, rihusil sexien nae xil, e rae nar xil latamae ni ti tengan ravuri e ravousili.” <sup>22</sup>Moletin xil vus di lasuv xat xatel e di lasepin nggeih ba xat Pol xal Saelas e di lasak tengan lati xalu.

---

<sup>p</sup> **16:10** Luk xa tetis uvei ak temos e xatel e hal Troas. <sup>q</sup> **16:12** Rae xil te taon ak momal ni ngan xil tahal Rom tang. E moletin xil holu xa ladi en labe hortan xil tahal Rom.



Di, moletin te lepisien xil ladal papas eising na Pol xal Saelas be reling xalu e lasemae ni moletin te vaeen xil tangan va lavas pangas xalu ni liei. <sup>23</sup>Labas purun xalu bus, laleh xalu ba, laso xalu lube nim te xeih e labiteni mi moletin xa di miketeh xol nim ak tangan ivar xat kuh xalu. <sup>24</sup>Melele xa moletin ak milong sepinien nae, xi miso xalu lube namba sikis e bar xat le xalu del xat liei tei xa meas. Ludit mak tang.

<sup>25</sup>E hilaep te vongien, Pol xal Saelas di luis e di lukikei ni sisien xil ba ni Hi, e ngan tesav xil xa ladi sangas ni xalu di lateong ni xalu. <sup>26</sup>E melele xa di tamu lupol ni mak, latemanin e lul tei xa nggeih milil, e misak ni nim te xeih ak mulul pupu. Puitech xil vus lasaha e sen xil vus xa tevar xat xil lameluv reling moletin xil xa lateti e nim te xeih. <sup>27</sup>Lul ak misak ni moletin xa di milaxat nim te xeih mitemanin. E melele xa mitamea, pusi xa puitech xil vus milel. Xi minemi bit moletin xil vus xa lateti e nim te xeih latlesae ngamu, ma milih rat tiei te vaeen nan e bit vatil vin xi mun tang ni.<sup>r</sup> <sup>28</sup>E Pol mikei nggeih ba ni bitene, “!Onahasuk ti! Xamem vus madi tak.”

<sup>29</sup>Ma moletin ak mikei tangan lapo laet tova vamei. Di, miloh ba, miteingeiril pe met Pol xal Saelas, e len mulul pupu. <sup>30</sup>Melele xa miling kuh moletin sav xil e nim te xeih ak, midel Pol xalu lustal e misis xalu bitene, “?Suv xalu, nipol ni itep tangan Hi iteh meulien e nou?”

<sup>31</sup>Xalu lubit rilomun ni mini lubit, “Uneket e Suv Iesu ma xi iteh meulien e xouk, xouk itel ngan xil vus xa ladi tim sam.” <sup>32</sup>Di, xalu lusetu ni sepinien usil Suv Iesu mini e mi mosav xil mun xa ladi tim san. <sup>33</sup>E melele nen tak, e vongien, moletin xa di milaxat nim te xeih ak mileh xalu ba mikas moten von liei xa latehas xalu ni. Di, xi del nan xil vus mei laneket e Iesu, ma Pol derir ni xil e oei. <sup>34</sup>Di, mileh Pol xal Saelas latbe nesao e nim man, ba misa anien mi xalu. Xi del nan xil vus lamaal pupu vengan xa xil mei laneket e Hi.

<sup>35</sup>Melele xa ut milan, moletin xil te lepisien lasil polis nae xil del sepinien ak, “Ha mumae ni moletin xalu xai ha vexalu imase.”

<sup>36</sup>Ma moletin xa di milaxat nim te xeih biteni mi Pol bit, “Moletin xil te lepisien lamae ni xamil muliha ha vemil imase. Ma mulkila mulistal. Muliha itel xat tomat na Hi.”

<sup>37</sup>E Pol biteni mi polis xatel ak bitene, “Neta sav xa lattakamet ti naha xa xamel mapol ni misa, latmae ni xamel ba labas purun xamel pe met moletin xil. Di, laso xamel mabe nim te xeih. E xamel mabe hortan te kantri tahal Rom.<sup>s</sup> ?E taxeak labit lasil xuxus ni xamel maloha? !E-e, namak ti! Xil tang limei litel xamel e liling kuh xamel sung.”

---

<sup>r</sup> 16:27 Sexien na mol-Rom xil biteni bit xosxa moletin te vaeen tei mae ni moletin tei xa di laketeh xole ba ven mase, xi sung ihur longpangasien na moletin ak. <sup>s</sup> 16:37 E melele nen ak, rae na mol-Rom xil biteni bit neta sav xosxa eilep xil labas purun movotei xil, e mi hortan xil te kantri tahal Rom xil, lasakras. Hortan xil ak lihe pe met moletin te lepisien itiamu, ti, xi mikila isa pangasien teni mi xil.

<sup>38</sup>Ma polis xatel latdilomun be latobit sepinien xil ak mi moletin te lepisien xatel, e melele xa latlonge xa Pol xal Saelas lube hortan te kantri tahal Rom, uliatel mikan. <sup>39</sup>Ma xatel ba latobit esaen natel mi Pol xal Saelas. Di, latdel xalu lustal e nim te xeih e latsis xalu tangan lalhe reling taon nae. <sup>40</sup>Melele xa Pol xal Saelas lumea reling nim te xeih, luba lube nim ma Lidia. E rute ak, xalu lubitue del Kristin sav xil e lusel xat xil vatei mun. Di, lumea lube reling taon ak.<sup>t</sup>

### E Hal Tesolonaeka, Vat Xil na Siu Xil Lapol ni Moletin Xil Labae del Pol Xatel

**17** <sup>1</sup>Pol xal Saelas lukakao ba, lunggur sal ni taon tahal Ampipolis del Apolonia e mei lustal e Tesolonaeka. E rute ak, nim te pispisien tei na Siu xil da en. <sup>2</sup>Pol be nim te pispisien ak nggoni ngan taxa di pol vehakut ni. E Sabat tol, xi di misep kil sepinien xil xa de Vanuvei na Hi mi moletin xil. <sup>3</sup>Xi pisen ni memese mi xil xa Kristo xa Hi tehit xati tehit imei, xi ilong pangas xi, e ha imat. Ti, imeul rilomun ra maten. Pol biteni mak, “Tesu xa nasep usili mi xamim iaxa be Kristo reitin xa Hi tehit xati.” <sup>4</sup>Rute xil laneket en, ma lamos del Pol xal Saelas. Atou xil holu xa labe vat na atou xil lamos del xalu, xil del moletin xil holu mun tahal Kris xa lamot mi Hi.

<sup>5</sup>E melele xa rut Siu xil lapusi mak, lanem misa ni xalu. Ma laleh viton vatxeih tatei xil xa labe te suse tang tangan lamei labe vanute tei e lapol ni rumen xa eilep. E lasak ni xil lapol ni vaeen tei xa eilep e taon ak. Di, lalang ni Pol xal Saelas tangan laleh xalu lalomei pe met moletin xil. Labit ludi e nim ma Tiesen, ma ba langgulen puiteh te nim man. <sup>6</sup>E melele xa latakamet xalu ti, xil langgur Tiesen del rut Kristin xil mun e ladel kakao ni xil mei lasoh pe met vat xil te taon ak. Di, lakei nggeih labit, “!Moletin xil ak lasak ni vaeen tova tang e rute xil vus! E taxeak, xil lamei e taon nar. <sup>7</sup>E Tiesen xai di misoson xalu ludi nim man. Xil vus di langgur xoteh rae xil na suv toto nar tahal Rom vengan di labitene labitene suv toto tei mun da xa hisen Iesu.” <sup>8</sup>Melele xa vanut moletin xil del vat xil lalong sepinien xil ak, iexil mikat pupu ven. <sup>9</sup>Misak ni vat xil lapol ni Tiesen del ngan tesav xil lasa vatu tei xa eilep mi xil. Di, labitene mi xil labit, “Vatu xil ak be namim, e xosxa tua namim xalu lalipol ni neta tei mun xa isa, ma vatu ak ikesa e reling xamim.” Di, lamae ni xil laba.

### Moletin Xil tahal Beria Mei Laneket e Iesu

<sup>10</sup>Melele xa vongien bemei, Kristin xil te rute ak lasil Pol xal Saelas lube hal Beria. E melele xa ba lustal e rute ak, luka sal lube nim te

---

<sup>t</sup> **16:40** Rakila xa Pol miling Luk dat e rute ak vengan e sepinien xil xa itutou, Luk tamos ti mun e xil. Melele xa Pol isao rilomun ni Kristin xil e hal Pilipae e 20:5, Luk ihusili rilomun.

pispisien. <sup>11</sup>Lukameti xa moletin xil e rute ak iexil bei tangan lalong ti sepinien nalu mili ngan xil tahal Tesolonaeka. E melengien xil vus, laketeh be Vanuvei na Hi tangan lalepisi xa naha xa Pol biteni be reitin mu tave reitin ti. <sup>12</sup>Ma xil holu laneket e Iesu del eilep tatei xil tahal Kris del rut atou xil mun xa latellep tahal Kris. <sup>13</sup>E melele xa Siu xil xa ladi Tesolonaeka lalongeong ni xa Pol di misetu ni sepinien na Hi e Beria mun, xil lamei mun e rute ak. Mei labiles nenemien na moletin xil tahal Beria tangan iexil vat pangas xalu. <sup>14</sup>Vatakes, Kristin xil lasil Pol ba be bien tangan vahur tuturil tei. E Saelas xal Timoti ludit e Beria. <sup>15</sup>E ngan xil xa ladel Pol laba, ba labus tang e taon tahal Atens e lalingi e rute ak. Di, ladihumun labe Beria del xat sepinien nan xa ha lihiteni mi Saelas xal Timoti tangan laltemanon mei ihe xatel.

### Longeongen Hos Ba ni Moletin Xil tahal Atens

<sup>16</sup>Melele xa Pol di midatil rumali e Atens, xi milonge misa pupu vengon xa pusi xa nanao na hi sav xil labe holu tova tang e rute xil vus e taon ak. <sup>17</sup>Ma xi be nim te pispisien na Siu xil e di misep kil sepinien na Hi mi Siu xil del ngan xil xa latave Siu ti e laneket e Hi nae. E melengien xil ngasen mun, be von bovarangen e taon ak e di misepin del xat movotei xil xa lamei laba. <sup>18</sup>Rut moletin xil xa lamei e di langor dela labe tisa na vanut moletin lu, tei lakesi ni Epikiurias<sup>u</sup>, e tei xalu mun lakesi ni Stoik<sup>v</sup>. Xil lasis moletin xil usil pispisien na Pol labit, “!Ei! ?Unu xai bit ti vahit naha?”

Rut moletin sav xil labit rilomun ni mi xil labit, “Lehit ngan ak di misep usil hi sav tatei xil.” Xil di lasepin mak vengon xa Pol di misetu usil ‘Iesu’ e ‘Meul Rilomunen’. <sup>19</sup>Ma lasis Pol tangan vamei e von totanen tei te taon ak xa lakesi ni ‘Ariopakas’. Labiteni mini labit, “Mabit makil kuh ti pispisien hu eah nam iaxa di opispisi ni mi moletin xil. <sup>20</sup>Rut holesok xil xa xouk di obiteni be neta hu mi xamem e mabit makil ti koute teni.” <sup>21</sup>Xil labiteni mak vengon xa moletin xil vus tahal Atens e ngan xil xa ladi en xa latave hortan ti en, vehakut iexil bei xa ti latumul e ti lateong ni holesok hu xil xa di mistal.

<sup>22</sup>Ma Pol be xil, e ba misoh pe met Kaonsel te taon ak e biteni mi xil bitene, “Napusi xa xamim, mol-Atens xil, e sexien xil vus namim, di númerere ni hi namim xil. <sup>23</sup>Melele xa di nakakao e taon namim, di napus kila xa von moten xil namim labe holu. E nakamet hor tei sung xa

<sup>u</sup> 17:18 Vanut moletin xil ak langgusil pispisien na moletin tei, hisen Epikiurias (342-270 BC). Xi biteni bit hi xil lanem mele ni moletin xil te ut etan. Misak ni bos mak mu tangan moletin xil lipol ni holesok xil xa isak ni limaal tang. <sup>v</sup> 17:18 Vanut moletin xil ak langgusil pispisien na moletin tei, hisen Zeno (332-260 BC). Xi biteni bit hi tovuol. Misak ni bos mak mu tangan moletin xil lameul e tomat itel holesok xil te ut etan e lilaxat kuh sexien e nenemien nae xil tase.

latetis en labit, 'Hor na Hi xa Matakil ti.' E Hi xai xa di mumot mini xa mutakil ti, xi vari iaxa di nasep usili mi xamim taxeak. <sup>24</sup>Hi ak tepol ni ut etan e holesok xil vus xa di en, xi iaxa be Suv te ut nesao e ut etan. Xi tara ti e von moten xil xa moletin xil tang di lapol ni. <sup>25</sup>Xir rasakras ritutou ni ni neta tova, vengan xa xi vari tang iaxa be vatit meulien e di pol ni moletin xil e di misa holesok xil vus mi xil. <sup>26</sup>Ngggo moletin tei takes, xi pol ni hisit moletin sav xil e miling xil latasil ladi ut ngasen e ut etan. Moletin xil ngasen, xi miling xat rute xil xa xil liti en e di buli xat melengien xil nae xa liti en ihe nousav itep. <sup>27</sup>Xi pol ni xil tangan ti lilang vesi, lilang vesi vuma ... xos ti e xil likameti, vengan xa Hi tara ti sotin ra xir. <sup>28</sup>Ngggoni ngan taxa moletin tei biteni bitene,  
 'Ngggo xeihen nan kestang, xir di rameul, di rakakao e di rapol ni neta ngan.'

Ngggoni ngan taxa rut moletin te tisen xil namim latetisi latehit,  
 'Xir mun rabe horamue nan xil.'

<sup>29</sup>Reitin, Hi pol ni xir xa rabe horamue xil xati nan rameul radi. Ma vengan xa ngak ak, rinanemi ti rinahit xi nggoni nanao tei xa tameul ti, xa moletin tang pol ni nggo gol mu silva mu hat nggo metisouen nan. <sup>30</sup>Tetiamu, e melele xa moletin xil latnakil ti mu Hi, xi tenasa pangasien ti ve hisit tesaen xil vus nae. E taxeak, xi di misemae ni moletin xil vus e ut ngasen tangan lihiles ra tesaen xil nae. <sup>31</sup>Xil lihiles meulien nae vengan xa xi teling xat melengien te lepisien tei ngamu. Tehosei moletin tei xa ilepis moletin xil vus e sexien tei xa momal. !Moletin xa Hi tehosei iaxa tepol ni temeul rilomun ra maten tangan xir vus rikila!"

<sup>32</sup>Melele xa moletin xil lalong Pol misep usil moletin tei xa meul rilomun ra maten, rute xil lapol pepamen ni e rute xil labiteni labit, "Temem bei malong xoux usep usil netak vatei mun mi xamem." <sup>33</sup>Di, Pol be reling xil e von totanen ak. <sup>34</sup>Rut moletin xil lamos en e mei laneket e Iesu. Tei e xil tehe moletin tei te kaonsel te rute ak, hisen Daionaisas. Atou tei mun mineket en, hisen Damaris, del rut moletin sav xil mun.

### Pol Be Korin e Moletin Holu Mei Laneket

**18** <sup>1</sup>Dutou ni melengien xil xa Pol tete Athens, xi ba sung be Korin. <sup>2</sup>E inggak, Pol ba pus Siu tei, hisen Akuila xa be ngan Pontas. Xi temei rohon tang e Korin tetel atou nan xa hisen Prisila. Xalu lutexo Itali lutemei e Korin melele xa Suv Toto Klodias tesa rae tei tehit Siu xil vus lihe reling Rom e liha mun e von ne. Pol ba misao ni xalu. <sup>3</sup>E vengan xa xalu di lupol ni nim tavolin xil nggoni ngan taxa xi mun tesukul ven, xi de visal xalu e nim nalu e latepol vituei. <sup>4</sup>E Sabat xil vus, Pol be nim te pispisien e di misepin del Siu xil e del ngan xil xa latave Siu ti tangan liling neketen nae vate e Iesu.

<sup>5</sup>E melele xa Saelas xal Timoti lunggo Masedonia lumei, Pol miling polien nan te nim tavolin e misa xi ve polien te setuen kestang. Xi di misep kila mi Siu xil e nim te pispisien nae xa Iesu be ngan xa Hi tehit xati tehit imei iteh meulien e moletin xil. <sup>6</sup>E xil lasin sepinien nan e di lasep sisili. Ma xi mirang meas ra eising nan ba xat xil e biteni mi xil bitene, “!Pangasien xa imei xat xamim ihe namim tang. Inou, navan tovuol en! !Taxeak, niha ti nisetu sung mi ngan xil xa latave Siu ti!” <sup>7</sup>Di, Pol miling Siu xil, ba de nim ma moletin tei xa tave Siu ti e di mot mi Hi, hisen Titias Sastas. Nim man dat sangas ni nim te pispisien na Siu xil. <sup>8</sup>Vat te nim te pispisien ak, hisen Krispas. Xi, del ngan xil vus xa ladi tim san, lateling neketen nae e Suv Iesu. E moletin sav holu mun xa ladi e Korin, melele xa lataeong ni sepinien na Pol, xil mun laneket, ma lamae ni Pol derir ni xil e oei.

<sup>9</sup>E vongien tei, Suv misepin mi Pol nggo metuveen tei bitene, “!Tit usetu tang e ulum nakan ti! !Onatat votei ti! <sup>10</sup>Vengan xa inou, nadat visaluk e di nadutou ni xouk. Ninasak ni ti neta naxui xouk vengan xa moletin xil holu xa lade taon ak labe navan.” <sup>11</sup>Misak ni Pol tete Korin haram tei e rute, di tepispisi mi moletin xil usil sepinien na Hi.

<sup>12</sup>Melele xa Pol teta tamu e Korin, kavmen tahal Rom teling xoles vat te provins tahal Akeia. Vat hu xa nggur von nen, hisen Kalio. Melele xa Siu xil lapusi mak, xil vus mei laba ladal xat Pol, e langguri be kot pe met Kalio. <sup>13</sup>Xil labiteni mini labitene, “!Moletin ak di misak pisi vapol ni moletin namem xil ti lamot mi Hi e sexien tei xa nggur xoteh rae namem xil!”

<sup>14</sup>Pol tasepin ti mu, e Kalio misepin mi xil bitene, “Xamim, Siu xil, xosxa xamim mubit moletin ak pol ni neta tei xa misa ba xat rae xil na mol-Rom mu ve neta sav tei xa eilep, ma momal tang tangan inou niteong ni xamim. <sup>15</sup>E vengan xa di mungor usil rut sepinien xil, usil his moletin xil, e usil rae xil namim tang, ma xamim tang mumal ni. Inou ieok ti tavei tangan nilepis sexien xil ak.” <sup>16</sup>Ma misil rerat xil ra kot nan. <sup>17</sup>Di, vanut moletin xil xa ladi, langgur xat Sostenis xa be vat te nim te pispisien na Siu xil e labasi e von kot vari. Kalio pusi, e bit nakil ti.

### Pol Dilomun Be Antiok

<sup>18</sup>Pol di mi Kristin xil e taon tahal Korin melengien holu mu. Di, bit vatilomun vahe Siria. Misak ni misep ling xil e ba be Senkaria tangan latohur tuturil en, e Prisila xal Akuila lube xatel latoba. Melele xa latduxoh Senkaria, Pol kot hilin be vatumas vengan xa xi pol vuol ni hitxatien tei xa tepol ni tetel Hi.<sup>w</sup> Di, latnggur tuturil tei latoba latobe provins tahal Siria. <sup>19</sup>Lamei laduxoh

---

<sup>w</sup> 18:18 E sexien na Siu xil, melele xa moletin tei pol vuol ni hitxatien tei xa pol ni tetel Hi, di mikot hilin mei be vatumas.

Episis, e latobe nim te pispisien e Pol di mitumul del Siu xil en. Di, Pol bit iling Prisila xal Akuila inggak. <sup>20</sup>Siu xil lasisi tangan vata vatel xil melengien vahis mun e xi tamaen ni ti. <sup>21</sup>E melele xa miling xil, xi biteni bit, “Xosxa Hi imae ni, ma nitilomun nimei visal xamim.” Di, miling Episis nggo tuturil ba.

<sup>22</sup>Tuturil ba be Sesarea e miling Pol da en. Di, mikakao be Serusalem e ba misao ni ngan xil te sias inggak. Pol da vuteili tang en, di, ba be Antiok.<sup>x</sup> <sup>23</sup>Pol de inggak melengien vahis, di, miling Antiok ba tangan vasao ni vanut Kristin xil e provins tahal Kalesia e provins tahal Prikia. E rute xil vus, di dutou ni ngan xil ak tangan neketen nae e Iesu ixeh mu.

### Apolos Mei Be Moletin Te Pispisien e Sias tahal Episis

<sup>24</sup>E melele nen ak, Siu tei tahal Aleksandria temei e Episis, hisen Apolos. Xi be moletin tei xa di misepin kuhi mak e mikil kuh sepinien xil xa di e Vanuvei na Hi. <sup>25</sup>Xi di pispisi mi moletin xil del eimaen. E pispisien nan xil momal usil longeongen hos usil Suv Iesu, e mikil kes ni teriren tang xa Sion di tepol ni ni oei. <sup>26</sup>E melele xa Apolos di misepin del xeihen e nim te pispisien na Siu xil, Prisila xal Akuila lulonge. Misak ni luba lungguri latbe tim, e lusep kil longeongen hos mini tangan vakil kuhi. <sup>27</sup>Di, Apolos pol ni nenemien nan tangan ihe Akeia, ma Kristin xil xa ladi Episis ladutou ni e ladis uvei tei ba ni Kristin sav xil xa ladi Akeia tangan xa lihur pilei melele xa ha istal. E melele xa ba mistal visal xil, xi dutou ni ngan xil xa mei laneket nggo eheien hos na Hi. <sup>28</sup>Melele xa Siu xil te rute ak mei di lasep tetavoe mi Kristin xil pe met moletin xil, Apolos pisen kila nggo Vanuvei na Hi xa Iesu be Kristo xa Hi tehosei.

### Moletin Xil tahal Episis Mei Lapolu ni Ninin Eo

**19** <sup>1</sup>Melele xa Apolos di tamu e Korin, Pol mikakao nggo vathu xil te provins tahal Kalesia e mei mistal e Episis. E inggak, xi mikamet rut Kristin xil. <sup>2</sup>Ma misis xil bitene, “?Melele xa mei muneket e Hi, Ninin Eo temei e xamim?”

E xil labit rilomun ni mini labit, “E-e. Xamem matakil ti mu xa Ninin Eo be naha.”

<sup>3</sup>Ma Pol misis xil mun bitene, “?Ma xamim munggur hisit teriren eah?”

E xil labitene mini labit, “Manggur hisit teriren xa nggoni ngan taxa Sion di tepol ni.”

<sup>4</sup>Ma Pol biteni mi xil bit, “Teriren xa Sion tepol ni tehe na moletin xil tangan lihiles ra tesaen nae xil. E xi tehiteni mi Siu xil tangan lineket e ngan xa imei itutou ni, ngan ak be Iesu.”

<sup>5</sup>Melele xa lalong sepinien ak, lamae ni Pol xatel latobaptaes ni xil e oei e his Suv Iesu. <sup>6</sup>Di, Pol miling hen e xil, e Ninin Eo mei polu e xil,

<sup>x</sup> 18:22 Antiok be 480 kilomita ra hal Serusalem.

ma di lasepin ni sepinien sav xil e di lake mese ni sepinien eo xil na Hi. 7Moletin xil ak labe lu e le (12).

<sup>8</sup>Aveti tol (3) iaxa Pol dit tehe nim te pispisien na Siu xil e di tesep tetavoe tetel moletin xil e tesep kila mi xil suse xa Hi mei ihe suv toto e meulien nae. Xi tesepin mi xil, e ulin tenakan ti. <sup>9</sup>E rut ngan xil, vatie nggeih ma lataneket ti e sepinien na Pol. E pe met moletin xil, moletin xil ak di laso sepinien xil xa misa ba ni Kristin xil xa langgusil xat ‘Suse na Suv Iesu’. Misak ni Pol miling xil e midel ngan xil xa laneket langgusili. E melengien xil vus, be von vitueien na moletin tei, hisen Tiranas, e di misep tetavoe del moletin xil usil suse xa Hi mei ihe suv toto e meulien nae. <sup>10</sup>Huram lu (2), Pol di tepol ni temak, ma moletin xil vus xa ladi e provins tahal Esia latelong sepinien usil Suv Iesu, Siu xil e ngan tesav xil mun xa latave Siu ti.

### **Horam Maxoe Xil na Skeva Lasak Tengan Lapol ni Merekel Tova e His Iesu**

<sup>11</sup>E melele nen ak, Hi di tepol ni hisit merekela sav xil tehe holu latestal latexo Pol. <sup>12</sup>Mak iaxa, moletin xil di laleh kaliko te vetin nan tetel eising te polien nan xil tang, ba di latesa ni mi ngan xil xa latemesei. Melele xa xil laduxoli, meseien nae xil tevus reling xil e temat xil mun latlesae reling xil. <sup>13</sup>E melele nen ak, vanut moletin xil xa labe Siu di latekapis tengen lavol rerat temat xil ra moletin xil. Xil mun labit lipol ni itel his Suv Iesu. Ma melele xa di lapol, xil kekes di biteni mi temat xil mak, “!Nasemae ni xouk e his Iesu xa Pol di misetu usili tengen uhe reling moletin ak!”

<sup>14</sup>E rute ak, Vatixar tei na pris xil teta, hisen Skeva, e horamue nan xil labe lu e he sav (7). Xil latehe vanut moletin tei xa di latepol ni temak. <sup>15</sup>Ma vatei, melele xa di lasak pisi tengen lapol ni vamak, ninin tesa tei biteni mi xil bitene, “Iesu nakila, e Pol mun nakila. ?E xamim, mube visi?”

<sup>16</sup>Di, moletin xa temat di en but xat xatel e bas purun xatel misa. Dal papas eising nae reling xil e mikal kukul xil. Horam maxoe xil ak langgul ni re e lastal laloh hon tang reling tim san. <sup>17</sup>Melele xa Siu xil del ngan xil xa latave Siu ti lalongeong ni, xil uli xil mikan pupu. E moletin xil vus tahal Episis lapet rat his Iesu e lamerere ni. <sup>18</sup>Moletin xil hao mei laneket, e pe met moletin xil, labit rerat tesaen xil nae. <sup>19</sup>Xil hao xa di latepol ni eimas, laleh viton vanuvei nae xil xa sepinien te eimas di en, e mei ladin ni pe met moletin xil. E melele xa labit lakil kuh ti vatu nen, lakameti xa vatu nen duxoh milian be hanutap lu e hexalu mun (50,000,000). <sup>20</sup>Mak, ma Hi pisen xeihen nan e longeongen usil Iesu Kristo mei mikapis e ut ngasen, e moletin hao mu laneket en.

### **Vaen Tei Mistal e Episis**

<sup>21</sup>Dutou ni ngan xa holesok xil ak testal, Pol pol ni nenemien nan tengen ikakao ha ixo provins tahal Masedonia e tahal Akeia, ti, ihe Serusalem.

Xi minemi bit, “Melele xa nihe Serusalem ivus, niha sung e Rom.” <sup>22</sup>Ma xi misil moletin lu xa di ludutou ni tangan laltiamu ni lalhe Masedonia, hisealu Timoti e Urastras. E xi da luvoluv tamu e provins tahal Asia.

<sup>23</sup>E melele xa Pol da tamu e Asia, iaxa vaeen tei xa eilep mistal e hal Episis ve Kristin xil xa di langgusil xat ‘Suse na Suv Iesu’. <sup>24</sup>E rute ak, moletin tei da en xa di pol ni nanao xil ni silva xa nggur nini nim te moten na hi tei xa lakesi ni hi Artemis. Moletin ak, hisen Demitrias. Xi, del moletin nan xil mun, di langgur vatu xa eilep nggo en. <sup>25</sup>Ma mikes viton moletin nan xil vus del rute sav xil mun xa polien nae pipin tang. Di, xi biteni mi xil bitene, “Tiramue xil, mukila xa xir rapus hosien nar nggo e polien ak. <sup>26</sup>Xamim di mupusi e di mulongeong ni naha xa moletin ak di pol ni. Pol ak di biteni xa hi xil xa moletin xil tang di lapol ni, xil latave reitin ti. Xi pol ni moletin xil hao e Episis, e provins tahal Asia mun, mei lake reitin e nenemien ak e lastokovein moten nae ba mi Hi Artemis. <sup>27</sup>!Ngan ak misa pupu mi xir! Sepinien nan ipurun meulien te polien nar. E tave ti ngan ak kestang, sexien ak isak ni mun xa moletin xil linamerere ni ti mun nim te moten na Hi Artemis, hi nar xa be eilep pupu. Hi nar, moletin xil vus di lamerere ni, e provins tahal Asia del ut xil ngasen e ut etan. !E sepinien na moletin ak ipol ni his Hi Artemis mei ihe neta sav tang! !Ngan ak misa tova tang!”

<sup>28</sup>Melele xa vanut moletin xil ak lalong sepinien xil ak, iexil mikat pupu. Ma latamea di lakekei ni nggeih labit, “!Artemis be hi na mol-Episis! !Rapet rat hisen!” <sup>29</sup>Rumen te ekaten mikapis e taon ak, e moletin xil ngasen mei lamos e vanut moletin xil ak. Di, xil ladal xat moletin lu te provins tahal Masedonia xa di lunggusil Pol lumei, hisealu Keas e Aristakas. Ladal kakao ni xalu mei ba laling xalu ludi e von vitueien nae xa eilep. <sup>30</sup>Pol ien bei vahe pe met moletin xil ak ha vasepin mi xil, e Kristin xil te rute ak latamae ni ti vaha. <sup>31</sup>Rut vat xil mun te provins ak, xa labe timue nan lasa sepinien ba da xole tangan nasak pisi ti nave von vitueien ak. <sup>32</sup>E rute ak, moletin xil di lapol ni rumen xa mahulong. Rut ngan xil di lameun ni neta tei. E ngan tesav xil di lameun ni neta sav mun. E moletin holu latakil ti veneh ma lamei vituei inggak. <sup>33</sup>Di, rut Siu xil ladivin vat tei nae mei misoh pe met moletin xil tangan mei isep motin rin na Siu xil, hisen Aleksanda. E melele xa moletin xil lapusi, lanemi labit xos xi iaxa be vat te vaeen ak. Di, Aleksanda misa hen be nesao tangan lati votei. <sup>34</sup>E melele xa lapus kila xa xi be Siu tei<sup>y</sup>, xil vus lakekei ni nggeih labit, “!Artemis be hi na mol-Episis! !Rapet rat hisen!” Xil langgulehi lameun mak ba vuma ... duxoh haoa lu (2).

<sup>35</sup>Ba vuma, klak te taon ak mei misak ni moletin xil ladi votei. Di, biteni mi xil bitene, “!Moletin xil tahal Episis! Moletin xil vus lakila xa

<sup>y</sup> 19:34 Moletin xil lanemi labit Kristin xil e Siu xil latasav ti, labe hisit moletin tei takes.



taon nar iaxa di miketeh xol nim te moten na hi Artemis. E xir di raketeh xol hat eo teni xa temot texo ut nesao teme i etan. <sup>36</sup>Moletin tovuol vakila vahit netak be luvosen. Ma xamem muta merou tang, e munapol ni ti sexien xil xa mitallang. <sup>37</sup>Xamim mudel moletin xalu ak lumei inggak. E xalu lutenakan ni ti neta e nim te moten na hi nar, mu lutenaso ti sepinien xil xa misa vaha ni. <sup>38</sup>Xosxa Demitrias del moletin te polien nan xil iexil bei tangan laso sepinien tova xa misa vaha ni moletin tei, xil likila lipol ni sung mi moletin xati te lepisien e melengien xati teni. Ti, litotan, e moletin ak ilepis ngongoren nae sung. <sup>39</sup>E xosxa iemim bei neta ti mun, ma mutatil melengien xati te totanen nar xa ti imei, e moletin xil te kaonsel te taon ak iaxa imal ni sung. <sup>40</sup>Naha xa rapol ni xosali ak tamal ti! E vat xil te taon nar likila lileh xir ngasen rihe von koten. E xosxa xil lipol ni imak, ma xir rasakras ravit mese ni mi xil ravit rapol ni rumen xa eilep xiak veneh.” <sup>41</sup>Melele xa misepin bus, xi misil rerat moletin xil ra von vitueien ak.

#### Pol Misao ni Kristin Xil e Provins Xalu tahal Masedonia e Akeia

**20** <sup>1</sup>Dutou ni xa rumen te ekaten ak be tan, Pol mikes viton Kristin xil tahal Episis e misel xat xil. Di, misep ling xil e ba be provins tahal Masedonia. <sup>2</sup>Di, e rute xil vus xa di tekapis en, xi di misao ni Kristin xil e di misa sepinien te selxatien ba vatutou ni xil. Di, miling xil ba be provins tahal Akeia. <sup>3</sup>Di, tekapis taon xil e provins ak tehe aveti tol (3). E melele xa di bue xat xi tangan ihe reling rute ak ha ihe provins tahal Siria, maxa ni e milonge xa rut Siu xil tahal Siria di lapol ni lingxatien tei tangan lihas vini e suse nan. Misak ni xi biles nenemien nan tangan itilomun ihusil suse sav ha ixo Masedonia. <sup>4</sup>Pol mikakao del moletin xil ak: Sopata xa be nat Piras tahal Beria; Aristakas xal Sekandas tahal Tesolonaeka; Ngegas tahal Derbi; Titikas e Tropimas xa lube tahal Esia; e Timoti mun xa be ngan Listra tei. <sup>5</sup>Melele xa laduxoh Pilipae, rut moletin xil ak langgo tuturil tei, ladiamu labe taon tahal Troas tangan litatil Pol en. <sup>6</sup>E Pol de Pilipae duxoh melele xa Anien te Beret xa Is Tovuol En bus. Inou Luk tehe xamel del rut Kristin xil mun. Di, manggo tuturil e Pilipae e maloh melengien lim, di, ba maduxoh Troas. E inggak, mabituei del ngan xil xa latetiamu, e madi duxoh wik tei.

<sup>7</sup>E melele xa di mabue xat xamem tangan maling rute ak, mamei vituei e Sarere vongien tangan mavur anien eo na Suv. Di, Pol misetu mi moletin xil e dit misepin ba vuma ... duxoh hilaep te vongien. Pol pol ni mak vengan xa mikila xa makoe tang ihe reling xil. <sup>8</sup>E nim xa madotan en, madi e von toen xa de nesao xa be tol nen, e laet holu di lapili en. <sup>9</sup>E melele nen ak, horam maxoe tei di dotan de windo, hisen Iutikas. E melele xa Pol di tamu misepin, horam maxoe ak miteong ni ba vuma ... meten minoh xa minoh, ma pat. Latemanin e mot nggo windo nesao

mei mirum e tan. E melele xa ba lapusi, e xi mat ngamu. <sup>10</sup>E Pol be tan ba por xati e di misa hen xole. Di, biteni mi xil bitene. “!Munanexo ti, xi tamat ti, meul tang da!” <sup>11</sup>Di, Pol del moletin sav xil ladilomun labe von toen xa de nesao, e langganien. Di, Pol misepin rilomun mi xil ba vuma ... ut milan. Bus, Pol miling xil ba. <sup>12</sup>E horam maxoe ak, ladela labe tim san, e lamaal himetu vengan xa xi meul tang da.

### Pol Be Malaetas e Misep Ling Elda Xil tahal Episis

<sup>13</sup>Ma xamem mabit mava. E Pol diamu ni xamem mikakao nggusil suse xa tamure tang e bit itatil xamem e Asos.<sup>z</sup> E xamem mabe bien tangan muxo tuturil muhusil suse xa teviei muhe Asos, e muhur Pol ihe xamem e rute ak. <sup>14</sup>E melele xa maduxoh Asos, mapusi xa Pol di datil xamem ngamu en. Ma mangguri bemei e tuturil e maloh mabe Mitilen. <sup>15</sup>Di, mamea inggak maloh maba, be ut milan, e maduxoh Kios. Di, maloh vongien, e makoe nen, be maduxoh Samos. E visuvong nen, matle sal ba maduxoh Malaetas sung, <sup>16</sup>vengan xa Pol tepol ni nenemien nan tehit matavi e Episis vengan xa ien ti tavei vahas melengien vahe holu e provins tahal Asia. Mipol ni mak vengan xa bit vasak pisi vatuxoh Serusalem mu, vati vahe melengien te Pentekos sung.<sup>a</sup>

<sup>17</sup>Melele xa Pol da tamu e Malaetas, xi misa sepinien nan ba mi elda xil te sias tahal Episis bit limei lipusi. <sup>18</sup>E melele xa lastal, xi dotan del xil e misepin mi xil bitene, “Xami mukil sexien xil navan melele xa natemei nateti mi xamim e provins tahal Asia, e melengien kokot teni tetuxoh melengien xa nateling xamim nateha. <sup>19</sup>E melele nen ak, di natepol ni polien na Suv tetel nenemien xa be tan e simetok teleh ve xamim. Natepol ni temak, tave ti neta xa melengien holu natekameti te xeih ve lingxatien xil xa rut Siu xil latepol ni teta xat nou. <sup>20</sup>Mukila xa natesa sen holesok xil xa ti vatutou ni meulien namim texo setuen e pispisien navan xil xa natepol ni pe met moletin xil e e tim kekes sami xil. Natnasoson ti neta vari mi xamim. <sup>21</sup>Natesa sepinien te selxatien te xeih mi xamim vus; mi xamim xa mube Siu, e mi xamim xa mutave Siu ti tangan muhiles ra tesaen xil namim e mumei visal Hi. E natesel xat xamim mun tangan muling neketen namim ixeh e Suv Iesu.

<sup>22</sup>“E taxeak, Ninin Eo di del nou tangan name Serusalem. E natakil ti naha tova xa ixui nou en. <sup>23</sup>E rute xil vus xa di natesao en, Ninin Eo tepisen ni minou xa nave nousav ti, nihe nim te xeih e ti nilong pangas nou. <sup>24</sup>Tave ti neta xa mak, nanem mele ni meulien navan tang. Ieok bei taxa nipol vuol ni polien xa Suv Iesu tesa ni minou tangan ti nihithit

<sup>z</sup> 20:13 Taon tahal Asos be 32 kilomita nggo ut ra hal Troas, e 80 kilomita nggo tas.

<sup>a</sup> 20:16 Pentekos be melengien hanutap lu e hexalu mun (50) dutou ni Anien te Tavien. Melengien ak iaxa Ninin Eo mei polu e moletin xil xa laneket kokot (Polien 2:1-4).

longeongen hos usil eheien hos na Hi. Ieok bei tang tangan xa ti nihusil lohen xa Suv teling nou en ituxoh hoxalite teni.

<sup>25</sup>“Melele xa nateti tamu visal xamim, natekapis ut namim xil ngasen e di natesetu mi xamim vus usil suse xa Hi imei ihe suv toto e meulien na moletin xil. E taxeak, nakila xa xamim vus musakras mupus rilomun ni nou. <sup>26</sup>Mak, ma e xosali ak, ieok bei nabit mese ni mi xamim xa xosxa tei e xamim ikesae e taling ti mu neketen nan e Iesu, inou navan tovuol en. <sup>27</sup>Vengan xa inou natnasoson ti neta mi xamim. E-e, natesep vuol ni holesok xil xa Hi ien bei vapol ni e meulien na moletin xil. <sup>28</sup>Mak, ma muxuxou kuhi ve xamim e ve moletin xil na Hi xa Ninin Eo miling xil ladi e hemim. Ma mulaxat kuh xil vengan xa ngan xil ak labe Sias na Hi xa texal rati ni re natnali xati. <sup>29</sup>Nakila xa itutou ni ngan xa niha, ngan xil limei listal e lisak purun xamim ixoni kuli reran xil lapol ni mi sulut sipsip xil. <sup>30</sup>E ngan xil mun listal lixo vanut xamim mun tang, mei lihiles reitinen na Hi e lisep luvos Kristin sav xil tangan ha lihusil pispisien xil nae. <sup>31</sup>!Mak, ma muxuxou kuhi ve xamim! E munem usil haram tol (3) xa nateti mi xamim, e di natesel xat xamim e melengien e vongien tetel simetok xa di teleh.

<sup>32</sup>“Ma xosali, naling xamim pe he Hi. Sepinien usil eheien hos nan isak ni neketen namim ixeih. E nggo sepinien xil nan, Hi di bit xati xa isa tuxolxatien mi xamim e mi ngan xil vus xa tepol ni xil labe moletin eo nan. <sup>33</sup>Melele xa nateti mi xamim, natnasis ti moletin tangan vasa vatu mu eising minou. <sup>34</sup>Xami mukil kuhi mak xa inou di natepol tetel heok xalu tangan di matekamet holesok xil xa inou tetel moletin navan xil di iemem tehei. <sup>35</sup>Texo sexien xil navan xa natepol ni e pe metemim, natepisen ni xa melele xa rapol nggeih, ma rakila ti ritutou ni ngan xil xa lamerou. Ixoni sepinien xa Suv Iesu vari tang tesepin ni tehiti, ‘Sien xa iti mi ngan xa di misa tutouen mi mosav ili sien xa iti mi ngan xa di nggur tutouen nggo mosav tang.’ ”

<sup>36</sup>Melele xa Pol misepin bus, mitingeiril be tan del xil e misis. <sup>37</sup>Xil vus lamuis e lasa he ngga xole. Di, lapesum e vin e labiteni mini labit, “Oba li.” <sup>38</sup>Lalonge misa himetu vengan xa Pol tehiteni mi xil xa xil linapus ti mun. Ma langgusili laba, lalingi be tuturil.

### Pol Be Serusalem

**21** <sup>1</sup>Melele xa masep ling xil bus, mabe tuturil ak maba. Manggur xoteh tas, e mei maduxoh aelan tahal Kos. Di, makoe nen, mei maduxoh aelan tahal Rods. Bus, manggo inggak, mei mabe taon tahal Patara. <sup>2</sup>E inggak mapus tuturil tei xa di labue xati tangan vahe Vonesia, ma mabut en maba. <sup>3</sup>Ma maloh mei matavi e aelan tahal Saepras e rin xa be saot, di, ba maduxoh taon tahal Taer xa de provins tahal Siria. E inggak, tuturil miso rat holesok xil xa teti e vangite. <sup>4</sup>E rute ak, makamet

rut Kristin xil, ma madi visal xil wik tei. E melele xa madi tamu visal xil, xeihen te Ninin Eo bemei e xil, ma lasep xol Pol tangan nava ti e Serusalem. <sup>5</sup>E melele xa melengien pipin tangan maling xil mava, Kristin xil vus te taon ak, tiramue xil, atou nae xil e horamue nae xil mun, be xamem maling taon ak tangan va laling xamem e bien. Di, mabe tan inggak, matingeiril e masis. <sup>6</sup>Di, lasep ling xamem. Bus, xamem mabe tuturil, e xil ladilomun labe tim sae.

<sup>7</sup>E suse xa manggo en, tuturil miling Taer be Patolemas. E inggak, masao ni Kristin xil del memaalen e madi visal xil duxoh makoe. <sup>8</sup>E makoe nen, maling Patolemas e maloh maba maduxoh Sesaria. E inggak, madi e tim sa Evanselis Pilip. Xi be tei e dikon kokot xil xa labe lu e he sav (7).<sup>b</sup> <sup>9</sup>Natnahin xil labe hat (4) e latatali ti mu. Xil labe provet xil e dit lake mese ni sepinien xil xa Hi di misa ni mi xil.

<sup>10</sup>Madi inggak melengien vahis, e provet tei, hisen Akabas,<sup>c</sup> nggo Sudea mei mistal. <sup>11</sup>Xi bemei visal xamem, nggur rat atuatu na Pol e bar xat len e hen xalu ni. Di, mike mese ni mi xamem bitene, “Ninin Eo iaxa misepin ni mak bitene, ‘Moletin xa atuatu nan xiak, Siu xil livar xati imak melele xa ha ituxoh Serusalem. Ti, lisa rati ihe he ngan xil xa latave Siu ti.’”

<sup>12</sup>Melele xa malonge mak, xamem del moletin sav tatei xil mun xa ladi inggak madak kes Pol tangan nava ti mu e Serusalem. <sup>13</sup>Ma xi bit rilomun ni mi xamem bitene, “?Veneh ma di mumuis? Maxa ni di musak ni nou mun, tinok muis. Inou, nabue xat nou tuei tangan livar xat nou mu lihas nou mun nimat e Serusalem ve neketen navan e Suv Iesu.”

<sup>14</sup>Melele xa mapusi xa masakras maviles nenemien nan, ma malingi nga tang, e mabiteni mini mabitene, “Suv ipol ni mi xoux ixoni ngan xa xi ien bei.”

<sup>15</sup>Melengien vahis mitavi, di, mabue xat xamem tangan muling Sesaria e muhe Serusalem. <sup>16</sup>Rut Kristin xil tahal Sesaria lamei labituei del xamem e ladel xamem maba mabe tim sa moletin xa mupat itela, hisen Neson tahal Saepras. Xi be tei e moletin xil xa lateneket kokot e Iesu.

### Pol Ba Pus Kristin Xil e Serusalem

<sup>17</sup>Melele xa ba mastal e Serusalem, Kristin xil langgur pilei xamem del memaalen. <sup>18</sup>E makoe nen, Pol be xamem maba tangan ha mapus Temis e elda sav xil mun te sias. <sup>19</sup>Di, Pol bit bos makoe mi xil e misep usili mi xil holesok xil ngasen xa Hi di tepol ni mi ngan xil xa latave Siu ti texo polien xil nan.

<sup>20</sup>Melele xa Temis del elda sav xil lalong sepinien xil na Pol, xil vus lames Hi ven. Di, labiteni mini labitene, “Tua Pol. ?Opusi? Siu xil hao xa

<sup>b</sup> 21:8 Pol 6:1-7    <sup>c</sup> 21:10 Pol 11:28

hao latemei lateneket ngamu e Suv Iesu. E xil vus nenemien nae nggeih tova tang tangan lihusil xat Rae xil na Mosis. <sup>21</sup>Xil di latelongeong ni xa di opisipisi mi Siu xil xa ladi tan xil na moletin xil xa latave Siu ti tangan ti linahusil ti mun Rae xil na Mosis. Latelongeong ni mun xa di otehiteni mi xil tangan linapol ni horamue nae xil ti linave vexaho, e linahusil xat ti mun sexien matu xil na Siu xil. <sup>22</sup>Navehi ti, xil lilongeong ni xa xouk otestal ngamu inggak. ?Mak, ma ripol ni itep? <sup>23</sup>Xamem iemem bei xa upol ni imak: moletin hat inggak latepol ni hitxatien tei tetel Hi. <sup>24</sup>Ha uhe xamim muhe Nim Eo na Hi e muhusil xat sexien xil te serep moletin en. Ti, uxa! vongoro xil namim xa ha musa ni mi pris xil.<sup>d</sup> Melele xa mupol vuol ni, ma mukila mukot hilimim mei muhe vatumas. Imak, ma moletin xil vus lipus kila xa longeongen tesa xa di lalongeong ni usuluk, tave reitin ti. Xil lipus kila sung xa xouk di olong xat Rae xil na Mosis e di tamu omerere ni xil. <sup>25</sup>E usil ngan xil xa latave Siu ti xa lamei labe Kristin, xamem matesa uvei tei tuei tehat mi xil. E uvei ak, matesis xil tangan linaxa ti anien xa latesa ni teha mi nanao xil, e linaxa ti mun anien xa ra di xati, mu linaxa ti vongoro xa latesar xoteh hurraen tang. E matesis xil mun tangan linapol ni ti sexien tesa xil ti natel atou mu tiramue na mosav.”

<sup>26</sup>Pol mae ni, ma makoe nen, mileh tiramue xil ak laba tangan lava lapol kokot ni sexien xil te serep moletin en. Di, Pol ba be vloh te Nim Eo na Hi e misep mese ni mi pris xil xa lapol kokot ni sexien te serep moletin en ngamu. Di, miling xat melengien mun vari xa xil litomun mei lisa sanien eo nae kekes en.

### Ladal Xat Pol e Nim Eo na Hi

<sup>27</sup>E melele xa melengien lu e he sav (7) sangas mei vatavi tangan Pol vatel moletin xatel mun ha latopol vuol ni sexien xil te serep moletin xil en, rut Siu ngan xil xa latexo provins tahal Esia lamei. Melele xa xil lamei e vloh te Nim Eo, xil lapus kil Pol, ma lasi petine vanut moletin xil tangan liha lital xati. <sup>28</sup>Melele xa ladal xati, lakei nggeih ba ni moletin xil labitene, “!Tua namem xil! !Mumei! Mututou ni xamem. Moletin ak vari iaxa di mikapis e rute xil vus e di misa pispisien xil xa misa ba xat xir tahal Isrel, ba xat Rae xil xa Mosis tesa ni mi xir, e ba xat Nim Eo nar. E taxeak, xi di mileh moletin xil xa latave Siu ti lamei e Nim Eo ak vari, e di misak ni rute ak tave ut eo ti mun pe met Hi.” <sup>29</sup>Lasepin ni mak vengan xa melele xa latepus Pol e taon, xi tehe xal moletin tei tahal Epixis xa tave Siu ti xa hisen Tropimas. E xil latenemi latehit Pol iaxa tehuri lutemei e vloh te Nim Eo ak.

---

<sup>d</sup> 21:24 Melele xa Siu xil lapol ni sexien xil te serep moletin en, xil lisa sanien eo te memesien iha mi Hi xa mak: mae lu del sipsip tei ve moletin xil kekes. Di, lakila lakot hilixil mei lave vatumas tangan lapiisen ni xa meulien nae memese pe met Hi.

<sup>30</sup>Ngan ak misak ni rumen te ekaten miloh mikapis bivil taon ak, e moletin xil laloh lamei vituei. Ladal xat Pol, e ladel kakao ni mistal ra vloh te Nim Eo ak. E vatakes, lakoe xol puiteh xil teni. <sup>31</sup>Melele xa moletin xil ak di lasak tangan lavas vin Pol, vatixar tei na moletin xil te vaeen milongcong ni xa vaeen tei xa mahulong mistal e Serusalem. <sup>32</sup>Ma vatakes, vatixar ak mileh viton vat sav xil del moletin te vaeen xil nae,<sup>e</sup> e latemanon mei labe visal vanut moletin xil ak. E melele xa xil lapus ngan xil te vaeen, lastokovein Pol e latavasi ti mun.

<sup>33</sup>Vatixar na moletin xil te vaeen mikakao be visal Pol, dal xati, e misemae ni tangan moletin nan xil livar xati ni sen lu. Di, misis pilei vanut moletin xil bitene, “?Moletin ak be visi? ?Xi pol ni naha?” <sup>34</sup>Rut moletin xil lakekei ni neta ngan, e rute ngan xil mun lakekei ni neta sav. Vanut moletin xil latangal holu, misak ni vatixar ak misakras valong kuh vatit rumen ak xa testal tetep. Ma misemae ni tangan moletin nan xil lihur Pol ha lilingi ite nim ma moletin te vaeen xil. <sup>35</sup>E melele xa ladel Pol lamei sangas ni nim mae e labit lipeou lihusil von kakaoen lihe nim, moletin xil te vaeen lapo rat Pol dat nesao vengan xa vanut moletin xil ak, nenemien nae ngeih pupu tangan lital rat Pol ra he xil, ha lihasi. <sup>36</sup>Siu xil langgulehi langgusili e lamuis kei be nesao labitene, “!Ravasi! !Ravasi vamat!”

### Pol Misep Kil Rin Nan Pe Met Moletin Xil

<sup>37</sup>Melele xa moletin te vaeen xil lamei sangas ni puiteh te nim mae, Pol misepin mi vatixar nae bitene, “?Nakila namit neta tei minuk?”

Ma vatixar ak biteni mini bitene, “?Ei, xouk okila osepin ni sepinien tahal Kris? <sup>38</sup>Inou di nanemi nabit xouk obe silixin tahal Isip xa testal tave nousav ti. Moletin ak teleh viton vanut moletin xil latehe taosen hat (4000) e latehe uruvuol aveti vahis xa mitavi tuei. Moletin tevae xuxusen nan xil latesak pisi tangan lapangei polien na kavmen tahal Rom.”

<sup>39</sup>Pol bit rilomun ni mini bit, “E-e, tave nou ti. Inou nabe Siu tei xa nabe hortan tahal Tarsis, taon tei xa bos mak mu xa de provins tahal Silisia. Nasisuk tangan umae ni nou li nisepin vuteili mi vanut moletin xil ak.”

<sup>40</sup>Vatixar ak mae ni, ma Pol misa hen be nesao tangan liti votei e misepin mi xil ni sepinien xati nae xa be Arameak, e xi biteni mak mi xil bitene,

**22** <sup>1</sup>“!Toxoli xil e tata navan xil tahal Isrel, muteong ni nou! Nisak pisi nisep motin nou pe metemim.” <sup>2</sup>Melele xa lalonge taxa di misepin mi xil nggo sepinien Arameak, ladi votei kuhi sung e lateong kuhi ni.

<sup>e</sup> 21:32 E melengien ak, moletin te vaeen xil ak lateli handred lu (200).

Di, Pol misepin mi xil bitene, <sup>3</sup>“Inou nabe Siu tei xa matestal e Tarsis e provins tahal Silisia. E natematu sung e Serusalem. Inggak, natesukul pe he Kameliel xa tepispisi kuhi minou usil Rae xil na avu nar xil. Natehusil xat Rae xil ak e eheien navan te xeih e Hi nggoni xamim vus xa mudi inggak xosali. <sup>4</sup>Inou mun natepangei ngan xil xa latehusil xat Iesu ba vuma ... natesak ni xil holu lalel. Tiramue xil e atou xil mun, natetal xat xil vus e nateso xil lathe nim te xeih. <sup>5</sup>Vahit musis pisi mi Vatixar te pris xil e vat xil te Kaonsel nar, ma xil lakila lavit rati xa sepinien navan be reitin. Xil iaxa latetis uvei xil tangan nalehi vaha mi tua nar xil xa labe Siu xa ladi Damaskas. Ma natehur uvei xil ak e nateha tangan nital xat Kristin xil te rute ak e nilah xil litolomun limei Serusalem, mei lilong pangas xil sung en.”

### Pol Misep Usil Naha xa Testal Mini e Damaskas

<sup>6</sup>Pol biteni mun mi xil bitene, “Melele xa di natekakao natemei sangas ni Damaskas, e piniae vari, miehen tei xa minehin pupu texo ut nesao e mei telelup xol nou. <sup>7</sup>Misak ni natemot natehe tan e rae tei temei minou tehitene, ‘!Sol, Sol! ?Veneh ma di opangei nou del moletin navan xil mak?’

<sup>8</sup>“Ma inou natesis pilei natehit, ‘?Suv, xoux obe visi?’

“E xi tehiteni minou tehitene, ‘Inou Iesu tahal Nasaret xa di opangei.’

<sup>9</sup>Tiramue xil xa latehe xamem latepus miehen ak, e latnalong ti rae xa tesepin minou.

<sup>10</sup>“Ma natesisi natehit, ‘?Suv, inou nipol ni naha?’

“Ma Suv tehiteni minou tehitene, ‘!Tamea e uhe Damaskas! E inggak, moletin tei ihit mese ni mi xoux holesok xil vus xa Hi teling xati tangan ha ti upol ni.’ <sup>11</sup>Melele xa rae tesepin tevus, nate manin e metok tevar ve miehen xa telelup xol nou. Tesak ni ngan xil xa latehe xamem latetal xat heok e lateteli nou tang matehe Damaskas.

<sup>12</sup>“E taon nen ak, moletin tei mei tesao ni nou, hisen Ananaeas. Xi tehe Siu tei xa eheien nan nggeih e Hi. Xi tehusil vuol ni rae nar xil, e Siu xil vus xa ladi e taon ak di latemerere ni. <sup>13</sup>Xi temei tesoh sangas visal nou e tehiteni minou tehitene, ‘!Toxoli Sol, keteh rilomun!’ E melele nen ak vari, nateketeh rilomun e natepusi. <sup>14</sup>Di, xi tehiteni minou tehitene, ‘Hi na avu nar tehosei xoux tangan ukil nenemien nan, upus Moletin Eo te Polien nan, e ulong rae xati nan. <sup>15</sup>Xi pol ni mak vengan tehosei xoux tangan ha ti uhit mese ni mi moletin xil vus to ut etan naha xa otepusi e otelonge. <sup>16</sup>!Ma taxeak, onararu ti! !Mea soh! Utak kes Iesu tangan ipol ni mei umese ra tesaen xil nam. Uling nenesien nam iti en e umae ni nou niterir ni xoux.’

### Hi Bosei Pol Tangan Ha Isetu mi Moletin Xil xa Latave Siu Ti

<sup>17</sup>“Dutou ni neta xa testal minou e Damaskas, natetilomun natemei e Serusalem. Melele xa natetak, ba di natesis e vloh te Nim Eo e natepus

metuveen tei. <sup>18</sup>E metuveen ak, Suv Iesu testal e tesepin minou tehitene, ‘Temanon uhe reling Serusalem vengon xa moletin xil inggak lasakras lataeong ni sepinien nam usil nou.’

<sup>19</sup>“Ma natehit rilomun ni mini natehit, ‘Suv, xil lakil kuh nou mak. Lakila xa inou iaxa di natehe nim te pispisien xil e natetal xat ngan xil xa laneket e xouk en, e ba di natehas pangas xil. <sup>20</sup>Inou natete rute ak melele xa latehov vin Stivin xa tesa sepinien nam mi moletin xil. E inou natemae ve maten nan e natelaxat eising na ngan xil xa latehov vini.’

<sup>21</sup>“E Suv tehiteni minou tehitene, ‘!Ha! Nisilak tangan uhe ut xil xa sotin ve moletin xil xa latave Siu ti.’”

<sup>22</sup>Moletin xil di lataeong kuh ni sepinien xil na Pol. E melele xa misep kokot ni usil ngan xil xa latave Siu ti, lake xati nggeih be nesao e labit, ‘!Ravasi! !Ravur xoteh meulien nan! !Tavos ti tangan xa xi vameul!’ <sup>23</sup>Xil lamuis kei, laso vulmeas be nesao, e lasil rerat eising nae te masoh e di labuil ni ba xati. <sup>24</sup>Vatixar na moletin xil te vaeen tahal Rom misemae ni moletin nan xil tangan lihur Pol ihe nim nae, e ha limeas pangasi tangan ihit kil ti veneh ma Siu xil ak di lamaxan ni. <sup>25</sup>E melele xa labar xati tangan lameas pangasi, Pol misepin mi vat tei na vanut moletin tei te vaeen xa di misoh sangas visali bitene, “?Rae na mol-Rom xil di mae ni tangan umeas hortan xati tei te kantri tahal Rom xosxa latallepisi ti mu?”

<sup>26</sup>Melele xa vat ak milonge mak, ma xi ba pus vatixar nan e misisi bitene, “?Di opol ni naha xiak? !Moletin xai be hortan vari tang te kantri tahal Rom!”<sup>f</sup>

<sup>27</sup>Ma vatixar ak be visal Pol e misis pilei bitene, “!Hit pisi minou! ?Reitin mak xa xouk obe hortan xati te kantri tahal Rom?”

E Pol bit rilomun ni mini bit, “!o.”

<sup>28</sup>Ma vatixar bit, “Inou natemei natehe hortan tei te kantri tahal Rom texo suse te xalen ni vatu tei xa mahulong.”

E Pol biteni mini bitene, “E inou, latepes xat nou en.”

<sup>29</sup>Melele xa lalonge mak, vatakes, ngan xil xa lateti tangan lisis ravui labe relingi. E vatixar ak, ulin mikan pupu vengon xa bar xat Pol ngamu xa be hortan xati te kantri tahal Rom.

### **Pol Misoh Pe Met Kaonsel na Mol-Siu Xil**

<sup>30</sup>Vatixar na moletin xil te vaeen bit wakil kuh ti veneh ma Siu di lamaxan Pol ven. Misak ni, ut milan, misemae tangan lalal rerat sen xil ra he Pol. Di, misis vat xil na pris xil tangan litotan vituei itel moletin xil te Kaonsel. Di, del Pol ba misoh pe met xil.

---

<sup>f</sup> **22:26** E melele nen ak, rae na mol-Rom xil biteni bit neta sav xosxa eilep xil labas purun movotei xil, e mi hortan xil te kantri tahal Rom xil, lasakras. Hortan xil ak lihe pe met moletin te lepisien itiamu, ti, isa pangasien teni mi xil.



**23** <sup>1</sup>Di, Pol miketeh momal ba ni vat xil te Kaonsel ak, e misepin mi xil bitene, “Toxoli xil tahal Isrel, melele xa nanem usil polien xil e meulien navan mei duxoh xosali ak e suse xil ngasen xa natehusili, natave unoun ti pe met Hi.” <sup>2</sup>Melele xa lalonge mak, Ananaeas xa be Vatixar na pris xil misemae ni ngan xil xa lasoh ladi visal Pol tangan lamuxol pon.

<sup>3</sup>Melele xa lamuxol pon, Pol bit rilomun ni mi Vatixar ak bit, “!Hi mun imuxol pom, xouk xa meulien nam be luvosen tang! Xouk onggoni seri nim tei xa lapen kuhi ni mei mieh, e muis di tamu en. !Odotan inggak tangan ti olepis nou vahusil Rae xil nar, e xouk vari tang onggur xoteh Rae xil ak melele xa otesemae tangan lamuxol pok!”

<sup>4</sup>Ma moletin xil xa lasoh ladi visal Pol labiteni mini labit, “Xouk, di osep sisil Vatixar na Hi vari tang iaxai.”

<sup>5</sup>Ma Pol bit rilomun ni mi xil bit, “Toxoli xil tahal Isrel, natnakil ti li xa xi be Vatixar na pris xil. Vahit nakila, ma ninapol ni ti namak vengan xa Vanuvei na Hi di biteni bit, ‘Munaso ti sepinien xil xa misa naha xat eilep tei xa di milaxat moletin namim xil.’<sup>8</sup>

<sup>6</sup>Melele xa Pol mipus kila xa rute e xil xa ladi e Kaonsel labe Satusi xil, e rute ngan xil mun labe Parasi xil, xi mikei nggeih bit, “Toxoli xil tahal Isrel, inou nabe Parasi tei xa nastal nggo vatimol na Parasi xil. !Namei nasoh inggak pe metemim vengan xa nake reitin xa moletin mikila imeul rilomun ra maten!”

<sup>7</sup>Melele xa misepin mak, Parasi xil ak del Satusi xil langor tova tang. Misak ni lalepas xil e vanute lu. <sup>8</sup>Lapol ni mak vengan xa Satusi xil latake reitin ti xa moletin mikila imeul rilomun ra maten. E latake reitin ti mun xa masxaxa xil ladi, mu nini moletin xil mun da. E Parasi xil lake reitin e neta xatel vus ak. <sup>9</sup>Ngongoren ak mei be himetu, e rut tisa xil te Rae xil na Mosis xa lamos e Parasi xil lamea lasoh e lasepin nggeih labit, “Xamem matakamet ti neta vasa vata xat moletin ak. !Xos be reitin mak xa masxaxa mu ninin tova tesepin mini!” <sup>10</sup>Selen ak mei be himetu e sangas vaeen vastal en. Misak ni vatixar na moletin xil te vaeen uli mikan xa linatal papas Pol. Ma misemae ni moletin nan xil tangan lihe tan e lital rat Pol reling xil. Ma ba ladela rilomun mei labe nim mae.

<sup>11</sup>E vongien nen tak, Suv Iesu mei misoh visal Pol e biteni mini bitene, “!Ulum nakan ti! Xouk otesep usil kuh nou inggak e Serusalem. Ma ha usepin ni imak mun tang e Rom.”

### Rut Siu Xil Labein Xati Tengan Lihax Vin Pol

<sup>12</sup>E makoe nen, rut Siu ngan xil lamei vituei e labein xati tangan linaxa ti mu anien mu linamu ti mu oei ituxoh melele xa lihas Pol imat. <sup>13</sup>Ngan

---

§ 23:5 Eks 22:28

xil vus xa latemae e lingxatien ak lateli hanutap lu (40). <sup>14</sup>Di, labe visal vat xil na pris xil e elda xil mun e labiteni mi xil labitene, “Xamem mabein xati nggeih xa manaxa ti neta ha vuma ... muhas Pol imat. Xosxa muhur xotehi, ma Hi isa pangasien mi xamem. <sup>15</sup>Mak, ma xamim itel ngan xil te Kaonsel musa sepinien iha mi vatixar na moletin te vaeen tangan itel Pol imei mun mei mulepisi. Muluvosi taxa iemim bei tangan muteong kuhi ni vatei mun. E xamem, muxus tili tangan melele xa litela imei, natuxoh inggak ti mu, e muhasi imat.”

<sup>16</sup>E matilou xati na Pol milongeong ni lingxatien ak, ma miloh be nim ma moletin te vaeen xil xa pap nan da en, e ba bit mese ni lingxatien ak mini. <sup>17</sup>Ma Pol mikes moletin tei te vaeen bemei e biteni mini bitene, “Utel horam maxoe ak ha mulpus vatixar namim. Xi nggur sepinien tei tangan ihit rati mini.”

<sup>18</sup>Ma moletin te vaeen ak dela ba lupus vatixar nan e biteni mini bitene, “Pol xa de nim te xeih mikes nou naba e biteni minou tangan nitel horam maxoe ak imei visaluk vengan xa xi nggur xat sepinien tei tangan ihit rati minuk.”

<sup>19</sup>Ma vatixar ak dela ba ludi asealu e misisi bit, “?Naha vari obit oviteni minou?”

<sup>20</sup>Ma xi biteni mi vatixar ak bitene, “Rut Siu xil labein xati ngamu da xa visuvong, mei lisisuk tangan utel Pol ihe visal Kaonsel nae. Xil liluvosuk xa iexil bei tangan lilong kuhi ni vatei mun. <sup>21</sup>E onahusil ti li naha xa xil lihiteni vengan xa moletin xil nae ti lixus tili. Moletin xil ak lali hanutap lu (40), e labein xati nggeih tangan linaxa ti mu anien mu linamu ti mu oei ha vuma ... lihas Pol imat. E taxeak, di labue xat xil tueli e litatiluk sutang tangan umae ni.”

<sup>22</sup>Ma vatixar ak biteni mini bitene, “Onahiteni ti mi mosav xa omei obit sepinien ak minou.” Di, misil horam maxoe ak dilomun ba.

### Lasa Pol Be He Vat te Kavmen tahal Sudea

<sup>23</sup>Ma vatixar mikes vat lu te vanut moletin te vaeen lumei e biteni mi xalu bitene, “Mulivue xat moletin xil te vaeen lihe handred lu (200) tangan muhe Sesaria e naen klok vongien xosali. Xamim muka vituei itel moletin xil xa liloh ni hos lihe hanutap tol e hexalu mun (70), e itel moletin te sosoen xil mun lihe handred lu (200). <sup>24</sup>Musa ti hos mi Pol mun tangan iloh en, e mutel kuhi ha mulingi pe he Filiks xa be vat te kavmen tahal Sudea xa de Sesaria.” <sup>25</sup>Di, vatixar ak midis uvei tei tangan lisa ni mi Filiks xa biteni mak:

<sup>26</sup>“Vat Tehos te Kavmen Filiks,

Inou, Klodias Lisias, nabit bos makoe minuk.

<sup>27</sup>Moletin xa masa ni bat iaxai, Siu xil latetal xati e latehit lavasi vamat. E melele xa nakameti xa xi be hortan xati te kantri tahal

Rom, naleh moletin navan xil ba manggur rati ra he xil. <sup>28</sup>Natehit nakil ti veneh ma latemaxan ni ven, ma natetela tehe visal Kaonsel nae. <sup>29</sup>E melele xa di nateong ni sepinien nae, natekameti xa di lasep sisili vengon xa latehit tehur xoteh rae xil te neketen nae tang. Xi tenapol ni ti neta vasa tangan vasak ni lavasi vamat mu lalingi e nim te xeih ven. <sup>30</sup>E melele xa natelongeong ni lingxatien tei tangan lavasi vamat, vatakes, nasa ni bemei mi xouk. E ngan xil xa di lasep sisili, nabiteni mi xil tangan lihat lihit kil naha xa xi tepol ni mi xil pe metom. Xi nen tak. Namesuk.”

<sup>31</sup>Moletin xil te vaeen lalong xat naha xa vatixar tesemae ni mi vat lu nae. Ma e vongien nen tak, xil laba. Laba vuma ... laduxoh taon tahal Antipatris. <sup>32</sup>Ut milan, moletin te vaeen xil xa latekakao, xil ladilomun laba labe vonine. E laling ngan xil xa laloh ni hos tangan litel Pol iha. <sup>33</sup>Melele xa laduxoh Sesaria, laba labe visal vat te kavmen e lasa uvei na vatixar nae mini. Di, laling Pol de hen. <sup>34</sup>Melele xa vat te kavmen Filiks buli uvei ak bus, misis Pol tangan vahit kila xa xi nggo provins xave. Melele xa mikameti xa Pol be tahal Silisia, <sup>35</sup>xi biteni mini bitene, “Momal. Inou nilepis ngongoren namim e von koten navan melele xa ngan xil xa di lasep sisiluk limei lituxoh inggak.” Di, misemae ni tangan ha liketeh xol Pol e nim xa mahulong xa Suv Toto Herot tepol ni.<sup>h</sup>

### Pol Misoh Pe Met Filiks

**24** <sup>1</sup>Melengien lim (5) mei mitavi, Ananaeas xa be Vatixar na pris xil, del rut elda xil labe Sesaria. Xil lamei del loa tei nae xa hisen Tetalas. Ba lasoh pe met Filiks e von koten nan e laso sepinien xil xa nggeih usil Pol mini. <sup>2</sup>Di, xi misemae ni tangan litel Pol imei nim. Melele xa bemei, Tetalas misep sisil Pol pe met Filiks biteni mak:

“Vat te Kavmen Filiks, vengon xa di olaxat kuh xamem del metisouen, xamem madi e tomat vehakut. Xouk di oserep holesok xil hao ve moletin xil te kantri ak mei bos pupu. <sup>3</sup>E ut xil vus, xamem mamaal ve relaxatien nam, e mabit mamesuk ven. <sup>4</sup>Mabit munavas pupu ni ti melengien nam, e madak kesuk tang tangan umae li e uteong vuteili ni rin namem e ngongoren ak xa mabit maviteni minuk taxeak. <sup>5</sup>Makameti xa moletin ak be vatxeih tei xa di pol ni vaeen xil xa mahulong del Siu xil e rute xil vus e ut etan. Xi be vat na vanut moletin xil xa di langgusil pispisien na moletin tei tahal Nasaret. <sup>6</sup>Xi tesak tangan vapol ni Nim Eo na Siu xil mei vahe muis pe met Hi, ma matetal xati ven. <sup>8</sup>Xosxa usis pilei moletin ak, ma

<sup>h</sup> 23:35 Suv Toto Herot ak be ‘Herot xa Mahulong’ xa temat dutou ni melele xa Iesu tepot. Xi vari iaxa tesemae ni tangan lipol ni nim mahulong ak. E melengien xil na Pol, moletin te vaeen xil tang lateti en.

ulong kila ixo xi mun tang xa holesok xil xa di mabit usili be reitin.”<sup>9</sup>E Siu xil vus xa lateti lamae e sepinien nan e labit holesok xil vus be reitin.

### Pol Misep Kil Rin Nan Pe Met Filiks

<sup>10</sup>Di, Vat Filiks pisen ni nggo hen tangan Pol imei iht kil rin nan e ngogoren ak, ma Pol biteni mini bitene, “Namei pe metom Vat Filiks tangan nisepe kil rin navan del sien, vengon xa nakila xa huram xil holu, xouk di otelepis moletin xil te kantri ak. <sup>11</sup>Xosxa usis moletin xil ak, ma ulong kil kuhi xa melengien lu e le (12) tang tetavi xa inou natehe Serusalem tangan namot mi Hi en. <sup>12</sup>Melele xa Siu xil latekamet nou, inou natnangor ti vatel moletin tova e Nim Eo, mu natnapol ni ti selen mi moletin xil e nim te pispisien tova mu e rute sav xil mun e taon ak. <sup>13</sup>Siu xil xai lasakras lapisen kil sexien tesa tova xa lavit inou iaxa natepol ni. <sup>14</sup>E taxeak, nihit rat ngan ak minuk Filiks xa inou di namot mi Hi na avu namem xil usil sexien tei xa Siu xil ak labit tamal ti. E inou mun nake reitin e holesok xil vus xa latetisi e Rae xil na Mosis tetel uvei xil na provet xil. <sup>15</sup>Nenesien navan del nenesien nae pipin tang xa bit Hi isak ni moletin xil ngasen, ngan labos e ngan lasa, likila limeul rilomun ra maten tangan Hi ilepis xil vus. <sup>16</sup>Mak, ma vehakut di nasak tangan nipol ni holesok xil e sexien tei xa isak ni nou ninave unoun ti pe met Hi e pe met moletin sav xil.

<sup>17</sup>“Huram xil holu natnata kat ti e Serusalem. Di, natetilomun nateha tangan naleh ti vatu vaha vatutou ni rut moletin xil tahal Isrel e nasa sanien eo xil vaha mi Hi. <sup>18</sup>E melele xa di natepol ni holesok xil ak, xil latekamet nou e vloh te Nim Eo na Hi e melele vari xa di natepol vuol ni sexien xil te serep moletin en. E melele nen ak, natnata ti vatel vanut moletin tova, e natnapol ni ti selen tova. Natetat temak tang. <sup>19</sup>E rut Siu xil xa latexo provins tahal Esia lateti. Bos vahit xil mun lati inggak xosali tangan lisepe kil sexien tesa tova pe metom xa labit inou natepol ni. <sup>20</sup>Mu umae ni ngan xil xa ladi inggak lavit kil neta tova xa misa xa latekameti da xat nou melele xa natesoh pe met Kaonsel nae. <sup>21</sup>Mu xos ve neta xa natekei ni melele xa natesoh pe met xil e natehit, ‘Namei nasoh pe metemim taxeak vengon xa nake reitin xa moletin ikila imeul rilomun ra maten.’”

<sup>22</sup>Di, Filiks, xa mikil kuh neketen na Kristin xil, misep xol koten nan del sepinien ak bit, “Melele xa Lisias xa be vatixar na moletin xil te vaeen mei ituxoh inggak, inou nimal ni ngogoren namim sung.” <sup>23</sup>Di, Filiks misemae ni moletin te vaeen xa di miketeh xol Pol tangan ti iketeh kuhi xole e imae ni tangan ikakao vuteili e nim te xeih e imae ni timue nan xil limei lipusi e lisa tutouen mini.

### Pol Misetu mi Filiks del Atou Nan

<sup>24</sup>Melengien vahis mei mitavi, Filiks del atou nan xa hisen Drusila lube visal rute xa Pol da en. Atou nan be ate-Siu tei. Di, Filiks misilasil ve Pol

bemei e luteong ni misetu usil neketen nan e Iesu Kristo. <sup>25</sup>E sepinien kor na Pol, xi misetu mi xalu bit, “Hi ien bei xa moletin xil lilaxat kuh sexien nae xil e lipol ni naha xa momal tevi, vengan xa melele xa rimat, xi ilepis xir vus.”

Melele xa Pol biteni mak, Filiks, ulin mikan. Ma biteni mini bit, “Utilomun mun uha. E melele xa nakamet mesal, nikes rilomun ni xouk.” <sup>26</sup>E melele nen tak, xi di minemi bit Pol isa ti watu mini. Ma ve ngan ak, Filiks mikesi vehakut e di misepin dela.

<sup>27</sup>Huram lu mei mitavi, moletin tei mei minggoles von Filiks e mei be vat hu te kavmen tahal Sudea, hisen Porkas Festas. E vengan xa Siu xil, iexil nggat Filiks e polien nan, xi mistokovein Pol da nga nim te xeih nan tangan vapol ni nenemien nae mei vahos vuteili.

### Festas Milepis Pol

**25** <sup>1</sup>Festas temei e taon tahal Sesaria tangan vahur kokot ni polien te vat te kavmen e provins tahal Sudea. Di, melengien tol mitavi, nggo Sesaria e be Serusalem. <sup>2</sup>E rute ak, vat xil na pris xil del vat xil na Siu xil lamei lapusi. Laseputut ni Pol mini, e lasisi <sup>3</sup>tangan vapol ni lalonge vahos e vamae ni Pol vamei e nim te xeih e hal Serusalem. Xil lasisi mak vengan xa lateling xati ngamu xa lihasi e suse. <sup>4</sup>E Festas biteni mi xil bitene, “Pol da nga nim te xeih e Sesaria. E navehi ti, inou nitilomun nihe rute ak. <sup>5</sup>Xosxa itep, ma vat namim xil mei lihe xamem muvituei muhe Sesaria. Xosxa moletin ak pol ni neta tova xa misa, ma xil likila lihit rati inggaxor.”

<sup>6</sup>Festas bas melengien xos tol e he sav (8) mu hexalu (10) del xat xil. Di, dilomun be Sesaria. E visuvong nen, xi dotan e von koten nan, e misemae ni xa lavur Pol vamei nim. <sup>7</sup>Melele xa Pol bemei, Siu xil xa latexo Serusalem latemei, mei lakapis xole e di labit rat sexien tesa hao xa tellep xa labit Pol tepol ni. E lasakras lapien ni vamae xa naha xa labiteni be reitin. <sup>8</sup>E Pol misep motin xi bit, “Inou natapol ni ti neta vasa vaha ni Rae na Siu xil, mu vaha ni Nim Eo nae, mu vaha ni suv toto tahal Rom.”

<sup>9</sup>E Festas ien bei xa Siu xil lamaan ve polien nan, ma misis Pol bit, “?Xouk omae ni xa ove Serusalem tangan ha nilepisuk en?”

<sup>10</sup>Ma Pol bit rilomun ni mini bitene, “E-e, natamae ni ti. Taxeak, nasoh ngamu nade von koten na kavmen tahal Rom. Ma e rute ak vari iaxa momal tangan ulepis nou en. Xouk okila ngamu xa inou natapol ni ti neta vasa mi Siu xil. <sup>11</sup>Xosxa nanggur xoteh rae tei mu napol ni neta tei xa misa tangan ha nimat ven, ma minasak pisi ti ninalesae relingi. E xosxa sepinien nae usil nou be luvosen tang, ma moletin tovuol mikila vamae ni nou name he xil. Imak, ma nasasuk Festas tangan umae ni nou nihe Rom tangan suv toto vari iaxa ilepis rin navan e ngongoren ak e von koten nan.”

<sup>12</sup>Ma Festas misepin del moletin xil te kaonsel nan e lasep kil rae xil mini. Di, xi bit rilomun ni mi Pol bit, “Xouk osis nou tangan ha upus suv toto tahal Rom, ma nisa nuk ha upusi.”

### **Festas Misep Usil Pol mi Suv Toto Akripa**

<sup>13</sup>Rut melengien xil mei mitavi, Suv Toto Akripa del hineli, Bernis, lumei e hal Sesaria tangan lalsa sepinien te hurpilien nalu mi Festas ve polien hu nan. <sup>14</sup>Melele xa ludi visali melengien vahis, Festas misep usil Pol mi suv toto. Biteni bit, “Melele xa Filiks tehe vat te kavmen, teling moletin tei e nim te xeih, e da tamu xiak. <sup>15</sup>E melele xa natehe Serusalem, vat xil na pris xil del elda xil na Siu xil latehit rat tesaen xil xa tepol ni, e latsis nou tangan nimae ni ha vamat. <sup>16</sup>E natehiteni mi xil xa ngan ak tave sexien na mol-Rom xil ti tangan mamae ni moletin tei vaha valong pangas xi vatiamu. E-e, itiamu, mulepisi e von koten tangan moletin ak ilong sepinien tesa xil xa liso ni iha ni, e xi isep motin xi pe mete. <sup>17</sup>Ma melele xa latemei inggak, natnararu ti. E-e. Ut milan nen tang, natetotan e von koten e natesemae ni tangan litel moletin ak imei nim. <sup>18</sup>E melele xa ngan xil xa iexil minggat moletin ak mei latesoh tangan latesepin, xil latnaso ti sepinien xa vasa pupu vaha xati vaxoni ngan xa inou di natenemi. <sup>19</sup>Xil latengor mini usil neketen nae e usil moletin tei xa hisen Iesu. Xil labit mat vuol, e Pol mike reitin xa xi meul tang da. <sup>20</sup>E melele nen ak, inou natnakil ti vari tangan nikamet reitinen te sepinien nae itep. Ma nasis Pol tangan vamae ni vahe Serusalem tangan lilepis ngongoren nae en. <sup>21</sup>E Pol ien ti tavei, e tesis nou tangan itat e heok inggak ituxoh melele xa nikila nisa ni ihe Rom tangan ha Suv Toto sung ilepis kuh rin nan e ngongoren ak.”

<sup>22</sup>Ma Akripa biteni mi Festas bitene, “Inou mun, ieok bei niteong ni ti moletin ak.”

Ma Festas bit, “Bos tang, uteong ni ti sung visuvong.”

<sup>23</sup>E visuvong nen, lapien sexien te sien xa momal ve eilep tei mi Suv Toto Akripa xal hineli Bernis. Ma vat xil te taon ak del vat xil na vanut moletin xil te vaeen ladel xalu lamei del merereen, e ladotan e von vitueien tei xa mahulong. Di, Festas misemae tangan litel Pol imei nim. <sup>24</sup>Di, Festas biteni mi xil bitene, “Suv Toto Akripa e xamim vus xa mudi visal xamem taxeak. Moletin ak iaxa Siu xil vus, e hal Serusalem e inggak, di lasep sisili minou. Xil di ladak kes nou nggeih tova tang tangan mavur xoteh meulien nan. <sup>25</sup>E inou natnakamet ti neta tova xa misa xa xi tepol ni tangan ha vamat ven. Ma melele xa xi tesis nou tangan nisa ni ihe Rom tangan Suv Toto ilepisi sung, inou natemae ni. <sup>26</sup>E nenemien tovuol tamu xa nitis usili tangan nisa ni vatela vaha mi ngan xil tahal Rom. Mak iaxa, nangguri mei misoh pe metom, Suv Toto Akripa, e pe metemim vus tangan melele xa rilepis rin nan e ngongoren

ak ivus, nikila sung nitis neta tova. <sup>27</sup>Tamal pupu ti tangan rasa vatxeih tei vaha mi xil xosxa rinavit kil ti veneh ma xa rasa ni ven.”

### Pol Misep Kil Rin Nan Pe Met Suv Toto Akripa

**26** <sup>1</sup>Di, Akripa biteni mi Pol bitene, “Namae ni xouk tangan usep motin rin nam e ngongoren ak minou.”

Ma Pol misa hen be nesao tangan litit votei. Di, misepin pe met moletin xil bitene, <sup>2</sup>“Suv Toto Akripa, namaal pupu ve mesal xa lasa ni minou tangan nisep motin rin navan e ngongoren ak minuk ve naha xa Siu xil di lasep sisil nou ven. <sup>3</sup>Bos tangan ulonge, vengan xa okil kuh sexien xil vus na Siu xil tui del ngongoren nae xil. Ma nasisuk tangan uteong ni nou li ihe vuteili tang.

<sup>4</sup>“Siu xil vus lakil meulien navan, melele xa natehe horam maxoe mei duxoh xosali ak, e naha xa natepol ni e ut xati navan e e Serusalem mun. <sup>5</sup>Xosxa usis xil, xil tang likila lihiteni minuk xa, tetiamu, natemos tetel vanut Siu tei xa lakes xil ni Parasi e nanggusil kuh sexien nae xil. Vanut Siu xil ak di lalong xat rae namem xil mili vanut Siu sav xil. <sup>6</sup>Ma taxeak, di nasoh e von koten ak vengan xa di naling nenesien navan e hitxatien xa Hi tepol ni tetel xat avu namem xil tetiamu. <sup>7</sup>Moletin namem xil vus xa lastal langgo vatimol namem xil xa labe lu e le (12), xil ngasen di laling nenesien nae e hitxatien ak tangan mei istal ihe reitin melele xa di lamot mi Hi e melengien e vongien xil. Mak iaxa, Suv Toto, ve nenesien navan e hitxatien ak, Siu xil ak di lasep sisil nou.”

<sup>8</sup>Di, Pol biles pus Siu xil xa ladi e von koten ak e biteni mi xil bit, “?Siu xil, veneh ma xamim xa mubit Hi mikila isak ni moletin imeul rilomun ra maten, mukameti ngeih tangan muke reitin xa Hi pol ni Iesu temeul rilomun ra maten? <sup>9</sup>Tetiamu, inou mun natenemi tangan nisak purun ngan xil xa laneket e his Iesu tahal Nasaret. <sup>10</sup>Ngan ak iaxa natepol ni e hal Serusalem. Vat xil na pris xil latmae ni nou tangan nital xat moletin eo xil xa laneket e Iesu e niso xil lihe nim te xeih. E melele xa latemei tangan lavas xil lalel, inou mun namaen ni tang. <sup>11</sup>Melengien xil holu, natehe nim te pispisien na Siu xil, e melele xa natekamet rute ngan xil en, di natehas pangas xil tangan lisepin isa e his Iesu e lipol ni hitxatien tangan linahusili ti mun. Ieok teat pupu ni xil mak, misak ni di natehe taon sav xil mun tangan ti nihol rerat xil en.”

### Pol Misep Usil Naha xa Testal Mini e Suse xa Be Damaskas

<sup>12</sup>Pol misepin mi moletin xil mun bit, “Usil nenemien nen tak, vat xil na pris xil latesil nou natehe Damaskas tetel xeihen nae tangan nipol vuol ni rae xil nae. <sup>13</sup>E Suv Toto, melele xa natehusil suse nateha, e piniae vari, miehen tei testal xa temihinehin teli eai texo ut nesao teme, mei teleluv xol nou tetel moletin xil xa latetel xat nou mateha. <sup>14</sup>Misak

ni xamem vus matekiri matehe tan. E inou, natelong rae tei xa tesepin minou texo sepinien na Siu xil tehitene, ‘!Sol, Sol! ?Veneh ma di opurun nou? Di osa pangasien mi xouk mun tang melele xa di obae del nou. Onggoni buluk tei xa suv nan di measi melele xa di pol ni vatin.’<sup>15</sup> Ma nabit, ‘?Suv, xouk visi?’ E xi bit rilomun ni minou bit, ‘Inou Iesu, ngan xa di osak purun ni.’<sup>16</sup> !Tamea! Nastal minuk xosali vengon xa nabosei xouk tuei tangan mei ove moletin te polien navan. Ha uhit mese ni naha xa otepusi usil nou xosali e naha xa nipisen ni minuk e melengien xil xa ti imei.<sup>17</sup> Inou niketeh xolok ra Siu xil. E niketeh xolok mun ra ngan xil xa latave Siu ti xa di nasil xouk tangan uhe visal xil.<sup>18</sup> Xouk, uleh rerat xil ra maluxoluken xa da xat xil, mei lipus kil miehen navan. Reitin, ixo xouk nileh rerat xil ra xeihen na Temat, mei liti e xeihen na Hi. Mak, ma melele xa liling neketen nae e nou, nileh rerat tesaen nae ra xil, e mei lihur von ne xil itel moletin eo xil xa Hi tehosei xil.’

### Pol Misep Usil Polien Nan

<sup>19</sup> “Ma Suv Toto, natehusil xat kuh metuveen xa natepusi texo ut nesao.<sup>20</sup> Misak ni, e hal Damaskas, natesetu mi moletin xil vus tangan lihiles ra tesaen nae xil e lipol ni holesok xil xa ipisen ni xa xil latsa meulien nae mi Hi. Di, natesetu ni mun temak e Serusalem, e ut xil ngasen e provins tahal Sudea. Di, natesetu ni mun mi ngan xil xa latave Siu ti.<sup>21</sup> Ve sexien ak vari iaxa Siu xil latetal xat nou e vloh te Nim Eo melele xa namei tangan namot mi Hi, e latesak tangan lavas nou namat.<sup>22</sup> E Hi di dutou ni nou duxoh xosali ak, ma nasoh inggak e di nasep usil longeongen hos usil Iesu Kristo mi xamim vus, mi eilep xil e mi movotei xil mun. Naha xa inou di nabiteni mi xamim nggoni ngan taxa provet xil tetiamu del Mosis lateke mese ni latehit mei istal.<sup>23</sup> Latehiteni xa Kristo xa Hi tehosei ha ilong pangas xi e ha imat. Ti, xi vari iaxa imeul rilomun ra maten itiamu ni moletin sav xil tangan ipisen miehen te meulien mi Siu xil e mi ngan xil xa latave Siu ti.”

<sup>24</sup> Melele xa Pol di tamu misep motin rin nan e ngongoren ak, Festas mikei nggeih e misep pepamen ba mini bitene, “!Pol, otallang tova tang! !Kilakilen nam xai di misak ni xouk otallang pupu!”

<sup>25</sup> E Pol bit rilomun ni mini bit, “Suv Festas, inou natatallang ti. Sepinien te reitinen e metisoen iaxa di nabiteni xiak.<sup>26</sup> Suv Toto xai mikil holesok xil ak ngamu, e nakila namiteni vama tang mini. Xi mikil kuhi vengon xa holesok xil ak tastal ti vaxo suse te xusen.”

<sup>27</sup> Pol miketeh momal ba ni Akripa e biteni mini bitene, “?Suv Toto, xouk oke reitin e sepinien na provet xil? Nakila xa xouk okila.”

<sup>28</sup> E Akripa bit rilomun ni mini bit, “?Pol, onemi obit okila opol ni nou namei name Kristin komanon?”

<sup>29</sup> E Pol biteni mini bitene, “Neta sav xa ove Kristin komanon mu veter luvoluv mu, nasis mi Hi tangan xouk, itel xamim vus xa di muteong ni



nou xosali, ti mumei muneket muxoni nou ... e sen xil ak ihe tovuol e hemim.”

<sup>30</sup>Melele xa Pol misepin bus, Suv Toto Akripa, vat te kavmen Festas, Bernis, del xil vus xa latotan tetel xatel, latamea laba. <sup>31</sup>E melele xa di laba, di labiteni mi xil mun tang labit, “Moletin ak tapol ni ti neta vasa tangan ha vamat ven mu vahe nim te xeih ven.” <sup>32</sup>E Akripa biteni mi Festas bit, “Vahit moletin ak nasisuk ti tangan usa ni vahe visal Suv Toto tahal Rom, ma bos tangan ha ven vamase.”

### Pol Nggo Tuturil Tei Be Rom

**27** <sup>1</sup>Di, Vat Festas miling melengien tangan Pol del rute sav xil mun xa ladi nim te xeih lave taon tahal Rom e provins tahal Itali, e inou Luk be xamem. Ma miling xamem e he vat tei na vanut moletin te vaeen xil xa hisen Sulias. Moletin nan xil labe handred tei (100) e laces xil ni ‘Vanut Moletin te Vaeen na Suv Toto tahal Rom’. <sup>2</sup>Manggo tuturil tei e hal Atramitiam xa di labue xati tangan vahe pasis xil e provins tahal Esia. Di, matoba del xat moletin tei tahal Masedonia xa tete hal Tesolonaeka, hisen Aristakas. <sup>3</sup>E melengien sav, matduxoh pasis tahal Saedon. E Sulias en misae e Pol, ma mae ni tangan ha vapus ti timue nan xil tangan lisa ti neta mini xa xi ien bei. <sup>4</sup>Melele xa mabe reling Saedon, votiang miseten nggeih, misak ni maba makapis manggo rin sav e aelan tahal Saepras xa tas merou vuteili en. <sup>5</sup>Di, manggur xoteh tas sangas ni provins tahal Silisia del Pampilia, e ba masotie e taon tahal Mira xa de provins tahal Lisia. <sup>6</sup>E rute ak, mabut mabe ut e Sulias mikamet tuturil tei mun na mol-Aleksandria xil xa di bue xat xi tangan vahe Itali, ma misis vatihos tangan vamae ni xamem mava en.

<sup>7</sup>Di, tuturil xa matnggo en, dat miloh merou tang melengien vahis vengon xa votiang nggeih pupu. Melengien hao mei mitavi, di, maduxoh rute tei sangas visal taon tahal Nitas. E tuturil misakras valoh vamael vengon votiang nggeih tamu, misak ni biles ba nggusil aelan tahal Krit, e rin xa tas be tan vuteili en. Di, tuturil miloh ba nggo sangas ni meteh xil sangas visal taon tahal Salmone. <sup>8</sup>Di, manggo sangas ni ut te aelan tahal Krit, e tas nggeih tova tang. Ma maloh maba vuma ... maduxoh rute tei xa bos xa lakesi ni ‘Pasis xa Bos’. Pasis ak tave sotin ti ra taon tahal Lasia.

<sup>9</sup>E rute ak, mapusi xa matehas melengien hao ngamu e suse e misak ni madi ngamu e melengien xil te an tesa (melengien xa Siu xil di labal ni anien ve ‘Melengien te Kas Moten Meulien En ni Ra’ mitavi ngamu<sup>i</sup>). Melele xa vat te moletin te vaeen di minem usili, Pol misa nenemien nan

---

<sup>i</sup> 27:9 Melengien Eo ak be na Siu xil xa di lapol ni e hoxalite te aveti Septemba. E melengien kokot xil te Septemba ba duxoh hoxalite te aveti Febuari be melengien xil te an tesa xa tavos ti tangan tuturil xil laloh en.

mini bit, <sup>10</sup>“Tiramue xil, e ketehen navan, napusi xa suse nar ixeih pupu. Tuturil ak imahoe lel, holesok xil xa di vangite ikesae, e moletin ngan xil mun lilel.” <sup>11</sup>E Sulias xa be vat na moletin te vaeen xil, xi miteong kes ni sepinien na vatihos del moletin xa tuturil nan, xi minem mele ni sepinien na Pol. <sup>12</sup>Xalu lubiteni mini lubit pasis xa madi en tavos ti e melengien xil te an tesa. Sangas moletin xil vus iexil bei xa lasak pisi lakapis e aelan ak e va lave pasis xa bos xa de hal Finiks e aelan ak tahal Krit tangan lavur sen melengien xil te an tesa en. Pasis ak nggur mesal e rin lu, tei nggo saotwes, e tei mun nggo notwes.

### Votiang Tei xa Nggeih Bas Pol Xatel

<sup>13</sup>Melele xa votiang hos tei xa nggo saot mistal mi xamem, moletin xil te tuturil lanemi labit bos tangan mava vaxoni lingxatien nae. Misak ni lalih rat angga e manggo sangas tang ut maba. <sup>14</sup>Tavehi ti, votiang tei xa nggeih pupu, xa lakesi ni ‘Toio’,<sup>j</sup> nggo ut bemei, mei divin tuturil be mesal. <sup>15</sup>Vengan xa votiang bas pupu ni tuturil e masakras maviles matilomun mavusil suse namem mava, ma mamae ni tang votiang divin xamem maba. <sup>16</sup>Manggus vuteili melele xa be manggo rin xa be saot e tutut aelan tahal Kaoda. E rute ak, del xeihen, maling kuh bot te tuturil ak. <sup>17</sup>Di, boskru xil te tuturil lapo rati bemei nesao. Di, laso ao xil be tas mei langgo pe tuturil, di malet xat xil tangan tas naxu len ni ti. Xil ulixil mikan xa tuturil naxon e mae e kantri tahal Libia, misak ni laseti sel be tan. <sup>18</sup>Vatiang ak nggeih dat mak tang duxoh melengien sav xil mun e tas di bas tuturil xa madi en misa tang, ma laso rut holesok xil xa di vangit tuturil be tas. <sup>19</sup>Melengien sav mun, laso rut holesok xil te tuturil xa meas be tas. <sup>20</sup>Melengien hao matapus ti eai mu hitu xil tangan mapus kil suse namem vaxo en. Vatiang miseten dat mak e xamem vus manemi mabit be te maten tuei iaxa madi xiak.

<sup>21</sup>Di, melele xa Pol pusi xa moletin xil lataxanien ti melengien holu, mitamea misoh pe met xil e biteni mi xil bitene, “Tiramue xil, xosxa vahit muteong ni nou e munave reling Krit ti, ma musakras mukameti vaxeih vamak e holesok xil mun misakras vakesae vahe tas vamak. <sup>22</sup>Tave ti neta xa mak, ulimim nakan ti mun. Moletin ti nakesae. Tuturil kestang iaxa ikesae. <sup>23</sup>E vongien, masxaxa tei na Hi xa nabe moletin nan e xa di namot mini mei testal minou e tehiteni minou tehitene, <sup>24</sup>‘Pol, ulum nakan ti. Hi miling xati tuei tangan xouk ha usoh pe met Suv Toto tahal Rom. E xi mae ni xa moletin xil vus mun xa ladi e tuturil ak del xouk, linalael ti.’ <sup>25</sup>!Ma tiramue xil, ulimim nakan ti! Nanesi e Hi xa holesok xil istal ixoni ngan taxa masxaxa ak tehiteni minou. <sup>26</sup>E tuturil ak iha ixon ite aelan tova.”

---

<sup>j</sup> 27:14 Toio be votiang xa nggo notis e nggeih pupu.

<sup>27</sup>Melele xa mateloh e votiang ak wik lu e tas tahal Mediterenia, e hilaep te vongien, rut moletin xil xa di lapol e tuturil di lanemi labit sangas mave ut. <sup>28</sup>Misak ni laso ao be tas tangan lakameti xa tas ak be huinep midep, e lakameti xa be huinep duxoh mita xa be hanutap tei e lu e le sav mun (37 m). Ma laloh vuteili mun e laso rilomun ni e lakameti xa be huinep duxoh mita xa be hanutap tei e lu e he sav mun (27 m). <sup>29</sup>Ulixil mikan xa tuturil ak naxon nate hat ti, misak ni laso tiei ni ngga hat (4) xa di pe vil tuturil e moletin xil ngasen di lasis mi hi nae xil tangan ut valan katen. <sup>30</sup>Di, moletin xil xa lapol e tuturil lanemi labit lilesae relingi, misak ni lasae ni bot be tas. Xil di laluvos labit liha tangan liling xat angga xil iti vat tuturil mun. <sup>31</sup>E melele xa Pol pusi mak, ba biteni mi vat na moletin te vaeen xil del moletin nan xil bit, “Xosxa moletin xil te tuturil ak lilesae rani, ma xamim vus musakras mumeul.” <sup>32</sup>Ma moletin xil te vaeen lada xoteh ao xa dal xat bot e lalingi misal ba. <sup>33</sup>Sangas ut valan, Pol nggeih xat xil tangan lavanien ti, ma biteni mi xil bit, “Wik lu tuei xiak di munexo pupu, ma mutaxa ti neta. <sup>34</sup>Mak, ma bos xa muanien ti mu li tangan vemim ixeh e mukila mumeul. Munanexo ti vengan xa nakila xa neta ti naxui xamim.” <sup>35</sup>Melele xa Pol misepin bus, xi mileh beret vutei e memes Hi ven pe met xil. Di, bul pasi e ngga ni. <sup>36</sup>Melele xa lapusi mak, ulikanen be reling xil, e xil mun langga anien vutei. <sup>37</sup>Xil vus xa ladi e tuturil ak laduxoh handred lu e hanutap tol e tei e le sav mun (276). <sup>38</sup>Melele xa xil vus langganien bus, laso bak pulaoa xil vus xa teti vangite be tas tangan vasak ni tuturil vameit.

### Tuturil xa Pol Xatel Latdi en Minggon De Mae

<sup>39</sup>Melele xa ut da miluv kuhu, moletin xil te tuturil lale ras rute xa ladi en. E lale kil tutut pasis tei xa be suhon, ma lanemi labit xosxa itep, ma lipol ni tuturil ha isal xat suhon tang. <sup>40</sup>Mak, ma lada xoteh angga xil lamerir labe tan, e lada xoteh ao xil xa dal xat stia. Di, lalihi rut sel xil xa di vat tuturil be nesao tangan votiang ikila itivin tuturil ak ihe ut. Di, maloh ve ut. <sup>41</sup>E tuturil ba minggon e mae tang, ma misakras mun valisalis ti. Vatin iaxa nggon, ma tahe xil xa nggeih mei di nggol len ni nggo toun.

<sup>42</sup>Moletin xil te vaeen lapol ni lingxatien tei labit lihas vin vatxeih xil ngasen xa ladi pe he tangan linaxul ti linave ut, maxa ni ha linalesae. <sup>43</sup>E vat nae tamaen ni ti vengan bit vateh meulien e Pol. Ma misemae ni moletin xil vus xa lakil xulen tangan lavut lave tas e laxul lave ut. <sup>44</sup>E moletin xil xa latakil ti xulen, bit liha sung itutou itel xat mavulut pilang xil te tuturil e lisal itela lihe ut. Ma nggo sexien ak vari, xamem vus ba maduxoh ut mameul.

### Pol Dutou ni Moletin Xil tahal Malta

**28** <sup>1</sup>Melele xa xamem vus ba maduxoh ut, malong kila sung xa aelan ak, lakesi ni ‘Malta’. <sup>2</sup>Moletin xil te rute ak labos mi xamem e

langgur pilei xamem. Lapol ni upang tei xa eilep di madali vengan xa us mus e masoh minggat xamem. <sup>3</sup>Pol mun di mileh viton av tangan vaso ni vahe upang. E melele xa di miso ni be upang, tetal tesa tei mistal nggo vanut av xil ak mei minggar xat hen e murur tang da. <sup>4</sup>Melele xa moletin xil te rute ak lapus tetal xa murur de he Pol, xil di labiteni mi xil mun tang labit, “Moletin ak, xos bas vin moletin tova. Mak iaxa tave ti neta xa tamat ti e tas, hi nar xa rakesi ni ‘Hi te Lepisien’ tamaen ni ti tangan ha vameul.” <sup>5</sup>E Pol misin rat tetal ak be upang, e neta ti taxula. <sup>6</sup>Moletin xil di ladatili tangan hen vatep mu vamot tang vamat. E melele xa ladi nousav e latapus ti neta vaxula, xil labiles nenemien nae e labit, “!Moletin ak, xos be hi tova!” <sup>7</sup>Rute xa matehe ut en, tave sotin ti ra tan na suv te aelan ak xa hisen Pablias. Xi minggur pilei xamem e milaxat kuh xamem melengien tol. <sup>8</sup>E melele nen ak, tame Pablias mesei. Ven nggan e miloh en pupu, misak ni pat dat mak. Ma Pol be nim man, miling hen da en e misis xole, ma xi mei milonge bos. <sup>9</sup>Melele xa moletin xil te aelan ak lalongeong ni, mosav xil mun xa lamesei ladi aelan ak lamei, e Hi pol ni xil vus lalonge bos rilomun. <sup>10</sup>Xil lasa sanien hao mi xamem. E xil laso viton holesok xil hao mun tangan itutou ni suse namem melele eah xa muhe reling xil.

### Pol Be Reling Malta Be Rom

<sup>11</sup>Aveti tol (3) mitavi xa mateti e Malta. Di, makamet tuturil tei na mol-Aleksandria xa texus ve an tesa tete aelan ak. Ma manggo en, maba. Tuturil ak lakesi ni ‘Dioskuri’<sup>k</sup>. <sup>12</sup>Maloh ba maduxoh taon tei e kantri tahal Sisili, xa lakesi ni Serakus. Mabas melengien tol e rute ak. <sup>13</sup>Di, maloh ba maduxoh taon tei tahal Itali xa lakesi ni Rikiam. Ut milan nen, votiang tei mistal nggo saot e mei divin komanon ni xamem. Misak ni melengien lu tang, ba maduxoh taon tahal Puteoli. <sup>14</sup>E rute ak, makamet moletin vutei xil xa labe Kristin ngamu, ma lakes xamem be madi visal xil wik tei. Di, makakao tangan mave Rom. <sup>15</sup>Melele xa Kristin xil tahal Rom lalongeong ni xamem, xil lakatil xamem. Rute xil ladatil xamem e taon xa lakesi ni ‘Von Posen na Apias’<sup>l</sup>, e rute xil ladi nga e taon xa lakesi ni ‘Im te Paten Tol’.<sup>m</sup> E melele xa Pol pus xil, xi memaal pupu e memes Hi ve xil.

### Pol Ba Mistal e Rom

<sup>16</sup>Melele xa maduxoh Rom, lamae ni Pol tangan ha itanga tasen e nim tei itel xat moletin te vaeen tei xa di miketeh xole.

---

<sup>k</sup> 28:11 E sepinien na mol-Krik, ‘Dioskuri’, koute teni be ‘Nat Hi Sius xalu.’ Hi Sius be hi tei na mol-Krik xil xa eilep mili hi sav nae xil. Natnali xalu ak lube meah e hise xalu be Kasta e Polakis. Lakesi ni tuturil ak mak vengan xa lateseh nanao nalu tete vat tuturil ak. <sup>l</sup> 28:15 ‘Von Posen na Apias’ be taon tei xa be 69 kilomita ra hal Rom. <sup>m</sup> 28:15 ‘Im te Paten Tol’ be taon tei xa be 53 kilomita ra hal Rom.

<sup>17</sup>Melele xa melengien tol mitavi, Pol mikes viton vat xil na Siu xil lamei e totanen tei. Melele xa mei ladi vituei, Pol biteni mi xil bitene, “Toxoli xil tahal Isrel, namei inggak nggoni vatxeih tei vengan xa mol-Serusalem xil latetal xat nou e lateling nou natete e he mol-Rom xil. Neta sav xa latepol ni nou temak, inou natnapol ni ti neta vasa mi moletin nar xil, mu natnapol ni ti neta vasa mun ni sexien hos xil xa avu nar xil latepispisi ni mi xir.

<sup>18</sup>Melele xa mol-Rom xil latelepis rin navan e ngongoren ak tevus, xil latehit lamae ni nou ha veok vamase vengan xa latnakamet ti neta vasa xa inou natepol ni tangan ha namat ven. <sup>19</sup>E melele xa vat xil na Siu xil latesin nenemien nae, napusi xa suse navan minggonaxon. Misak ni natesisi tangan Suv Toto tahal Rom kestang ilepis nou, tave ti neta xa inou, nenemien tesa navan tovuol vata xat tua navan xil tahal Isrel. <sup>20</sup>Mak iaxa nakes viton xamim mei nipus xamim tangan nisep kil holesok xil xa testal minou mi xamim. Ieok bei mule kila xa sen xil ak di xat nou vengan xa nake reitin e ngan xa Hi tehiti xati mi mol-Isrel xil tangan isa ni imei iteh meulien e xir.”

<sup>21</sup>Ma xil labiteni mini labit, “Mataxur ti uvei vaxo Sudea xa vahit usiluk. Mu tumem tovuol xa vaxo en vamei vatel longeongen mu sepinien tova usiluk xa vasa. <sup>22</sup>E xamem mabit mateong ni ti mu nenemien nam xil vengan xa makila xa e ut xil ngasen, moletin xil di lasepin misa ba ni vanut Kristin xil xa xouk obe tei e xil.”

<sup>23</sup>Ma xil laling xat melengien tei del Pol tangan isepin mi xil. E melengien nen ak, xil holu lamei e rute xa Pol da en. E makoe nen be duxoh vongien, Pol misep kil suse xa Hi mei ihe suv toto na moletin xil. E nggo Rae xil na Mosis e tisen xil na provet xil xa ladi e Vanuvei na Hi, xi di misak tova tang tangan Siu xil ak mei lake reitin e Iesu. <sup>24</sup>Rute e xil lake reitin e sepinien nan, e rute e xil, latake reitin ti en. <sup>25</sup>Ma xil di langor mi xil mun tang. E melele xa labit ti lava, Pol miso sepinien ak mi xil bitene, “Naha xa Ninin Eo tehiteni mi avu namim xil texo provet Aesea temal <sup>26</sup>xa biteni bit,

‘Ha uhiteni mi moletin xil ak uhit,

‘Muteong vuma ... munalong kil ti neta.

Muketeh vuma ... munapus kil ti neta.”

<sup>27</sup>Sexien ak istal mi xil vengan xa, e nenemien nae, di lalong ras nou,  
di laki xol vurange,  
e di label xat mete.

Vahit linapol ni ti namak,

mete mikila vapus nou,

vurange mikila valong nou,

e nenemien nae mikila wakil kuh naha xa di napol ni.

Mak, ma xil lakila laviles meulien nae,

ma inou, nikila niteh meulien e xil.’ ”<sup>n</sup>

<sup>n</sup> 28:27 Aes 6:9-10

<sup>28</sup>E hoxalite te sepinien na Pol, xi biteni bit, “Mak, ma ieok bei mukila xa taxeak, longengen hos na Hi usil suse tete meulien en ba ngamu mi ngan xil xa latave Siu ti. !Xil lilong xati e lineket en!”

<sup>30</sup>Huram lu (2), Pol de nim tei xa di minggale e aveti xil vus ni vatu nan. Inggak, di minggur pilei moletin xil ngasen xa mei di lasao ni. <sup>31</sup>Xi di misetu mi xil usil suse xa Hi mei ihe Suv Toto na moletin xil, e di pispisi mi xil usil Suv Iesu Kristo. Moletin ti tasep xole, e xi besi xi tang tangan vasepin mi moletin eah munamun.

# 1 Timoti

## *Sepinien xa Diamu te 1 e 2 Timoti del Taetas*

Tisen xatel ak, 1 e 2 Timoti del Taetas, lakes xatel ni 'tisen tol xa ba mi pasta xil.' Labiteni mak vengan latesep usil sexien na Kristin xil e sias e sexien xa momal tangan elda e dikon xil lipol ni e meulien nae (1 Tim 3:2-13, Taet 1:6-9). Pol tetis uvei tei teha mi Timoti (1 Timoti), di, tetis tei mun teha mi Taetas tetutou ni melengien xil xa Polien sapta 28 tesepe usili.

Polien sapta 28 biteni bit melele xa Pol tete Rom, tete pe he kavmen tahal Rom e di lateling moletin te vaeen xil di lateketehe xole e nim tei (Polien 28:30-31). E tisen sav xil xa di e Vanuvei Eo e vanuvei sav xil mun labiteni labit kavmen tahal Rom lamaen ni ba ven mase.

E kakaoen xil nan xa tetutou ni melele nen ak, Taetas, Timoti e moletin sav xil mun latemos en. E melele xa ba latesao ni moletin xil e aelan tahal Krit, Pol teling Taetas tangan ilaxat kuh Kristin hu xil ixoni pasta nae (Taet 1:5). E melele xa latetuxoh taon tahal Efeses, Pol teling Timoti tangan ilaxat Kristin xil e rute ak (1 Tim 1:3). Di, Pol tehe reling xalu e ba tesao ni Kristin xil e taon sav xil. Melele xa tetuxoh taon tahal Pilipae, Pol tetis uvei xalu ak, 1 Timoti e Taetas, tangan vatutou ni xalu e polien nalu.

Di, Pol tetilomun tehe Rom. Melele xa tetuxoh Rom, ngan xil te kavmen latetal xati rilomun e lateso ni tehe nim te xeih. Melele xa latelepisi e kot, latehit navehi ti lihasi imat. Melele xa tehur longeongen teni, tetis uvei tei mun teha mi Timoti (2 Timoti) e tehiteni mini tangan itemanon mei isao ni. Tave ti neta xa tekila xa imat, neketen nan texeih tamu. Tisen kor na Pol ak tepisen ni xa neketen nan te xeih (2 Tim 1:3-14), en tehei pupu tangan pispisien xil te sias imal tevi (2 Tim 3:10-17), e en tehei mak mu tangan vat xil na moletin xil te sias, meulien nae imese ra tesaen vehakut (2 Tim 2:1-26).

## **Sepinien xa Diamu te 1 Timoti**

### **Visi tetis uvei ak?**

Tetutou ni tumulen xil xa di e vanuvei te Polien na Eloheoh Xil, kavmen tahal Rom latemaen ni Pol tehe reling nim te xeih. Pol teha tangan vasao ni Kristin xil e ut xil ngasen. E melele nen ak, Timoti xal Taetas lutehusili. Pol teling Taetas tangan ilaxat ngan xil te sias tahal Krit (Taet 1:5). E teling Timoti tangan ilaxat Kristin xil xa lateti e taon tahal Efeses (1Tim 1:3). Melele xa Pol di tamu tepol e

provins tahal Masedonia, telongeong ni xa xalu lutekameti texeih e polien nalu. Tesak ni, tetis sepinien xil ak teha mi Timoti tangan vatutou ni (1:1) e huram xa tehe sangas ni 64 AD (ngan ak huram 32 tetutou ni maten e mea rilomunen na Iesu). Melele xa tetisi tevus, Pol tehe Rom. E rute nen ak, moletin xil te vaeen tahal Rom latetal xati, e lateso ni tehe nim te xeih vatei mun.

### **Visi iaxa tevuli uvei ak tetiamu?**

Pol tetis sepinien ak teha mi Timoti (1:2). Timoti tehe moletin hu tei xa testal texo taon tahal Listra (Polien 16:1). Ninen tehe ate-Siu tei e tamen tehe ngan Kris tei (Polien 16:1). Timoti tehusil xat Hi e tetutou ni Pol e polien nan (Polien 16:3; 17:14; 18:5), e lutepol vituei e taon tahal Efeses (Polien 19:22). Pol, eheien nan teti Timoti pupu e tekes xati texoni horamue nan xati (1:2).

### **Pol tetis uvei ak veneh?**

**Pol en tehei tangan vassel xat Timoti usil moletin xil te luvosen** - E taon tahal Efeses, rut moletin ngan xil di lateluvos Kristin xil. Latehiteni latehit holesok xil vus te ut etan tesa pupu (4:4). Tesak ni latepispisi mi moletin xil latehit rut anien xil tenavos ti te anien en (4:3) e Kristin xil linateli ti (4:3). Ngan xil ak latehiteni mi moletin xil xa xil kestang latekil sepinien xil na Hi xa koute teni di minggus, tesak ni moletin xil latehusil rae nae xil (1:4-11).

**Pol en tehei tangan pispisien xil vus na Timoti imal tevi** - Pol tesel xat Timoti tangan ihur xat neketen nan e Iesu, ipispisi ni pispisien xa momal, e isak ni meulien nan mun imal tevi pe met Hi (3:14-16; 4:9-16; 6:20-21).

**Pol en tehei tangan vahit kil sexien hos xil na pasta tei mi Timoti** - Pasta tei ipol ixeh e meulien nan melele xa ihit valaxat kuh moletin xil na Hi (1:18-19; 4:6; 4:9-12; 6:11-16). Ikil kuh Vanuvei Eo e ihusil xat sepinien xil teni (4:13-16), e ihe moletin tei te pispisien. Vehakut, nenemien nan ihos mi moletin xil vus (5:1-2) e meulien nan imal tevi.

**Pol en tehei tangan vahit kil sexien hos na vat xil te sias mi Timoti** - Xosxa moletin tei mei be elda mu dikon tei te sias, sexien nan imal (3:1-13; 5:17). Xosxa sexien nan imal, ipet rat his Hi ihe nesao e holesok xil te sias iloh imal.

**Pol en tehei tangan vahit kil polien hos te sias mi Timoti** - Vat xil te sias lilaxat kuh moletin nae xil. Lipol ixeh tangan lilaxat ngan xil xa lamesei, ngan xil xa labe hoeo, e tunau xil mun (5:3-10). Melele xa moletin xil xa latakil ti Hi lapus sexien hos nae xil, lipus kila sung xa eheien na Hi be reitin (3:7; 4:15).

**Pol en tehei mun tangan vahit kil suse te sisen** - Melele xa ramei vituei ve sisen, nenemien nar e Hi imal e iexir naxat mosav ti (2:1-8; 4:4-5).



**Vatit nenemien tei te uvei ak de 1 Timoti 4:12**

*Onamaen moletin xil ti linanem male ni xouk vengam xa obe horam maxoe tei tang. !E-e! Uhe vat tei na ngan xil xa laneket ixo sexien hos xil ak: ixo sepinien nam, kakaoen nam, eheien nam e mosav xil, e ixo neketen nam mun. E holesok xil vus xa di opol ni, meulien nam imese tevi.*

**Naha iaxa de sepinien ak?**

1. Pispisien xil xa momal tangan rihusili (1:1-20)
2. Pispisien xil usil polien te sias (2:1-3:16)
3. Pispisien usil sexien na vat xil te sias (4:1-6:21)

**Sepinien xa Diamu**

**1** <sup>1</sup>Inou Pol iaxa nadis uvei ak. Nabe eloheoh tei xa di napol e his Iesu Kristo. Hi xa di miteh meulien e xir e Iesu Kristo xa neketen nar di en, xalu iaxa luling nou e polien ak.

<sup>2</sup>Bos makoe minuk Timoti. Ve neketen naralu, nalonge nggoni ngan xa xouk obe horamue navan xati. E nasis tangan eheien hos, esaen e tomat na Hi Tamer e Iesu Kristo, Suv nar, iti minuk.

**Selxatien Tengan Timoti Nahusil ti Pispisien Te Luvosen**

<sup>3</sup>Timoti, ieok bei xa xouk otat e hal Efeses, nggoni ngan xa natehiteni minuk tuei melele xa natelinguk oteta en e inou natehe provins tahal Masedonia. Rut moletin xil xai di lapispisi ni hisit pispisien sav xil xa tamal ti usil suse te neketen, e ieok bei xa uhiteni mi xil tangan linapol ni ti mun namak. <sup>4</sup>Uhiteni mun mi xil tangan linapispisi ni moletin xil ti mun naxo tumulen te luvosen nae xil mu naxo vanut his avu na mol-Siu xil xa hoxalite teni tovuol. Hisit tumulen xil ak di pol ni ngongoren xil tang, e tahusil pispisien xil na Hi ti xa rakila nggo neketen nar kestang. <sup>5</sup>Vatit selxatien ak be tangan isak ni eheien iti e xamim xa di mistal nggo nenemien xa memese, nggo neketen xa be reitin, e nggo sexien xil xa mukila mubit momal pe met Hi. <sup>6</sup>Rut moletin namim xil latehusil hisit sexien hos xil ak tetiamu. E taxeak, xil lakavitou ni sexien xil ak e dit lapurun melengien nae xil e sepinien xil xa be neta sav tang. <sup>7</sup>Xil di labiteni labit labe tisa xil te Rae na Hi. E tave ti neta xa di lamangang vehakut nggoni ngan xa lakilakil kuhi, xil latakil ti vari koute te holesok xil xa di labiteni.

<sup>8</sup>Rakila xa Rae na Hi bos mak mu xosxa ranggusil kuhi nggo sexien xa momal. <sup>9</sup>Rakila xa Rae xil ak, Hi tenapol ni ti tangan ti vama ni ngan xil xa langgusil sexien xil xa momal ngamu. E-e. Hi tepol ni xil tangan vama ni ngan xil xa sexien nae xil misa: ngan xil xa langgur xoteh rae xil e labe vatxeih xil; ngan xil xa lapol misa e latakil ti Hi; ngan xil xa latamerere ni

Hi ti e meulien nae di sotin rani; ngan xil xa di labas vin mosav xil e labas vin tamexil e ninexil mun; <sup>10</sup>ngan xil xa di lapat vituei e latateli ti mu e tiramue xil xa di lapat vituei del tiramue mun tang; ngan xil xa di lakan ni moletin xil e lapos ni xil mei labe slev; ngan xil xa di laluvos vehakut e ngan xil xa di laluvos ni his mosav e koten; e ngan xil xa di lapol ni neta sav xil mun xa misav ni pispisien xil te reitinen na Hi. <sup>11</sup>Pispisien xil na Hi nggusil longeongen hos xa xi misa ni minou tangan nihithiteni mi mosav xil. Longeongen hos ak bos pupu e nggo Hi xa be eilep xa be eilep pupu.

### Pol Memes Hi ve Eheien Hos Nan

<sup>12</sup>Inou nasa memesien mi Iesu Kristo, Suv nar, vengang xa xi miling nenesien nan e nou tangan nipol mini, e misa xeihen minou tangan nikila nipol itela. <sup>13</sup>Tetiamu, natesepin tesa teha xati, natepol ni texeih mi ngan xil xa latehusili e natehe vat xaren tei. E neta sav xa temak, Hi en tesae e nou vengang xa natnaneket ti mu e Iesu e natnakil ti xa di natepol tesa. <sup>14</sup>E Iesu Kristo, Suv nar, tepisen eheien hos nan minou xa eilep pupu, e tesak ni nou nateling neketen e eheien navan teti en. <sup>15</sup>Nisep usil neta tei xa be reitin, ma bos uhur xati: 'Iesu Kristo temei e ut etan tangan iteh meulien e moletin tesa xil.' E inou nasa mak mu mili mosav xil. <sup>16</sup>Ve rin ak, Hi tehosei nou tangan en isae e nou e nasa pangasien ti minou. Xi tepol ni minou tangan ngan teisav xil xa mei lineket e Iesu e lihur meulien xa misakras vavus, xil lipus kil nenemien hos nan xa teviei pupu minou. <sup>17</sup>!Reitin mak! !Ripet rat his Hi! !Xi kestang be Hi e be Suv Toto vehakut! Metexir misakras vapusi, e xi dat nggoni ngan tang, misakras vamat. !Bos mak mu xa xir rimerere ni e rimesi! !Reitin!

### Pol Misel Xat Timoti tangan Isoh Ixeih e Neketen Nan

<sup>18</sup>Timoti, natuxuli, di nasa selxatien ak minuk xa nggusil sepinien xa provet nar xil lateke mese ni usiluk tetiamu. Xosxa unem xat sepinien xil ak e uhusil xati, ma mei uhe moletin te vaeen hos tei na Hi xa ivae ixeih e rin nan. <sup>19</sup>E melele xa upol ni, usoh ixeih e neketen nam e uhusil kes ni sexien xil xa okila obit momal pe met Hi. Rut moletin xil latapol ni ti sexien xil xa lakila xa momal, e di lapurun neketen nae. Xil langgoni vatihos te tuturil tei xa mikil suse xa momal e tahusili ti. E misak ni tuturil nan merir e meulien nan mikesae. <sup>20</sup>Moletin lu xa lupol mak, tei hisen Haemeneas, e tei mun xalu, hisen Aleksanda. Mak ma, inou nasil rat xalu ra xir tangan ha lalihur pangasien e he Temat. E suse ak, xalu lalipus kila xa lalnispisi ti mun ni luvosen usil Hi.

### Selxatien usil Melele xa Moletin Xil Mei Lamot mi Hi

**2** <sup>1</sup>Timoti, ieok bei pupu tangan xamim musa sisen xil mi Hi ve tutouen, ve memesien, e musis mun ve moletin xil vus, <sup>2</sup>ve ngan xil

xa labe suv toto, e ve ngan xil mun xa labe eilep xa di lalaxat xir. Isak ni xir rikila riti e hosien e tomat itel mosav xil; e rikila rimot mi Hi e ripisen merereen mi mosav xil. <sup>3</sup>Hisit sisen xil ak bos e momal pe met Hi. <sup>4</sup>Xi ien bei vateh meulien na moletin xil vus e vapol ni xil mei lakil pispisien nan xil te reitinen xa mak:

<sup>5</sup> Hi be tei takes;

e moletin tei takes misoh pe met Hi e rin na moletin xil te ut etan, xi be Iesu Kristo.

<sup>6</sup> Xi maen xoteh meulien nan mei mat tangan vaxal rat meulien na moletin xil vus ra maten.

E melele xa temat ve xir, xi tepisen ni xa melengien momal tangan Hi vateh meulien na moletin xil. <sup>7</sup>Ve rin ak, Hi tepol ni nou mei natehe eloheoh nan e tesil nou tangan niha nihithiten longeongen hos nan mi ngan xil xa latave Siu ti, e nipispisi mi xil usil suse te neketen xa be reitin. !Ngan ak reitin, nataluvos ni ti!

<sup>8</sup> Misak ni, e melele xil ngasen xa ti mumei vituei tangan mumot mi Hi, ieok bei xa tiramue xil liling tesaen, ngongoren e ekaten nae xil, e mei lisis mi Hi. <sup>9</sup>E rin nen tak, atou xil linanem ti nahe holu usil eising nae xil. Linapilas ni hilixil, vurangexil, mu hiraexil ti e linavut xil ti natel eising xil xa mani nen nggeih. !E-e! Ieok bei tangan lising xol xil ni sexien xil xa ipisen merouen e merereen nae mi mosav xil. <sup>10</sup>Ihos mak mu xosxa atou xil lipilas ni xil itel polien hos xil xa ipin ni atou xil xa labiteni labit di lamerere ni Hi. <sup>11</sup>Melele xa tiramue xil di lapispisi, atou xil linatungal ti. Xil ti lihur pispisien xil ak e ti lilong xati itel nenemien te merouen. <sup>12</sup>Inou natamaen atou xil ti tangan ti lipispisi mi tiramue xil mu lave vat na tiramue xil. Atou xil litit votei itel merereen e melele te pispisien. <sup>13</sup>Vengan xa Hi tepol ni Adam mu tetiamu, e Iv, tetutou tang. <sup>14</sup>E tenave Adam ti iaxa temot e luvosen. Tehe atou vari tang iaxa temot e luvosen e tehur xoteh rae na Hi. <sup>15</sup>E Hi iteh meulien e atou xil melele xa ti lileh horamue xil, xosxa meulien nae di pisen neketen, eheien, merouen, e sexien xil xa momal pe meten.

### Sexien Hos Na Elda Xil

**3** <sup>1</sup>Sepinien matu ak be reitin, “Xosxa moletin tei bit mei vahe elda tei te sias, naha xa xi ien bei tangan vapol ni bos pupu.” <sup>2</sup>Mak ma moletin xa ihe elda, ihe hisit moletin ak: sexien nan imese tevi, nenemien nan iti atou nan xati kestang, ihe moletin xa ihusil nenemien hos xil kestang, mikila ixuxou kuhi ve sexien nan xil, e ihe hisit moletin tei xa mosav xil di lamerere ni. Xi ihe hisit moletin xa di nggur pilei moletin xil e tim san, e xi mikila vapispisi ni sepinien na Hi mi mosav xil. <sup>3</sup>Xi nave moletin temunien ti, mu nave moletin te vaeen ti, sexien nan imerou tang. Xi ti naso sepinien xil ti xa

nggeih, e ti nave ho mani ti. <sup>4</sup>Xi ikila ilaxat kuh tim san e horamue nan xil ti limerere ni e ti lilong xat raen. <sup>5</sup>?Vengan moletin xa misakras valaxat ngenen xil, ma xi ikila ilaxat kuh moletin na Hi xil sung itep?

<sup>6</sup>Xi nave neta hu ti e neketen nan. Vengan xa xosxa neketen nan be neta hu, nahe ti ipo xi ihe nesao e nenemien nan. Imak, ma Hi isa pangasien mini ixoni ngan xa misa ni mi Temat ve hisit sexien ak. <sup>7</sup>Sexien nan xil ipol ni moletin xil xa latahul Hi ti lipus kila xa xi be moletin hos tei. Maxani, melele xa Temat isak pisi, xi imot e ipol ni neta ngan xa isak ni ihe unoun pe met moletin xil.

### Sexien Hos Na Dikon Xil

<sup>8</sup>Usil sexien nen xil ak, dikon xil mun lihe hisit moletin xil xa mosav xil di lamerere ni xil. Xil ti linavilhiles sepinien xil ti, ti linave vat munien ti, e linave ho mani ti. <sup>9</sup>Xil ti lihur xat neketen nae iti mi xil e lihusili itel nenemien xa lakila labit momal pe met Hi. Reitinen te vatit neketen ak texus tetiamu, e taxeak, Hi di bit rati mi xir. <sup>10</sup>Itiamu ni ngan xa moletin tei ihit ihur polien ak, xamim muketeh kuhi mupus meulien nan. Xosxa neta ti nasa nata xati, ma xi ikila ihur polien te dikon. <sup>11</sup>Atou nae xil lihe hisit atou xil xa moletin xil di lamerere ni xil. Linave atou te sepututen ti. Sexien nae ihusil nenemien xa momal e lihe hisit atou xil xa mosav xil di laling nenesien nae di e xil. <sup>12</sup>Dikon tei, nenemien nan iti atou nan xati kestang, e xi ihe hisit moletin mun xa mikila milaxat kuh tim san. <sup>13</sup>Dikon xil xa di lapol bos, mosav xil ti limerere ni xil. Imak, ma ulixil nakan ti melele xa lasep usil neketen nae e Iesu Kristo.

### Hi Misak ni Reitinen Nan xa Tesoson ni Tetiamu, Bemei e Valkesao

<sup>14</sup>Nanemi nabit nave nousav ti, nihat nipusuk. E bos mak mu xa nadis uvei ak bat minuk, <sup>15</sup>vengan xosxa niraru, e xouk ukil sexien xil ngamu xa ngan xil na Hi ti lihusili. Xir ramos e Sias na Hi xa meul, e ranggoni pos e seteman xil teni xa di misuv xat vesis del veat te sepinien te reitinen. <sup>16</sup>Reitin mak, vatit neketen nar xa Hi tesoson ni tetiamu bos pupu, e xosali, bithiteni xa be Iesu Kristo:

Tehe xi iaxa temei e ut etan e mei tehe moletin reitin.

Tehe xi iaxa Ninin Eo tesa xeihen mini tangan vapisen ni xa xi be Nat Hi.

Tehe xi iaxa masxaxa xil latepusi.

Tehe xi iaxa latesep usili mi ngan xil xa latave Siu ti.

Tehe xi iaxa moletin xil holu te ut etan laneket en.

E tehe xi mun tang iaxa Hi tehur rati tehe ut nesao e telingi e von merereen.

### Paul Misep usil Tisa Xil te Luvosen

**4** <sup>1</sup>Ninin Eo bit kila xa e melengien xil te Vongkor, moletin xil holu listokovein neketen nae. Xil limaen ninin tesa xil liluvos xil e lihusil

pispisien nae xil. <sup>2</sup>Hisit pispisien xil ak mistal nggo moletin te luvosen xil xa di lasepin nggot hilibexil tang, e latahusil ti mun reitinen. Mak ma xil latakil ti naha xa bos e naha xa misa. <sup>3</sup>Hisit moletin xil ak di lasep xol moletin xil tangan linateli ti. E di lasep xol xil mun labit rut anien tavos ti tangan lava ni. E Hi pol ni anien xil vus bos, ma xir xa di ranggusili e rakil reitinen nan, rakila ria ni itel nenemien te memesien. <sup>4</sup>Holesok xil vus xa Hi pol ni bos. E melele xa rangguri e ranggani del sisen te memesien, neta tovuol xa xir ravit raso ni vaha. <sup>5</sup>Rakila ravuri vengan xa Hi tehiteni ngamu texo sepinien nan xa xil vus bos,<sup>a</sup> e ramesi tuei ven.

#### Pol Misel Xat Timoti Tangan Ihe Moletin Hos te Polien na Iesu Kristo

<sup>6</sup>Xosxa usa pispisien xil ak mi ngan xil xa di langgusil xat Iesu, xouk uhe moletin hos tei te polien nan. E melele xati nen tak, neketen nam e Iesu imeul ihe eilep ixo sepinien na Hi e ixo pispisien te reitinen xa otehusili tetiamu tuei temei. <sup>7</sup>Ngan xil xa, vehakut, di lasep usil tumulen te luvosen xil na Siu xil, xa misakras vapol ni ti neta vahos e meulien na moletin xil, onamaen ni xil ti tangan lamos e xamim. Bos mak mu xa uvue xatuk tangan uhusil sexien xil xa isak ni xouk mei umal pe met Hi. <sup>8</sup>Xosxa ripol ni tenbexir ixeh mu, ngan ak ihos vuteili tang. E xosxa ripol ni neketen nar ixeh mu tangan rihusil xat kuh Hi e meulien nar, ngan ak ihos mak mu. Vengan xa sexien xil ak mikila ipol ni meulien nar ihos taxeak xa rameul ra di, e ihos mun e meulien xa rihuri itutou. <sup>9</sup>Sepinien ak be reitin, e bos xa moletin xil lihuri e linem xati. <sup>10</sup>Io, ve rin ak, rapol nggeih e vetin nar mileh tangan ravusil sexien xil xa bos. Rakila rapol ni vengan raling nenesien nar e Hi xa meul. Xi be Hi te teh meulien en na moletin xil vus, e mi ngan xil mak mu xa laling neketen nae e Iesu.

<sup>11</sup>Pispisien xil xa nadisi xiak, upispisi ni mi ngan xil xa di olaxat xil tangan ti lilong xati. <sup>12</sup>Onamaen moletin xil ti linanem male ni xouk vengan xa obe horam maxoe tei tang. !E-e! Uhe vat tei na ngan xil xa laneket ixo sexien hos xil ak: ixo sepinien nam, kakaoen nam, eheien nam e mosav xil, e ixo neketen nam mun. E holesok xil vus xa di opol ni, meulien nam imese. <sup>13</sup>Ha ituxoh melele xa nihat, xouk ti upol ni sexien hos xil ak: ti uvuli sepinien te Vanuvei Eo mi moletin xil, ti uhit kil koute teni e melele xa ti usetu ni sepinien na Hi mi xil, e ti upispisi mi xil ni suse xa lihusili itep e meulien nae. <sup>14</sup>Upol itel sanien xa Hi telingi e meulien nam, e onapat ti natela. Unem xati xa sanien ak temei e xouk melele xa provet xil latesepin ni, e elda xil lateling hexil e xouk. <sup>15</sup>Upol vehakut ni holesok xil ak e usa xouk ven, tangan isak ni moletin xil vus ti lipus kil polien hos xil nam. <sup>16</sup>Ulxat kuh meulien nam e ulxat kuh pispisien nam xil mun. Upol sen sexien hos xil ak, vengan xosxa upol ni,

<sup>a</sup> 4:5 Sen 1:31; 2:18; 9:3

ma Hi iteh meulien e xouk e iteh meulien e ngan xil mun xa di lalong pispisien nam e di lalong xati.

**Moletin Xil na Hi Ti Lipol Vituei Ixoni Ngan  
Taxa Xil Labe Vatimol Tei Takes**

**5** <sup>1</sup>Timoti, xosxa momatu tei pol misa, onasepin ti naxeih mini. !E-e! Bos mak mu tangan usepin kuhi mini ixoni ngan taxa xi be tamom tei. Usil sexien nen tak, upol ihos mi horam maxoe xil ixoni ngan taxa xil labe tumali xil. <sup>2</sup>Mi tovolih xil, usepin kuhi mi xil ixoni ngan taxa xil labe ninom xil. E osepin mi atul maxoe xil itel nenemien xa memese ixoni ngan taxa xil labe tumahin xil.

**Ulxat Kuh Tunau Xil Itep**

<sup>3</sup>Uhiteni mi moletin xil lilaxat kuh tunau xil xa moletin nae xil tovuol tangan lalaxat xil. <sup>4</sup>E xosxa tunau tei, horamue xil mu havneli xil ladi, ma xil vari lilaxati ixoni ngan xa Hi tehiteni.<sup>b</sup> Imak, ma xil ti lisa rilomun ni lelatatien mini, vengan xa Hi memaal ve sexien xil ak. <sup>5</sup>Tunau tei xa moletin nan tovuol tangan valaxati, xi di miling nenesien nan e Hi kestang, e di misisi ve tutouen e melengien e vongien. <sup>6</sup>E tunau tei xa di misa xi ve sexien tesa xil te ut etan, munalaxati ti. Tave ti neta xa meul da, neketen nan mat ngamu. <sup>7</sup>Usa pispisien xil ak mi moletin na Hi xil tangan lilaxat kuh tunau nae xil. Imak, ma moletin ti nasepin nasa mi xil. <sup>8</sup>E xosxa rut moletin xil latalaxat kuh tunau nae xil ti mu ngan xil mun xa ladi e vatimol nae, xil lapol ni sexien tei xa isa mak mu mili xosxa latestokovein neketen nae mu latnaneket ti e Hi.

<sup>9</sup>Tunau xil xa mututou ni xil, mutis hisexil ihe vanuvei te lelatatien. Ngan xil ak, haram nae ili hanutap tol (60), e melele xa lateteli, nenemien nae teti tiramue nae xati kestang. <sup>10</sup>Tunau xil ak, moletin xil lipus kil sexien hos xil ak e meulien nae xa, tetiamu, latehe atou xil xa latelaxat kuh horamue nae xil, latehur pilei moletin xil e tim sae, e latetutou ni moletin xil na Hi e sexien te merouen. Melele xa latepus moletin tei xa tekameti texeih e meulien nan, xil latesa tutouen mini. E xil latemaen xil ve polien xil vus xa tehos.

<sup>11</sup>Tunau xil xa di mulaxat xil, xil lipol ni hitxatien tei xa lisa sen meulien nae mi Iesu e linateli ti mun. Mak, ma ngan xil xa latave tovolih pupu ti, munamaen ti tangan linatis hisexil ti nati vanuvei namim. Vengan melele xa eheien nae bas xil e misak ni xil labit lavur xoles tiramue tei mun, xil likila likavitou ni Iesu Kristo e liteli mun. <sup>12</sup>Mak, ma xil lihur xoteh hitxatien xa latepol ni tetiamu tetel Hi, e lilihi pangasien na Hi imei e xil mun tang. <sup>13</sup>Ma xil lihur sexien te mahen e tit likakao likapis e tim xil vus.

<sup>b</sup> 5:4 Eks 20:12

E ngan xa isa pilei mak, xil ti liseputut e ti lisep usil holesok xil xa namal ti. <sup>14</sup>Mak, ma bos pupu xa tunau xil xa latave tovolih ti, liteli rilomun, lileh horamue xil, e lilaxat tim sae xil. Imak, ma ngan xil xa labit lasep xar ni xir xa raneket e Iesu, xil lasakras vengan xa sexien xa di rapol ni mi tunau nar xil ak momal tang. <sup>15</sup>E rut tunau nar xil latekavitou ni suse xa momal ngamu, e latehusil suse xa tamal ti xa Temat ien bei tangan lavusili.

<sup>16</sup>Xosxa atou tei xa mineket e Hi mikila xa tunau tei de vatimol nan, xi ihuri mei ilaxat kuhi. Nalingi ti nate he elda xil te sias, maxani, nasa polien nahe holu mi xil. Imak, ma elda xil ak lakila lilaxat tunau xil xa ladit tasexil.

### Selxatien mi Timoti Tangan Ipiisen Suse mi Vat Xil te Sias

<sup>17</sup>Elda xil xa di lalaxat kuh moletin xil te sias, xil likila lihur merereen e huit polien nae, vengan xa xil di lapol nggeih tangan lavithiten sepinien na Hi e di lapispisi mi moletin xil. <sup>18</sup>Xil lihur huit polien nae ixoni ngan taxa Vanuvei Eo di misep usili bit,

*“Xosxa buluk sam di pol minuk,  
onavar xol vulongen ti, umaen ni ianien ti.” (Dut 25:4)*

E Vanuvei Eo biteni mun bit,

*“Ngan xil xa di lapol,  
momal tangan lihur huite teni.” (Luk 10:7)*

<sup>19</sup>E xosxa moletin tei takes bit sepinien tei ba xat elda tei, onatemanon ti onake reitin en. Utatili ituxoh melele xa moletin lu mu tol mun mei latihit sepinien ak iha xati, ti, ulepis elda ak sung. <sup>20</sup>Elda xil xa lapol ni tesaen, uhit rat tesaen nae xil pe met moletin xil na Hi. Imak, ma ngan teisav xil, ulixil ikan tangan lapol ni tesaen.

<sup>21</sup>E pe met Hi, pe met Iesu, e pe met masxaxa xil mun, nasel xatuk Timoti: xosxa elda tei mot e tesaen, uhusil sen naha xa nabiteni minuk xiak. Upol ni imak mi elda xil vus, tave ti neta xa xi be timue hos tei nam. <sup>22</sup>Onatemanon ti onaling hem e moletin tei tangan mei vahur polien na Hi. Vengan xosxa xi imot e tesaen, moletin xil iexil iatuk sung iti en. E rin nam, meulien nam imese tevi, onamot ti e tesaen. <sup>23</sup>(E onamu oei ti kestang, umu ti uae vuteili mak ixoni mersin tangan itutou ni vangom xa di pangas vehakut e meseien sav xil nam.)

<sup>24</sup>E rin te lepisien, tesaen na rut moletin ngan di kesao, e moletin xil vus lakila. E rut moletin ngan, tesaen nae xil di minggus e istal sung e melele te lepisien. <sup>25</sup>Usil nenemien nen tak, sexien hos xil mun, rut moletin ngan di lapol ni bemei kesao, e rute ngan xil dit lapol xuxus ni. E sexien xil vus misakras vaxus pe met Hi.

### Selxatien Ba mi Slev Xil xa Langgusil Xat Iesu

**6** <sup>1</sup>Nasel xat tua nar xil xa labe slev tangan ti limerere ni vat nae xil. Vengan xa xosxa linamerere ni xil ti, ma mosav xil lisepin isa iha

mi his Hi e pispisien nar xil. <sup>2</sup>Xosxa slev tei, vat nan mun di minggusil xat Hi, slev ak nanem male ni ti e nasepepamen ni ti vengan xa xalu lusukul vituei. !E-e! Xi ipol ihos pilei mak mu mini vengan xa xi di dutou ni moletin tei na Hi. Reitin, eheien nan iti en ihe holu mu vengan xa lube tua usil neketen nalu. Timoti, upispisi mi moletin xil ni holesok xil ak tangan ti lihusili.

### **Selxatien Usil Voh te Mani**

<sup>3</sup>Rut moletin xil di lapispisi ni moletin xil ni pispisien xil te luvosien xa misav ni pispisien na Iesu Kristo. Naha xa di lapispisi ni tapisen suse ti xa Hi ien bei tangan moletin nan xil lavusili. <sup>4</sup>Melele xa moletin ngan xil lapol ni sexien xil xa mak, pisen ni xa xil lapolu ni koaien, e latakil ti naha xa di labit usili. Xil latalang vengan labit ti lisep mah usil mavulut sepinien xil vus xa di e tumulen matu na Siu xil. Hisit sexien xil ak di pol ni moletin xil labe elu ni xil, iexil mikat, di lasuhol xil, e di lanem misa ni mosav xil. <sup>5</sup>Vehakut di labae mi xil. E vengan xa di tuei latepol ni sexien xil ak nousav temeï, xil latapus kil ti mun naha xa be reitin e naha xa be luvosen. Xil ba di lapispisi mi moletin xil ni suse xa ti lihusil kuh Hi en, vengan xa di lanemi labit likila lihur holesok xil ihe holu ixo en.

<sup>6</sup>Be reitin xa di ranggur holesok xil te neketen xa bos melele xa ranggusil kuh Hi e ramaal tang ve holesok xil xa di e hexir ngamu. <sup>7</sup>Melele xa latepes xir ratemeï e ut etan, rateka hon tang. E melele mun xa rimat, rika hon tang riha. <sup>8</sup>Ve rin ak, xosxa rut anien ar e rut eising nar di, ma rihesi xir tang ven. <sup>9</sup>Moletin xil xa labe ho mani lakila lipol ni tesaen xil tangan lavuri. Suse te mani nggoni voh tei xa boh xol nenemien e eheien nae tangan lapol vasa e lapurun meulien nae. <sup>10</sup>Reitin mak, eheien te mani be vatite te sexien xil holu xa misa. Mani telihi nenemien na moletin xil holu latehe sotin reling pispisien te reitinen usil Iesu Kristo ngamu. E xosali ak, meulien nae di pangas pupu ve holesok tesa xil xa di latepol ni.

### **Selxatien Usil Kakaoen Hos na Moletin Xil na Hi**

<sup>11</sup>E rin nam Timoti, vengan xa xouk obe moletin tei na Hi, onahusil ti sexien xil ak vari. !E-e! Uhusil hisit sexien xil xa Hi ien bei xouk tangan ti upol ni e onahe mah ni ti. Meulien nam imese, e sexien nam xil imal tevi. Uling nenesien nam e Hi, e ulong xati vehakut. Eheien nam iti e mosav xil, e utamerou mun ni sepinien nam xil. <sup>12</sup>E rin te neketen nam, upol ixeh ven, ixoni ngan xa xouk ode lohen tei. Xosxa upol imak, ma uhur huite teni xa be meulien sal. Hi tekesuk tangan mei uhuri e melele xa otehit rat neketen nam pe met vanut moletin xil holu. <sup>13</sup>Pe met Hi, xa misa meulien mi holesok xil vus te ut etan, e pe met Iesu, xa tehit rat reitinen usil xi mi Pontas Paelet, nasel xatuk mak: <sup>14</sup>uhusil kuh holesok



xil vus xa Hi ien bei tangan upol ni ixo sexien hos xil xa mosav xil lasakras lasepin vaha minuk ven. Onatam ras ti pispisien nan ha ituxoh melele xa Iesu Kristo, Suv nar, itilomun en. <sup>15</sup>Xi itilomun imei e melele xa Hi ipusi ihit imal.

Hi ak vari, lelatatien xil vus de hen e momal tangan lipet rati.

Xi be Suv Toto na suv toto xil vus,

e be Eilep na eilep xil vus.

<sup>16</sup>Hi ak kestang ita xa ita.

E vengan miehen xa de vontoen nan mahulong pupu,

moletin xil lasakras lave sangas visali e lapusi.

Moletin xil vus lisa merereen mini

e lipus kil xeihen nan ha vuma ... navus ti vatova.

Reitin.

<sup>17</sup>Moletin xil xa lapolu ni holesok xil te ut etan, usel xat xil tangan ti linavut xil ti. Bos mak mu tangan liling nenesien nae e Hi, e linaling nenesien nae ti e holesok xil te ut etan xa mikila ikesae reling xil. Hi di misa sen holesok xil holu pipin tangan ti rihesi xir ven. <sup>18</sup>Usel xat xil tangan ti lipol ni holesok xil xa bos. Xil lipolu ni polien hos e livue xat xil tangan lisa tutouen mi mosav xil mun. <sup>19</sup>Itel sexien xil xa bos xiak, ngan xil xa holesok nae holu, xil likila liserep holesok xil xa bos iti nga e ut nesao. Vengan xa holesok xil te ut etan likesae, e holesok xil xa bos xa Hi miling xati ve xil iti vehakut. Melele xa xil lipol ni imak, xil lihur meulien tei xa be reitin vari tang.

<sup>20</sup>Timoti, ulaxat kuh naha xa Hi milingi de hem. Onamos ti natel ngan xil xa di laso sepinien xil xa misa e tamal ti e pe met Hi. Ngan xil ak, di labit pispisien nae xil polu ni metisouen, e polu ni luvosen tang. <sup>21</sup>1 Rut moletin xil langgusil pispisien xil ak ngamu. Mak ma, xil latahusil ti mun suse te reitinen na Hi.

Nasis tangan eheien hos na Hi iti mi xamim.

# 2 Timoti

## *Sepinien xa diamu te 2 Timoti*

### **Visi tetis uvei ak?**

Pol tetis sepinien ak e hram xa tehe sangas ni 67 AD xa tehe sepinien kor nan. Melele xa tetis sepinien tetiamu teha mi Timoti xal Taetas, di tesao ni vanut Kristin xil e taon holu. E melele xa tehe Rom, latetel xati e lateso ni tehe nim te xeih (1:8,16). Xi telonge tesa, e neta sav xa temak, neketen nan di tamu texeih (1:12). Misak ni, tetis uvei tei mun teha mi Timoti tehit imei isao ni vatei mun. Ti, xi iha imat sung e he mol-Rom xil (4:9-13).

### **Visi iaxa tevuli uvei ak tetiamu?**

Pol tetis uvei ak teha mi Timoti (1:2), e en tehei ngan xil te sias tahal Efeses mun lilonge (4:22). Sepinien xa Diamu te 1 Timoti di bit kila xa Timoti tehe visi.

### **Pol tetis uvei ak veneh?**

**Pol en tehei vapus rilomun ni Timoti** - Pol tekila xa navehi ti lihasi imat (4:6-8), misak ni bit vapus rilomun ni Timoti, iti, imat sung e he mol-Rom xil (1:4; 4:9,21).

**Pol en tehei vasel xat Timoti ve melele xil xa nggeih di bemei** - Pol tepus kila xa melele xil xa nggeih di bemei, misak ni en tehei tangan Kristin xil lisoh ixeih e neketen nae (1:8; 2:3).

**Pol en tehei vasel xat Timoti tangan vaxuxou kuhi ve pispisien nan xil** - Pol tesis Timoti tangan vaxuxou kuhi ve pispisien nan melele xa di misetu ni sepinien na Hi (1:14), e itit ni ngan xa ti ihit rat longeongen hos na Hi mi moletin xil (3:14; 4:2).

**Pol en tehei vasel xat Timoti vatei mun usil moletin xil te luvosen** - Moletin xil te luvosen lateti tamu visal Timoti, ma Pol tesel xat rilomun ni tangan nahusil xat xil ti e nangor ti natel xil (2:16-26).

**Vatit nenemien tei te uvei ak de 2 Timoti 2:15**

*Mak ma, xouk, Timoti, upol imal melele xa di opisipi ni sepinien te reitinen na Hi mi moletin xil. Mak ma, ukila usoh ixeh pe met Hi ixoni moletin te polien tei xa tave unoun ti ni polien nan.*

**Vatit nenemien tei mun te uvei ak de 2 Timoti 3:16-17**

*Sepinien xil vus xa di Vanuvei Eo, nenemien xil vus teni nggo Hi. Sepinien xil ak bos te pispisien, te selxatien, te sepkilaen usil suse xa momal, e te pispisi mi moletin xil tangan linapol ni ti mun sexien xil xa misa. Nggo sexien xil ak, Vanuvei Eo di misak xat moletin xil na Hi tangan likila lipol vuol ni polien hos xil vus.*

**Naha de uvei ak?**

1. Pispisien xil usil ngan xil xa di langgur polien na Hi (1:1-2:26)
  2. Selxatien ba mi Kristin xil tangan lisoh ixeh ve melele xil xa nggeih di bemei (3:1-4:22)
- 

**1** <sup>1</sup>Inou Pol iaxa nadis uvei ak. Inou nabe eloheoh tei na Iesu Kristo nggusil nenemien na Hi xa bit xati xa isa meulien sal mi ngan xil xa di laling neketen nae e Iesu Kristo.

<sup>2</sup>Nadis minuk Timoti xa onggoni natuxuli hos tei. Nasis tangan eheien, esaen, e tomat na Hi Tamer e na Iesu Kristo xa be Suv nar iti e meulien nam.

**Pol Misel Xat Timoti tangan Ital Xat Kuh Polien xa Hi Misa ni Mini**

<sup>3</sup>Timoti, e vongien e melengien, ieok di tabovorong ni xouk ti e sisen xil navan e di names Hi ve xouk. Hi ak iaxa di nanggusil xati, nggoni ngan xa avu navan xil tetiamu di latepol ni, e nakila namusil xati nggo sexien xa nakila nabit momal pe meten. <sup>4</sup>Nanem xat simetom xa temereh melele xa rutetasil, e ieok bei tangan nipusuk rilomun e isak ni nou nipolu ni sien. <sup>5</sup>Nanem xat neketen hos nam xa be reitin. Neketen ak nggoni neketen hos na avu nam Loes e na ninom Iunis. E nakila xa de xouk mun. <sup>6</sup>Ve rin ak nasel xatuk tangan utit ni ti upol itel sanien xa Hi tesa ni minuk melele xa natetuxol xatuk. Sanien ak nggoni upang na Hi e meulien nam e bos xa uhui xati tangan ileluv mei ihe eilep mu. <sup>7</sup>Upol ixeh vengan Ninin Eo xa Hi tesa ni mi xir misak ni ulixir takan ti. Ninin Eo nan pol ni xir rapol vituei del xeihen nan, tangan eheien nar iti e mosav e mikila raxuxou kuhi ve sexien nar xil.

<sup>8</sup>Mak ma, onahe unoun ti tangan ovit rat sepinien xil usil Iesu xa be Suv nar. E onahe unoun ni nou ti mun xa nade nim te xeih vengan inou nabe moletin na Iesu. !E-e! Itel xeihen xa Hi misa ni minuk, xouk mun uhusil suse te longpangisien ixoni nou ve longgeongon hos usil Iesu. <sup>9</sup>Hi

mileh rerat xir ra tesaen e misa meulien hu mi xir. Xi mikes xir tangan mei rave moletin nan, e tave ti ve naha xa xir di rapol ni. !E-e! Xi pol ni mak nggusil nenemien nan e ve eheien hos nan mi xir. Tetiamu ni melele xa Hi tepeas ni ut etan, xi tehiti xati xa xi isa Iesu mei ihe suse tangan isak ni eheien hos nan mei istal mi xir. <sup>10</sup>E xosali, hitxatien nan mei mistal be reitin e melele xa Iesu Kristo teme e ut etan e teteh meulien e xir. Xi bas tan ni xeihen te maten, e longeongen hos teni pisen suse te meulien hu mi xir.

<sup>11</sup>Ma vengani Hi ien bei tangan longeongen hos ak ihe ut xil vus, xi tehosei nou mei nabe eloheoh nan tangan nihiti rati mi moletin xil vus e nipispisi ni reitinen nan mi xil. <sup>12</sup>Ma ve rin ak, iaxa inou di nalong pangas nou ven e nim te xeih ak. Inou natanexo ti vengani nakil kuh ngan xa inou naling nenesien navan da en. E nakil kuhi xa xi nggur xeihen pipin tangan isikoe xol naha xa xi milingi e heok tangan ti nipol ni ituxoh melele Iesu itilomun en. <sup>13</sup>Xouk mun utal xat kuh sepinien te reitinen xa natepisisi ni minuk ngamu. Holesok xil xa otepus nou natepol ni e otelong nou natehiteni, xouk mun upol ni. E utal xat sexien xil te neketen e eheien ixoni ngan xil xa di langgusil xat Iesu Kristo. <sup>14</sup>Longeongen hos xa ongguri be neta ngan xa bos pupu. Misak ni, uketeh xole e uxuxou ven ihos itel tutouen na Ninin Eo xa de xir.

<sup>15</sup>Xouk otelong kila xa tua navan xil e provins tahal Esia, nggoni Fukelas xal Hemonggenes, xil vus latetasil reling nou ngamu. <sup>16</sup>Onesiforas, xi kestang bemei visal nou e melele nen xil ak, e di pet rat nenemien navan. Nasis Hi tangan isa hosien mini itel ngenen xil vengani xa xi tave unoun ti tangan mei vasao ni nou e nim te xeih ak. <sup>17</sup>Io, melele xa tetuxoh taon xa eilep tahal Rom xi telang ni nou ba vuma tekamete rute xa inou nada en. <sup>18</sup>E melele sav mun xa di natepol e taon tahal Efeses, xouk okil kuhi mak xa xi tetutou ni nou tehe holu. Misak ni, di nasis tangan Suv Iesu ipisen esaeen mini e melele xa xi imei rilomun en e ilepis moletin xil.

### Pol Misel Xat Timoti tangan Isoh Ixeih e Neketen Nan

**2** <sup>1</sup>Timoti, natuxuli, usoh ixehi itel tutouen xa Iesu Kristo di misa ni mi xir. <sup>2</sup>Pispisien xil xa otelong nou natehiteni mi moletin xil, xouk uhuri e ha upispisi ni mi ngan xil xa nenesien nam di e xil. Mak ma, xil mun likila lipispisi ni mi mosav xil.

<sup>3</sup>Melele xa saksipisien xil di bemei, xouk usoh ixehi ixoni moletin hos tei te vaeen na Iesu Kristo. <sup>4</sup>Melele xa moletin tei te vaeen di pol, xi di tamaen ni ti holesok xil te ut etan tangan valihi nenemien nan ra polien nan vengani ien bei tangan suv nan vamaal ven. <sup>5</sup>Xouk onggoni moletin te lohen mun. Moletin ak iloh ihusil rae xil te lohen. Xosxa xi tahusil rae xil vus ti, xi misakras vahur huite teni. <sup>6</sup>Xouk onggoni moletin te naho

mun. Vengan moletin xa nggur vetin e naho san, momal tang tangan xi ihur anien en itiamu ni mosav xil. <sup>7</sup>Bos xa unem xat vole xatel ak xa nabiteni minuk, e Hi Suv isak ni xouk ukil kuh koute te xatel.

<sup>8</sup>Unem xat Iesu Kristo: xa temeul rilomun ra maten e xa testal texo ra na suv toto Deved. Ngan ak be vatit longeongen hos xa di nabit rati. <sup>9</sup>Ve longeongen hos ak, inou di nanggur longpangasien e labar xat nou ni sen e nim te xeih ak nggoni moletin tei te kanen. E sepinien na Hi, lasakras lavar xati. <sup>10</sup>Ve rin ak, namaen nou tangan nihur longpangasien xil ak. Vengan nakila xa melele xa nabit rat longeongen hos mi moletin xil, ngan xil xa Hi tehosei xil, likila lihur meulien hu xa mistal nggo Iesu Kristo. Mak ma, xil likila liti e miehen itela vehakut. <sup>11</sup>Usil nenemien ak, sepinien ak be reitin xa biteni bit:

Xosxa ratemat tetel Iesu Kristo,  
ma rimeul itela.

<sup>12</sup>Xosxa risoh ixeh ve hisen,  
ma xir rikila rilaxat ut xil e ut etan itela.  
E xosxa rihiteni rihit ratakil ti xi,  
ma xi mun ihiteni ihit takil ti xir.

<sup>13</sup>E tave ti neta xosxa rimot e neketen nar,  
e xi misakras vastokovein xir,  
vengan xi misakras vapol ni misav  
ni sexien nan xati xa momal tevi.

### Moletin te Polien Hos na Iesu Kristo

<sup>14</sup>Bos tangan vehakut ti upispisi mi moletin xil ni pispisien xil ak. Usel xat xil e his Hi tangan linanggor ti ve koute te mavulut sepinien xil vus. Sexien ak misakras vapol ni ti neta vahos. Sexien xil ak di purun moletin xil xa di lalonge. <sup>15</sup>Mak ma, Timoti, ti usak pisi tangan upispisi ni sepinien te reitinen na Hi mi moletin xil. Mak ma, ukila usoh ixeh be met Hi ixoni moletin te polien tei xa tave unoun ti ni polien nan. <sup>16</sup>E onamos ti natel ngan xil xa sepinien nae be neta sav tang e tamal ti. Vengan xa hisit sepinien xil ak di midel moletin xil labe sotin mak mu ra Hi e sexien hos xa ien bei xil lavusili. <sup>17</sup>Ve naha xa di lasep usili mikapis mi moletin xil, e di purun nenemien nae. Sepinien nae nggoni menuk tei xa bo xa mistal e moletin, e ngga purun tenben xil vus. Moletin lu xa lumak lube Haemeneas e Faelitas. <sup>18</sup>Xalu di lupispisi ni mi moletin xil lubit mea rilomunen ra maten mistal ngamu. Mak ma, xalu di lupurun neketen na moletin sav xil e di lupisen ni xa lule ras suse te reitinen. <sup>19</sup>E tave ti neta xa di lupol ni mak, sepinien na Hi di tamu misoh nggeih nggoni simen te nim tei xa lakili ni be tan. Vengan xa xi biteni mak bit, *“Hi suv mikil kuh ngenen xil.”* (Namba 16:5) E biteni mun bit, *“Ngan xil xa labit lavusil Hi Suv listokovein sexien tesa nae xil.”* (Aes 52:11)

<sup>20</sup>Sias na Hi nggoni nim tei xa eilep xa tre xil e plet xil holu di en. Rut tre ngan xil, lapol kuhi ni ni neta xil xa minehin, nggoni silva e gol; e rute xil mun, lapol ni ni liei e tan xa pili. Ngan xil xa bos pupu, laserevi datil polien hos tei; e ngan xil xa tavos pupu ti, dit lapol ni muis ba en. <sup>21</sup>Usil nenemien ak, xosxa moletin tei pol ni xi mese ra hisit sepinien tesa xil xa nasep usili, Hi ise revu ve polien hos xa tehosei ven. E vengan xa xi misa meulien nan mi Hi e misak xat kuh xi bos ve polien, Hi xa be Suv te Sias ihur xati e ipol ni polien hos xil ixo en. <sup>22</sup>Mak ma, Timoti, bos tangan uling sexien tesa xil xa tiram maxoe sav xil di langgusili. !Io! Xouk itel ngan xil xa di mumot mi Hi del nenemien hos, bos xa muloh ve sexien xil xa Hi ien bei nggoni momalen, neketen, eheien, itel tomat. <sup>23</sup>Uhe reling ngan xil xa di lasep talang ve holesok xil xa be neta sav tang, vengan hisit sepinien xil xa mak di pol ni ngongoren xil tang. <sup>24</sup>E vengan xa xouk obe moletin te polien na Hi, onangor ti natel moletin sav xil. Xouk uhos mi moletin xil vus e upispisi kuhi mi xil. Bos tangan utal xat nenemien nam tangan iem nakat ti namanon. <sup>25</sup>Ngan xil xa di laseputut ni xouk, xouk upispisi mi xil itel sexien te merouen. Xos Hi isak ni xil lihiles ra tesaen nae xil e mei likil reitinen nan. <sup>26</sup>Mak ma, xil mei lihur nenemien xa bos e lilesae ra voh xa Temat di boxol xil en. Temat di dal xat xil vengan ien bei tangan lapol vahusil nenemien nan.

### Selxatien usil Naha xa Istal e Melengien Xil te Vongkor

**3** <sup>1</sup>Timoti, bos xa ukil kuhi xa, e melengien xil te Vongkor, sakkpisien xil holu limei. <sup>2</sup>Vengan e melengien xil ak, moletin xil linem kes ni xil tang: nenemien nae iti e mani, lisep xoli xil e lihe koae. Xil lipurun mosav xil e linalong xat ti tame xil. Xil linem mele ni tutouen xil xa mosav xil lasa ni e linem mele ni holesok xil na Hi. <sup>3</sup>E melele nen ak, xil linanem ti meulien na mosav xil, esaen nae ihe tovuol. Xil ti lisuhol purun mosav xil e lipol ni vaeen mi xil. Iexil ikat vehakut e liketeh isa ni holesok xil xa bos. <sup>4</sup>Xil ti lipol ni suse tangan ti lipurun mosav xil e linanem ti meulien nae mu na mosav. Xil lipolu ni nenemien te molepen e eheien nae iti e sien xil te ut etan, e nati ti e Hi. <sup>5</sup>Xil ti lihusil Hi ixot hilibexil tang, e xeihen nan tovuol e meulien nae. !Hisit moletin xil xa lamak, onaha ti visal xil! <sup>6</sup>Rut moletin xil ak di lakapis e nim xil vus e di lasep luvos atou xil xa nenemien nae taxeih ti tangan lavusil pispisien nae. Atou xil ak, eheien te holesok xil te ut etan di del xil, e nenemien usil tesaen nae xil di bas tan ni xil vehakut. <sup>7</sup>E tave ti neta xa hisit atou xil ak di langgur pispisien xil vehakut, lasakras lakil ti reitinen teni. <sup>8</sup>Xosali ak, moletin xil holu di lasep misa ba ni longongen hos na Hi. Nenemien nae tamal ti e neketen nae be te luvosen tang. Xosali nggoni tetiamu, e melele xa provet te luvosen lu na suv toto tahal Isip lutesepin tesa teha mi Mosis, hisealu tehe Sanes e Sampres.<sup>a</sup> <sup>9</sup>E nggoni provet te luvosien

<sup>a</sup> 3:8 Eks 7:11-13

xalu ak, polien nae xil mei ihe neta sav tang vengan moletin xil vus lipus kila xa xil dit lapol ni unuen.

### Selxatien mi Timoti tangan Ihusil Kuh Sepinien na Hi

<sup>10</sup>E xouk, Timoti, okil kuh pispisien xil navan e sexien navan xil. Okil kuh vatit nenemien xa di napol nggusili. E okil kuh neketen navan, eheien navan, e nenemien navan xa teviei. Okila mun xa inou natangel ti e polien navan. <sup>11</sup>Xouk okil kuh sarpisien e longpangasien xil xa natehisu ni e taon xatel ak: Antiok, Aekoniam e Listra.<sup>b</sup> Sarpisien xil ak tehe holu pupu, e Hi tesikoe xol meulien navan ra xil vus. <sup>12</sup>Io, moletin xil vus xa iexil bei tangan lavusil Iesu Kristo e suse xil xa momal na Hi, xil lihur sarpisien e longpangasien xil ven. <sup>13</sup>E moletin xil xa lasa e ngan xil xa di laluvos, xil mei lisa pilei sung. Xil ti liluvos mosav xil, e mosav xil mun ti liluvos xil. <sup>14</sup>E xouk Timoti, onaxoni xil ti, utit ni ngan taxa ti uhusil pispisien xil xa otehuri tetiamu e okila ngamu xa be reitin. Okil kuh hisit pispisien xil xa otehuri ra moletin xil xa nenesien nam di e xil. <sup>15</sup>E okil kuhi xa hisit pispisien xil ak di nggusil naha xa otelonge texo Vanuvei Eo e melele xa otehe horamue tamu mei duxoh xosali. Vanuvei Eo mikila vasak ni moletin xil lale kil suse xa lakila laling neketen nae e Iesu Kristo e lavur meulien hu vaxo en. <sup>16</sup>Sepinien xil vus xa di Vanuvei Eo, nenemien xil vus teni nggo Hi. Sepinien xil ak bos te pispisien, te selxatien, te sepkilaen usil suse xa momal, e te pispisi mi moletin xil tangan linapol ni ti mun sexien xil xa misa. <sup>17</sup>Nggo sexien xil ak, Vanuvei Eo di misak xat moletin xil na Hi tangan likila lipol vuol ni polien hos xil vus.

### Pol Misel Xat Timoti Tangan Ihithiten Sepinien Na Hi

**4** <sup>1</sup>Timoti, Iesu Kristo itilomun e mei ihe suv toto. Mak ma, pe met Hi e pe met Iesu Kristo xa ilepis moletin xil xa lameul e ngan xil xa lalel, inou nasa selxatien xil ak minuk. <sup>2</sup>Uti ni ngan taxa ti uhit rat longeongen hos na Hi. E melele xa bos, e melele xa nggeih mun, usak xatuk ven. Mi ngan xil xa latakil ti Hi, usak ni xil like reitin en. Mi ngan xil xa di lapol ni tesaen, usel xat xil ni. E mi ngan xil xa di lalonge misa, upet rat nenemien nae ni. E uti ni ngan taxa ti upol ni sexien xil ak itel pispisien hos xil. <sup>3</sup>E melengien xil xa ti imei, moletin xil iexil ti navei lalong pispisien hos te reitinen. !Io! Xil lihusil naha kestang xa iexil bei. Ma lileh viton tisa xil mei liti xorelis xil tangan lisa pispisien xil xa iexil bei tangan ti lilonge. <sup>4</sup>Xil lihiles ra sepinien te reitinen e lilong xat pispisien xil usil tumulen te luvosen xil. <sup>5</sup>E xouk, Timoti, uxuxou kuhi ve sexien nam xil. Usoh ixeh e longpangasien xil nam, uhit rat longeongen hos vehakut, e upol ni holesok xil vus xa Hi milingi e hem.

<sup>b</sup> 3:11 Pol 13:44-14:23

<sup>6</sup>Nasel xatuk nggeih mak vengán inou, meulien navan sangas vavus nggoni sanien kor navan ba mi Hi. Navehi ti, nihe reling ut etan. <sup>7</sup>Inou nanggoni moletin tei te vaeen e natevae texeih e rin na Iesu Kristo. E nanggoni moletin te lohen mun, xa natenagel ti e lohen te neketen. E taxeak, naduxol xoxalite teni ngamu. Natesoh texeih e neketen navan. <sup>8</sup>Ma taxeak, huit lohen navan datil nou e ut nesao vengán xa nanggusil naha xa Suv ien bei. Xi xa momal isa huit ak minou e melengien xa mei ilepis moletin xil en. E nave nou ti kestang, xi isa huit e mun mi moletin xil vus xa iexil bei pupu tengán lipus meien nan.

### Pol Misis Timoti tengán Vatemanon Vamei Visali

<sup>9</sup>Timoti, usak pisi li utemanon mei upus nou inggak. <sup>10</sup>Nasisuk tengán omei vengán xa Kresken ba ngamu pol e provins tahal Kalesia, e Taetas mun ba ngamu pol e taon tahal Dalmesia. E Dimas, xa eheien nan di e holesok xil te ut etan, xi milesae ra nou e be taon tahal Tesalonaeka. <sup>11</sup>Luk kestang be xamel madi. Mak ma, uhur Mak ihe xamil, vengán xi mikila itutou ni nou e polien navan ixoni ngán xa tepol ni tetiamu. <sup>12</sup>Nasil Tikikas di bat ni xamil e taon tahal Efeses. <sup>13</sup>E melele xa umei, bos tengán uhur kot navan xa natelingi tete he Karpas xa de taon tahal Troas. E uleh vanuvei navan xil, e ngán xa eilep mak mu, uleh tisen navan xil itel xat xamil.

<sup>14</sup>Aleksanda xa di pol ni holesok xil ni aean, xi purun pupu ni nou. E Suv Iesu isa rilomun ni naha xa tepol ni minou ihe an. <sup>15</sup>U laxatuk ve moletin ak, vengán xi di bae pupu ba ni longeongen hos xa xir di rabithiteni.

<sup>16</sup>Melele xa latehur kokot ni nou natehe kot, moletin tovuol mei vasoh e rin navan tengán vatutou ni nou ni sepinien. Xil vus latelesae reling nou. E natesis Hi tengán naketeh ti nasa mi xil ve rin ak. <sup>17</sup>E Suv iaxa tesoh e rin navan e tesa xeihen minou. Xi tesak ni nou natesepin kuhi ni longeongen hos nan tengán ngán xil xa latave Siu ti lakila lalonge. Xil sangas lasemae ni tengán lavas vin nou, e Hi tesikoe xol nou ra xil. <sup>18</sup>E Hi isikoe xol nou ra he ngán xil vus xa lasa xa labit ti lapurun nou. E xi ihur kuh nou tengán ha nite metimal nan xa eilep xa de ut nesao. Ripetrat his Hi ihe nesao e ita vehakut. Reitin.

### Sepinien Kor

<sup>19</sup>Nabit bos makoe mi Prisila del tiramue nan, Akuila. Nabit bos makoe mun mi Onesiforas del ngenen xil. <sup>20</sup>Erastas dat e ut Korin, e naling Toropimas e ut Milaetas vengán temesei. <sup>21</sup>Usak pisi utemanon umei vengán an tesa xil di bemei. Epulas, Pudens, Laenus e Klodia, del tua sav xil mun inggak, labit bos makoe minuk.

<sup>22</sup>Nasis tengán Hi iti minuk, Timoti, e eheien hos nan iti mi xamim vus.



# Taetas

*Sepinien xa Diamu te Uvei xa Pol Tetisi teha mi Taetas*

## **Visi tetis uvei ak?**

Pol tetis sepini ak e hram xa sangas ni 64 AD (ngan ak hram 32 tetoutu ni maten e mea rilomunen na Iesu). Pol tetis uvei ak tetoutu ni tumulen xil xa di Polien na Eloheoh Xil (ukila upus rut sepini ngan xil teni e Sepini xa Diamu te 1 Timoti). Pol tepol vituei e aelan tahal Krit tetel Taetas melengien vahis (1:5). Di, teling Taetas ti ilaxat Kristin hu xil e rute nen ak (1:5; 2:15; 3:12-13).

## **Visi iaxa tevuli uvei ak tetiamu?**

Pol tetis sepini ak teha mi Taetas (1:4). Vatei, Pol teha tangan vapus vat xil te sias tahal Serusalem tangan vahit kil polien nan del ngan xil xa latave Siu ti (2 Tim 2:8). E melele nen ak, xi nggur Taetas xa tave ngan Siu ti e be Kristin tei tuei (Kal 2:3). Melengien holu, Taetas tehusil Pol e kakaoen nan: lutepol vituei e Korin (2 Kor 7:6; 8:23), Dalmesia (2 Tim 4:10), e aelan tahal Krit mun (1:5). Pol tehiteni mini tangan ihosei ti elda xil, isel xat Kristin xil linahusil ti mun pispisien xil te luvosen, e ipol ituxoh melele xa Pol isil moletin sav mei ixolesi e polien nan (3:12).

## **Pol tetis uvei ak veneh?**

**Pol en tehei tangan vasep kil sexien hos na vat xil te sias mi Taetas** - Elda xil, lilaxat kuh moletin xil te sias, lipol ixeh e polien na Hi, e lipispisi mi moletin xil ni pispisien xil xa bos (1:5,9). Pol tehiteni tehit elda tei ihe hisit moletin tei xa ilaxat kuh tim san (1:6) e ixuxou kuhi ve sexien nan xil (1:7-8).

**Pol en tehei tangan vassel xat Taetas usil moletin xil te luvosen** - Vengan sexien na mol-Krit xil tesa pupu (1:12), Pol tesis Taetas tangan isel xat xil ixeh e ipispisi mi xil ni pispisien xil xa momal (1:10-16). Vanut Siu xil iexil tehei tangan di langor vatel Taetas, e Pol tesel xati tangan xi napol ni ti ngongoren natel xil (3:9-11).

**Pol en tehei tangan vasep kil sexien hos na Kristin xil mi Taetas** - Pol tesis Taetas tangan ipispisi kuhi mi ngan xil xa labe momatu (2:2), atou xil (2:3-5), tiram maxoe xil (2:6-8) e slev xil mun (2:9-10). Pol tehit kila xa Hi di misa xeihen mi ngan xil xa di langgusil xati (2:11-15).

**Pol en tehei tangan vasep kila mi Taetas ni sexien hos xil xa Kristin xil ti lipol ni mi mosav xil** - Pol en tehei Kristin xil te sias liti e tomat itel mosav xil, ti lilong xat kavmen (3:1), e linasepin ti nasa mi mosav xil (3:2). Tehitini mun xa xil linapol ni ti ngongoren natel ngan xil xa nenemien nae misav (3:9-11). Kristin xil iexil nabong ni ti xa, tetiamu, xil mun latepol ni sexien tesa xil ak, e Hi tehiles meulien nae (3:3-7).

### **Vatit nenemien tei te uvei ak de Taetas 1:5**

*Melele xa natelinguk otete aelan tahal Krit, natesisuk tangan upol vuol ni rut polien xil xa rutepol lingi teti. E natesisuk tangan ti uhosei elda xil te sias e metimal xil vus xa di olaxati. Unem xat selxatien xil navan.*

### **Vatit nenemien tei mun te uvei ak de Taetas 3:4-5**

*E tave ti neta xa ratemak, Hi tepisen hosien e eheien nan mi xir e tete meulien e xir. Xi iaxa teleh rerat xir ra tesaen xil nar, tave ti ve holesok xil xa bos xa xir ratepol ni. !E-e! Xi teleh rerat xir vengan en misae e xir. Ma xi tesa Ninin Eo mi xir xa mikas motin xir ra tesaen nar xil e misa meulien hu e sexien hu xil mi xir.*

### **Naha iaxa de sepinien ak?**

1. Pispisien xil usil sexien hos xil na elda xil (1:1-9)
2. Pispisien xil usil moletin xil te luvosen (1:10-16)
3. Pispisien xil usil sexien hos xil na Kristin xil (2:1-15)
4. Pispisien xil usil sexien hos xa lipol ni mi mosav xil (3:1-15)

### **Sepinien xa Diamu**

**1** <sup>1</sup>Inou, Pol, iaxa nadis uvei ak e nabe moletin tei te polien na Hi e eloheoh tei na Iesu Kristo.

Hi tehosei nou e tesil nou tangan ha nitutou ni neketen na ngan xil xa Hi tehosei xil mei labe nan. Xi tesil nou mun tangan nipispisi mi xil usil reitinen te suse xa likila mei limal pe meten. <sup>2</sup>Ngan xil ak likila lihusil hisit neketen ak vengan xa lanesi xa Hi isa meulien sal mi xil. Vengan xa, tetiamu ni melele xa Hi tepeas ni ut etan, tehit xati xa isa meulien ak mi xir, e Hi misakras valuvos. <sup>3</sup>E melele xa xi bit momal, Hi xa di miteh meulien e moletin xil misak ni naha xa tehit xati mei mistal be reitin sung. Reitin, naha xa Hi tesoson ni, xi di mikirati nggo sepinien xa tesa ni minou e tesemae ni minou tangan ti nihithiteni mi mosav xil.

<sup>4</sup>Natis bat mi xouk, Taetas, xa ongoni natuxuli xati, ve neketen naralu be tei takes.

Nasisi xa Hi Tamer e Iesu Kristo, xa miteh meulien e xir, lalisa eheien hos itel tomat nalu iti minuk.

## Lihosei Elda Xil Itep

<sup>5</sup>Melele xa natelinguk otete aelan tahal Krit, natesisuk tangan upol vuol ni rut polien xil xa rutepol lingi teti. E natesisuk tangan ti uhosei elda xil te sias e metimal xil vus xa di olaxati. Unem xat selxatien xil navan: <sup>6</sup>elda tei, meulien nan imal, e nenemien nan iti atou nan xati kestang. Horamue nan xil lihusil xat Iesu e sexien nae xil ihos tangan moletin sav xil ti linaseputut ni xil linahit vatixil nggeih e di latalong xat tamexil ti. <sup>7</sup>Melele xa uling moletin tei mei ihe vat te sias tangan ti valaxat moletin xil na Hi, sexien nan imese. Nahe moletin te koaien ti, e tinen nasoh ti namanon. Nahe moletin te mumunen ti, nahe moletin te tutuen ti, e nahe ho mani ti. !Namak ti! <sup>8</sup>The hisit moletin xa di nggur pilei moletin sav xil e tim san, e di ien bei neta xil kestang xa bos. Nenemien nan ixeih e polien nan xil, kakaoen nan ihos, meulien nan imal, e mikila ixuxou kuhi ve sexien nan xil. <sup>9</sup>Elda ak, ihur xat kuh pispisien usil Iesu xa xir di rapispisi ni. Ikila xa pispisien xil ak be reitin. Imak, ma xi ikila ti itiamu ni mosav xil e suse te momalen, e ti ipispisi mi xil usil naha xa be reitin. E melele xa mosav xil laseputut ni pispisien nan xil, elda ak ikila ipisen ni mi xil xa naha xa xil di lasepin ni be neta sav tang.

<sup>10</sup>Nasepin ni mak vengan xa moletin xil holu latamemere ni vat xil te sias ti. Pispisien na moletin xil ak be voti tang xa reitinen tovuol en e di laluvos moletin sav xil tangan lihusil xat xil. Xil di lapispisi ni xa moletin xil vus na Hi lihe vexahu ixoni ngan xa Siu xil di lapol ni. <sup>11</sup>Taetas, usikoe xol pispisien nae xil. Vengan, xil di lapispisi ni holesok xil xa tamal ti tangan lavur mani vaxo en. E misak ni, moletin xil vus e tim xil di lastokovein neketen nae. !Ngan ak tamal ti! <sup>12</sup>Tehe provet tei nae tang tahal Krit iaxa tesepe usil sexien nae xil tehiti,

“Mol-Krit xil, vehakut di laluvos e sexien nae mikavui.

Xil labe mah e, vehakut, di lanem kes ni vange tang.”

<sup>13</sup>Sepinien ak be reitin. Ma bos xa xouk usepin ixeih mi xil. Ngan ak isak ni xil lihusil pispisien xil kestang xa momal. <sup>14</sup>Linahusil ti mun tumulen te luvosen xil na Siu xil, mu rae xil na ngan xil xa lasin reitinen na Hi. <sup>15</sup>Ngan xil xa meulien nae momal pe met Hi, holesok xil vus momal tang mi xil.<sup>a</sup> E ngan xil xa meulien nae tamal ti pe met Hi e lataneket ti e Iesu, ma holesok xil vus tamal ti e xil vengan xa nenemien nae be muis. Ngan xil ak latakil ti naha xa momal e naha xa tamal ti.

---

<sup>a</sup> 1:15 Ngoni ngan xa 1 Tim 4:3-5 biteni, tisa xil te luvosen xa labe Siu lapispisi ni xa rut sexien xil e rut anien xil mun mikila vapol ni moletin tei namal ti pe met Hi. E Pol biteni xa melele xa di ranggur neta ngan del nenemien tei xa momal, anien ak momal tang, mu sexien ak momal tangan rapol ni.

<sup>16</sup>Nggo valonge, xil labit lakil Hi, e sexien nae xil di pisen ni xa latakil ti. Latalong xat Hi ti, sexien nae pupuru tang, e lasakras lapol ni neta tova vahos e meulien nae.

### Kakaoen xa Nggusil Pispisien te Reitinen

**2** <sup>1</sup>E xouk, upispisi ni holesok xil xa nggusil pispisien te reitinen. <sup>2</sup>Upispisi ni ngan xil xa labe momatu tangan liti merou, sexien nae xil ihusil nenemien hos xil kestang, e likila lixuxou kuhi ve sexien nae xil. Neketen nae e Hi ixeih, eheien nae iti e mosav xil, e tave ti neta xa melengien xil te xeih ti imei, xil lihusil xat Iesu vehakut.

<sup>3</sup>Thusil sexien nen tak, upispisi ni tovolih xil tangan lipisen sexien te merereen mi moletin xil vus. Xil ti linaseputut ni mosav xil ti, e linahe vat mumunen ti. !Namak ti! Xil ti lipispisi mi mosav xil ni sexien hos xil kestang. <sup>4</sup>Ixo sexien ak, xil ti lipispisi mi ate maxoe xil tangan ti lipisen eheien nae mi tiramue e horamue nae xil. <sup>5</sup>Tovolih xil ti lipispisi mi xil mun tangan lixuxou kuhi ve sexien nae xil e lipol ihos mi moletin sav. Xil limaen ni xil mi tiramue nae xil kestang e nave mi tiramue sav xil ti. Ate maxoe xil ak mei likila xa lilaxat kuh tim sae xil e ti liling nenemien nae ihe tan tangan lipol usil nenemien na tiramue nae xil tang. Sexien hos nae xil ak isak ni moletin sav xil lisakras ti lisep purun sepinien xil na Hi.

<sup>6</sup>Thusil nenemien xati ak, uhiteni mi tiram maxoe xil tangan lixuxou kuhi ve sexien nae xil. <sup>7</sup>Taetas, xouk mun, ixo sexien hos nam xil, upisen suse xa bos tangan mosav xil likila lihusili. E melele xa upispisi mi moletin xil, upol ni e sexien tei xa moletin sav xil likila linesi e limerere ni. <sup>8</sup>E sepinien xil nam, usepin usil neta kestang xa be reitin xa moletin sav xil lasakras lasep xar ni. Isak ni, ngan xil xa di laketeh misa ni xir lihe unoun vengan xa lisakras lavit ti neta vasa vaha xat xir.

<sup>9</sup>Ngan xil xa labe slev, xil liling nenemien nae ihe tan e lipol ihusil nenemien na suv nae xil. E holesok xil xa ti lipol ni, lipol ni ihos tangan suv nae xil lihesi xil ven. Slev xil linaso rilomun ni sepinien xil ti naha mi suv nae xil, <sup>10</sup>e linakan ni ti neta ra xil. Lipol ihos imak tangan suv nae xil likila liling nenesien nae iti e xil. Sexien hos nae xil isak ni moletin xil vus ti linemi xa pispisien nar xil usil Hi xa miteh meulien e xir bos pupu.

<sup>11</sup>Bos xa upispisi mi xil usil holesok xil ak vengan xa eheien hos na Hi mei mistal ngamu e di miteh meulien e xir vus. <sup>12</sup>Eheien hos na Hi ak di pispisi mi xir tangan ti ristokovein sexien tesa xil e ti rinamaen ni ti sexien xil te ut etan nalihi nenemien nar. !Namak ti! Eheien hos na Hi isak ni xir rixuxou kuhi ve sexien nar xil, rikakao ihos, e rihusil sexien xil xa momal tevi e melele xa rameul radi e ut etan. <sup>13</sup>Di rapol ni mak vengan xa di radatil melengien hos tei xa di bemei. E melengien nen ak, xir ranesi xa Iesu Kristo xa be Hi xa di miteh meulien e xir, xi mei istal itel miehen e xeihen nan. <sup>14</sup>Xi maen xoteh meulien nan mei mat binat

xir tangan valeh rerat xir ra xeihen te tesaen. Mak ma, xi miteh meulien e xir e misak ni xir mei rabe nan. Reitin, xi pol ni xir mei rameluv ra sexien xil xa mikavui e misak ni xir rabe vanut moletin tei nan xa rasav ni moletin teisav xil. Io, xir rabe moletin nan xil xa iexir bei pupu tangan ripol ni polien hos xil xa momal tevi pe meten.

<sup>15</sup>Hi milinguk e polien nan e misa xeihen minuk. Ma, upol itel xeihen ak e melele xa ti upispisi mi moletin xil usil suse xa momal tangan ti lihusili, e melele xa ti usel xat xil tangan linahusil ti mun suse te tesaen. Ixo sexien xil ak, onamaen xil ti linanem male ni xouk.

### Sexien na Moletin Xil Xa Langgusil Hi

**3** <sup>1</sup>Usep rilomun ni mi moletin nam xil tangan ti liling nenemien nae ihe tan e ti lipol ihusil nenemien na moletin xil te kavmen e eilep sav xil nae e ti litacong xat xil. Xil livue xat xil tangan lipol ni polien hos xil vus. <sup>2</sup>Uhiteni mun mi xil tangan linasepin ti nasa mi moletin sav e linangor ti natel xil. !Namak ti! Xil lipol ni ihos mi xil itel sexien te merouen, e ti lipisen merereen mi xil vehakut. <sup>3</sup>Iexir nabong ni ti xa, tetiamu, xir mun ratehe hisit moletin xil xa ratexonni xil tang: ratehe unu, ratnalong xat Hi ti, e di ratehusil suse xil vus te luvosen. Tetiamu, sexien tesa xil e eheien te holesok xil te ut etan tevulu xat xir e di tetel xir. Ratehe elu mi mosav xil, e ratehesi xir melele xa ratepus mosav xil latemot e tesaen. Moletin xil, iexil teat xir, e xir mun, iexir di teat xil. <sup>4</sup>E tave ti neta xa ratemak, Hi tepisen hosien e eheien nan mi xir e teteh meulien e xir. <sup>5</sup>Xi iaxa teleh rerat xir ra tesaen xil nar, tave ti ve holesok eah xa bos xa xir ratepol ni. !E-e! Xi teleh rerat xir vengan en misae e xir. Ma xi tesa Ninin Eo mi xir xa mikas motin xir ra tesaen nar xil e misa meulien hu e sexien hu xil mi xir. <sup>6</sup>E vengan xa hosien nan mahulong pupu, Hi tesa Ninin Eo mei tepolu e meulien nar. Maten na Iesu Kristo xa teteh meulien e xir iaxa tepol ni suse temase tangan Ninin Eo imei ve xir. <sup>7</sup>Eheien hos nan misak ni xi tepol ni xir ramal pe meten, tave ti neta xa rabe moletin tesa xil tang. Misak ni, xosali, xir rakila mei rabe horamue nan xil e ranesi xa be reitin xa xir rihur holesok hos xil melele xa ha riti itela e ut nesao. <sup>8</sup>Sepinien xil xa di nabiteni minuk be reitin.

Misak ni, vehakut, ieok bei xa xouk tit upispisi mi moletin xil usil holesok xil ak. Upol ni imak tangan ngan xil xa di langgusil Hi, nenemien nae ixeh tangan ti lipol ni polien hos xil. Hisit pispisien xil ak bos e di dutou ni xir vus. <sup>9</sup>Xouk onamae ni xouk ti ha onasep tetovoe natel xil usil holesok xil xa be neta sav tang. Ngan xil ak di lasep usil avu kokot nae bemei duxoh xil, e iexil bei tangan ti langor pupu usil rae xil na Siu xil. Hisit sexien xil ak misakras vatutou ni ti moletin e be neta sav tang. <sup>10</sup>Xosxa moletin tei di pol ni sexien xil ak xa di misak ni moletin xil di latasil ra xil, vatei takes, ha usepin ixeh mini tangan istokovein sexien

nan xil ak. E xosxa tastokovein sexien nan xil ti, ma ha usepin mini vatei mun. E xosxa dit nggulehi ni sexien nan xil, ma onamaen ni ti mun namei vituei natel xamim. <sup>11</sup> Vengan xa sexien nan xil nggeih, e di pisen ni xa xi be hisit moletin tesa tei xa tekavitou ni reitinen na Hi ngamu e di milihi longpangasien bemei e xi tasen.

### Sepinien Kor na Pol

<sup>12</sup> Taetas, nisil Artemeas mu Tikikas ihat minuk tangan tei e xalu ihur voninom. Ti, xouk usak pisi tangan mei upus nou e taon tahal Nikopolis, vengan xa inou nita tak ha ituxoh hoxalite te aveti xil te an tesa xa di bemei. <sup>13</sup> Usak pisi otutou ni Apolos, itel Sinas xa be moletin te ling xat rae xil en.<sup>b</sup> Xalu ti lalohusil suse nalu lalohat xiak. Ma nasasuk tangan upus rin nalu e usa holesok xil xa ealu ihei tangan lalilehi itel xat xalu. <sup>14</sup> Moletin xil nar likila lisa xil ve polien xil xa bos. Imak, ma likila ti litutou ni ngan xil xa labe terume ni holesok xil holu. Moletin nam xil linati votei ti. Bos mak mu lipol ni neta ngan xa ihos itel meulien nae.

<sup>15</sup> Ngan xil xa madi vituei inggak, labit ‘bos makoe’ mi xouk. E uhit ‘bos makoe’ namem mi tumem xil te neketen.

Nasis tangan eheien hos na Hi iti mi xamim vus.

---

<sup>b</sup> 3:13 Sinas tehe loa tei.

# Filimon

*Sepinien xa Diamu ni Uvei xa Pol Tetisi Teha mi Filimon*

## Visi tetis uvei ak?

Pol tetis sepinien ak (1:9,19) e huraam xa sangas ni 64 AD e melele taxa tetis uvei tei mi Kristin xil e taon tahal Kolosi. Pol tete nim te xeih e taon xa mahulong tahal Rom (Polien 28:16-31), e tetis uvei xalu ak e telingi e he Taetikas e Onesimas tangan lalihuri e lalisa ni mi ngan xil tahal Kolosi (Kol 4:7-9).

## Visi iaxa tevuli uvei ak tetiamu?

Pol tetis sepinien ak teha mi moletin tei te sias tahal Kolosi, hisen Filimon (1:1). Texo polien na Pol e Kolosi, Filimon mei be Kristin tei (1:19). E Filimon temae ni Kristin xil di latevituei e tim san (1:2). Xi tehe eilep tei xa teleh slev xil di latepol mini (1:16). Pol tetis uvei ak mi Filimon tangan vasisi vahur pilei rilomun ni slev tei nan, hisen Onesimas (1:9-10).

## Pol tetis uvei ak veneh?

**Pol en tehei tangan vapisen suse xa Kristin xil liketeh ihos ni ngan xil xa di lasa mi xil** - Nggusil rae na mol-Rom xil, momal tangan Filimon vahas vin Onesimas vengam xa xi mikan ni neta tei nan e milesae relingi (1:18-19). E Pol tesis Filimon tangan iketeh ihos rilomun ni Onesimas (1:9-10). E tesis mun tangan ipol ihos mini e napol ni ti mun mini naxoni xi be slev tei nan tang. Ipol ni mini ixoni ngan xa xi be tuneli tei e neketen (1:15-16). Imak, ma xir mun rakila riketeh ihos rilomun mi ngan xil xa lapol misa mi xir.

**Pol en tehei tangan vapisen ni xa, pe met Hi, xir vus rapin tang** - E melele xa Pol temeul teta, ngan xil xa labe eilep, e ngan xil xa labe slev nae, lasakras lamos vituei. E nggo Iesu, xir vus rapin tang (1:1-2,16,23-24), neta sav xos rabe eilep mu rabe slev, rabe moletin xa holesok nar holu mu rabe hoeo tang, rabe moletin te maluxoluk mu rabe metalo, mu rabe malahos mu rabe atou. Vengam xir vus xa di raneket e Iesu, rapin tang pe met Hi.

**Pol en tehei tangan vapisen sexien te merereen** - Pol tehe eilep te sias e tekila vasepin vaxeih mi Filimon tangan ihur pilei Onesimas e navasi ti (1:8). E vengam xa Pol temerere ni Filimon, xi tesa sepinien xa tehos tang mini (1:9,14) e tesis

tengan vapol vahos mi Onesimas (1:21). Bos xa xir mun rimerere ni moletin sav xil.

### Vatit nenemien tei te uvei ak de Filimon 1:15-16

*Nahe xos Hi temaen Onesimas telesae relinguk vuteili tangan melele xa itilomun ihat, xi ikila ita kat visaluk vehakut. E taxeak, xi tave slev nam ti tang. !E-e! Xi bos mak mu mili slev tei, xi mei be tumali hos tei. Eheien navan di en, e xouk, eheien nam iti en ili, vengan xi be slev nam, e be tumali mun vari e his Suv Iesu.*

### Naha iaxa de sepinien ak?

1. Pol besi xi himetu ve polien na Filimon (1:1-7)
2. Pol misis Filimon tangan iketeh ihos rilomun ni Onesimas (1:8-25)

### Sepinien xa diamu

<sup>1</sup>Inou Pol, nade nim te xeih vengan xa di nabit rat longeongen hos usil Iesu Kristo.

Inou del tumali Timoti, mabit bos makoe minuk, Filimon. Xouk obe moletin hos tei te polien na Iesu nggoni xamel e eheien namel di e xouk. <sup>2</sup>Mabit malhit bos makoe mun mi Apia, xa nggoni tuxohin tei namel. E bos makoe mun mi Akipas, xa di pol mi Iesu nggoni moletin hos tei te vaean nan nggoni xamel. E bos makoe mun mi ngan xil xa langgusil Hi xa di lasukul e tim sam.

<sup>3</sup>Nasis tangan eheien hos e tomat na Hi Tamer e Suv nar, Iesu Kristo, iti mi xamim.

### Pol Misep Usil Eheien e Neketen na Filimon

<sup>4</sup>Tuxoli Filimon, melele xa di nanem xatuk e sisen xil navan, vehakut di names Hi ve xouk. <sup>5</sup>Nasis mak vengan xa nalongeong usil neketen nam e Iesu Kristo, e eheien xa di opisen ni mi moletin xil na Hi. <sup>6</sup>Nasis mi Hi tangan melele xa mumei vituei, isak ni neketen namim ixeh mu, e isak ni xamim mukilakil kuhi ni holesok hos xil vus xa be namim vengan mubisti del Iesu Kristo. <sup>7</sup>Tuxoli, eheien nam mi mosav misak ni nou nabesi pupu ni nou e di dal rat nenemien na moletin xil na Hi.

### Pol Misis Filimon Tangan Ihur Pilei Slev Nan xa Telesae Relingi

<sup>8</sup>Vengan xa nakil kuh eheien nam mi mosav xil, inou nakila xa xosxa nisemae minuk e his Iesu Kristo tangan upol ni neta ngan, ma xouk upol ni. <sup>9</sup>E nabesi nou tang tangan nisisuk upol ni naha xa ieok bei ve eheien nam e nou, xa nabe momatu ngamu e nade nim te xeih taxeak ve his Iesu Kristo. <sup>10</sup>Nasisuk ve rin na Onesimas. Xi nggoni horamue tei navan vengan xa, melele xa nade nim te xeih, natetutou ni e xi tekamet meulien hu. <sup>11</sup>Tetiamu, melele xa telesae relinguk, xi tenave moletin



hos te tutouen ti. E taxeak, xi bos tangan itutou ni xouk, e itutou ni nou mun.<sup>a</sup>

<sup>12</sup>Eheien navan di pupu e Onesimas. E neta sav xa mak, di nasa rilomun ni bat minuk. <sup>13</sup>leok bei tangan namur xati vate visal nou vaxolesuk tangan vatutou ni nou e melele xa nade nim te xeih ve longeongen hos xa di nabithiteni. <sup>14</sup>E ieok ti tavei napol ni ti neta xa xouk otamaen nou ti tangan napol ni. !E-e! leok bei tangan nipol ni naha xa xouk kestang di onemi obit bos. Isak ni, tutouen xa usa ni minou ihusil nenemien hos nam kestang, e nave ti vengan nangegeh xatuk tangan opol ni.

<sup>15</sup>Nahe xos Hi maen Onesimas telesae relinguk vuteili tangan melele xa itilomun ihat, xi mikila ita kat visaluk vehakut. <sup>16</sup>E taxeak, xi tave slev nam ti tang. !E-e! Xi bos mak mu mili slev tei, xi mei be tumali hos tei. Eheien navan di en, e xouk, eheien nam iti en ili, vengan xi be slev nam, e be tumali mun vari e his Suv Iesu.

<sup>17</sup>Mak ma, xosxa onemi obit rupol mi Suv tei takes, ma uhur pilei ixoni ngan taxa ovur pilei nou. <sup>18</sup>Xosxa xi tepol ni neta tova tesa minuk, mu pol ni kaon tei delak, inou iaxa nixal rati. <sup>19</sup>!Pus ti mu! Nadis ngan ak ni heok xati: *Inou Pol nixal rat holesok xil xa be kaon na Onesimas.* (E xouk iem nabovorong ni kaon nam ti xa del xat nou, vengan xouk otehur meulien hu texo nou.) <sup>20</sup>Tuxoli hos navan li, ieok bei pupu tangan upol ni naha xa inou di nasisi minuk vengan ralu vus rube moletin na Iesu Kristo. Ngan ak isak ni nou nipolu ni sien.

<sup>21</sup>Melele xa di ladis sepinien navan xil ak, inou nakil kuhi mak xa xouk upol ni ixoni ngan xa di nasisi. !Io! E nakila xa upol ni ili. <sup>22</sup>Nabit nasikus mun ve neta tei: usak mesen vontoen tova e nim mam tangan mei nita en. Vengan nake reitin xa Hi isa huit sisen namim tangan nistal ra nim te xeih ak e nihat nite visal xamim rilomun.

### Sepinien Kor

<sup>23</sup>Epapras xa de nim te xeih del nou ve his Iesu Kristo, xi bit ‘bos makoe’ minuk. <sup>24</sup>E Mak, Aristakas, Dimas e Luk mun xa di mapol vituei, xil mun labit lavit ‘bos makoe’ minuk.

<sup>25</sup>Nasis tangan eheien hos na Suv Iesu iti mi xamim vus.

---

<sup>a</sup> 1:11 Onesimas be slev tei na Filimon. His Onesimas, koute teni be ‘bos te tutouen’. Misak ni, Pol di misep tetoh usil hisen.